

相山集

王之道

文碩閣

wenshuoge.com

目录

关于我们	3
提要	5
卷一	6
卷二	13
卷三	19
卷四	27
卷五	32
卷六	36
卷七	41
卷八	48
卷九	53
卷十	60
卷十一	68
卷十二	75
卷十三	87
卷十四	94
卷十五	103
卷十六	112
卷十七	121
卷十八	127
卷十九	134
卷二十	142
卷二十一	147
卷二十二	152
卷二十三	157
卷二十四	162
卷二十五	168
卷二十六	175
卷二十七	182
卷二十八	185
卷二十九	189
卷三十	192

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部四

提要

相山集三十卷 别集类三【宋】

臣等谨案相山集三十卷宋王之道撰之道字彦猷庐州人宣和六年与兄之义弟之深同登进士第调历阳丞南渡後累官湖南转运判官以朝奉大夫致仕後以其子藺官枢密使追赠太师宋史为藺立传而不及之道故其事蹟不详惟尤袤所撰神道碑尚在永乐大典中可以考见大略之道尝自号相山居士其集即以为名宋史艺文志作二十五卷书録解题作二十六卷宝佑濡须志及濡须续志俱作四十卷尤袤碑文作三十卷彼此乖互不合今原集既亡无可复证然袤碑乃据其子家状所书似当得其实也初金兵南伐庐州盜起之道率乡人据险共保城赖以全干略颇有足称又其登第对策时即极言燕云用兵之非以切直抑置下列及绍兴和议初成之道方通判滁州移吏部侍郎魏劄司諫曾统书力陈辱国非便寻又上疏论之并以前书缴进大忤秦桧意谪监南雄盐税坐是沦废者二十年今原疏虽佚不存而所与劄统二书具在集中其所论九不可和之说慷慨激烈足与胡铨封事相匹气节尤不可及其他论事诸劄子亦多明白晓畅可以见诸施行韵语虽非所长而抒写性情具有真朴之致盖有体有用之言固不徒以文章工拙论矣谨就永乐大典各韵中蒐辑编次仍可得三十卷疑明初纂修诸臣重其为人全部收入故虽偶有脱遗而仍去原数不远欽乾隆四十六年九月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

相山集卷一 宋 王之道 撰

五言古诗

和吕叔恭题和州香林汤【是时趋郡苦淫雨独坐精舍中贾邵周出示和倅吕叔恭诗顿忘逆旅之态辄继其韵】

新诗等絺绣文采照座右尤怜继絶唱峥嵘竞高秀词源眉山长句法杜陵旧相从今老矣岂独歌邂逅香林在何许湔沸发岩窦其流渐清温脉助草木茂岁旱添苗槁一溉十倍收追游记畴昔我仆苦痛疚别来隔兵火荆榛挂猿?温温自然汤蠲痼古非谬我闻泉所发江海远相透其温本硫黄气味自同臭大哉无碍浴天地不轻授严霜与烈日冬夏特异候人生困凌薄往往少中壽飘飘澡雪力狴犴忽蒙宥春寒不喜出块坐拨残燠晦陰又连朔夜雨屡通昼谁能慰穷愁邵州有贤守开篋出大轴令我和其後此意重虚辱勉强忘固陋吕侯卿相家博学靡不究会当似前人嘉猷日告后君看华清宫海淫似招寇当年从千官车马所犇辘渔阳一炬火曾不半钱售争如寄僧房泠泠灑苔甃常遂尘土濯永免脂粉漱

和富公权送行诗韵

公权提刑年兄与之道有四十年雁塔题名之旧备员湖北始得见君子聯王事相从二年所以眷予之意何翅骨肉今之道罢官以归於分携燕饯之余特出长篇宠光行色令人恋恋不能自已辄勉强次韵

叨尘四十年静计所得禄十分才二三清饿似饥鹄中昨守义阳一时苦穷促忽闻栢台长表荐彻聪目不惟免罪戾英游许追逐接武宪漕间寒庖见粱肉从兄逮两载种种荷推轂容我数百 大矣空洞腹为怜昔同升相看日不足芳时木芙蓉唱酬动成轴烧香每开奩惠茗屡倾簏青青閱冬夏高视松栢独顾我如砮砮讵敢比良玉而兄不我鄙步骤俾继躅是行集霰候霜威日增肃解维在朝夕离绪可堪触恋恋重掺袪移庖过吾屋紫囊出巨编还我海陵錄全家被燕衍日尽继以烛何人鱸红鲜想见鰕项缩腹腴愧偏劝佐此一杯綠实筐出越罗帛更加束酒阑儿女曹起舞应歌曲殷勤药石海美疚肯滋毒新诗追古作高义激颓俗临岐沐宠贐固陋敢虚辱但惭水底蛙勉趑丝与竹正尔无足道聊用资报复谦谦古君子厚德卑自牧请歌伐木篇敬谢酬奠速

有荐胡仁叔为历阳令者仁叔以诗送知己暇日杨德润錄以示予因次其韵

四海皆兄弟三界是道場果且无彼我安用分封疆胡公历阳来气焰何可当威严走邸吏不

露太守章锦衣荣会稽暮雨成高唐观望改倂 鷄羣鶴昂昂斯民苦兵火有意哀劳伤岂无
九转丹为助千金方古来记循吏不称苟道将杀弟自取酷防人人所防子潜去少室渊明恋
柴桑出处虽异事一梦归黄梁昔日骨已朽伤哉今也亡?国歌栢舟曹风赋鵩梁秋来河伯喜
未覩若与洋大小自有见一笑还两忘我生分每越泉石成膏肓弃遗等麟角空虚漫龟肠常
欲埋车轮除奸继张纲召此人气和致彼天时康语之有暇矣未窺夫子墻理所不可及马腹
徒鞭长诤知王者师异日韩张良愿言三顾庐卧龙起南阳

和张咏老

三公与刺史秩等二千石人生不知足犇驰竟朝夕谁能话名理尊酒时促席贤愚大相远从
环映丛荻多谢张南巢诗筒肯予觅琅琅若明珠其来自灵壁僧房聊解鞍当暑得偃息挽回
清微风笔有万钧力

彦嘉通守当今之俊伟人也余心向慕之常以未获识君为恨兹因孔纯老遂有邂逅之适其
何幸如此将归纯老置酒饯别仆实预坐酒数行纯老丐诗於彦嘉以记坐上笑谈之乐顷刻
扫数百言挥毫落纸云烟飞动永叔所谓盈前尽珠玑一一难简汰者殆谓是邪索鄙句不敢
以固陋辞辄和北庄二诗奉呈

春寒不肯去谷雨犹袂衣溪流灩池塘远看緑生漪识君恨不早语离我心悲行行欲何往丞
郡金房西顛风送飞雨日日吼东北檐声决江河倾泻不成滴朝来喜新霁晨光透云隙垂杨
翠幄开远岫青盖立孔君公事暇侯子归期逼开樽且精设论文萃清集顾我老无能分甘口
挂壁行矣不可挽思君浩无极

送无为倅张南仲归吉州

吾友李粹老少也游胶庠六年得一第自谓贵且昌衽席不知戒飞黄中道僵三閼大渊献岁
月亦已长嗟嗟死非所至今未能忘忠言类良药苦口不见尝那知兵火余获见同舍郎来丞
濡须郡两岁依余光邂逅偶及此为之泪淋浪高义藉激薄美政称扶伤康沂富邦国何独歌
王祥江城四月尽麦熟梅子黄归欤佐吾君谈笑跻羲皇遥应不可留船头鼓其镗

次韵因上人晚菊简魏定父

荆棘困松栢风雨乱昏晓干戈几时息年来费天讨孤芳如谢安端恐非小草此意谁人知伊
余相自保不学桃与李芬芳竞春时天公岂多情清露为君迟荣悴休问命冷暖当自知青荧
夜窗灯相对哦新诗离索自可笑衰迟谁见怜亭亭摇落中一枝小窗前正色有家法细看清
且妍浮觴未云晚松醪吾所便经年混蒿艾蘊藏应待时清香密渍沉微风助纷披宋玉昧秋
意乃作儿女悲君子有所养因君观解颐道人如青松孤高不成丛爱此黄金花萧然有淳风
新诗皎秋月警我野性慵佳意不在酒此身今醉翁介壽诚有取无问人所宜君看菊花潭事
见桃源诗东坡百世士敢比流俗知相逢勿相失不醉欲何时黄花如故人别久喜复面浇泥

一杯酒安用较深浅清霜开浮云黄落信风卷岩岩幽素姿秋来不多见

监止亭

扬波欲澄浊孰若波暂停止波浊自澄万象无逃形世人竞驰骛方寸不得宁投闲幸一来先生常独醒灯下读魏彦成诸公诗因次其韵呈曾子修诸君

距春尚旬月春信已回柳时来芝与菌往往出粪朽流俗不自重困穷变操守贵贱等人耳未易遽薄厚桃李何敢轻所报必瑶玖一笑置勿论旨有君子酒

见山堂

淮西提干章序臣即其官舍远亭之西为屋数楹命名曰见山堂盖繁昌诸山一举头则隐然见於檐外也

浮云开西风落木下夕阳谁人步东篱采菊哦秋光悠然若有思此意何可量南山适当前翠色摩穹苍我心不期见我眼偶相望咄哉逐兽夫泰山空在旁

西灵鹫

我闻西灵鹫幽奇冠龙舒山神知我来夜雨自涤除篮舁犯罪微敢惮石径纡清风偃林柯征衣尽沾濡樵人向我言君行欲何如松杉已在望尚有七里余崎岖雨过水蹊云上天衢飞楼及涌殿峥嵘映浮屠幽鸟若相喜好音弄笙竽为言一宿觉何妨更踟蹰

憩灵鹫道院

黎明发龙门亭午憩西院冒雨且不辞宁能避泥溅是行良不恶此处殊可恋从今山中人何独识吾面

追和老杜种莴苣诗【并序】

春晚雨过行蔬畦见园夫栽莴苣谓予曰苣有二种其色青而味苦者曰牛耳其色白而味甘者曰银条今方得银条一束於隣翁将栽以作种予顾园畦才十数菰已过韭且老矣惟牛耳青青可爱而园夫以苦鄙之伤时恶直丑正不见容於君子因和老杜种莴苣云

我有数亩园荒秽索锄理干戈何许久生意困屠毁道也其兴与时哉亦甚矣去年失短吕培植乏驱使今年得老杨衰病更临起晚菰已荒没早韭就茅靡菁菁何所有莴苣独牛耳纵苦可自珍供盘况潇洒银条直且甘风味胡伯始其视李太尉小人与君子明明如古监不虑纖尘止廓廓若太清强欲浮云滓老氏有遗训重去彼取此方今向太平臯夔正端委台省登硕

德要荒窜诬毁击寇岂无人蕃将来黑齿破齐在不日逆以诛正己停观劳还役杖杜顒采芑
万邦遇有道贫贱古人耻文王来吕夷汉祖致园绮异时免沟坑愿附织贝筐

种田庵

古人即耒耜自有中田庐看君种田庵名异实则如淅场归去来宫功不容纾

廉余堂

高堂面山水境与动静兼惟动故能乐惟静故能廉乐也知有余廉也笑无赍

次韵魏定文

半年去城府寤寐溪东扉有时得君书想像挾石貌岂知纪渚子养气如养鷄应响与疾视一
洗三旬非我生坐穷困哆侈伤南箕鼯鼠亦何物焉用千钧机封侯綈澣药等手不龟所用
有异耳此言寓非卮梅蕾良可人如椒缀南枝芬芳想不晚太皞方执?

次韵沈次韩见赠

我狂衆所易赖有君见容十年卧岩壑百念付一空新诗似流泉涓涓江汉供人言鷄羣鹤我
目霜中松相距无两舍会见何溟蒙谁能写离索正藉诗思工

次韵许志仁

我技类族庖用刀常月更君才妙天下游刃得我惊前年获相值因忆吴中行一别忽两载依
然旧交情新诗璧夜光厥价轻连城相思不可见把玩我愿盈笔札擅南州文章动西京行矣
秋风高更听宾鸿声

盆池

剡苔得古监湛湛清不浑大哉壶中天勿与俗子言谁能时汲井注兹老瓦盆欲观从容儵无
羨横海鯤

秋晚采菊和徐伯远

少皞司肃杀於渠独留情一枝黄金花照眼增双明香清露溥溥秀色云英英会当饮潭水使
我病骨轻

题德章山郭养源墨竹

曾次富盘错笔端妙苍翠霜枝岂人为烟叶有生意与可骨已朽此法谁复嗣伟哉寻丈姿绰有万尺势

追和东坡雨中睡熟至晚

春睡酣带酒晚食美当肉细观东坡诗万事贵精熟一陰七十日雨意犹未足山云开复合檐溜断还续东隣娇痴儿索饭恣啼哭惊回梦中蝶重把君诗读

会河道中

会河村店西沙水清练练我行独带月淠淠掣金线凝寒逼征衣霜华重如霰至此怀僧弥老泪几欲滋【会河光州境也建炎初家弟尝尉浮光故有是句】

和龚圣任即事

新诗似霜月谛玩清且好欲见势未能思君令人老启蛰在朝夕雷雨发枯槁愿言从杖屨高吟备搜讨

月台

低迷委径柳氛氲被池莲亭前秋雨余明月来婵娟高台登苍玉清风夜周旋举杯属姮娥醉舞还蹁跹

小桥

芳榭遶流水春余半篙绿登临赏幽花兹亦我所欲小桥梁何往长堤正相属朝看龟鱼游晚听鸥鹭浴

次韵朱元顺食萱草羹

衰年因羈旅百念日萦绕蓍龟亦何知忧来又将老出处稍不慎远志成小草堂陰有孤芳纷葩照人好谁将忘忧姿撷芼等苹藻充肠固甚慰入鼎可堪扰糠粃贫者事甚矣兄逐嫂异时膾梁肉记此一羹饱

赠术士罗世忠

春秋有罗国之子岂其後家传锦囊书相地走淮右为问何所宗此法古所授卜瀍与卜宅周孔语非谬用能游公卿所至术辄售有时过吾庐乘间得频扣谈诗涉坡谷说卦本爻繇是名陰阳家未可容易诟归欬春雨霁飞花扑襟袖遥怜玉笥峯岿然插天秀

送无为宰赵涣水仲

百里寄一令於民为最亲休戚咳唾间诂可非其人赵侯古循吏当世无等伦
竭来宰濡须旧政俱更新虽无赫赫名吏戢民称仁善良仰若父奸欺畏如神
幸哉百里地两载销颿呻果膺君相知赞书下枫宸不终三年淹径作帅幕
宾秋风散炎酷夜雨清埃尘寧容卧辙留高檣舣江滨君看眉间黄华近兹其因

映雪亭

萧然数株梅皓与雪相映临池鉴踈影影落大圆镜不烦粉涂株寒光助严靚

题宿云轩

朝来怯秋霜生撇瓮里清我老颜已衰一杯聊发頽村彪恠我醉忽呖三两声
蜀月不可见宿云有新行

酬朱元顺参议

予与元顺分携十有六年当公出守安陆赞画荆南予以踈愚自投闲放声迹久相絶
向者泛江之役获邂逅於湖陰语不终晷而篙师催解舟怅恨无穷今乃得相从於都城之东其何慰如之
蒙示新诗辄用韵书呈因以自警云

舟来自金沙敢避江路绕计程踰五月书劳比三考湖陰见君处取别殊草草因思会面难
相从意弥好新诗何所似绘绣错华藻赓酬愧空疎祗益我心搅亨否有时命恭倨任妻嫂行矣无忘饥俗谚戒一饱

送张仲甫赴江西参议

仲甫参议与予昧平生临安一见倾盖如旧是行将赴江西余窃快之辄成古风奉送行色

我生坐踈拙逢人辄倾倒语言无浅深出口被伊恼为孽匪天作受攻本谁造
惩非每嚼舌事已复自蹈可怜愚不灵蹭蹬到今老识君无几时底里见襟抱
古人重倾盖相从恨不早是行若登仙江山为君好无繇挽画鷁此意增恋嫪
何当寄相思临风慰衰槁

曾钦道家山图

曾判官式古出按邮传来归自濠示予所赋曾倅钦道家山图古风予虽未果识钦道而披其图
然获於式古诗中窥见一斑恨不即命驾以偿愿见之素因漫成二十韵寄钦道尚冀异日游桐庐访子陵之遗迹而谒钦道於家山亲见家山之胜而赋焉
绍兴庚午六月壬申

永叔爱清颖明仲乐阳美投老获所归为计亦良便何如强健时从官山水县升虚得吉卜愧
若地祇荐曾侯卿相种才业固邦彦而况盛德後世祀乃天眷式古吾畏友被命按邮传来归
自濠梁访我出诗卷为言有华宗畴昔无半面相逢遂相喜笑语至舞忬其家负家山山水家
可恋松篁逴森列冈峦互萦转台池及花草高下烂明绚粲然图一幅规橛坐中见予尝赋此
诗好事敢独擅纵横一千字把玩不知倦桐庐在何许东望眼欲眩子陵亦往矣钓濑清练练
家山亘今昔昔隐今始现彼美曾侯贤何当覩岩电

题李梦发摇碧堂

羣仙俯平湖冰壶浸蒲壁瀟沦五千顷岸客一万尺苍松偃旌盖翠竹森劒戟纖尘不可到湛
湛见沙碛诗人嗜好异方寸富泉石堂成欲临赋牋管罗几席偶然对涟漪微风缓摇碧高吟
寓动静真赏废晨夕璇题壮檐楹玉轴走宾客清商入葱蒨积雨洗炎赫翱翔下幽鹭从容出
圆鲫穿荷过独舸傍柳倚轻策此兴复不浅何日当有获君方事闲放佳处勿轻掷明年谷鸣
驹金闺遂通籍

和陈阜卿为汤与立壽次韵

我闻无量壽世作天人师有祷必应感如形影随之吾见盛德士吏隐江之湄岩岩栋梁材为
桷岂所宜守道心自适怡然见双眉何当日千里整顿黄金鞵嗟予拙无用正坐千林姿荷兄
独青眼少雪羣儿欺兰菊虽异芳春秋莫予遗相逢一尊酒驻马聊共持偶观香雾鬣彷彿初
生时愿兄壽无量登庸侍彤墀年年遇今日酌酒共瑶卮

卷二

钦定四库全书

相山集卷二 宋 王之道 撰五言古诗

次韩子云白莲韵

金缕不相称
纨素新裁衣
坐令时世粧
屏迹从招挥
施粉定太白
增分却成肥
须知冰雪肌
秋月扬明辉
来从姑射山
一洗百念非
何烦障青绡
高谈解郎围
亭亭翠盖中
老眼省见稀
摇风自披拂
照水相因依
傍观慎无前
恐犯丞相威
不如太华巅
食藕家翠微

追和元微之春余遣兴示王觉民

物态有荣悴
时令互消长
堕身名利场
鱼鸟在罗网
岂无金屈卮
听此石方响
残花日晴陰
落絮风下上
春事虽已阑
余芳尚堪赏
我有临溪亭
疎楹为君敞
青青小荷钱
雅与水相养
狂吟醉题壁
纵步懒扶杖
仰止李谪仙
笔端走羣象
九原不可作
夜梦见精爽
栖栖亦固矣
君子坦荡荡
相期醉醕醑
偕来衆无鞅

九江解舟顺风追和张文潜

朝来转西风
天巧借吾便
解维湓江口
去若弦上箭
水光漾朝曦
过浪掣惊电
周旋谢神颺
冠坐敢不变
斯须走四驿
俛仰暮二县
谁知久留滞
一旦乃适愿
吾闻信由中
溪毛可羞荐
咄哉和氏璞
底事待三献
亨否自有时
时亨百无谴
雷声在渊默
若讷故大辨
千岩与万壑
左右供几砚
落帆风亦止
璧月熨江练

花洞

浮渡竟何处
欲游未能游
梦寐金谷岩
神往形独留
异哉城市中
芳菲自春秋
长红杂团緑
结成岩穴幽

怡顔堂

人生无百年
半被忧患苦
其间开口笑
一月仅四五
谁能盼庭柯
怡然见眉宇
积财不得用
真是守钱虏

蒸红亭

桃源果何处
溪流出残红
忽然见桃花
灼灼摇春风
蒸成日边霞
高吟思无穷

史佐才读书堂

我闻轮人扁妙解书中义当其听读书默识圣人意忽然释椎凿有问发兹秘虽云圣人语糟粕岂精粹齐侯诘其说无说当致死请以斲轮观固入要非易不徐仍不疾心手在相契是中有数存非言所能既扁也亦何人所得乃至此固知斯道在天下本无二观君榜斯堂令我端拜议想见堂中书填箱溢巾笥纵横三万卷一覽悉能记左右逢其原下笔不能缀我昔摄东城君时尚童穉如闻侍先公往矣江之涘崎岖三十载於此忽相值出示诸公诗圭璧烂庭瑞君家依水竹亭台繚幽邃作堂於其间读书乃其事嗜好与人殊可以见君志明年冠羣英先正秘书字

题王亦顏清心阁

湖光浩无际远与列岫并风澄烟雾开炯若镜面平高人对万变寸田常默耕扰扰亦何为岂容方寸撓有时鉴湖光爱其静而明那知水是物心清物还清徘徊不忍去杰阁指顾成阁成何所喜画栋连朱甍大江西南来羣山东北横江山不待招宛转趋檐楹暇度多暇日登临有余情论文一樽酒对客手自倾酒阑复徜徉观书弄颖泓使人之意消鄙吝何由萌嗟予顽钝姿栖栖亦劳生从今事疏濬永守清心盟

追和韦苏州诗呈周守敦义【并序】

癸亥五月兀坐逆旅中读韦苏州郡斋雨中与诸文士燕集诗玩味兵卫森画戟宴寝凝清香之句不能自已辄用韵书呈敦义知府舍人年兄以丐?削

江城五月雨千里荷花香清风吹葛衣铃斋有余凉日晏吏卒散槐陰扫高堂归来欲偃仰叹息不敢康设醴致佳客论交到相忘高文如大烹未惯染指尝何当侍函文获赋蔓草章君方扶摇抟我独蓬蒿翔生平一壑美未见北海洋愿言承至教虽老当自强

寄题鲁如晦需堂

鲁僖有贤裔家在吴江东宏词与奥学浩渺江无穷魁然栋梁姿久困荆棘中抱能未施邦殆与张籍同人皆盲於心我目昏不蒙而君乃勇退奉祠环堵宫筑圃号通隐花竹罗青红郡山涌其前湖光湛冲瀨日哦松菊间志气骄王公客来醉需堂饮食沾奴童嗟予老且倦齿豁仍头童田芜未能归惭愧通隐翁

题李梦发知足斋

荀卿重无祸老氏贵不辱不辱非暂荣无祸乃长福咄哉名利场甚矣身世桎得侯方丐公怀金未忘玉经营蛾赴火犇走蝇嗜肉方当从後抔宁复念前覆李斯悲黄犬扬雄诮丹毂二者倘胥失万此亦何足是理甚易知允蹈君所独使人之意销岂止我心服不贪子罕宝属厌女

寬腹庶几闻高风将遂变流俗

夏日雨霁郊行次韵刘春卿

皇天久不雨既雨晴亦好食已得从容偕行石城道桑麻光似泼山林净如澡苍苔长綠发嫩竹摇翠葆离离实攢椅??花褪枣风梢水中蒲烟叶湖外草新秧良可喜勃然见兴槁老农竞耘耔出作恨不早谁家列午饷蔬笋杂鲜槁田头立妇子柳下坐翁媪宁能择丰甘放筯等一扫旁观犹快意想见慰倾倒嗟予少力穡自取宦游恼何当赋归来须髮已华皓

次韵陈勉仲登羣山观

十年放江湖亲朋益疎散不知跬步间游览有奇观因君寄新诗心日益凄断东城俯荻洲下有鱼鸟乱想见江南山终日对书案小立筇杖倚兀坐葛巾岸高情渺云外竝议涉唐汉嗟予衰且老儿辈逼婚冠岂复敢言诗观诗重增叹春容来大轴玩味起顽懦穷愁欲谁知富贵当自断探虎愧吕蒙思鲈抗张翰别来能几时鬢髮暗凋换养成杜甫懒甘作元结漫何当遂拂衣疲马解纆绊卜隣大期东攜酒日相看

题龙舒天祚宫玉虹亭

山只不爱宝倾写白玉霰秋阳正炎赫喷薄争清明我疑石韞玉白虹贯岩泓源源自何来万古风雷声

闻蝉和彦时兄

浮光我家尉近处惟高安尝欲为亲择敢作非意干忆昔从东来飞雪凌羈单青春不可挽明月裁齐紈三釜竟何地一囊今屡殫我有醉翁吟试从徽外弹古人骨已朽知音果哉难拳拳抱枝蝉未露先号寒缅想江南山琼梳碧成攢僧牕开南薰俯仰天地寬诗成有佳句往往胜得官

赠笔工柳之庠

我昔丞历阳好笔得柳生维时习治久羣盜方纵横生售数毛穎一一简择精作字可人意为我供笔耕不知二十年天下乃复平尔贫技不售我困功无成布衫负箬笠羸然过柴荆我老废读书无意游管城千钱与斗米聊尔饷此行归家饱妻子一笑嘲彭亨

送彦立兄游太学以恩袍草色动为韵

鼠腊要非玉簾声偶先坝穷通一生事早晚焉足论行行欲何之阔步登金门有意韩淮陰报讎如报恩西风晓飞霜猎猎吹征袍丁宁顾婢语肯效儿女曹举鞭问长安诗海今谁豪我欲

从之游痛饮歌离骚文章我家勃人唤腹为藁随行载中书所至得挥扫新诗如秋月皎皎清更好惠连有佳梦池塘遍春草梅花破朝寒似欲壮行色駸駸小骊驹回首便数驿一鶚在云路鵲鸟空累百从令马宾王不是新丰客君子赠以言古人重相送大梁在何许我心欲飞动兄才如青钱万选仍万中行矣喜冬晴北方地多冻

题璋老清閤轩

予暇日过吉祥爱其竹徘徊不忍去长老璋公方葺小室丐名於予因诵退之笋添南堦竹日日成清閤之语取清閤二字以名之後五年岁在壬申三月既望璋访予索诗不辞为赋此诗

典午接曹氏其风扇浮虚当时波浪从高谈乃其余竹诚松柏流一日不可无子猷为此语千古谁能渝堂堂韩退之议论荀扬徒咏竹美清閤长篇载诸书吉祥在无为隐若西南隅我来过梅雨新竹环精庐风梢弄苍筤日影穿扶疎高标挺直节劲特凌万夫道人谓予言吾方葺吾居公其为吾名要令与实符清閤退之咏是轩良不孤何当对此君搜吟更踟躇

和鲁如晦喜雨

我本山中人当暑玩泉石高吟清风朝长啸明月夕前年徙江城舴艋劣容席是时暑雨过黄流没青荻城中无置锥僦舍至三易还来成小筑风月得相觅执热想飞瀑白练挂苍壁顿从釜甑中令我获苏息尤怜昨夜雨洒濯有余力

假山

幽人爱九华胷臆富岩窦叠石谈笑顷窗间列远岫一拳悦兴云其功等高秀君看负山者盍亦备兹寇

柳径

我笑陶彭泽门栽五株柳柳成复自号清陰亦何有岂如两分行一径入花蘂白韞春尽时青障雨晴後

古松

老松如蛟龙气夺百万军根蟠苍崖石梢拂青天云山神护野火地主诃樵斤魁然栋梁材为之献吾君

白莲池

白莲如玉人高洁谢脂泽圆荷作翠盖掩映秋水碧小亭日相对无言倚轻策

种橘

或言千树橘贵可比封君先生种橘意此计何足云珍絶色香味解醒有余勲

次韵王山甫春日出郊探梅

倚竹有佳人天寒玉肌温永怀经年别及此春日暄幽闲谁与娱依依映丘樊计台二三友才高工拨繁幕府公事退联镳出郊原城南富卉木胜处陈家园东风发萌芽柳眼暗若昏昨宵一阵雨清爽到乾坤植杖芳草径系马枯桑根观梅不忍去错俎罗金樽主人笑揖客徘徊倚朱门指麾羣儿辈薪水相抚存隣妇抹红粧来覩攀篱援酒酣诗思逸笔力华旗搴姜盐芜菁絶胜瓠叶幡萧然出尘姿飘飘欲腾掀桃李分当避蜂蝶那敢喧谁能移将归栽培拥高垣要令百种花俯伏争趋犇不烦频出游正恐嘲短辕太簇初应律飞翼尚翩翩何妨醉瑶舟大嚼供炮燔手捻一枝春吟笑穷曛嗽可怜廊庙具沉滞三家村和羹似不晚作诗与招魂

对雪和子厚弟四首

冻云不成雨巧作白玉霰寒光僭晓色报我东窗明起来拨残灰煖酒手自倾多谢麴居士於人殊有情前村不多地坐觉阻且长梅花应已开鼻观来清香天公爱衰朽古木敲鸣璫僵仆巧耐寒冰柱生承浆青腰夜种玉不见稠与稀将军欲何往滹沱正流澌软火烧黄精我尔宁苦饥行行复行行舌在请勿疑瑶林我家风银色佛世界泠泠一川水淙玉漱寒瀨敲冰往得鱼拨冻自挑菜山居果如此冷暖任交态

和沈元吉与唐用崔乞菊

黄花如幽人别来心念之邂逅适我愿讵可无一辞缅怀东篱游旧与西风期乞我三百株烂醉风前杯休文有佳裔咳唾成新诗把玩乞菊章颇愧前篇非寄言崔蓝田舍之复谁贻

和魏桐城题三瀑泉赠汤洞卿

犇霆响空山飞连挂絶壁毛发忽森竖精神共英特平生丘壑姿至此意颇适何必游九华龙眠自尤物雨雹碎晴峰珠玑泻石壁势增九军勇气压百夫特先生我辈人一见愿自适壮哉三瀑泉表表尘外物

题双峰磨院瀑布

烈日冰雪皎淡烟玉虹明谁云真珠帘要之亦强名我来少踌躇一洗尘埃清便欲觅千斛为压归装轻予绍兴三十二年夏四月三日行部至山中时月上人方入山十有八日旋披荆棘立数椽以居其徒明年改元隆兴夏六月二日再过山而堂室粗备且於云母泉侧创为茅亭使往来观者得以驻足而酌甘诚可嘉也时巴陵尉临川李克仁高密刘孝杰华容尉权三衢

徐二誉在焉子 侍行

去年入山时孟夏暑犹薄来观云母泉陰崖坐盘礴老禅披荆榛经营始兴作山空斤斧响丁丁振林壑俛仰恰周星炎赫若凌薄昨朝发岳阳东风怒还恶惊涛送轻舟十里沙头落投凉不待晓肩輿上硤确僧徒笑相迎此意安可却高亭?白茅羣峰峙青廓偕行二三子临泉一杯酌呼僮?石鼎煮汤旋和药谁令俗士驾急去能不忤因成数句语聊发後來喙

卷三

钦定四库全书

相山集卷三 宋 王之道 撰五言古诗

癸酉閏十二月朔旦入夜雪复作静言岁歉斯人艰食展转不能寐强沃一杯径醉因成此诗

宿雁惊江渚饿彪啸林丘不知雪如许但怪风飏飏起看堂前柳枯梢
戛鸣球安得万家春解我饥寒忧旋支折脚铛移灯视床头发蒙余半饼聊温三四瓯
鸣肠时一沃曲身渐和柔遥应原野间锦衾覆厘甿农夫庾钱罇指日望有秋愿言开同云东郊从春游

再用前韵谢潘壽卿见和二首

小人南郭綦君子东家丘相从濡须坞雪案风飏飏眼界眩兜绵耳根哄鸣球何妨具杯酌一笑
寬百忧不见刘带花逢愁但摇头时来看崔卢姓名覆金瓯我愿霁晨霜栗烈还温柔黄金着高柳
綠浪翻来甿要令扶犁儿力田遂逢秋饱食奚所须鼓腹同天游

新诗清絕俗想见胷中丘飞泉落高峰风声助飏飏又如清庙中河图见天球不惟竦观瞻玩之可忘忧
是行何处来楚尾连吴头一杯聊效芹大似胜茶瓯赓我喜雪章词情和且柔久旱民苦饥重怜来与甿
勃焉来争春富哉甿向秋吾君德无边今与和气游

再用前韵谢张济之见和

我欲访蓬莱长笑挹浮丘此身插两翼冷然御飏飏楼台耸琼瑶草木丛珠球周旋於其间不知尘世忧
愿言久未遂俛仰今白头茅斋夜飞雪碎玉敲风瓯平生铁石肠化作绕指柔年饥百无赢接新待来甿
君才似鵬鸞修翎正横秋冲天在不日入侍岩廊游

四面山午饭澡雪尘土往太湖二首

白沙浥夜雨苍松弄朝日清风满行路駸駸马蹄疾溪声静如漱岚翠浓欲滴我岂山中僧前身饱游历
重门掩松篁杰阁戛霄汉溪流水晶软石栈云母粲清游不可失微劳敢言憚斜阳无相催我欲濯尘汗

次韵徐伯源九日闲居追和渊明

闲居遇重九对酒怀陶生陶生不可见爱此重九名清霜肃时令天宇增高明依依远山色隐隐宾鸿声
泛酒黄金花人言可延龄嗟予不解饮酒到从之倾嫣然木芙蓉摇风倚东荣虽无窈窕歌自足娱吾情
鼓琴复何为年来泯亏成

追和东坡喜雪用王觐韵

长安一夜雪酒价涌朝市何人独耐寒
翛然立庭砌盈盈竹间梅靚粧欲谁媚
冰肌与玉骨似不胜风袂丰年贵三白
麟凤敢称瑞要令舆论协庶遂我心慰
春回在朝夕枯荻动和气尤怜麦盖锦
秀发功必倍忧葵亦何为度日同度岁
不如拥百城陶然六经醉

对雪二首再用前韵

同云昼暗空孤城早休市行人失道路
贺客拥堦砌翻缟语亦工飞絮思争媚
飘飘何所似想见六铢袂盈尺信为大
三白乃成瑞梅花不畏寒点缀若相慰
高吟捻冻须诗社颇增气薰然一杯酒
神速功力倍来麤被余润预可占有岁
便当呼老农泼醅取沉醉

我笑袁司徒闭户雪中市高眠罢炊?
冰榻对瑶砌岂如王孝伯鹤氅鬬清媚
随风杨柳花纵横扑襟袂冬温犯春令
破白已为瑞何妨盈地尺万井共欢慰
草木含余滋山川鬱佳气清寒入诗骨
敢问酒价倍日月同过鸟燔烈又兴岁
老大不足悲吾今但心醉

书怀示周少隐右司

我生动多艰一笑不易得竭来坐逆旅
俯仰空太息吾人当代秀文章擅华国
分攜十四载复此见颜色忽忽未及歛
归程忽云逼愿君因索涂为我指南北
金门与玉堂努力事登陟闲将咫尺书
因风寄相忆

因纳上人寄题望江张氏春晖亭诗

青青原上草初生殆毫芒迺来没蓬蒿
似有三尺强春晖主发生万物资余光
迟迟虽不暴萋萋自能长条风与穀雨
其功固难量予尝优劣之岂得相辈行
大哉发生恩欲报不可偿东野古纯孝
作诗本肝肠怀亲感春晖义见游子章
凯风亦远矣此道何茫茫惟余东野诗
千古遥相望张公雷江人鷄羣鹤昂昂
冰鱼与冬笋志慕孟与王结庐守松楸
至行称淮乡我不识君面因诗得其详

一经堂为王亦顔题

我生非我有天地暂委形谛观子若孙
相值如浮萍崔昭与李兼甚矣愚不灵
积钱遗芸窟转手还星星何如散羸金
人遗以一经韦贤不可作高风看典型
公家世植德兰玉滋芳馨三鱣偶墮砌
伯鱼初过庭明明有圣训言之尔其听
退而学诗礼斋扉昼长扃矻矻对月牖
孜孜守风棖冬映孙子雪夜聚车公萤
有时闻诵诗流泉韵泠泠悬知睟见面
岩电仍双荧行当擢贤科发策惊天廷
致君此其术何独取紫青

苦雨呈蘄守徐次公

涉春苦淫雨连绵过梅夏西来二十日终朝走泥滢林霏欲开户檐溜又淙夜势如黄河翻声若沧海泻颓垣就崩摧败屋遂倾卸垂成麦伤潦将老蚕病柘那知困羈旅正恐害耕稼痛哉兵火余人物久凋谢疮痍索抚养嵬琐烦教化方推中牟恭复获颍川霸是行良不恶渐美同瞰蔗况承双鱼书敢缓千里驾平生慕山水寻胜每偷暇何妨见君子大厌顾荣炙一举欣两得重趼轻百舍登临兴何穷吟咏乐无价猿鹤互酬对云烟竞邀迓岩松升龙矫溪桥断虹跨尚恨阻丰隆未果访姑射须烦段文昌一出补天罅

告春亭诗为江寧令荀晋仲作

渊明晋高士从官非所好当时令彭泽为米聊寄傲公田三百亩一稔足炊?明年春二月农以仲春告为言当举趾西畴雨如膏雨後春日迟不寒亦不暴欣欣木争荣民析肯居隩感此万物时吾年迫衰耗余生复几许遑遑近颠倒翩然赋归去岂为折腰躁兄也今渊明强盛当远到学问穷古始文章配盘诰十年宰两邑五月政三报去冬得兄书怜我加慰劳仁言暖於帛失喜至舞蹈其间何所云作亭县之奥为农榜告春此意在劝导我欲求子诗并以示倪耄春作苟尽力秋成可无祷先当起疲瘵次用振凋耗别来忽九载触绪增恋嫪塞命敢不勉一笑一杯犒

次韵同年蔡仲平察院游西湖

朝日不受雾晴光似晖晖忽然快我心清风为解围坐见九里松旌幢碧相依天竺了在望上有祥云微西湖一千顷圆荷覆青衣轻舟竞游览往往俗客稀幸及新雨霁欣逢露初曦水光与山色高低映郊畿佳哉气葱鬱观阙何巍巍谁云门庭远咫尺永天威诸公萃俊杰高论玉麈挥载酒旨且多不醉无庸归余欢到献酢灑灑双驾飞新诗烂锦段想见劳心机顾我虽百拙续貂重相违明年若重来种种当如几

和秦壽之喜雨

云峰拥棱层不动若顽石追凉困无所何当日云夕挥箠汗如流欲卧莫安席云头从北来微风动?荻滂沱一尺雨旱魃惊辟易巾屨获暂御尊酒容复覓谁怜贫长卿空洞家四壁熬熬炉炭中万物同一息明朝槁苗兴农亩歌帝力

秋日访程元明喜雨而作

去年夏六月我来自临安滂沱一夜雨原隰俱弥漫俛仰忽再秋秋旱畎浚乾嘉谷槁垂尽万口空长叹我从相山来朝云起漓岏油然遍寰宇半道濡征鞍亭午至君家檐声落惊湍诘旦视大田青青已堪看会见百室盈陋巷饱一簞何独解君忧我心其少寬裘芳富卉木秋炎苦摧残柯叶顿欣荣秀色良可餐速宜置尊酒一洗儒生酸我虽不解饮醒狂佐君欢

和天宁因上人韵送僧用懿住桐城金绳山

老松如蛟龙秋来露鳞甲雷霆昨夜雨奋迅以时发道人粲可流出世雨相法至今狮子吼狐兔尚惊惶金绳小金山突兀一峰拔桐城旧知音相招遗书札世情强轻重祖道无广狭天宁有佳句钟磬鬬铿戛嗟予丘壑姿晚岁麋鹿狎属和良不工前诗万钧压

送延上人归云峰

去年出山时飞雪正撩乱殷懃大洪老呵笔写真赞为言化菩萨持鉢江北岸欲将说禅相醒彼瞌睡汉别来能几日沕灭冰且泮似闻妙湛师接踵还旧观公归勿惆怅生死同夜旦幸有囊中金了此一重案

送遵禅者

阿遵我辈人相从十年旧行肥形愈瘠身贫道常富厥初为天衣持鉢化淮右袖携维卫录访我过蓬陋若言法华山有象金所就其来自西土隐现不可究我时尝记之尔耳亦聊复谁令慈悲师镂板播踈谬向来天衣游追随遍岩窦高谈屡絶倒寝食废宵昼归欤又同舟半道过濠壽是行寄先茔一再获邂逅清霜殒羣木凄劲捣衣候翩然不我留云山挺高秀

次韵慧上人见寄

别来六改岁想遍江南山江南二百州云水相往还秦望冠吴越嵯峨俯尘寰法华在其侧参差拥高鬟幽花自芬芳好鸟时緡蛮传闻发梦寐登览忘劬艰去年谒老聪默坐焚金颜忽然狮子吼顿觉醒冥顽子今从之游旧习须夷删人人自有分既悟不我怪请看钓鱼翁满船载鲂鰈

用东坡三峡桥韵赠源上人

解衣振林霏欹枕听檐溜饥肠欲雷鸣病耳忽牛鬬自嗟兵火余十载困淮右崎岖穷水石邂逅遍岩窦山游杂麋鹿野处狎猿 那知膏粱肥但觉蔬笋瘦宝林吾北邻晨夕钟鼓奏疎篁玉森列樛木弓半彀来为圣人祝歌呗发清昼归余雨脚稀溪流静如漱

和韦苏州游灵岩山寺韵呈言上人

我老懒成癖贪此林泉幽谁令吴中来两月乘江流阖门十日雨不得历虎丘读子灵岩诗还复令我愁想见韦左司拥骑当年游山中雨新霁绿树鸣莺稠乘兴自不恶金风飒清秋

游白云山海会寺

龙舒富山水白云又其角七峰互回环仰见天一握古木森建幢苍藤大张幄初疑翠黛扫颇类青玉琢飞泉何处来其势自天落春撞吼雷霆激射纷雪雹田家承下流伐石竞耕凿摇风

麦初齐泛水秧尚弱恍若桃花源误入不容却况有古道場碧瓦照丹牖楼台鎖烟霞松杉聚猿鹤我来孟夏初征衫汗如濯行行不知劳梯云上青廓入门寂无人幽鸟自相乐登堂赵州出此意亦不恶徐徐叩其端善巧万金药销除爱欲恼澡浣尘土浊山神似相留入夜雨还作明朝出山去欲去更盘礴何当赋归来寄傲酬素约

题三祖山

观山不惮远有癖老增剧是行迫王事所过飞鸟疾路傍四五祖不得着脚历朝来所干集我愿容自适冲寒走海会啸吟遂终日眷言三祖山经从阻良覲僧果知我意饭仆济行色崎岖五十里入山及未炅山头残雪在青瑶点微白殷勤承老禅倾盖同莫逆为言住此山予宝始今日欲以扶我衰不鄙昔轻策扪萝助探讨蹑石共登陟羣峰耸遥翠一水涨深碧行行何所喜两脚有余力归来饱香积清淡更过昔

五祖山

我生事幽讨尘埃良独难竭来舒蕲游登临每长叹如何胜絶境佛屋多所安大哉慈悲力神功助剷削住处未易言小道亦可观五祖古名刹楼台倚漓岏崎岖六七里萦纡三百盘悬崖擢青土夹道罗苍官飞泉响环玦幽芳馥沉檀我来及新霁千峰碧玉攢忽闻杞犬吠旋觉壶天寛水声擢午暑岚气生晚寒心目快开豁腰脚嗟蹒跚看云更揩筇披风少凭栏欲营五亩宫它年寄衰残试烦问祖师莫作非意干

赠浮屠有则

我老不能诗其穷类诗人多谢二三子强以穷相亲师从何方来过听误失真袖携诸公诗巧我踵後尘顾我虽不能欲辞恐师嗔勉作数句偈拙恶惭无伦

题澄上人颐庵

我生困语言老大犹栖迟咄哉一言失虽悔何能追常欲说向人到口还忸怩不如静中坐此理吾所知春风入城郭古寺花开时广庭积雨过红紫初纷披偶逢颐庵人强丐颐庵诗是庵清而虚底事名为颐南陵有徐子顷尝吏於斯作字妙羲献学易深坎离慎言与节饮卦象不可欺君看命名意往往只在兹

追和游谢氏山亭赠贤上人

春旱久不雨既雨风日清桑麻被膏润往往争欣荣花鸟发诗思湖山欢野情驾言南亩游遂有西塔行云光鬱在望地僻路亦生贤公方外交别来莺再鸣相逢话畴昔茗碗喜屡倾多谢二三子壶浆竞邀迎

黄梅东禅寺

南晋今黄梅东禅旧青莲曹溪竟何许龙朔知几年我闻二祖师属袂兹徧?片言道有契千古衣相传栽松与舂磴为此一大缘朝追固若迫夜度亦大遄迤来五百载兵火数变迁惟余坠腰石绳窞徒空穿堂堂吴生画笔法世所贤绢素虽朽蠹丹青尚依然嗟予二三子平生慕真詮来游获瞻仰投老当周旋独恨走俗状明朝又加鞭临池更徘徊圆荷泛漪涟

题智果寺

吕侯妙章句珠玉走隣境想当落笔时豪迈不淹顷智果古精舍松篁转冈岭幽人所盘礴俗客作远屏春云忽解剥林日光炯炯门迎有高僧乌用赋渴井开緘读数过令我发深省老来习懒放万事废不整犹怜闲中趣日月颇增永何当遂浮家百口具舴艋不见六一翁梦寐在清潁人生会如意岁晚果得请

菩提院

菩提古精舍兵余但茅茨我行勸午暑少憩容奴炊山僧老无子养蚕如养儿奈何煮白蠶迺欲缫青丝燕泥固可恶覆巢似非宜不闻两足尊顶鹄安无隳我亦学佛者言之为兴悲作诗书壁间以为浮屠规

黄顿琅玕山永福院

我从明光来十里得永福山中何所有离离见疎竹前人目琅玕用意良不俗谁能对此君蔬饭贱粱肉

成相院

山前罗万松邀我行数里不知幽人居但爱乱峰峙新晴翠似泼乍热汗如洗幸获听潺湲何妨濯清泚

吊魏敏功赠住庵通老

一别异生死三年能几时埋玉不可见拱木徒兴悲通老奉香火坐閱岁月移圆颅点飞霜夷旷真吾师

和因老游水寨府治东轩二首

市井从东州水竹自西府我来与公偕盘礴日欹午从容河底鱼乐哉得其所此意与谁论相看默无语买山荷叠钱照天水开府幽花有余香谁复为贾午胜句须斯人清游更何所临深

未能还我欲作危语

题崇因院信上人宿云轩

秋声入高梧暝色上疎竹南山拢青螺过已净如沐悠然孤飞云窈窕转林麓自疑归去晚意欲窗下宿道人等虚空去来断追逐云来不吾拒云去不吾速相从一息顷便觉静缘熟何以照我心老蟾挂枯木

宿彰教寺

过市欲投宿秒隘非所安人言五里余有寺洁且寬驱弩犯泥淖敢憚风雨寒稻塍与兔迢萦纡度千盘衣裘被沾湿脚膝加蹒跚因思圣人语後获当先难壮哉古道場翬飞映层峦秀色藹松桧清香馥芝兰我心大有得岂惟厌游观行行勿踌躇霁日升云端

赠六安文殊亮老

予是行按蓼馆於文殊获与亮老欵坐上邂逅会胜菴公请谈三夕而二师苦於病恼皆有高举远引之兴故作是诗勉之丁丑夏四月辛亥

我从东蓼来水竹遂幽讨崎岖至於六获见文殊老文殊方外友僧门素称宝平生首肯处可嗣布禅皓寤寐思棒喝邂逅得倾倒何妨萃高人坐上识吾菴会胜索枝撑得师恨不早勉为云山留未可止中道

赠僧辨端

南僧如竹?在处即成林虽去常人发不异常人心邈哉端上人所得趣向深云泉香火里日夕长苦吟为我有时名踏雪来相寻相寻缘底事论诗复鸣琴我是折腰吏衣带尘土侵何以谢吾师恨无虞师金

送尚老之江西

豫章翠岩因老以书来招前无为报恩尚老於其行也作诗送之

道人野鹤姿昂昂在鷄羣谁能恋场粟俯仰劳骸筋飘然欲何之注目西山云西山甲南昌雄胜天下闻翠岩为之冠有客许见分旋酌秀溪月煮茗特劝君寄言翠岩老吾将谢纷纭尚有鼻端垚须烦为挥斤

赠浮屠勤上人

澧勤道人吾畏友也作别十二年为国清持鉢来归过敝庐见其坐禅穷昼夜至废寝食叹其不可跂及故作是讚

隔宿不问道此语幼所闻汨没尘土中岁晚方得君学道戒怠惰成功在精勤勤哉勤道者取名不徒云别来十二秋东游遍温鄞持呪动至暮坐禅常达昕寸陰古所惜君今惜余分兢兢穷昼夜直欲忘斋薰轩昂冲天鹤那容混鷄羣我老懒成癖见君但欢欣茅斋无一物坐对栢子焚忽然舍我去翩若风中云

龙门呈心老

千山倚天高一径穿云斜忽然见楼阁知是佛子家苍松老不死夭矫如龙蛇霜皮自鳞皴风梢互槎牙幽花似舊卜清絕不可加过庭送好音异哉碧鴿伽我来不忍去一步三咨嗟终当解冠裳从师卧烟霞

国清化人示寒山

师从天台来示我一集诗开编未及读涕泪已交颐纷纷世间人迷妄觉者谁浮沉苦海中欲出无端涯寒山与拾得旁观为兴悲作诗三百篇劝戒仍嘲嗤觉此未觉者当下成牟尼此意亦良厚奈何人罕知师持国清鉢欲救云堂饥贈言亦安用聊以报所贻

奉送果上人住开先寺

我昔游成均年少心犹童倒床即甘寝寧问达与穷精爽忽飞越梦到庐山中庐山最佳处二林占西东开先在其间泉石清而雄分明我所记古刹磨碑丰长衔似持节觉来梦还空俛仰殆三絕踉蹌老更癯贵贱等梦尔觉梦一理同持节何足道得时可三公说梦乃梦语笑杀懒散翁翁今往开先凭何警盲聋将此一转语截断双石罅源源自何来其去何所终

次韵因老见贈

扁舟历阳来访君得少息登堂默无语见者称目击去年糝江上羣盜罗劒戟君时濡须游入山笑相揖肩担祖师禅问答挥即栗岂惟警聋聵亦足慰岑寂春容褪丹青雨意铺水墨定将悦赴感澄霁自端的麦秋数日间饥肠颇贪得兵余敝庐尽何独空四壁维摩幸无恙胡避有新室白云本无心能归定能出岵然三杰峰况是旧相识我有半仙丹和剂等菖术为言山中人蟠桃已成实

<集部,别集类,南宋建炎至德佑,相山集>

卷四

钦定四库全书

相山集卷四 宋 王之道 撰七言古诗

信阳和同官喜雨韵

欲识农夫田作苦久雨祷晴晴雨祷晴得雨雨得晴此患到今传自古苾芬非是萧兰馨
诚心一发通三灵文昌俗吏亦何者乃能致雨兴雷霆尔来旱气熾熾热夜望天涯电光掣原田
嘉谷半焦黄何独枯鱼濡涸辙忽然一雨洗瘴昏珠玉无边难价论坐令愁叹变欢拚千岩万
壑江流奔从今不厌商羊舞十日一犁均下土漏邦寒俭酒味醺且磴新茶其分乳庭前花草
还青葱想见黍稌纷芄芄吾君早晚复疆宇屡丰将见迫元丰天人大抵常相即人若必天天
可必愿修人事格天心天若不从非所恤泰亨自复先朋来时通端不忧尘埃新诗要非所宜
辱敢以木李酬琼瑰六年无蓄号不足菜色定应缘半菽要令汭暴似海岳岂但河沙论秉斛
炎天赫日当流金去国多年思转深只今淮北望霓切须烦伊傅资商霖

次韵子厚弟喜雨行赠赵守端质

我生畏暑如畏焚奈此岁旱风尘昏十年废放卧岩壑名虽八品身黎元恒阳乞雨雨乞霁雨
转为淫阳转炽不知此理果何如每讶天心异人意去年避地还家园蒿莱满目高侵天秋阳
肆虐冬益甚涉春陂泽皆平川还来焦稿遍区宇黄金融液胶流弩赵侯日为疲瘵忧应怪鲁
书三不雨天人大抵常相资顾我碌碌伤无奇鬻浆苦凉屠苦热敢望屏翳从招麾圣主东巡
羣后覲万里江淮方水运折冲御侮赖亲贤何独为霖福斯郡精诚昭格吾谁欺顷间祷雨人
所知忽然檐溜泻河汉数声霹雳轰相随公堂六月清无暑旋磴龙团试分乳官曹相贺复何
言且戒农夫筑场圃小人托庇安村墟获同野老歌而呼愿公玉带悬金鱼奉报得雨禾生稔
霏霏不厌沾衣裾稍晴欲自躬犁鋤斯民食足吾其俱何妨把酒仍观书

酬潘县尉【县尉远遗佳篇獎与过当而其中见及亡友钱子全王尧明二公皆俊人非碌碌者不幸相继死矣埋玉树於土中使人情不能已辄用韵书谢】

尧明文采灿星宿子全道义高金玉伤哉二子不可见墓上悲风号拱木逢君论友话偶及令
我吞声为渠哭因渠感君不我鄙远寄锦囊诗一轴有如贝阙罗珠玑东攫西拏厌吾欲又如
康衢走骐驎朝越暮燕惟尔逐匹夫获罪坐怀璧谁使夜光冲郤屋仲尼知本故称水请看悬
崖泻飞瀑我从二子方弱冠俛仰三终同转毂壮年登第今已老碌碌无奇堪齿录羨君节操
似松筠雪里高标仍絶俗已将义命等穷途肯为身名强荣辱高情慷慨怜衰晚妙句纵横丐
膏馥开缄反复读数过骨竦毛森头觳觫施隆报蔑君勿谓明月轻投得鱼目人生遇合会有
日行矣鸣驺入空谷變调元化坐庙堂长使斯民歌鼓腹

赠淮西运干徐伯远

伯远得印於予里人杨德润其文曰东海开国杨自其先侍讲与南昌潘延之游印盖延之所遗而故常侍徐公旧物也从潘入杨凡六十年至是复归徐氏亦异事也为作诗以纪之云

嗟予偃伏淮南村十年不践公侯门谁令金印入魂梦平章六字承君恩左手人头右手印此理未可轻易论丈夫盖棺事始定擒戎会使来称藩争如徐子擅骚雅笔力豪纵今文园杨君收印六十载细观制作同新翻为言常侍故家物其先得自南昌潘珠还合浦有时节余庆未艾鍾仍昆子今得之类摘鹄此贐重可轻璵璠便当準拟佩三印并与文安遗子孙

和王觉民梅花诗

觉民寄示梅花诗有强拙者属和之意予衰也岂能与诸公争豪取其填塞章句可也

梅花似是东君客漏泄春风犯寒坼冰肌玉骨照双泉应为孤根借泉脉先生狂得次公醒诗思藹藹飘晴云为怜老拙有旧分俾预胜赏沾清芬我时被酒酒初透香扑鼻端曾一嗅别来飞雪往未能想见精神愈高瘦西湖处士真诗仙东坡老人所推先岂知此花自奇絶神助妙语相争妍浪言投李报琼玖牛後何如作鷄口我今无物报投琼木李虽轻聊藉手先生标致良可人此诗不减花娉婷相当欹枕初得句夜兴冠坐如惊霆愿君追作淮夷雅换取公卿重文价嗟予衰矣不复论但欲高门容驷马

沈汤辅隐轩诗

小隐山林大朝市夫子命轩良有意仕途捷径固无取泉石膏肓亦犹次不知朝隐谁得之我恐曼倩为近似公卿百执各有职岂容妄隐但充位古人禄仕所不免意在全身近於智庄周梅福此其流吏隐之名可无愧沈君有弟今休文咳唾成章数千字耻从举子事进取逸韵高情寓吟醉乃兄宦达方强仕翠竹停鸾想风致君侯才业伯仲间退以求名名亦遂方今尧舜理四海岩穴弹冠求自试朝廷既治羣吏肃何处堪为隐者地不如市隐最得策大胜山林自憔悴花源缭绕转红緑竹洞深沉入幽邃我闻此风颇健羨图成未可日月冀他时傥作江西游兄曰能来访予季

大梁食李有感呈彦时兄

葵花已过荷花繁南风入户清而温担头有李初入眼令人引脰怀家园三年为客在两处李熟未果登清樽翻思整冠诚可乐何苦鑽核辄不存急宜买冰致凝凜全胜汲井供潺湲小床方簟嚼春雪一实自可轻璵璠扁舟行逐东南犇回首稻粱江上村相欢孰若弟与昆古来唱和须箴损

用子藺韵赋九日小酌

春日归来忽重九潦旱相仍岁无有庭前岩桂独青青此意於人亦良厚欲酬佳节 一醉会有白衣来送酒须臾穀核第罗列无蟹犹空把螯手坐来灵雨洒珠玑洗出湖山竞高秀三公在望无百里咫尺银屏拥其後【三公银屏盖无为南北山也】长篇落纸箭离筈大白浮醪檐注溜细看黄菊与红茱想像年时还话旧登高何必须人扶我有筇杖颇坚瘦明朝写出醉中语牵帅不知谁唱首

春晚书怀

十年萍梗三到吴走俗未暇观西湖是行信步至湖上水光山色开天壶游人杂遝半罗绮一径不憚穿云紆归来神思顿清发诗中写出钱塘图张侯妙语何所似青玉为案黄金铺要当聯轡事幽讨邂逅得句相招呼东坡已死不可作因君对景还嗟吁水僊配食竟莫举但见旧隐环菰蒲山间有寺过三百终期徧走参能儒还家儿辈若问我庶免不知空嗷嗷

和刘春卿夏日闵旱次韵

何人夜作秋虫号吟诗坐对山月高想当龙门夺锦袍从臣拱手看挥毫衡茅咫尺临江臯浮光灏灏翻金涛满帆何处乘风艘千山过眼同犇逃不防鱣鲤兼炰羔酒酣起舞如飞猱醉中往往笑成咷一时辈流籍湜翱嗟予蹇剥意鬱陶七年坐困山林牢迺来天旱地不毛釜鱼薪蚁何嗷嗷谁能读诗夜焚膏只益心蓬增日蒿丈人纯白羞桔槔终日抱瓮忘其劳今春属国纷旗旄两淮供亿争鸣镝干戈载戢弓其弢此行辅弼环萧曹藁街伫见悬酋豪买牛卖剑犒卖刀我虽不饮当漱醪堆盘况有瑶池桃鹿鸣会赋嘉宾敖予衰尚可追风骚过集湖德济庙用赵尉廉留题韵示周钦夫程彦游

秋阳泛泛流清晖帆腹不张旗脚垂灵祠轮奂湖之麋水天一色成玻璃西轩爽垲高不危凭栏下瞰羣山卑鬼神亮我心无欺风涛纵险夫何疑区区犇走劳驱驰和光未免世俗随相逢一笑聊伸眉明朝掺袂还东之萧曹有节未见奇往往樵牧相鄙夷吾生倾否会有时穷愁过眼无足悲

次韵张文伯喜雨

新诗句句堪流传令人读之神凜然孟君已死不可见如公笔力今无前天生百谷养万姓暄润稍阙功难全江城秋旱望一溉斯民穷极伊谁怜滂沱忽澍三尺雨稿苗厌厌薰縣縣不知何以遽得此有贤太守方承宣焚香默祷辞未絕精诚已格高高天油云垂布若可揽沾濡车盖初言旋西成指日多黍稌颂歌未负赓丰年豚蹄孟酒谢神祝鼓腹一笑非予偏

和董令升喜雨用前韵

夜听檐声翻急雨想见膏润均率土先生休戚共斯民忧在愆焚非憚暑人情类被饥所移我尔相忘自甘苦宁从祷旱身暴日肯对驱蝗歌侑俎用心何独追老杜大庇寒儒欢广宇要令

匹夫被惠泽上致吾君尧舜数嗟予粪朽伏邱壑尺短寸长无足取洵蒙珠玉过称扬丈夫殆以气相许

次韵毕少董游西湖

西湖春晚未全热湖上山光互明灭往来冠盖竞骈阗断续笙箫共伊咽我怜湖山山见怜波间涌出佳人钿太真一去不复返圆荷万点胭脂钱船头美眄珠的皪不必洞房深处覓忽然相值更相呼嫩蓝衫子山争碧肠断骚人一轴诗细看烟柳想腰肢明年我亦西湖去迟日光风二月时

西湖游次韵赵见烛

山镇在越泽在吴东南形势凭江湖不知弱水竟何处恍若员峤连方壶海门潮至飞雪涌天竺雨过遥青纡十年不见看愈好正复妙笔那能图苍松摇风翠盖偃芳草藉地柔茵铺僧舍朝游恣登览酒楼夕醉争歌呼竭来俛仰春又晓对花无语空长吁作诗既非拙者事强欲写书编泽蒲伟哉得志佐明主进退百辟称鸿儒应怜伺候犇走辈终日趑趄仍嗷嗷

天宝歌和魏定公文次韵

连昌宫中马为乐一时舞马黄金络君王养欲臣养文忠鯁漫多宁救药嗷嗷万国风中船檣倾桅坏夫何言潼关莫拒范阳贼伤哉天廡空连钱翠华西去遥指蜀应念霓裳旧家曲六军敢怒谁敢呵马足空污太真肉始皇布漆徒坚城元海斩木徒轻兵驱鱼驱雀强鸛獭乃使後世蒙佳声乱离每忆昇平日忽对新诗重嗟泣望仙花草自春秋悵悵六龙归未得

和江和仲司理喜雨

天怜轍鲋嘘残湿震奋雷霆起幽蛰清风入夜送雨来大慰焦枯望霓急新诗如雨雨未休相对自可忘为忧东臯秋稔想多秫预期剧饮无论筹老蟾宿毕君知否欲烦更问东家丘我今已具西归舟会见扶桑升赤虬鹿泉居士王觉民颇有杜子美不彻之恼和东坡忆梅韵箴其膏肓

鹿泉居士身若槁不惯看花梦颠倒桐庐有客燕新昏妄托娇痴重伊恼冻云垂地雪欲落断雁叫羣天尚早一枝何处寄春来便觉寒窗自华好琼瑶万里眼界净咫尺前村莫轻扫留将青女伴孤芳长向茅斋照衰老先生才思老不进寤寐池塘见春草对花酌酒祝东君烦把穷通问苍昊

次韵胡德辉松轩时乞兵戍淮

伐蛟生得须髯苍隐然为屋分三梁广寒恍若东西厢清风入座衣披猖萧萧终日声奏篁一

洗郑卫无伊凉嗟予顽钝铁石肠时危命蹇甘皇皇江城正苦夏烈日淮甸已惧秋飞霜綠尊翠杓且径醉喜与夫子参翱翔平生邱壑老增剧梦想朝露珠玊香何时元戎北渡森旗章料敌制胜一一尽所长鷄羣野鹤看昂昂

大柿行

丙辰夏秋虽足雨百谷与蔬果皆凋耗不丰惟柿特大异常岁昔所未见夫大柿大事也其为国家之祥乎其扫清强敌迎还两宫之兆乎?豫臬麟盖不足道也作大柿行以歌之

君不见郑?学书晚弥笃岁收柿叶贮三屋兴来寝食两俱忘但觉毛公老而秃又不见梓人造车度羣木木中无火柿所独旧言盖軫象乾坤须信斡旋归一轴美哉此果有常德结实何曾问荒熟霜余万颗缀寒林下视黄柑类奴仆牛心取象庶彷彿熨斗得名何浼渎火乾既许暖关膈冰冷当知解烦燠今年夏秋足时雨尽道和气鍾百谷西成仅得十之五亦见阴阳有盈缩就中朱实繁且大照野煌煌骇人目较之常岁远不侔正似?胜难趑趄国家运厄困强敌一纪於兹事弓韉空庭喋血在今年我已不疑何更卜禾和鞋谐古云?大柿之祥天下福请赓继伐献吾君王者功成四方服

秋日苦雨和子厚弟韵

烟鬱湿薪费挑拨可堪余沥溅如泼吹霞弄日语纵工正恐诗人类迂濶屋角萧萧霜叶鸣夜静乱我糟床声诗成欲写辄复已邻鸡犯早催天明

赠曾桑中弹琴

春寒沍连冬春雪深数尺千门拥琼瑰跬步燕越隔朝来有情意淡日透云隙殷勤贵公子访我跨龙脊登堂笑不休为言督诗责君尝许我诗俛仰岁三易至今犹未偿无乃言遂食我老苦健志百不记六七公子诚有意何吝话畴昔昔也君过我我方事琴历尝为阳春弄次第长短侧君乎鍾子期此举不轻掷闻之思茫然彷彿见擘趲我有朱丝弦尘埃久侵蚀试烦一再鼓助我毛穎力公子不我拒抱琴枕双膝须臾扣商弦当春变秋律凉风着草木离离尽成实我贫人不知陋巷家四壁何幸空乏中登此黍与稷但恐时令乖疮痍至生疾公子其反是叩角夹鍾激不然总四弦命宫以调适坐令景风与庆云为福为祥遍方国

卷五

钦定四库全书

相山集卷五 宋 王之道 撰七言古诗

送赵仲达

仲达比在蕲州教授彦逢弟处训犹子 去年来赴运属徐季功之请朝夕与儿辈蕞蕞相讨论老拙间得奉谈麈今当东还来索鄙句穷愁无好语勉强塞其请成古诗十四韵奉送且简莫德裕

人生邂逅非偶耳一面岂容轻愠喜白首如新倾盖欢谁解乘闲究斯理君家江南我江北南北相望殆千里惠宠顾我端有由衰滞不应能致此为言前岁在金沙幽讨穷探徧山水论文获与阿逢游臄馥残膏丐犹子是行来赴徐卿召昨日扁舟方戾止阿逢闻是公僧弥予乃阿逢门下士知公闲放今杜门所舍与公殊密迕何妨旦夕侍杖屨执经仍与诸郎齿过从弹指见周星入室芝兰被蕝蕝须知四海皆兄弟高义似君谁可比徐卿报政趣归朝画鷁高檣舣江涘明朝车骑遂东还有便时时遗双鲤

赠李廷吉知县

庆源王公所至视吏民如家人安人安乐之东坡先生有诗云青衫半作霜叶枯视民如儿吏如奴吏民莫作长官看我是识字耕田夫盖为庆源作也李无为与予昧平生方到官之初境内大旱曾不三日而雨远迩沾足予固疑其有以致之已而访之民间尽能言其拊循矜恤之政咸以为当世未见其比者故因求之古人得王庆源于东坡诗中辄次其韵奉寄庶几异时以备史官之采择云绍兴壬子

李侯入境怜焦枯指麾屏翳如家奴坐令大旱变霖雨一时凋瘵歌岩夫我思东坡不可见夜讽新诗还捻须庆源老人骨已朽爱民似子当今无稻田上下水声接农家準拟相携壶南邻败屋欹欲倒君来往人争扶流离复合燕相贺向人竞欲嘲解襦吏民莫恠吾面瘠耄倪艰食方饥癯政声不必家置喙自然和气成欢呼何当相聚饮一斗高吟大笑临邛垆

次韵秦寿之雷江阻风

君之是行亦不恶到处名山得佳作江神好事欲援例横起狂风卷帆脚要求诗句须少驻故戏舟师令暂泊雷江正在淮南岸万顷黄芦映青廓不知眼界濶多少但见炊烟耿墟落归心浩浩孰撩动归梦忡忡予忖度怒涛底事强留滞清夜无眠屡惊愕溯游初冀日千里今比驱车反成错人生离合自有数谁谓江神能见谖新诗入笔走骅骝犇逸絶尘那可却何妨有酒发妙思坐对陶泓自斟酌韵严语险属和难顾我才慙子非虐

晓解糝潭追和张文潜白沙阻风

江上惊风夜穿屋扁舟正舣沙头宿灯寒屡剔短檠青酒暖孤斟老盆绿更阑艇子催人起泥汊而今趁朝市披衣踉蹌出马门凌波逐浪来江豚鸣橹呕哑溅飞雨静听依稀似人语月城百里指顾中只好张帆使风去

和李似矩马图歌次韵

画工妙处称毛羽我欲论功第先兔不知心手会天机象管纷纷谁比数寥寥千载一曹霸墨妙于今传二马龚生重马轻尺璧蔑视韩韦复何者尔来一顾遇孙阳奔走侯门日无暇一匹腾骧一匹嘶先生爱骏非爱奇有如霓裳第三叠按图知拍逢王维新诗迈絶今老杜作经未必多马蹄先生驰骋金马里口角雌黄即公是欲知早晚定登庸步武风云起平地伟哉骅骝世英物一日早行三万里

应资深康乐园四咏

溪头柳色春无际溪水浮天一张纸东君戏草康乐园旋入夭桃与繁李乱花无数不知名往往倚槛窥前楹有时酒恶吐欲死先生来约花间行

露梢戛戛敲鸣玉云叶差差传新绿亭前十顷碧琉璃过雨荷花净如浴客来不迎君莫嗔我有清风如故人先生午醉睡正熟长须倒尽床头春

不知眼界几多濶隐隐青山在天末湖光酿就琥珀浓应助先生恣浇泼西风摇落黄花秋江城有蟹供拍浮人如渊明亦不恶肯使临赋成悠悠

谁人独钓江南雪雪满江南鸟飞絶先生对雪望江南嗅认梅花忍寒折痴云卷尽清月流小舟横卧南池头子猷乘兴欲何往归欤莫为伊人留

华亭风月堂避暑

予自无为来获与赵应之市舶亲友相从於海上而吴伯和司理素昧平生一见蒙倾盖暇日三人避暑风月堂邂逅王寿茂主簿并锺干二公碁酒终晷乐可知也辄成古风以丐抚掌一笑

大哉天休何穹窿惟王配天居域中东西南北乃四裔盛德可使车书同吾皇中兴继商武小雅不复歌车攻年来幽障灭烽燧梯航万里来夷戎华亭濒海古岩邑商民填委百货通雕题交趾在何许但见巨舰浮苍龙国家怀远固有道缓征薄税垂无穷名官市舶司置长往往所任多名公洪侯才望在人右暂此出使良忡忡使台雄胜压湖水飞桥百尺如垂虹作堂枕水傍风月想见浩气盘高空我来五月过淫雨炎云烈日方熯熯登临不独眼界豁一洗烦暑清

心曾偕行相遇二三子吴赵与我并王锺高谈亹亹到莫逆围碁把酒还从容轻风拂拂动襟袖明月炯炯窥帘栊湖光十顷碧上下身世况在玻璃宫何人倚槛正横笛数声裂石开云峯忽然琵琶又继作磬此百榼谁能供夜阑归去不成寝卧听湖外鸣丰隆

次韵因老胡避游

新诗滚滚江流东一泻万里谁能穷平生清峭不近俗雪山突兀江头峯相逢一笑莫相避自古高人苦难致涪翁骨冷唤不醒且向新诗求笔势君於涪翁真後身有同次律前身僧语言直下见理窟何须辛苦从张凭对君令我思秋菊三月褒山如一宿君看玉局感秋吟叹息流光岂予独

送管养正长歌

钱别宜有酒我无一杯漱君口送行当以赆我无一物藉我手与君意气真相知君尝谓予可言诗独有诗句堪送别欲赋复止空嗟咨送君胡为三叹息文酒从今失三益干戈日寻雅道衰吾徒一别真可惜问君四海无家归飘然此去将何之答云南阳善城守屡以孤垒攘重围我今欲往诚有以主帅好贤同邑里輜车悦许载病翁长策犹能靖多垒骐驎君看伏枥姿髮虽种种心不衰胷中之奇老未吐忍死山谷甘寒饥君不见元龙豪气真磊落卧见许生自旁若时危康济乃丈夫问舍求田匪余乐又不见越石夜半闻鸡鸣披衣起舞贺友生风尘湏洞四海乱英雄攘臂收功名古人相期盖如此岂效世间儿女子出门惘惘色可怜君亦为之殊可鄙壮君此语胆忽张羣忧散尽增激昂西风猎猎天落霜千山凋林松桧苍寒菊始花黄且香高空无云老鵬翔登山临水秋兴长行人欲行送者伤我独不复伤知君壮志殊未央为君援笔写长句一洗古今离别肠

冬不雪春苦雨外台为民心恻檄郡请祷於法轮应感尊者悉获灵贶曾不终日教授有诗以发扬盛美郡人相山居士闻而悦之勉次其韵

谁令一日如三秋仁人方念淮南州斯民忍饥望麴麦积雨又有伤残忧冬温土燥生春瘴半夜风声来枕上晓看飞雪欲堆檐白马参差攢玉嶂【白马山名】年饥高下艺麦多暴如山阜沔如河那知雪欲苦淫潦两岐半吐翻随波欣闻万事一言了使者勤民坐待晓指麾郡将率官僚出郭共迎罗汉祷由来天意每因人况自至诚宜感神明朝披雾走乌轡晴光杲杲清无尘回头菽粟贱如水醉饱田间摩腹觜周行四海不齎粮可但携壶饷邻里出游遂继文昌謠追锋行赴公车招快将刘晏干排手袞衣入相裨唐尧广文才气迈燕许分教芹宫从少驻政德稳步玉笋班好尾輶轩上天去

次韵孙兴宗秋怀

秋山赫赫明丹枫秋天隐隐分玄鸿不知眼界濶多少九华突兀撑晴空嗟予老病百事懒谁能强勉追儿童读书既苦齿多豁属文益觉心如蓬年来衰甚更齟齬乘舟卖面皆遭风茫茫

有类堕云海踌躇四顾迷西东感君赋秋肯寄我开缄反覆歌三终如痿忽起盲忽视角力未易分雌雄寒乡冰雪正凝沍暖回爱日何烘烘惊涛巨浸浩无际安流利涉输艤艚毕门圭窠仅容膝规模敢拟阿房宫生平未惯新斧凿斲削便许从共工伟哉欧梅两黄鹄逃名诗酒俱称翁余生顾後八十载贤愚虽异襟期同知君尚友取前哲言之聊复输丹衷何为规规事骚雅乃欲索我章句中春容大轴烂锦绣令人一覩情融融清新妩丽似鲍谢岂徒奥学称淹通人能平地覆一簣不辍会致邱山崇披云俛仰三百日相逢底事常忽忽去年江上识君处凿冰初见阳冲冲分携不觉秋又晚向来早气方蕴隆君如镇西我淝水我往无事还何功而君被檄试多士考核曲尽权衡公作诗恶用求好语好语正自添诗穷有时嗣响姑趣韵兹意只欲安微躬争如闭门絶庆吊着书远继吾家充静言培塿亦何罪不跼正坐睎衡嵩茅斋雨过风露肃青灯夜讽赓秋虫更阑耿耿不成寐卧听江城鸣画筒上元後漕幕同僚二十八人会饮於西湖登千佛阁运干赵渔樵希圣以坡诗七言絶句分韵得陌字

福星台畔依红客厌踏红尘穿紫陌涌金门外泛兰舟两岸融融春水拍隔浦笙歌寄幽思向阳花柳饶春色六桥突兀披丹青千佛森罗眩金碧登临肯作怀古愁志在云台书竹帛须臾饮散晚风号却扫阴霾生桂魄含山令尹章邦基即其所居剡山得石嵌空乃作堂於其上而目之曰玉璧窟求诗诸公予不识邦基而与其侄无为簿济之游济之索诗故为赋之

我闻美玉地所秘出为世用自有时譬犹景星与庆云千载往往一见之君家玉璧岂无说剡山得石夸瑰奇岂惟苍翠实相似温润清越璠璵姿细看高广类墙壁以璧名之故其宜剡劂不已石无尽此窟未易窥藩篱作堂正在佳绝处下视海岳如城池钱塘雪浪涌澎湃天竺烟岫纷参差君于其间日成趣长篇短句挥蛟螭乃知地灵不爱宝要令景物求新诗顾我与君无半面牵帅阿咸难固辞沾哉沾哉吾与玉它年相见期相知

卷六

钦定四库全书

相山集卷六 宋 王之道 撰七言古诗

送神童胡元弼元英从其父胡庭俊归秋浦

西湖清丽春雨余子今欲去其焉如九华插天远在望三月不见愁容舒二儿犇逸汗血驹
视长离与鸕雏去年冒雪来其俱一鸣上国惊羣儒书不负人人负书公卿岂应终犁锄
惠然过我骑甚都萧萧晚吹飘襟裾借问能留旬月无吾亦理棹其归夫为言与君不同涂
葛峯松竹鸣笙竽奇童小友良不诬异哉老蚌生双珠君之是行亦荣欤三胡盛事喧州闾

和王觉民松轩诗

苍髯緑髮三四椽茅斋高下轻且轩清风入夜可人意来与夫子调朱弦连日秋阴荡残暑
抖擞烦襟欲轻举简编灯火置勿论且快蛟龙得云雨

追和东坡郭熙秋山示王觉民

平生最爱烟水闲不知岁月磨江山干戈七载厌犇走清霜夜入飞蓬间我家山水擅平远
未向郭熙见秋晚惊鸿断处抹微云野水尽头横翠巘林塘緑净明拒霜似与枫叶骄
秋阳东坡山谷妙言语珠玉倍增山水光乱离记得承平日政出多门事如髮伤心北
猗归何时园苑荒凉万年石

次韵袁望回见赠兼简杨德润

长堤十里荷花雨隐约尘头南去路故人恋恋不能忘又遣长须寄新语锦囊玉轴纒
朱丝开缄恍觉云烟飞青山未许松柏老緑野会致牛羊肥嗟予衰滞烦髻相十年
相对江湖上苦吟猛省爆鸭脚剧论旋惊烂熊掌分携令我重回首日月漂流易成
久因风频寄数行书母蹈从前作诗瘦比邻先生倦不出德齿俱尊时第一何妨杖
屨日过逢白酒黄鷄醉秋色

按麦行和魏定父韵

号啼莫怪妻儿疎麦秋恰了偿官租嘘嚔湿沫鱼在陆伤时令我思唐虞平生学
易有何说大要丰财贵知节相扶相吊来流亡问言豆叶何时黄远哉天道所不
晓人比前年孰多少

清江引用苏养直韵示王觉民

荷叶亭亭绿满塘秋炎深得盖鸳鸯晚来江上西风急收拾莲红付拒霜万山摇落见森樾翠影萧萧冷梳髮请君无作宋玉悲来赋江楼望明月

清江曲追和鲁直韵

鬓边残雪几春秋自说生来不解忧晚食得鱼吹荻火秋盘寻笋舣松舟布裙斗酒不须恶明月清风且相乐紫宸朝去醉眠时初日寒林正摇落

追和苏养直饭牛歌

时来富贵非所忧公卿何必皆黑头力田孰若逢有秋异哉甯戚亲饭牛商歌未绝惊齐侯遂从仲父盟葵丘勲业无闻死不休磻溪有叟垂直钩

次韵陶监丞茂安见赠

三年重见须川湄舍舟东去何驱驰王事靡盬莫遑息人生所贵心相知经从往返两过我一言意厚何多为向来江夏倾盖日翕然誉望推麟仪才猷伏火丹九转用之功效堪扶衰重阳初过雨新霁乾坤六合方平夷边城残寇何足灭庙堂胜算那容窥相逢问我出世法嗟我茅塞同荒陂因君扣击发深省沉迷可笑羣昏随我闻摩诘老居士後身楼至今王维忽然惠顾有缘契恍若宿雾青天披愿君为我取妙善此界示现无边慈

和成都张通叔韵简范伟明

高楼半天夸奕奕一室萧然再经昔君今盘礴知几时邂逅相逢俱是客襟怀磊落我辈人倾盖便觉情相亲欲知富贵未乾没岷山锦水鍾精神范侯国学同舍友闻与吾人最亲厚别来不寄一行书有便何妨为予取

赠蓑衣道人

蓑衣道人七年凡两见於西湖之上是行谓予会当晚达且遇异人则予心之所庶几而不敢必者道人丐予数语故兹及之咄哉彼以妄言之我以妄听之识者能无诮乎已卯三月二十五日

七年两见西湖滨似向贱贫求贵人安民扶世在豪杰贵人何必皆岩莘嗟予坎壈今老矣餬口相煎未能已愿君莫作贵人看岁晚庶几长不死

寄白香岩县丞

香山誉望不可攀香山之後传香岩香岩碑碣耸人目香岩秀气超尘凡香岩之风清可掬终

日哦松适幽独媿我无能老杜门何时一笑披青云

题魏吉老若水轩

世情孔甘似醇酒沾沾未必应心口覆手为雨翻手云余耳安能保长久魏侯风味真可人汪汪万顷江湖春相从卯岁今白髮坐对小轩聊欠伸

和沈次韩王觉民韵

二公才致同清壮顾我无能但薪向只今连璧复有谁伯仲未可轻第行小人老矣病且衰目光近在牛背上何当策蹇拟高谈岁晚寒云连雪障

教授顏端行出示所和老杜曲江章因次韵

浮云卷尽秋天高月光照水翻金涛临溪酌月羞溪毛举杯未饮欲谁酬兹非沈谢须刘曹

清夜无眠想千古一字茫然堕沙莽贤否纷纷固难数楼头漏声寂不闻策策寒窗叶鸣雨

富贵从今信在天君看黍稌多秋田金风玉宇秋无边白屋青云朝暮耳正如农父须逢年

定慧院海棠追和东坡呈虞季然陈德夫

春来何处无花木偶向招提见君独一枝着雨湿红粧便觉羣芳自尘俗嚶嚶幽鸟竞迁乔皎皎繁驹聊在谷人生富贵会有日莫以青云轻白屋固应遗策暂驻马况复过屠宜得肉无心杜老吟不到半醉杨妃睡难足态浓意远谁得似空想当年丽人淑嗟予坎壈世所鄙正坐甲壬无背腹少甘糠老葵藿自笑清癯类霜竹看花把酒发浩叹反复新诗三过目仇池老人已仙去千载东坡与西蜀思之展转不可见夜梦乘风跨黄鹄朱唇翠袖妙今古我欲宫商歌作曲翻愁刻鹄难复工唐突西施却成触

次韵寄荀晋仲简陈夫子

二老亭亭双属玉交映霜余半溪绿才高一世妙言语落笔珠玑烂盈掬时来钓叟为三公傅岩莘野谁雌雄纷纷俗态任冷暖风云早晚腾蛟龙中兴复见宣和盛须信人心协天命真从僵仆正邦基更向膏肓起民病尺书寄我三长篇管中窥豹非其全墨渝纸敝未释手晴窗飞尽沉香烟嗟予留滞濡须坞梦寐斯文属燕许何当单骑造斋榻遂使高轩出城府春风回首归萌芽又促畦丁种早瓜我心倾写会有日为言已办浮江槎

再用奴字韵寄李廷吉

廷吉行县过敝庐出其里人项君佳句属予俾和将以寄项君予虽不识君面观其词意字画必修谨乐善之君子也勉赋一章卒简项君为异时相见抚掌一笑云

霜余菊暗荷叶枯千头喜见君家奴离离丹实照绿叶不减五松官大夫迺来万木冻欲死东君信到梅花须一枝亚竹斜照水便觉清香无处无李君江南我江北正如员峤邻方壶操修迴与世俗异政事赖有神明扶文书甚简民甚喜老吏往往寒无襦项侯秀发西楚後作诗语带山仙癯愿因徐辟见孟子折简未敢先招呼异时鼎社遂酣畅会使王衍悲黄垆

酬秦寿之见赠三首

人言韩孟才相高欲将诗骨迫诗涛可怜寒谷瘦不毛青蒿倚松亦浪语遂令後世称同曹

谁能胷次浇今古老去蓬茅杂榛莽朴遯已甘无足数品题忽及乃君余顿觉焦枯得时雨

静中真乐全吾天勿轻舍已芸人田甜均食蜜无中边浊醪麤饭自不恶那能问命推行年

江天暮雪

冻云垂地风栗冽万里江天暮飞雪九华何处正嶙峋琼树瑶林鬬明洁扁舟突兀依寒芦朝来残酒犹半壶夜寒独酌不成醉卧听宿鴈鸣相呼

潇湘夜雨

短篷暮舫湘江宿坐见江豚起还伏忽然气作浪山来一夜雨声如决渎凄凄寒气欲相侵灯火青荧更向深床头有酒且径醉免使万虑萦吾心

洞庭秋月

扁舟夜泊蒹葭侧湖外云间见明月月光摇水掣金蛇坐想骚人赋秋色举杯向天属姮娥君当照坐吾当歌全胜送客九江上荻花枫叶如渠何

渔村落照

寒芦万顷迷西东夕阳上下江天红炊烟几处袅轻碧知是渔家收钓筒老翁长须更广颡路逢百钱挂藜杖三杯酒罢月已高短棹扁舟还独往

平沙鴈落

雨余湖水吞遥空前山宿雾开溟蒙坐看鴈阵落沙觜欲下复起摩苍穹寒芦飞花秋色老乱

扑客衣纷不扫肃肃惊风忽破行却似张芝作颠草

和笑庵送面

深堂杰阁松风鸣黄梅已过双溪晴不知城市乃有此六月表里冰壶清我来蒙师炷香鼎旋汲溪泉为煎茗明朝又送不托材大慰枯肠怯龙饼

赠坚上人

坚上人以竹斋居士所赠岷峨图诗来求鄙句为赋之继其韵也

岷峨何处在目前恍惚万里惟心田道人遐想对缣素毫端亹亹生云烟不烦扪参更历井坐见紫翠摩苍天崔嵬絶顶明积雪崎岖幽涧萦流泉当时神禹导江处随山刊木知何年竹斋言语妙天下山情水思何緜緜想当落笔快挥扫精神如到岷峨巅师诚乞诗我丐画不然无用徒相煎

寄古上人若之用东坡径山韵

寄语山中好看客待与诸郎醉秋色诸郎作诗学东坡笔力駸駸清到骨由来习气相薰蒸千古勾吴张季鹰鲈鱼斫鱠饮入夜哦诗坐对风窻灯好向少陵賸客至樽酒盘飧正相似请师净扫壁上尘準拟临时醉题字

送道觉游天童山

小雨新晴接重九猎猎西风振衰柳二禅过我欲东游为说偕行得良友天童老人笑垂手应问师来欲何取相逢莫作一日留袖取鄞江过淮右

四祖山

黄梅西去一舍许犇走龙天瞻四祖师今何往昔何来占断金沙长作主须知至道本不灭岂独高名固非取偶传衣鉢继三世遂配云中诏千古寺藏岩腹蟠地轴塔据峯巅立天柱棱层石栈斜瓮玉缭绕溪流缓萦组月明飞瀑百虹挂风撼长松万蛟舞路通涧谷横略约树霭烟霞团缕数清阴扫径初入夏苍藓封庭新过雨留连归客获联辔邂逅主僧还接武请观异事花五叶愿结胜缘香一缕何人为作锦鷄梦此意他年铭肺腑

卷七

钦定四库全书

相山集卷七 宋 王之道 撰五言律诗

和荀晋仲题法隆韵

去来何所喜一雨应澄清憔悴有生理叹嗟成颂声酒垆从客醉村睡问农耕深得诹询意谁能继此行

和沈进可检法秋夜饮客待月

欲雨云容合濒江水气浮笑谈初入夜灯火适逢秋巧借三豪便还成一醉谋投琼酬木李祗使老夫羞

冬夜对月怀彦逢弟

荒庭寒有月穷巷静无声坐想积年别遥同今夕明蹉跎前进士憔悴老书生短棹归来好边城久偃兵

和沈次韩历阳归来见寄

腊近梅争白冬温柳渐黄强吟诗思澁幽步野情长别去嗟何濶归来肯遽忘开缄得佳句和气溢寒乡

和魏定父

十里南溪路思君一望间黄花秋色老红叶露?殷似说亲朋集遥知杖屨闲徘徊松径晚踏破紫苔斑和子蘧官牌夹口韵是日闻官军破?贼

滞留嗟是役艰险笑吾生此去和风顺朝来?贼平湖山争喜气鴈鹜送欢声千里前塘路应知客念轻

和刘与可二首

老来无柰懒春至不胜情万石嗟遗迹双鱼谢寄声压花朝雨重酺酒夜泉鸣细把君诗读冰壶表里清野塘春草遍芳树老藤纒远信占黄耳清游任白颠山光晴抹黛湖气暖腾烟我有边韶癖何妨昼日眠

和历阳李簿见寄

短鬓纷垂白衰颜悴带黄多寒冬更甚少睡夜能长旧学长荒废新知感爱忘何时一樽酒谈咏带江乡

和因格非见寄二首

青山如我约终日对柴门学道未忘念怀君空断魂时来当有用事往置无论反覆新诗读谁知老眼昏兀坐时看屋闲居昼掩门吴吟聊遣兴楚些欲招魂否泰宜周易行藏付鲁论不须伤老大眠食度朝昏

和程德远二首

寓问发函旧论交倾盖新几年瞻翰墨今日侍光尘御侮烦骁将扶颠倚大臣相逢更可恨对酒漉陶巾未尽通宵话犹如一日秋壮怀天共远归意雨同留灯烬何明灭蛩声静应酬十年为客梦应不负瀛洲

追和老杜江上

独坐日将夕凄凄风雨秋寒灯照孤屋欹榻拥裘身世槐安国功名蜃化楼归欤老居士踪迹继浮休

和彦时兄赠王广济

往矣古循吏贤哉今长民牛羊归落日桑柘殿余春共学知名久相逢见面新疮痍赖休养犹喜见斯人和王觉民简褒山因上人枣岭魏欣然二首

七行才业在寧久困无津秋到搏风翼春迴纵壑鳞褒山方竞秀枣岭益争新珍重二三子诗骚追古人君来踰半月未果一尊同湖水寒应碧山梨雨自红何时过北牖今日转西风相去无他地孤城杖屨中酬陈勉仲勉仲寄示诸公所和黄字韵诗轴且责其归重念匹夫怀璧之罪不敢靳因复和其韵反之

失梳蓬鬓结欠洗垢衣黄我欲齐荣辱谁能较短长贱贫犹不去富贵慎无忘岂敢贪怀璧春秋戒越乡

和秦壽之题蕲春驿浸月轩

千山初过雨万籁不鸣风宝监沉寒水水轮上太空竹梢低蘸碧枫叶冷浮红终欲金沙去经营一亩宫

吴兴舟中有作

大泽知何处扁舟快此行
绮罗纷胜赏歌吹溢欢声
菱葑春还合波涛暮自平
临风一披拂谁识未归情

遣兴【长沙漕治】

步履随儿辈临池得凭栏
久陰东虹断小满北风寒
点水荷三叠依墙竹数竿
乍晴何所喜云际远山攢

和龚圣任冬日即事

老怯繁霜劲闲怜爱日温
御寒朝强酒防寇夜撑门
采荠篱根地观梅郭外春
余生何所托归命大慈尊

和秦壽之题黄州郡楼

西北张霞绮东南漾月波
登临筇作马吟咏笔翻河
思与苍霞远情同白水多
新诗清且丽标致压陰何

和子遠春江用老杜韵

欲去未成去朔风鸣怒涛
片帆洲外举列岫雾中高
竹屋雨沾被纸窗寒透袍
遥应望归艇向夕走儿曹

送彦逢弟赴西兴盐塲

闻道西兴去全家共小舟
别离江北岸怀抱海东头
闪闪风帆远滔滔雪浪浮
苕溪在何许应为故人留

送安丰判官江叔夜用菊花韵

冬温行色好江上菊花黄
乡味蓴羹美皇恩诰墨香
招延从北海吟咏继东阳
别後如相忆时应问草堂

秋日喜雨题周材老壁

大旱弥千里羣心迫望霓
檐声闻夜溜山气见朝隄
处暑余三日高原满一犁
我来何所喜焦槁免无泥

立春和孙子绍二首

老穷推不去湖海又逢春
懒复论三甲空惊荐五辛
柳梢寒已动萱草暖还新
我亦寰中物因君试问津
南浦初开冻东郊未去寒
芳华归草木生意入门阑
绿蚁供瑶瓮青丝送玉盘
新诗妙当世赋答敢辞难

题许公寨驿

畏景还迎日追凉偶遡风
泉声山上下松影路西东
远览心犹壮清吟语自工
雨多何所喜郡国庆年丰

和鲁如晦春日过定远山口

雨足塍塍水春晴处处花
畏涂双只堠荒戍两三家
心折朝鸣鹿魂惊暮集鸦
想君行役苦愁蹙不成嗟

丹阳湖阻风二首

水濶风还怒舟轻浪更颠
云容初过雨湖势欲吞天
沙觜青枫外鱼罾白鸟边
夕阳应到岸沉醉酒家眠
老去心犹壮诗成喜欲颠
时危思报主穷极待呼天
归梦先湖外离情到酒边
晚来风更恶舟卧不成眠

和潘泽之沈元吉泛舟湖上

散骑真前辈休文即当家
泛舟成丽句散绮见余霞
惊去沙鸥没招来酒旆斜
春归何处覓篱角见金沙

赠严彦醇

一别三年久重来两鬓苍
瘦筇扶蹇步新茗搅枯肠
得句情还适逢人话颇长
湖山元不改丧乱我心伤

中秋

静院三更雨楼台一点风
新诗愁恨里故国梦魂中
节物它乡异交情我辈同
眼前多怪事咄咄强书空
出户喜折屐江天来翠岑
看云忘久立待月动微吟
关塞重回首简编劳系心
琴中有山水应解遇知音

题北庄用陈勉仲韵

幽亭临水竹云是使君庄秋霁来观稼春融赋采桑纳凉供芡实载酒摘莲房坐得牧民术也应如牧羊

用陈阜卿劝农韵呈宣城太守

何处催耕早宣城刺史先旗麾明晓市耒耜徧晴川道路欢声接樽罍丽景鲜似闻携百榼分饷及高年欲知人意喜万户鬱炉烟纱幘花垂额金卮酒到莲岁丰端可卜农劝竞相传往矣南阳政今追召父贤

烧火用陈西麓韵

烧火驱寒去衔杯待暖回家书万金值怀抱一时开腊雪犹栖树风光已着梅相过随处好未怪损梅苔

题黄梅驿舍壁间

石润占梅雨山寒应麦秋清风鸣翠筱疎雨湿红榴古驿苔封砌荒城柳映楼高吟一瓿茗聊为故人留

太湖呈邵公晋沈元吉

半月江湖上晚来方得风挂帆谁共快到岸偶相逢可是过从旧都缘臭味同长亭一樽茗亲厚意何穷

秋夜对月

青廓经新雨扶疎桂影秋夜凉山色静风细水光浮坐久因忘寐诗成得散愁愿言乘此兴同赋庾公楼

春日无为道中

旱甚山光暗风颠日色微桑芽蠢翅小荻笋彘肩肥野寺看题壁村垆问典衣春容良不恶杨柳正依依归自合肥于四顶山絶湖呈孙仁叔抑之

達岸三时顷瞻山四顶賒乔林知马尾乱石见鼉牙水脚浮青靛湖唇滉白沙渔人收辘网归去日西斜

呈蔡元德二首

别来闲计日一日似三秋顾我无能老逢君始欲愁诗情今转胜交契久还稠学问神龟似当年继践猷一叶黄梅雨潺潺过麦秋昏沉浑似醉憔悴不禁愁渠溢门庭淖园荒草树稠乍晴酬絶唱何幸对风猷

蒙城早行

残月千家闭荒城万窍号举头华盖近回睇启明高野迴霜迎面风清冷透袍十年河上路从此步金鳌

固陵道中

道路榛菅合装齎咫尺迷陟冈还见塔下阪忽逢溪迴野鸣朝麋踈茨撼午鷄固陵何处是弛担日应西

广济道中

晓日挂林麓秋风入涧阿野禽飞自语田父笑相过村疃仓箱富山蹊芋栗多一鞭聊策蹇驰上小罗坡

沙窝道中

十里沙窝路晴云向暮开褰裳九过水驻马一观梅岁晚松篁茂山寒虎豹哀不因王事迫谁肯此间来

舟过三丫河

摇落蒹葭浦荒凉鴈鹭村吴柑迎齿冷鲁酒着颜温水澁风还逆天寒日自曷不堪归思乱鸟鹊闹黄昏

过白羊市

小市环农亩长桥接佛宫扁舟帆影日幽鸟柳陰风沙觜浅深水树梢红白茸乍闻秋粢贱吾亦庆年丰

立春示儿二首

雪尽适沾雨腊穷初得春上冰鱼意乐出谷鸟声新便觉风光好何忧活计贫一樽聊共醉?率见吾真朝来何所喜人唱玉楼春酒着心还壮诗成思转新土衡寧久困曲逆岂长贫千载风云会欣逢圣主真

追和李义山赋菊二首

嫩萼犹封绿繁英已醉黄雨余三径晚秋到一枝香滴滴盈朝露晖晖映夕阳何妨浮玉笋共
醉木兰堂团团青盖小拂拂御袍黄翠叶凌霜秀繁英浥露香浮觞追北牖饮水记南阳采采
东篱下行歌对草堂

和沈次韩秋日雨後督子厚报

江槛连朝雨山斋昨夜凉不知新稻熟深怪晚炊香得句君应喜闻风我漫狂绣溪行乐处云
水几千章

卷八

钦定四库全书

相山集卷八 宋 王之道 撰五言律诗

秋日即事三首

晚来何所喜急雨洗新秋幸遂登高赋应容遇胜留藕花明远近鸥鸟任沉浮不用挥纨扇何妨醉玉舟今日知何日西风正得秋天心方祚汉人物合师留才略烦威敌声名赖镇浮不妨临赋乐泛泛有杨舟俛仰黄花集澄清九月秋预愁新任迫难为故人留风去山光合江迴水气浮何当脱羁绊同办五湖舟

雪晴三首

雪压千山净云披万里晴木冰争霁色檐雨碎寒声静映吟牕冷轻浮茗椀清最宜今夜月来借短檠明湖山开宿霭院落快新晴滉漾溶银色潺湲过雨声味增茶品胜光夺月华清放出东墙角梅花数点明气暄寒日晓光照远山晴邹谷有春意袁门闻履声映书何自苦炙背不妨清邂逅逢诗将高吟眼倍明

和余时中元夕二首

今夕知何夕熙熙万室春歌楼醒醉客灯市往来人劝酒行杯促联诗得句新铜壶休见迫欢笑正相亲罗绮行歌夜杯盘坐笑春舞衫催急管步障拥佳人灯火珠星粲楼台璧月新传柑良可乐黼座玉音亲

次韵鲁如晦七夕

今夕知何夕相逢莫漫愁凉飈开北牖新月挂西楼重惜经年别贪延数刻秋明朝河汉隔西向望牵牛

秋日郊行

断桥临野水疎屋见人家嫩绿几畦菜深黄三径花断云行自逐征鴈望还赊好访韩湘去山林养白鸦

闲眠二首

乍暖经行久新凉出浴初酒酣春昼永食饱午钟余我懒喜聊复君闲应乐胥年来苦犇走此

味竟何如秋怀一事无暑尽昼凉初竹户静长闭藜牀安有余逍遥化蝴蝶容易入华胥天上多官府神仙恐不如

闲居

五斗不尔竞一区聊自营闲看探花信静坐听松声约客酒初熟访僧诗漫成有时过闾里往往竞邀迎

独步

饱余惟欲睡散睡步东园雨足富莲子年丰多稻孙崎岖穷竹径诘曲遍花源何必冠童辈偕来笑语喧

逍遥堂二首

独坐虚堂寂烟销瓦博山出游鱼自乐飞倦鸟知还花气清风远槐陰白昼闲逍遥入诗思落笔笑谈间娜婀风前竹空蒙雨外山孤云心共远短艇兴俱还酒有双莲胜诗无一字闲因君成怅想时到梦魂间

饱食

予亦属厌耳女寬何叹三一簞悦知足八珍自忘贪驼峯擅西北瑶柱夸东南但愿无是馁藜羹非我慚

放船和子遠韵

冬温寒日好岁晚早梅开帆脚随风转江流与岸迴坐怜青嶂远静见白鸥来水驿三千里斯游亦壮哉

追和东坡倦夜一首

风阁开还闭龕灯暗复明竹间听露滴庭际看云行皎月千门静微风一座清只今廷诤者谁复继元成

和子遠泛江送客用老杜韵

北风还入夜波怒未能平江气云烟重山光水墨轻荧荧渔火乱惨惨暮寒生咫尺淮鄉路淹留系此情

久客和子遠用老杜韵

舟解风还顺江神亦世情滯留三月过攀送一帆轻行止关吾道穷通任此生梅梢春已动冰雪漫纵横历阳倅蒙庵郑公卒於位记岁在丁丑与仆有交承之契方来自镇西而?亦自安丰往邂逅於合肥驿中获为三日之欸所谈无非周易太玄老庄之书开警蒙昧多矣公平生学佛行一着端的不昧所谓毫髮无遗恨者仆老矣请从其後而为浄土之游似不晚也作是诗以吊之

我倅安丰日君来自历阳交承分彼此邂逅及行藏精义通玄易微言妙老庄刹那今十稔叹仰未能忘东晋陶元亮西京董仲舒高风敦薄俗妙论见遗书水石伤新?松篁惨旧庐楞伽今在否此道发明初【楞伽達磨以授二祖东坡谓读者或不能句而公尝注是经想见公於此有得云恨未之见】

哭韩积中二首

命矣穷张籍归哉病长卿焦湖家自远畏日我同行想像分携处依稀警欬声仙踪向西路回首泪纵横多能倾相府高义着房州脱略通侯贵追随逐客游敢论当世比曾向古人求悃悃今楼护黄泉已再秋

哀陈夫子

不见陈夫子依稀四载余云亡前日信报葬几时书玉轴千篇在牙籤万卷储九原应有恨新第落成初去矣君何速闻之我重悲席尘埋古鼎书蠹入新诗鸿鴈嗟安仰粉榆痛莫追木瓜慚未报临纸涕涟洏

哀汤与立父

薄俗久不竞丘园多逸民闻君轻去世令我重沾巾一梦苕溪晓千年石塔春人情不能已南望哭江滨一门今七世谁复似君家盛事追公艺高风暎伯华板輿方就养玉树遽兴嗟叔子今何在魂应到马牙尚记宣和末贤科擢阿戎义方传輶下士誉走江东贺厦心虽切披云意自忡思君想眉目悲咽对西风

哀徐朝义恭人潘氏

爱子心惟壹宜家语不烦雨添南涧藻风偃北堂萱鬱鬱今同穴诜诜正满门善哉摩顶记归奉大慈尊城见三千岁人终八十春从夫安乐近拜佛率陀新婉娈书彤管凄凉叹棘薪中郎有贤子遗泽擢平津

和秦壽之题靖安栖霞观

飞观临无地江天在目晚霞工射日秋水欲浮空蓼岸深迷绿枫林远映红归欤还可喜千里一帆风

夏日归自宝林二首

十里招提路崎岖祝圣归青黄原上麦红白草间薇正看云容合俄惊雨脚飞余花被沾湿芳气袭人衣远岫升初日长林霭曙烟峯迢遥见塔溪转静鸣泉竹箨新披锦茅花欲擘绵清和多美?归路得踟蹰

和詹德秀出南汰二首

晓出东郊路春霖数尺泥湖山供胜赏花草覓新题坐听鸣鸿北归看落日西乍晴何所喜芳树早莺啼小沼鸣蛙吹虚堂堕燕泥对花容命酒书事喜分题僧舍乔林北田家古道西鹁鸠晴唤妇谷谷傍人啼

题香岩与何希渊陈勉仲联轡

市井三塾北招提百丈东晴云披鬣鬣寒日弄瞳矐滴沥林梢雨凄凉盖影风我惭追骥足策蹇走巴僮

东灵鹫

松盖雨还偃云屏风自关纵横两溪水高下万重山入室三弹指临渊一点顔悬知少来往石笋绿苔斑

题石碣明因院用李端叔韵

楚汉干戈地岿然见此山艰难思帝业牢落漫禅关野鸟惊人散江湖到岸边明朝又东去空羡阿师闲

题法轮寺

孤塔云烟外荒蹊草莽间蓼花红糝碎枫叶绦绀殷送客三溪远逢僧半日闲功名休览镜沦落鬓毛斑

题宣州书堂山寺

书堂形胜好山转与江抛泉古应黄蘖亭新换白茅雨余苍藓合春晚绿阴交欲问香岩旨风林竹自敲

秋日游南汰二首

小雨沾秋早清曦霁晓氛山留归壑水风送过江云碧瓦觚棱出黄茅兔径分高僧似相喜茗
饮话殷勤松篁团野色葭葭接江氛芳菊开新雨晴天扫片云村醪过寺共风袂转山分邂逅
梅夫子清谈得致勤

次因上人韵

一从潜水别三见菊花黄旧好论交笃新诗引兴长劳生闲自笑道术淡相忘蝴蝶秋来懒时
应到睡乡

送浮屠善慧东游

西去方祈谷东来适佩萸凄风梧脱叶积雨稻生蚨诗骨寒岩木禅心古庙炉莫将明月句容
易谒姑苏

送浮屠道郭云游

何必袁州去尘尘小释迦一筇非外物四海即吾家晓色霜还重秋容菊正华此行良不恶冬
笋已排牙

和巩兴宗题回峯寺赠明山主

江共烟云远山连蕝泽长日从三伏烈风借九秋凉休作桃花观聊同柏子香相逢无一事不
必下禅牀

寧公新拜首座因赠

着书新奏御【上诏承旨苏公道士韩德纯与公集三教圣贤事迹各五十卷故有首座之命】
优诏及禅扉首座名虽贵家山老未归磬声寒绕枕塔影静侵衣终忆西湖上秋风白鸟飞

春日游西塔示本上人

暇日搜奇胜羸骖适莽苍幽花撩醉眼早麦慰饥肠佛屋几间在村墟三里长廉纖晚来雨未
觉客心伤

卷九

钦定四库全书

相山集卷九 宋 王之道 撰七言律诗

春日书怀

野桃经雨烂争华似促畦丁种早瓜不见少年闲信马空怜寒土出无车泥融近水芹抽叶地
暖依墙荠放花偶忆惠连春草句夜来?梦到天涯

高文知已动天庭昨日春雷下六丁济旱会施惟肖雨举贤先应少微星行趋北阙形神健坐
对东风醉梦醒连日暖烟随处好吴山应胜越山青

立春小酌呈诸兄

共喜春随晓色来东郊欢踊赛牛迴破寒青转芜菁叶抵日红抽芍药茱萸岁换未劳惊我壮酒
封聊复为君开上林不负迁乔约百蛰同惊此夜雷

和伯父仲球立春即事二首

怪得青腰稍霁威却应缇室报飞灰摇风柳带缘冰重破冻溪流与岸迴羣盗传闻湖外去愁
云準拟岁前开玉盘丝菜今萧索赖有诗筒日往来

对雪酬春付酒杯兵余真似复然灰路通千里传书去人喜三军破贼迴梅萼封檀香未彻湖
声撞玉冻初开踈篱败屋休兴叹幸事羣凶不再来

春日有感示魏定父

聚散时来不自由相逢相别欲何尤韦臯况有三年约陶谷端非一日谋残角为谁惊晓梦远
山多事惹春愁故园又作骊驹赋尚幸持觞为劝留

清明即事

柳迳桃溪碧草芳故园遥寄水云乡老来转使宦情薄春思颇增诗兴长教子文书容自勉逢
人尊酒为谁忙海棠却似怜衰朽依倚东风试晚粧

追和东坡送春和陈德夫

柳外风樯迅莫追柳间迟日弄晴晖青春已作堂堂去乌髻何由缓缓飞入户呢喃轻语燕隔林啾轧静鸣机谁言四月芳菲尽萱草葵花觉昨非

鹿鸣宴

乾道乙酉无为太守吕公以冬十一月庚戌举送进士循旧典开鹿鸣之宴部使者梁公以建台於此而与焉吕公不鄙谓之道於是邦年齿最高实为乡老俾从观礼之道自念顷在宣和甲申获同弟兄联中科第迄今未见有继之者士风不振甚矣因作是诗记今日之集且以勉诸君是行联名春闱为时盛事大慰州闾之望

苍顔华髮老书生来赴公堂宴食苹曾预宣和闻喜集重观乾道计偕行绣衣劝驾追前哲熊軾宾贤继列城久矣邦人虚桂籍正须公等振英声

秋日书怀

断虹收尽晚风凉扑鼻谁家社酒香门外山横青玉案屋头榴绽紫罗囊对吟已觉输新俊遇酒还能发老狂坐想西园梨枣熟昔年犹记拉君尝

一别成均十九秋断肠千里致书邮可怜率土民心固端为当年圣泽流此去会看还北狩夜来先梦到东州尊君正是吾侪事可但南冠学楚囚

到齐何日醉青州久矣平原因督邮避地未容行信步泛江聊得卧安流望穷落鹜千山晚梦断惊飈万壑秋安得尚方三尺劒扫除骄寇献俘囚

对雪和马大卿

投分江梅亦太清寻盟风絮却多情势先泽腹归冰监气迫毫尖入管城吏部梦踰秦岭去将军来作蔡州行拥炉令我思前躅策蹇高吟愧孟生

对雪和因老韵

諫陛何人正伏蒲将坛无事且投壶因观雪曲词争胜便觉诗邻势不孤警鴈王师方入蔡赠梅边使欲离吴可怜鼠辈殊轻敌乃敢堂堂捋虎须

和张彦智对雪

雪山何处觅瞿昙压尽江南瘴与岚待伴可堪风作党交光应喜月成三濯巾漉酒供杯勺涉笔联诗尚笑谈柳絮自今轻谢句使君才气擅东南

苦寒

风屑琼寒透薄帷拥裘端与火相宜煖回炽焰身成直拨到残灰手欲龟赠炭尚谁怜正曜授薪还自愧支离不甘力请从缙侣苦调寒窗强作诗

题合肥驿

予癸亥春三月尝至此时兵火初过颓垣断堑远望若荒阡破岭所余人亦无几傍徨不忍举目後八年复来遶城秋草离离其青四合而市井旧通闾带闾处亦渐可观为之感叹因用壁间季延伸韵以识岁月绍兴二年秋七月丁酉

重来岁月恍如飞但怪芜城壁四围千里漫推新政善几人能遂故园归云蒸残暑催登谷风作新凉戒授衣小驿滞留朋旧絶何妨白昼掩朱扉

题元发弟竹轩

竹林深处敞轩楹分我西园一半清苍玉几番披夏箨老龙长此战秋声寒侵虚幌诗增爽緑浸疎醺醉不醒应许七贤追盛集烦君书入鄙夫名

题时轩

图书堆里席凝尘聊与时轩作主人自恐谢安行不免谁言陶侃困无津东荣晓色高迎日南圃花光得占春想见戴侯风味胜轻弹珠玉到江滨

题许公塞驿

遐想清游意欲飞巢湖西畔碧山围高城别後骚人到小驿春回燕子归壁上新诗留醉墨庭前飞絮点征衣穷愁勿用频惆怅来岁而今在北扉

题无为秀溪亭

画桥雕槛接招提新有幽人榜秀溪十顷净明天上下两奂光映水东西飞楼涌殿参差见古木修篁咫尺迷此景此时君信否緑杨陰里啜黄鹂

悯旱

食贫那识小槽红回也箪瓢久屡空翹候载芟歌济济忍看云汉叹爍爍困穷转觉蓬心隘憔悴犹怜菜颊丰坐对骄阳思霈泽日占鸣鸛望穹窿

为兴国周少隐题

紫翠森攢面面山个中佳致为君还凭阑人在风尘表落纸诗成咳唾间良夜幸陪红袖醉清时聊伴白鸥闲笼纱归去高城晚凝翠堂东月满湾

为彭积甫题熙春堂

似闻伐石旋诛茅已见高堂?乐郊百里湖山供眼界满城桃李动春梢寒梅过尽看成实乳燕飞来欲定巢何日登临闲信马路边人复少年嘲

田间夜归有作示王觉民二首

风云踪迹付扁舟水竹生涯寄一丘世故举同鷄抱鸭物情无怪马生牛百年半向愁中老万事常从酒到休莫爱得官轻得句争如饱食对吟搜

江上秋来忆少牢龟肠尤觉病诗饔调和索似三分酱瀕洞看如八斗糟水怪重增风势恶湘灵难禁鴈声高何当一雨洗烟月为放清光归我曹

寄题峡州楚塞楼

西陵旧有楚塞楼太史黄公鲁直命名兵火之余扫地尽矣秦德久至而新之顿还旧亲羣贤争出佳制烂然成编德久不鄙示予且索鄙句

江向西陵势渐平万山环合翠峥嵘须知楚国尝为塞不为涪翁浪得名人若此贤真俊杰楼还旧观焕神明临风每听滩声咽似怨张仪作暮横

和陶尉喜雨呈张文伯

贺客休辞酒盏深使君心是老农心精诚已致当时雨膏泽将为异岁霖得水槁苗俱竞秀乘秋高鸟自能吟宣风宜有中和作戛玉锵金播八音

和王冲之喜雨呈张文伯

指点邦人着眼看鲁侯雩祭正玄端望来已见千山雨此去那忧百谷乾高廩有期从穧敛犇霆何处起龙蟠新诗得得书灵应传与羣公好纵观

和应资深九日游康乐园二首

村落潇潇晚吹生斜阳天际与林平黄花照眼吟肩耸红袖扶头醉?轻可惯探题仍击鉢敢辞

偿令独浮觥相逢又复惊相别樽酒何妨意气倾

里社安闲得久生金华端不羨初平山林应有清修重轩冕还将道义轻诗捷口占那复藁酒豪盆酌不论觥一斑已幸窥秋句困廩他时冀倒倾

春日郊行和郭希鲁二首

紫风杨柳绿丝长过雨桑麻沃以光联骑不妨多载酒看花无用更烧香望穷岩电搜诗眼愁转车轮感别肠胜集清游定何处它年曲水记流觞

坐对烟江叠嶂图何如门外翠屏纡寻芳敢擅携筇去命友应从折简呼酒里光阴闲活计诗余情思静功夫浪吟痛饮真难遇休问西山日欲晡

和吴子美香林汤韵

泉沸鷄笼山下林浔阳曾记尺余深濯鲜?卵非予事清暑攘寒盖我心物态漫劳私暖暖灵源当信匪今今簿书汨没尘埃久附骥何时遂涤襟

上巳日阻雨和王冲之韵

祓除聊复对江亭樽酒相从一笑倾那得此时仍此乐况逢难弟与难兄潺潺暮雨檐间溜滑滑春泥柳外声好在海棠红合泪向人凄怆益多情

和窦又勇秋日见访阻雨见赠

风雨萧萧暮不休顿添寒色送穷秋已荒深院菊犹在欲去短亭人强留千里书迟空噪鹊四隣砧乱混鸣鸠相逢碁战宜终日卧稻从他烂不收

和石守道喜雨

夏旱逼小暑种入土者十才四五而原隰龟坼秧亦就槁太守张仲交为民请祷翼日片云作环城获一溉之润而大雨继之远迩沾足因观石徂徕喜雨之什勉用其韵且俾儿曹同赋庚辰夏五月庚子

坐听檐雨快高吟酒到从斟不厌深酣战遂符占蚁信鬱兴良慰望霓心一时与被尧天泽四海同苏傅野霖沾足岂惟秋有岁麦田犹及趁犁金【俗谚谓五月犁金六月犁银七月犁土今尚五月故云】

伏蒙知县县尉二寮友以夏旱得雨赓石徂徕喜雨韵见贶不可虚辱复嗣其韵书谢仍命儿

曹同赋

綠槐陰外听蝉吟
节过分龙夏已深
千里亢阳忧岁旱
一时甘雨快人心
养禾不害连朝暘
沃暑应容数日霖
多谢同寮怜老拙
双南佳句竞鏗金

追和东坡张昌言喜雨呈同官

旱魃正须三尺雨
飞廉旋布四天云
诗成采笔挥琼玖
酒到酡顏散纈纹
莲沼灑翻宵溜急
槐庭清送午风薰
欣欣千里农夫庆
衰病空慚老使君

和董令升舍人

雨余沙路润无泥
潏灑溪流与岸齐
苒苒年华催我老
酣酣春意得人迷
联珠便觉新诗富
浮玉还听雅唱低
杨柳缓摇陰正午
谁家篱落一声鷄

和董令升舍人梦中得句

早晚天书下紫泥
如今人物擅三齐
才华好自銓坡进
诗思休从蝶梦迷
深院日迟黄鸟啭
长桥风软綠杨低
春容不用相撩拨
老去心情似木鷄

和张安国舍人

判花西掖妙当年
曾见声华振日边
文翰共推唐李峤
功名将踵汉韦贤
江山到处供诗笥
风月多情付酒船
琳馆正应聊尔耳
会看鹏击水三千

和张文纪咏雪二首

万境沉沉夜气严
广寒初下水晶帘
三杯强沃浇肠酒
一捻聊分暖砚盐
已恨梅梢遭挫折
可堪风物为般添
才高柳絮虽难到此
语於今亦恶拈

朝来经阁课楞严
撩乱飞花竞撲帘
似是青腰夸黑帝
故教姑射混无盐
地炉无奈貂裘薄
斗酒难供座客添
诗债恼人眠不得
夜寒残管亦须拈

再和董令升雪二首

春雪初融作燕泥
梅花零落杏花齐
遥山扫翠云初敛
芳草铺青路欲迷
别恨每忧儿辈觉
老怀终为世情低
新诗价重连城璧
敢比灵犀独骇鷄

欲下闲庭不蹋泥
但惊飞絮与堦齐
一枝误失禽栖稳
三窟遥应兔迹迷
填塞涧溪还地厚
壅

培山阜觉天低寒光照应东窗白
咿喔应先报晓鸡

追和东坡严车二雪诗

公诗有意拂廉纖令似欧阳韵更严
犬子亦应惭赋缟痴儿端合愧夸盐
飞绵勃窣争平塹冻笋槎牙欲堕檐
胡避只今何处是玉屏森映一峯尖

雪满江城酒不賒闭门那患出无车
未容踏冻寻梅萼应喜临风见柳花
炭重乌银争晓市蔬挑翠羽荷隣家
何人正下红莲幙大嚼蒸羊手更义

<集部,别集类,南宋建炎至德佑,相山集>

卷十

钦定四库全书

相山集卷十 宋 王之道 撰七言律诗

和周少隐实録院对竹三首

夫子文章仆命骚高标寧若岁寒凋惯看雄辩朝挥麈想见清吟夜度韶老去荷君频折简时
来容我尚同寮区区长倩何为者不乐平原意本朝

老来须鬓白刁骚犹喜丹心未遽凋秋赋肯甘同宋玉昼眠聊复继边韶翩翩幽鸟随风展炯
炯寒灯伴夜寮多谢故人珠玉寄水云堆里望天朝

牕寒疎竹共萧骚可笑圆荷着露凋实録成书辉日月奉常新乐奏咸韶佳篇千里来青琐好
梦连宵到绮寮湖海固应聊尔耳伫看丹诏下公朝

和韵寄董令升舍人

曾将燕石报琼华别後哦诗愧莫涯空腹但看长柄械缓行何用短辕车神驰邓步弥天葑梦
入朋谿夹径花何日天台寻药去女仙迎笑饭胡麻

和余元明时元明邀余同李次元夜饮

坐中强半是同年赖有斯人席更圆跨马未须贪远道举觞聊复望青天枯荷折苇三壑路明
月清风百丈船俯仰便成陈迹恨须知此集不论钱

避寇糝潭登李彦修延秀阁

王师千里下邦畿三月宜新对敌围江上扁舟随处是烟中华屋转头非逢人借问何时定有
客来传二圣归已办笞箠学元结卜隣犹冀不相违

和因上人午睡韵

多谢高人问起居惠然相过共秋蔬栖栖衆且疑夫子碌碌谁知效阿奴老去睡乡还积欠君
来诗社责新逋便便一觉南窗午短簟方牀意不疎

历阳寄定城尉彦逢弟

故园鸛鵒久催耕休恋公田秫与稭别恨久随黄耳去归心应望白云生干戈丛里三书考
春夏交来几闭城我亦蓝田负丞者相从何日赋渊明

和萧山临川亭壁间留题韵

水外峯峦碧四环雨多门径藓苔斑滞留又及炊新粟欢喜何当见旧山招隐有诗来
雪上倦游无梦到云间西兴十里秋潮晚坐数扁舟带月还

和彦逢弟春日即事

杨花如雪菜花黄路出初郊正日长喜对新诗醒病眼会逢膏雨沃骄阳过僧竹院茶争美
酌客山堂酒倍香常恨抗尘仍走俗不知身在水云乡

和陈勉仲春日偶成二首

帷幄何人正坐筹匈奴轻汉索怀柔回銮未覩迎天驷劝穡还惊出土牛雨过池塘新涨绿
春归原野霁烟浮中兴自古须羣策更愿君王慎厥猷

江表归来得自由旧乡能复到温柔辞源已见流三峡笔力当期挽万牛白日忍从黄雾塞
青天那复黑云浮扫除骄寇还强汉会有忠良告远猷

春日偶成

余生今赴迓英朝似说夔龙许续貂枯枿遂承新雨露苍鹰应识旧云霄废兴须信关时命
劳逸谁能问贯条十载山林劳梦寐五更天仗听箫韶

春日次韵张叔元

迟日轻风过雨天草青南陌欲生烟江湖节物登王鲔村落归心起杜鹃已办芳游野寺
何当修禊泛溪船路逢少妇携笼去为说蚕儿向雨眠

和秦壽之中秋翫月三首

一樽芳酒起沉烟絶胜红裙拥後前山色水光相上下月华秋气共清圆佳时令我思韩愈
好梦逢君想惠连老大不知追逐乐却因妍唱惜流年

湖光无际接云烟举酒登临夕照前坐送落霞还杳霭倚看明月上高圆清谈浩渺河源注
丽句纵横绣段连归去凤池知不日山城岑寂记今年

肠断江城敛暮烟一声清笛短亭前
扬舲共喜风初转戏彩当期月正圆
水落双溪和石出霜余叠嶂与云连
令人暗想昭亭路屈指归来又四年

和张彦智中秋对月

万里青天霁色开嫦娥驾玉上云来
楼中胜饮八仙聚物外清谈三语该
空翠水光争滉漾漏声钟韵共徘徊
秋盘应爱金樱好红抹佳人醉里腮

和高守无隐官闲即事

老去空悲乐事稀百年浑醉几多卮
虽贫赖有旧栽竹纵嬾未容全废诗
碧草望迷烟漠漠黄梅看熟雨垂垂
莫嫌芜蕪晚相浼欲换邦君白雪词

谁怜村落笑歌稀全把茶瓯当酒卮
枯槁又经三月雨穷愁聊付一篇诗
牕间远岫青千叠楼外长天碧四垂
何日获陪文字饮欲翻妍唱入新词

和胡德辉增明轩

钓鱼聊复效詹何肯向青山较少多
身世自怜巢幕燕利名谁鉴扑灯蛾
风前逸气舒长笛酒里清愁到短歌
安得梧桐来鸞鷟一鸣千古继卷阿

寄奉符大有叔

血气侵凌不复豪往来欹倒似乘涛
寧知嬾过嵇中散亦有诗如谢法曹
旧藁只堪供酱瓿故人相赠有终袍
兗州宾主同风味恶句烦公更一薅

和曾式古

式古省干当高使君守濡须日实为幕中之宾
罢既踰年而兵饷有积下供给钱数百千未请
欲以为归资情见乎词成唐律三章以示同寮
仆偶获观焉韵险不能尽和姑和首章以当赠言

白云飞处见层巔回首风樯去若仙
旧隐已锄三径菊新吟聊憩一囊钱
春归沂水还相乐秋到盱江盛有年
更着彩衣歌且舞高堂侍沥奉周旋

和何希渊韵

敢负交游素所期自怜衰滞使君疑
向来兵火亦何久此去功名应未迟
诗似清风宜我慰心如白水欲谁欺
扁舟傥赴相从约江北江南笑有辞

和孔纯老归自属邑三首

纯老通判归自外邑闻守将宿有携妓郊劳之约途中以诗督之且蒙不鄙示予谨次韵一笑

行县归来赋陟冈青梅应快一樽尝诗成妙墨挥张圣酒到高歌发楚狂夹道野花围步障两行官妓簇桥梁嗟予贫悴跼蓬蒿不及郊迎笑举觞

往来陰雨恰弥旬滑滑那堪鸟语频行色可无三日霁旅怀应付万家春欣闻郊劳开瑶席想见车旋入锦茵何幸诗筒时寄我慰怀须信有诗人

诗涛难放笔头乾归及初晴素魄圆善誉敢论当世比佳篇应任老夫传凌云列岫堆螺髻出水新荷点翠钿报政还朝知不晚追随能复记当年

和梁宏父二首

时来谈笑取侯封清旷寧容雅志从上圣急贤齐舜禹羣公引类迈夔龙非材似我十围栢有用如君千丈松邂逅相逢辱倾盖能令瓦釜配黄钟

功名须向壮年收顾我摧颓已白头节晚独存松柏劲岁寒还见雪霜浮老将耄及从人笑醉欲眠时遣客休眼力尚能观细字诗筒经卷且优游

走笔和孔纯老催诗债次韵

闭门对客总言诗淹速由人敢预期思若涌泉夸往哲文如翻水擅当时年成定见争称善月链悬知鬪出奇疾似枚臯何足道汉朝终贵长卿迟【鲁直云闭门索句陈无已对客吟诗秦少游年成见左思月链乃许洞】

避寇姥山

山前湖水抱烟村湖外山光隐若存泛宅浮家聊自托?松藉草欲谁论物情鱼沫真堪笑世事槐安不在言回首故园煨烬里归欤犹胜傍人门

和邹进士

望外青山便到家冯讜何患出无车坐逢石鼎应联句筐有龙潭敢鬪茶樽酒几时同竹叶功名终日鉴菱花君看一雨苏羣槁所至人心乐否耶

和丁景仁三叉河留题赠李仲山

飘零双鬓已星星万里江湖寄此身山拥青螺初洗雨水浮苍壁似围春别来兴废同千古此去荣枯会一新葭薻弥天草如积宽予犹赖有斯人

弟子厚自相山徙居湖塘又复一月矣距外除只数日间光景漂流徒成感慨读新诗兴不能已辄和韵

相逢休访楚江萍我老无能一壮丁卜宅又惊三浹日御琴空感再周星新愁卯酒心先醉气怯春寒梦易醒却喜故山遥在眼举头时见竹青青

和李难老

半生场屋弄朱衣犹喜春来破白归同辈交游惟我拙一时人物似君稀风神要在山庭峻辞吐初疑锯屑飞州县未应淹骥足钓名谁羨子陵矶

和张公仪

醉中行草绾秋蛇十载风枳忆旧家朋旧乱多从鬼录诗书闲益富生涯稻塍绿合迷秧马沙嘴潮回下钓车归去西畴新雨足饭秔应不羨胡麻

和赵积中

入室芝兰气不殊逢君还忆见君初梅花正喜春悬凤藿叶俄同夏鱸鱼下榻旧闻看孺子负荆谁复谢相如艰难正拙平戎策及早东游叩帝居

和江和仲

把读新诗忆旧家深村羸犢短辕车年丰野老常携酒客至幽禽自唤茶乱後所存惟五柳老来无意约山花相逢何必曾相识乘兴时来过此耶

和张元礼

元礼以蘧着 三子下第未归有诗宽予因用韵勉诸子非独为下第者设也庚辰清明後一日

力学三年看有成龙蛇蟠蛰冀存身一杯钱别初迎腊千里归来欲送春爱日光陰宜共惜及时德业要争新吾家丛桂风流在速取高科慰老亲

和间必志见寄韵

老矣诗才欠壮观
美君闲燕富清欢
染羹早厌夸鼃指
食肉应宜谢马肝
送客篇章堪寄远
论文杯勺自驱寒
扁舟近过池头否
百丈西南水欲乾

和陈勉仲二首

人似平原字亦顏
诗成长在笑谈间
试看落笔云烟疾
难放摇春草木闲
美俗未容窥制锦
劝耕聊得伴行山
惭将郑腊酬荆璞
无怪年时债未还

相逢怜我太衰顏
冰雪精神照座间
霁日有情茶乳合
春风无力柳丝闲
肯从逋客来三径
祗恐佳人赋二山
旧说毛公今见否
似闻新向玉京还

和魏定父被檄还无为

定父通判被檄来
归旦夕当还安
丰距重阳不数日
方兹戏彩而遽尔
言去想不能无恋
恋因观所和因格
非佳句叹服别来
诗格超迈不能自
已次韵

雨脚廉纖日脚微
秋陰犹暗北山陲
莫言岩壑都无用
须信风云会有期
邂逅醉鄉还自适
周旋诗社好相规
黄华又报重阳近
想见迟迟去鲁时

和孔纯老按属邑二首

高车西去忽踰旬
坐想登临得句频
杨柳陰交山径晚
酴醾香满驿亭春
吟余扫壁时挥翰
醉里投牀任吐茵
闻说归来欢喜甚
故人相遇是诗人

杨柳依依半掩扉
新晴疎影弄斜暉
好花覓句忍轻负
幽鸟劝沽良重违
闲爱青苔缘砌上
静看蝴蝶扑窗飞
雨多不觉芰菁过
又喜盘中笋蕨肥

和许端夫兄弟二首时端夫出守当涂

灯火当年记马行
一时人物玩垂裳
旧游乱後半芜没
新贵迩来多罪亡
我有顷簷相应和
君同兰玉竞芬芳
高文已见含元赋
不用研思古战场

相喜何须日寄声
如君无处不知名
纵观妙墨云?动
想见新诗欸唾成
带雪山川增绮丽
向春梅柳自欣荣
好将十咏图归去
稳步花毡继李程

和袁望回

千古风流忆孔明
老龙高卧志存身
强陪簪绂更三圣
安坐江湖又四春
便合痴狂称達者
谁能穷悴作骚人
一杯聊复从公醉
要见予言总是真

过邓步和张叔元见赠韵

独舸东来夏日长
归装从此益生光
卧云禾穗珠成实
倾露荷花麝被囊
逸世才猷金騷裹
逼人风味木兰堂
常疑正始遗音絕
把读新诗远坛场

夜泊官牌夹口大风追和陈去非岁晚感怀

咿喔邻鷄夜向阑
晓风骄挟晓霜寒
吹灯强取残书读
拨火重寻远信看
綠蚁已应浮腊瓮
青丝行复送春盘
旅怀欲倩高鸿寄
凭仗新诗付笔端

和张序臣合肥驿中诗

橐臯何处合肥东
知有诗翁杖履中
鲁会一时归寂寞
吴吟千载发清雄
湖山照碧滕胧日
鞍马欺寒料峭风
春入花梢人易感
莫教房闼叹飞蓬

长至和魏公達

半夜迎长坐候明
眼看初日屋山平
诗豪不共年俱长
鬓雪惟应老自生
得酒人情何太喜
犯寒春色不多争
老农相庆无它语
尽道冬晴好趁耕

和孔纯老送司法吴德声

舞腰迴雪奏伊凉
餞设铃齐举别觴
如子固宜倾坐客
顾予何计挽征艎
交情旧喜推东道
归梦先应到北堂
花柳枝头春已闌
伫观超擢寘周行

和方景南参议见赠

向来踈率任天真
此去扶持护善邻
只恐磨砖难作镜
已知行水戒推轮
箠瓢本是吾家物
轩冕寧容我辈人
多谢诸公共推轂
欣欣寒谷暗生春

和彦时兄韵

立马山前问酒家
山峯森列两溪斜
扶疎新竹听流水
天矫古松看霁霞
远目自能供覓句
枯肠终不柰搜茶
一杯汤饼东牕晚
危坐清吟对月华

用李梦发韵

梦迴诗思不胜清
卧听幽禽两啜更
窗角界金分月色
山腰鸣玉漱溪声
欲行且住心还适
久雨新晴眼倍明
莫为浮名废真赏
较来何重亦何轻

梅隐亭

无虑无营得自如乱红狼籍緑陰初莫贪视盗诛锄术轻换齐民种蒔书风物最怜清且好宾朋那患数斯踈高谈亶亶还终晷坐觉庭花影上裾

丽泽堂

焚香读易欲何求只恐西邻未识丘千里交游思命驾一龕灯火喜逢秋胷中云梦应无筭天上风雷得遍搜莫向明时老岩壑伊周元不羨巢由

能赋台

万顷玻璃水浸空台前佳色咏难穷倚栏人在烟霞外落笔诗成笑语中属句畏惭非孟子供欢端合有车公解将能否分优劣过眼昭然向与雄

代人上段拂参政

玉牒书成已六年东游曾记此周旋千龄令庆亨嘉会二府新分造化权咫尺云天依日月斯须霖雨浹山川应怜汨没尘埃者白髮青衫走道边

卷十一

钦定四库全书

相山集卷十一 宋 王之道 撰七言律诗

江南道中

江迴山崦两三家招飏东风酒旆斜羸马送曛行自急峭寒欺客晚还加日边鴈足应传信竹外梅梢合放花指点东城归路寫一川流水閣栖鸦

隐静道中

马头聊复问诸涂东指宣城百里余水外山屏供步障道傍蛙吹接行车青归柳色浮烟里红入花光过雨初春意似同人意好此行那患食无鱼

寄余元明

对月令人忆子年别来重见望舒圆闲中情性南无界物外光陰小有天连喜得官如得句惯看乘马似乘船朝迴共醉知何日準拟春衣当酒钱

寄孙次卿

归来啜菽得无愁但觉官身不自由敢倩双鱼传尺素要知一日似三秋射阳别後从新辟幽谷公余获胜游尚忆龙盘分袂处五更残月在山头

次韵高守无隐苦热

郁蒸还起炮车云旱气方隆雨未能应念开幃来白鸟故成洒洒聚青蝇南皮痛饮君当继北牖高眠我独醒人仰郡侯清可倚暑中真是一条冰

用东坡赠晁新城韵呈朱乌江

偶然来赋瓦梁行乱後欣闻醉客声村戍火明人指路江城风静夜鸣钲对牀听雨他时念拨火哦诗此意清闻说鱼轩还枳里先生应合暂归耕

和连圣举呈张彦智

公望岩岩映广东曲江重见旧家风威行草木霜争肃春到湖山雪自融至喜此心鱼鸟共去

思前日吏民同从今不复忧兵火却敌如公笑语中

次韵伯远运干见寄

善邻虽幸借余光终愧陈臻问发棠官柳又惊眉拂翠宫梅应喜额涂黄江湖得计还相造道义论交付两忘多谢乾坤容长物许乘春意到文昌

次彦时兄苦旱韵

斗粟衡门且自安老来筋力厌辛酸官游动是三年别邂逅应容一笑欢荷浦珠联秋露溢稻田龟坼暑风乾昨朝溪足捎新雨已觉羸躯怯夜寒

次韵沈元吉兵火後初食羊

时难盆甑久无羶梦寐何郎食万钱一脔乍惊肥羜美五紵应喜敝裘全好从牛炙论蓴菜堪笑河魴咏柳绵弹铗得鱼良不恶先生何用鄙烹鲜

次韵陈勉仲二首

蜂喜春晴竞出笼雪明篱脚眼看融柳条借日还金色梅萼因风动玉容窥牖数声禽度曲过庭千字鴈书空青毡笑指吾家物芳草无边一望中

十载穷愁鸟出笼春来天意似通融得书故旧颇相悯上疏朝廷应见容开府莫辞金帛尽犁庭当冀禋氛空庙堂素定平戎策不待文渊在目中

次韵张进彦见寄二首

坐想云烟走笔端夜哦佳制老忘寒一时思致追长庆千载风流识建安接武尚稽班玉笋昂霄终合待金銮自怜衰退无新语捧腹还君醉眼看

鼻息??尽日眠从他儿辈竞嘲边那知问对成中说自得逍遥喜内篇雪里书来檐噪鹊灯前诗就鼎凝烟中郎去後人难继漫诧柯亭富笛椽

次韵同舍李支使梦与二首

三纪桥门过隙光醉吟曾共晚风凉旧游何在已芜没前好欲言空感伤重对诗囊开锦绣要看谈麈落水霜苕溪此去如相忆双鲤时应寄一行

短短灯檠便且光看书犹记感秋凉飘零未遂襟期远迟暮徒惊岁月伤初喜嫩荷青直盖不

知新竹粉储霜相从益觉交情笃时掷隋珠到我行

次韵周子嘉咏雪

势凌风力鬪清严彻骨尤非老病堪冻蠡夜回千首北寒梅朝放一枝南扁舟底事方行役贩履何人正立谈江上别来劳梦寐相宽犹喜见诗三

咏雪

白榆风起匝天来透隙穿帘醉眼开毡衬庭阶茸妥贴带盘山径玉萦迴根行万国将宜麦香动千林独放梅闲把银杯评柳絮始知谢女亦非才

和彦时兄腊雪六首

不耕何敢叹无困多谢先生早见倾望岁比同伤再潦逢年今共快三曩光凝夜旦千山晓势合高卑万壑平坐想袁安门未扫洛阳谁复念孤惇

一洗乾坤不动尘瑶台银阙鬪清新齐腰欲究安心法乘兴当为访戴人晬晬寒江归钓艇丁丁虚谷动樵斤二诗远比幽兰胜击节悬知衆所宾

敢以箪瓢傲廩困撇醅聊复笑还倾为言空腹朝搜句不觉寒牕夜集曩泽浹寰区成地富光生蓬荜见天平预占有岁从今始廊庙何忧不及惇

瑶林交映出风尘便觉寒门气象新莫讶窗前羣噪鹊须怜江上有归人抛瓢已喜来荆璞斲堊无劳运郢斤坐拥红金饶大嚼一时高会幕中宾

厌闻饥雀噪空困犹喜茅斋未遽倾屑玉岂劳青女送飞花聊混白云曩预占岁稔矜祥旧不择贫家荷施平早晚林梢挂寒日为回和气慰饥惇

举首西风漫障尘清无纖翳六花新谢庭拟似吟飞絮洛浦飘飏见丽人漏箭不知楼外晓觥筹先发坐中春兔园盛集应难继空想当时主与宾

次韵孙兴宗梅花

厌浥庭柯雨未乾乍晴天气午犹寒传来多谢新诗寄接得翻愁病眼看漫想素粧嫌粉浣须怜青子着枝酸和羹有日君知否老大心肠只自宽

次韵董令升梅花

花前樽酒泻尖泥痛饮仍欣客到齐竹外一枝青更好水边踈影动还迷醉醒正值微风入酬唱何妨素魄低闻说归舟阳羨去应容酌别为烹鷄

咏梅示魏吉老

孤芳常恐百花知桃李纷纷亦强追照雪精神应自喜逼人风味不吾亏幽香隐约留衣袂踈影玲珑鉴砚池欲识东君好消息夜来青鸟宿南枝

次方正叔知县韵仆今年六十有三窃观正叔赠陈甥述怀诗有感予心并和二首奉呈

年踰六十我何堪心曲因君得纵谈閱史旧尝疑夏五参禅今遂荐前三饮阑却怪清樽恶饥甚犹怜粝食甘交态物情何足较还来炉鼎兴方酣

水满陂塘麦满村路逢田父和长言题诗懒作蝇头字貰酒愁看犢鼻褌芳草藉青迷野迳远山横翠入柴门道衡骨朽无人继卿相谁能预识温

和张咏老知县

照郤辉辉碧夜光贫儿那复苦悲凉得鱼始信筌无用斲垤终期鼻不伤我类槁苗犹欠雨君同修竹饱经霜诗成病眼昏加澁欲写还忧细作行

腊梅和次韩韵

一枝横亚竹梢黄宫樣新翻半额粧闲淡似宜冬後日清癯应怯夜来霜生憎丹脸娇含酒巧妬冰肌冷透香取蜡为花缘底事浪吟空发少年狂

可怜风骨肖梅英试问东君曷似生正色不从朱粉浣耐寒犹怪雪霜轻论交薈卜君为胜投社醪醺我更清纵美詎能齐衆口漫言异日许调羹

夏月自六安舟行还安丰

灩灩溪流涨渌波乍晴天气自清和露梢抽翠交新竹风叶翻红飈嫩荷水外远山晨雾重道傍佳树午陰多头旋更苦舟摇兀说与篙师住得麽

和州得旨移粟宣城舟中和何希渊韵

辙鱼应怪决江流千里重为叠嶂游颇惯黑甜相对美可无赤糲为寬忧干戈在眼心还折勲业何时鬓早秋已办卖刀归买犢不妨多种白江州

沙窝道中

叠叠青山处处溪溪声淙玉漱玻璃悬知菊水人难老可信桃源路易迷山岭梅花迎客笑路傍松盖与云齐寒林昨夜微经雨新迹分明过虎蹄

迥流入栅江

久客心腸怯迥洄不堪官事紧相催踏霜人去纒风吼冲浪舟行岸冻开雪尽野梅红剪腊春迴溪水緑生苔穷愁好逐残年尽三日元正与泰来

春残次韵张叔元

乱红狼籍紫苔斑帘卷东风雨脚残蜀酒渐宜消昼永单衣犹觉怯朝寒玲珑有客双摇鬢矧何人一据鞍芍药酴醾晴更好劝君休作梦中看

次韵徐伯远木芙蓉

千林摇落见孤芳销得诗人赋拒霜高压菊花还独步静窥池水试新粧自怜衰病追欢懒忽覩骚吟引兴长何必采江重比并佳名艷色正相当

次韵子厚弟小春偶成

强插梨花做小春风前诗思有余清路逢野老那知姓耳听幽禽自唤名岁晚山林松桧色天寒关塞鼓鞞声枕流漱石君无笑我欲岩居学子荆

次韵程德远登清淮楼

西望中原懒转头十年空见水东流涂山漫想诸侯会濠上聊追二子游大劔长刀秋正拭淡烟疎雨暮还愁谁能不讨清河朔誓楫当期祖豫州

秋兴八首追和杜老

湖外干戈半緑林湖边葭薺晚森森风霾未放远山出岚气又连淒日陰世乱且同吟啸乐时来终快扫除心天寒况是开炉近应有佳人赋藁砧

巉岩石壁半欹斜茅栗丛中菊渐华风里断鸿书带草山头飞叶汉浮槎楼索莫吟秋笛戍火青荧?暮笳争似渔翁最萧散晚来和月卧芦花

云影曢曢日洒晖金湖西畔晚陰微渔舟缭绕青山去枫叶追随白鸟飞摩诘家风非世有渊

明心性与时违近来病瘠连诗瘦翻爱西台字樣肥

辘轳世态一杯棊销得秋来宋玉悲舒啸可无元亮意哦诗如见少陵时江湖於我还萧散田舍从他笑重迟异域故人今在否青灯牢落夜相思

翠壁苍崖水外山山头茅舍两三间夜窗明月来临卷昼户清风为启关霞绮障秋惊老眼酒红潮面发衰顏集英一梦如今觉犹忆当时晓趣班

远水西来抱鹿头山前草木带霜秋黄花雅意撩诗兴红叶端能寄别愁日月犇驰双转轂江湖漂荡一轻鸥干戈未戢中兴沸蹴被空怀祖豫州

勲业休烦付考功此生终待老山中宦情薄似贤人酒诗思清於少女风秋雨养肥桑耳白溪流濯出柳须红不堪世路频硣确四十萧然秃鬓翁

迢迢山势去委蛇林木东头见荻陂疎竹依岩秋迸笋病桑经火雨生枝草侵药种多难辨土拨松苗欲自移照眼谁家几枝橘出篱丹实正离离

送许判官志仁【同安许志仁与予比郡声迹相闻绍兴八年夏始于武林获有一面之幸而未款也前贾茂德将命淮东志仁方待次澧阳以文字见倾盖若旧遂联轡还无为今茂德复使江面而澧阳阙在数月间茂德自南昌遣舟来迎子方幸承教遽尔语离不胜怅然因志仁有春晚偶成佳句辄嗣韵赠之】

是行犹及豫章春闻说逢迎有故人倾盖为君殊快意掺祛令我重伤神向阳花木初开叶得雨蛟龙已转身江上新晴应更好綠杨如幄草如茵

送董令升舍人归朋溪二首

西掖归来鬢未华着书论字当生涯撑肠何止五千卷溢篋定踰三十车秋露青黄新种橘春风红紫旧栽花东还贪逐朋溪乐只恐金銮诏草麻

僊舟东去访金华歌彻骊驹向水涯试问玉堂司凤诏何如蓬岛驾云车雨余翠筱初翻箨风暖丹葵欲放花天气清和行色好江南江北半桑麻

送刘元发归鄱阳次其韵

杖藜千里访茅茨来赴当年一笑期白髮我徒悲老大青山君尚记艰危夜听高论因忘寐昼味新诗可疗饥冬日迎长殊可爱何妨去国少迟迟

送淮西转运判官李彦恢还朝

江头旗影弄青红似说朝天四牡东抱病不容攀轡勒送行那复遣儿童田均税斂千年利福
及疮痍九郡同此去定知还禁近从来陰德报宜丰

送徐次公罢历阳任归三衢

闻说家书赋鹄鵠归欤难弟见难兄接联本作二年调解印俄成千里行故国一犁春雨足长
江三板暮潮平烂柯况是神僊宅招隐诗成好寄声

送徐季公运干罢任

羈栖无奈老而穷又见徐卿马首东快意一时荷叶雨增明千里稻花风高材合在云霄上胜
处能忘涧壑中法护相从如问我为言踪迹与君同

送端溪尉张達城挈家南归

年时萧寺雪初晴闻道君来眼倍明送别又看秋欲去论交还感盖初倾帆张须水秋潮涨路
入铅山晚翠横快向端溪从吏隐归来稳步上蓬瀛

送江致远归建昌

翩然归兴不吾留应为高堂念远游数日语离良作恶几时书到得无愁白沙翠竹千山晚朱
实黄花万里秋後夜西风茅店月醉吟应不费冥搜

房陵秋日

新诗来处自房州已及瓜时叹滞留曾望碧云频送目又惊红叶再敲秋千山不隔清风远两
地应同素月流游刃似君诚利器只今无复见全牛

中秋和彦立兄韵悼伯父仲球

月华秋气共清圆千古佳时句一联节物伤心还惓惓山光经雨自涓涓潢池兵火今方炽沟
壑饥羸正可怜怊怅去年人已矣乱离谁复问招延

卷十二

钦定四库全书

相山集卷十二 宋 王之道 撰七言律诗

边公式周表卿侍郎同年会

侍郎边公式周表卿以绍兴十七年夏四月癸丑讲甲辰同升之好与诸公把酒湖上为泛舟之集预会者余宅仲李景圭王端才何才卿蔡仲平时昌臣李宜仲王彦光及之道共一十一人坐中公式令之道赋诗为唱得东字韵修故事也之道奉命不敢以固陋辞强勉奉呈

侍郎修好燕羣公鴈塔题名二纪同谈笑静移杨柳日杯盘清泛芰荷风鹏抃竞祝三旌贵鲸吸相期百榼空此会明年应更好马周行亦起新丰

苏台悯农

苏台五月苦多雨自葑门以东积潦浮天下田所不沉者数寸堤耳农夫以无土没水取泥培堤防扞涌溢去岁既遭旱每食辄不饱今复患水良可矜也作悯农一首

稻田高下欲分畦积潦弥茫隔寸堤天意未收连夜雨农功良苦半身泥一丸莫救风涛决千顷空怜稼穡低朝满夕除应可信望晴心绪忆昌黎

宣城驿中送建康倅赵纯中

芍药飘零雨洗春江城柳色静无尘扁舟未果寻归路小驿那堪送故人万里云天心共远一龛灯火话相亲因风无惜沾余馥我亦贫儿望富隣

和文倅侯彦嘉二首

彦嘉与通判孔纯老同僚之旧是行来谒知郡郑深道相遇於无为联珠唱玉不日成轴仆幸周旋其间纵观妙句获所未尝而彦嘉早晚当赴官西去敢和二诗以为异时抚掌一笑

相逢珠玉走佳章顾我无能更老苍尝鼎固应从指染冲天行喜见云翔向来别恨江同远此去诗情日共长才似二公今二妙山庭渊角绣肝肠

晖晖晴日树头平望外遥山宿雾轻积潦夜增南浦涨微风朝送北牕清滞留羈客牵归思陶写新诗尽物情谁谓春宵常苦短老来无寐厌长更

送无为守郑深道移严州

世称儒雅擅青徐今见君侯信不虚
报政未容更绣水除书先已易桐庐
郡隣帝所旋趋召地切家山勿恋居
千乘来迎催去急邦人何计挽行车

送钱逊叔出守袭庆赐出身除职

赐对金銮下九天旋闻熊轼为驱前
人从芸阁初分直桂折蟾宫乍得仙
刺史江山聊复尔翰林风月自依然
下车快草东封疏今去祥符正百年

次韵蒋守张进彦

邂逅传杯莫放杯七年重见梦初回
休嗟岁月堂堂去且喜旌麾得得来
春至会沾新雨露时清应扫旧氛埃
如君才业今张镐怜我栖迟穀屡推

送陈南仲守象州

熊轼朱轡照野明知君今赴象山
行荣观共作叹嗟语静念独伤离别情
畏景逼人才数日修涂计此始三程
至时应在中元後好奇双鱼慰友生

送秦德久守安丰

德久与仆相别十六年今邂逅宣城
其适我愿不言可知而德久方出守安
丰将取道於无为既已涓吉戒涂不容
少留仆方自无为来未能遽归以追骥
尾为之怅惘无穷勉效古人赠言五十六字奉呈

历水分携十六年相逢须鬓尽苍然
喜君宦况新来好许我交情老更坚
小雨送行春溜急长杨留别午陰圆
画船插帜澄江远回首风帆指绣川

喜雨

雷声翻海电光红濯濯蔷薇一夜空
云气共看渊跃螟雨祥曾验叶生虫
伫期多稼千箱富先庆来甦百室丰
饰喜自惭樽酒薄只将香火向穹窿

次韵周漕喜雨

十载栖迟畎亩间无聊尤苦屡无年
可怜一雨今时若便觉千塍顿郁然
击壤有期应共庆效顰非分敢争妍
正当檐溜江河决想见高吟夜不眠

酬章序臣二首【比得江梅数枝於里人因以遗序臣章公既报我以两絶又有唐律因用韵和呈】

风梢摇落雪飞花谁传江梅到我家曾把数枝分暗馥要催羣卉助光华高吟两絶那容继胜赏双清蔑以加春不世情应委曲十年留滞在天涯

老懒观梅喜见花一枝聊复寄君家清香扑袂传春信?影摇牕借日华小小池塘从掩映依依杨柳漫交加和羹风味今犹古回首青青遂有涯

酬李才叔见赠

与李才叔契阔凡十一年今相遇於越上大适我愿望蒙赋诗送行置酒话别所以眷予之意甚厚谨继韵

篙师且缓莫予催老眼逢君喜暂开相与未成招隐什分携宜尽送行杯谁令急景堂堂去我为佳人得得来万壑千岩终欲遍归欬清梦转幽哉

酬周少隐赠行之什

我老无知独梦鱼清风一枕午钟余忽惊珠玉情相厚便觉山林计不踈酒熟会看延客醉诗成还复遣儿书何人竟得闲中趣只恐无聊叹索居

酬张进彦见寄

进彦直阁以仆昔年尝有恶语书合肥驿中壁间谏度之余特辱宠和二章见寄至缚虎敢辞山路险斩鲸终见海波澄之句不唯笔力雄健难到亦可以想见其心也

皇华应记去年曾六轡驰驱问固陵道路向来荒枳棘堤封从昔错沟塍烟销列嶂秋光远木落长淮霁色澄自笑壮心穷未已欲言言大怕人憎

酬吕公季

公季昔寓华严精舍有半面之旧重来踰三十载殆一世矣得官汉阳未能行以无为孔倅少年庠序之交故自湖陰拏舟至此冀其惠顾前好有以振之而孔倅方摄龙舒郡事正官旦夕且入境公季不欲往谒少留以迟其归逆旅萧条厨?不烟予还自西郊闻之饌以新粲用救在陈之厄公季有诗见贻因和其韵

相逢宾戏快逢场何幸轻投得夜光半面向怀精舍旧一行今整汉阳装如君俊逸犹沉滞顾我迂踈合退藏别乘未来霜候冷客灯明灭漏声长

酬蕲春王宰公明

仆衰晚不竞迫於食贫日久将有临安之逸吾宗公明知县以言见赠过有褒拂嗣韵报之

致身华贯属华年顾我弩痾久不前醉被长官轻骂郑懒从学子竞嘲边功名有日还三杰诗
酒何人继八仙才业似君真独步文章政事尽堪传

和赵养正春日游魏园

藜杖芒鞋信脚行宿云披絮雨初晴溪边草色青毡合竹外山光翠盖横弱柳弄闲无限思小
桃含笑不胜情清明此去旬余日花底能寻载酒盟

和孙延壽喜雨述怀韵

小雨霏霏夜接朝乍惊和气入民謡官逋庶为麦秋缓酒价定随人意饶欲落枣花蚕断茧半
黄梅子稻移苗书生不惯征徭苦牢落僧房不自聊

寄别江茂德赴麻城丞二首

此行何处有淹留新得中郎万斛舟会见马羣空冀野还同鹤驾到扬州鲈鱼出网红翻锦江
水浮山緑泼油回首风檣惜轻别一声鸿鴈起沧洲

次韵周运判彦约芍药

独殿羣芳占晚春对花犹幸有斯人宓妃正自须曹赋楚女何妨与宋邻醉着午风浓似酒粧
融朝雨细如尘边城正藉诗书帅俎豆於今识祭遵

次韵蔡永叔双头芍药

反复新诗对月华?模犹及正而葩坐驰芍药心先醉身老江湖眼欲花夜半已酬连理约风前
还见一枝斜滩头更下双鸂 并与妖红作意夸

和方正叔芍药

院落青和昼漏长曲栏高檻倚新粧未饶玉蘂来仙女那羨莲花似阿郎遣兴勉从吾辈在追
欢难入少年场开缄忽得惊人句满纸云烟翰墨香

夜听刘昭远弹琴

河陰高转月光流露脚斜飞夜气收焦尾冷含三尺水悲风弹破一庭秋广陵别後多新操子敬亡来絶旧游欲洗世间筝笛耳为言干斛不须求

和江和仲司理喜雨

朝来虹影散青红旱气旋随夜雨空颀颀竞看飞石燕蠃蠕应快洗桃虫旧闻人说天心解今见时和岁事丰五谷穰穰无几日敢将豚酒谢穹窿

紫薇花

过尽红薇到紫薇广庭高槛见芳菲缤纷不逐槐花落拂掠应从燕子飞枝压画檐朝露重影摇苔砌午风微何当草诏丝纶阁伴我黄昏坐禁闱

春雪

一夜春寒梦寐清柳梢梅萼颇关情山川千里玉为路楼观半天云满城径醉已从酩酒去稍晴当办出郊行东君底事偏芳草剗尽依然上砌生

立春日雪和赵端质韵

春寒有信不踰期肯为衰顔独见欺白雪已输梅鬪早緑樽尤与火相宜撷来野蔌和萱草分得江鱼贯柳枝刺史忧民民共乐赛牛归去竞褰帷

次韵何子应大卿喜雪武昌作

云气浮江不见边拥炉吟雪思飘然风将急霰先鸣瓦水剪寒花忽际天才澁敢陪梁苑客兴来从泛剡溪船将军乘夜平淮蔡翻笑元和十二年

哀周然明

三荐渠能老一儒班超投笔好从吾功名到手身先死诗礼传家道不孤千里新封从马鬣百年余庆萃鸕雏西风哀挽桐川上傥有青刍致奠无

魏道弼父挽词代曾子修

德邵年高冠里闾庆余犹及魏公舒似闻白鹤归华表应有青刍奠故庐帝梦漫惊虞涧筑史占空叹渭滨渔泫然东望无从涕莫厠邦人会葬车

次韵元发弟秋日德余庵书事二首

饱谙世事转踈慵投老犹能向佛宫危坐遂移桑?日清谈仍对菊花风凭君为我追欢伯自此游山作醉翁闻说秋来足佳句暮归应念锦囊空

十载江湖叹断蓬梦魂时到帝王宫珠帘高卷虾须日宝扇斜开雉尾宫勿谓赵尧刀笔吏须怜窦巩啜嚙翁儿童来告黄花熟可喜樽中酒不空

和戴禹功水云馆留题

兵火间关我尔同相逢聊喜话忽忽山长不碍飞云去江涨应从远水通白鹭晚潮初浸脚雨花遗址正横空临风遐想成惆怅千古兴亡一局终

和秦壽之题天祚宫

洞天无际复无旁乔木梢云十万章身外轩裳谁系绶壶中日月自舒长平生尘垢烦三沐投老功名笑五浆白鹿青牛今在否一声秋磬上寥阳

题浮光丘家山寺

古寺钟鸣漏向残马嘶人起束征鞍瞳矐半弄陰晴日栗烈初迎小大寒溪水断流寒冻合野田飞烧晓霜乾嗟予老踏浮光路陟岵怀亲眼欲酸

次韵秦壽之题四祖

古木参天翠作堆云中石栈为谁开楼台正倚双峰起香火曾瞻四祖来霜重静闻秋子落风高愁听晓猿哀当年松上花何似五叶依然映紫苔【四祖常簪花松上松时方拱把今合抱而簪花处皮独不出其深数尺花犹存焉】

次韵秦壽之题五祖

栽花传法总吾身生灭无烦取次论一梦恍从今日觉羣峰应许此山尊塔中相好如来具手里衣盂达磨存若遇小儿宜借问性华何处更寻根【四祖住双峯一日黄梅道上问小儿姓儿曰姓有不是常姓祖曰是何姓儿曰是佛姓儿後为五祖遂传衣有偈云华种有生姓因地华生生大缘与性合当生生不生】

题四祖山瀑泉亭

予绍兴二十七年秋七月丁卯至山中登瀑泉亭徧閱先贤留题佳句追和主客杨次公韵

云影瞳矐雨弄晴山头小立听溪声不惊赤日雷霆吼但怪青天雪雹鸣气逼衣裳秋暑薄光

摇林数午风轻法身清浄元无垢何用临流更濯缨

赠五祖山净老

欲知祖意路堂堂满目湖山自放光林涌乱云迎马足峯迴荒磴上羊肠心花肯逐春同老法雨何妨岁用康试向樵夫问端的白莲生处是吾乡

赠古若之上人

灏潭澄碧见师心我欲穷源何处寻万壑松风酬夜讽一犁花雨发春吟不妨契濶三年别却得留连数日陰竹外小桃开也未灵云应已久披襟

送浮屠昙远归无为持鉢

一筇春色满郊畿弹指淮南迅若飞丈室正须香积供孤云聊作故山归长安城里风烟好锦绣溪头笋蕨肥我有上林桃李约未容随子赴亲闱

宿吉祥寺赠应上人

窗前修竹翠摩云清閤题轩念昔人三纪重来惊隔世一言相契定前因携尊得得纷亲友扶藹累累萃里民祖意如来烦指似迷舟何幸济通津

雨中宿竹林寺谢尉仁父见访

幽人好客不嫌纓带水拖泥辱顾予僧舍顿惊樽有酒旅庖那患食无鱼敢辞数里来相遇要使它时付特书新竹茂林中扫迳一瓯春雪少踟躇

示隐静恭老

游山何敢避泥涂恰值催花夜雨余杯渡已知无用楫马行今信不更车数声幽鸟过庭际一派飞泉赴壑初正欲寻师问心法却惊行色逼钟鱼

送懿上人持鉢潜川

坐觉青山忽上心着鞭来欲故人寻万松未放孤云过一饭共听幽鸟鸣莫厌崎岖穷野径须怜料峭结春陰潜川耆旧如相问千里长同月一襟

横枝山北别懿上人

青山终是慰人心到处相逢不用^问顾我未能忘楚些因君聊复效吴吟遥林入眼增双碧羸马
犇家竞寸陰何事横枝送南北他年同此记分襟

因上人访予相山夜闻二子诵书有诗次韵

杖锡东来意亦勤寒岩枯木自相亲方惊妙论雨侵坐忽喜新诗光照人物外交游清似水梦
中忧患碎如尘儿童正欲承砉错应觉临文便有神

还通上人卷

格清词苦与谁论携绕钱塘给事坟所得岂容人继和朗吟应被鹤听闻月轮冷照千岩雪霞
片轻装万叠云投向吾庐卜知己拟将诗草为师焚

次韵和朗公见赠【朗公少年曾游荆湖识虚中斋已】

朗公垂老尚吟诗曾泛三湘看九嶷欲问劳生心扰扰强酬佳句思迟迟红尘策马殊无味碧
杖移僧自合宜共待中条山有雪寺楼吟望更同谁

赠省钦【师善八分太宗召于殿上书数行赐紫衣】

旧隐何年别翠微瀑泉声外鏤禅扉御前曾写八分字天上特宣三事衣灯照夜庵霜後冷鼎
烹秋菌雨中肥终归五老峯边去杯渡长江一锡飞

和因上人三首

当涂瑞像因上人有诗欲献之郡将出以示予予报之三章其一嘉浮屠之能为吾儒之学而
欲诱之使至於道也其二写寂寞幽郁之思於偕来何子以相慰释也其三有怀吾亲将归耕
相山为终焉之计也知我者幸不我诮非敢言诗也

一抔兰若复谁家坐见羲和下日车燥吻未濡莲社酒枯肠空搅玉川茶摇风綠竹初翻箨过
雨红葵甚放花得句至今频示我安能郁郁久兹耶

归骑何时遂到家苍头猎猎走风车丑妻终胜长为客薄酒能无更饮茶梦断北窗凉似水望
中南亩雨飞花采莲游女应相识早晚扁舟访若耶

白云飞处是吾家石眼泠泠水一车醉日到来应种竹梅时过尽好藏茶遥怜壶枣初成实似
说占禾半吐花已得伽陀微妙句归欤香火讽罗耶

赠朗上人【朗公少游渚宫与齐已相识】

净剃霜髭展旧真自疑容貌是前身僧中独守三千戒诗里闲销七十春僻寺藓深人到少故
山云好梦归频禅斋近日谁还往只有西垣放逐臣

赠赞宁大师

诏修僧史浙江滨万卷书中老一身赴阙尚留支遁马援毫应待仲尼麟冥蒙雪影松窗晓狼
籍苔花竹院春还许幽斋暂相访却慙陶令满衣尘

朗上人见访复谒不遇留刺而还有诗见谢依韵和答

汤休访我我重寻独叩松关絶好音满袖尘埃回俗步一鑪香火隔禅林偶留刺字情非浅忽
枉诗章思更深犹喜谪官无吏役往来从此伴闲吟

赠遇公上人

卧云衣服半斓斑吴越烟萝旧往还几度看涛罗刹石经年寻药武夷山剃髭刃澁秋窗冷补
衲灯微夜榻闲应笑劳生苦多事槐花时节入秦关

寄赞宁上人【时上人进新修高僧传有诏赴阙】

支公兼有董狐才史传修成乙夜开天子远酬丹诏去高僧不出白云来眉毫久别应垂雪心
印休传本似灰若念重瞳欲相见未妨西上一浮杯

和天宁因上人次韵

日月漂流一鸟过别来心迹病维摩是非孰辨聊分谤诞信相讥要止讹摇落独怜松不改澄
清尝见海无波句中有眼劳开警更问诸人会得麽

和褒山因老二首

湖上逢师又到家别来诗句好相夸休嗟晚菊今迷草且喜寒梅欲放花丈室香温岩宝坐将
坛风软拥高牙相思对雪酬珠玉不觉茅檐送月华

岛可文章似出家不将言语落浮夸雪中令我思风絮天上因君合雨花一炷飞烟云天矫数
行佳树玉槎牙山高殊觉青霄近扃扉南窗向日华

次韵因上人谢徐守遗顾渚茶

相从聊罢致书邮情寄诗筒早晚休顾我未忘童子好评君还向古人求绡衲启处云英馥石

鼎煎来雪浪浮多谢徐卿分顾渚报之琼玖两相收

五言长律

送赵端质归朝

圣治中兴日宗藩第一流九重资共理三载赖分忧昨日交符虎当时竞带牛咄嗟成药石谈笑获锄耰善政称无扰罢民遂有瘳教风兴子弟膏泽被田畴士论高强汉王功继屏周外台书课最禁从表才猷往矣登青琐宜哉建碧油疮痍争借寇憔悴独依刘我愿攀鳞进入思卧辙留是行端可喜名姓在金瓯

过富池题澄江阁二首

晚日千峯色秋风万里情望云双目眩渴雨寸心倾有客诗方就何人笛正横渚烟萦别浦江月动前楹草木腥犹在生灵痛未平伤哉一杯酒北向酹边城

江山南北限风月古今情举酒杯还覆逢人盖暂倾目穷飞鸟落心逐断云横小市支残屋严祠列画楹晚烟渔艇远夏潦荻洲平试问濡须路归欤过几城

次韵刘春卿书怀

老去宜安分年来强竞辰功名虽自许心腹欲谁陈赖有金谿彦相从锦水滨词华三凤蔚诗律八音纯风月论交旧云山发兴新鄙怀烦澡雪高义叹倾囷李峤真才子唐邕实异人感时悲鹤战忧国赋车麟寤寐思摧敌行藏冀泽民廉高辞郑粟狂笑取韩银松柏迷荆棘琳琅杂珉珉北游观赤帟西走避黄巾端木谋存鲁长沙论过秦江湖双醉眼天地一闲身遵海嗟黄屋垂衣想紫宸擒王须李靖抗贼付张巡尚缓三城役方驰六轡询两河蜂伴蚁多垒介和麟烽火青淮隔楼船古汴堙离宫埋茂草禁籞掩荒榛典册尊诸夏戎羌守四邻如何来丑类容易破重闉大厦烟焚突长堤蚁溃漚复垣闾阖夜层观景龙春蔑视排奸魏空闻识反甄伤哉无止鼠甚矣不由鹑天启中兴运时当外侮宾此生那习坎吾道已康屯黄卷何妨对青灯正可亲侏儒归櫜括苦窳入陶钧夸父劳追日顔回怅絶尘庙堂资赞辅岩穴忍跼踖炳焕文中虎玲珑席上珍肯终虞涧筑聊滞越山薪君壮勤非勉予衰懒是真会看鸣鸞鷟相庆画麒麟簪绂行当贵藿盐莫厌贫仲尼忧悄悄扬子恶频频守节身何屈移忠道自伸秋吟足佳句飞动笔如神

追和韩退之雪韵

一时符衆望七尺验童謡人喜丰穰兆吾知瘴疠销戲看还扑面闲试欲齐腰堕絮纷辞萼飞花半惹条松篁低到地溪涧合平桥月牖潜争入风帘静自摇红金延坐夜緑蚁送行朝暗上歌茵隰轻随舞袖飘千林翻鲁缟万里藉鲛绡灯市堪行乐何妨酒价饶

菊有黄花为彦逢弟壽

正色憎桃李凌霜见嫩黄有同高士操常占晚秋芳
裊裊金风软溥溥玉露光君恩隆一束时令应重阳
幸遇桑蓬庆欣逢麴米香敢因难老祝采掇奉瑶觴

春雪和袁望回三首

残岁连人日同云暗海涯晨开才曛晷暮集复交加
野色铺霜缟秋光散玉葩老夫僵不扫稚子走争拿
皎洁欺梅萼严凝禁草芽饿彪迷旧穴惊鴈失圆沙
有客方夸酒何人欲鬪茶南山歌禹甸西国想毗耶
弄日乌薪熟围风翠幙遮岂知春霁好万物动芳华

谁谓过残腊余寒遂有涯雪来风益横水着雨还加
万里隋堤絮千山庾岭葩袁门晨尚闭剡艇夜应拿
百蛰犹含土羣芳敢放芽娇红还玉茗新緑借金沙
力胜榴花酒功高雀舌茶人心愁甚矣天意欲何耶
好放朝阳出休从宿雾遮青腰诚念我明日变霜华

棱棱威正肃浩浩意无涯雨息风还怒霜余雪更加
璠还席地蒼卜竞分葩虎饿豺狼抐乌穷鸟雀拿
木冰鸣玉佩檐溜轧芦芽鹤集疑惊露羊羣忆卧沙
晚餐甘当肉卯酒薄胜茶盈尺其多矣踰旬果是耶
日车行自驾云障欲何遮坐想传柑饮千官从翠华

和袁望回春雪

白雪嫌春晚纵横布玉霰柳花随处发瑶砌逐门成
旌别寒松茂摧残冻芋萌飘飊无限思料峭有余清
舞袂朝犹湿吟窗夜自明色疑侵两鬓光欲眩双睛
曛晷干林晓潺湲万壑晴江梅含故态山鸟弄新声
雅与诗情惬应怜病骨轻浇肠一杯酒风力鬪峥嵘

对雪和子 用欧阳子韵

散漫来天际高吟正倚门远山云母合芳树柳花繁
匝地银无价冰湖监有?何人穿敝履有客拥高轩
访戴从东棹游梁快北辕鼎寒香屡拨杯冷酒重温
风力千林吼云容万骑屯食余盐虎卧坐久炭猊蹲
观舞更三叠论文罄一樽清芬难揜覆端的属梅园

送杨德润赴礼部试

雨意止还作天容寒未舒无聊怀剧论何幸过穷居
举白夜酺酒剪黄朝荐蔬新诗闲鼓吹旧隐乱丘墟
轩冕时何晚山林计亦疎中兴屈羣策入告莫踌躇

追和东坡立春韵寄彦逢弟

荏苒岁云暮艰难予岂堪关山怀远别弓矢废清谈
风色霁还暖梅梢春已酣信音惊远鴈心

绪乱游蠹投笔班超近擒戎李靖慙行吟望西北赴难有虞潭

六言诗

和徐季功墨梅

闲想窥池倒影戲成落笔斜枝纵?难溜玉质细看何似当时

便是朱唇素面那知綠叶青枝淨几明窻展处微风淡月醒时

五言絶句

题成国仲画扇

奋髯欲何为戢翼应有待画工妙丹青物状从变态

题马以道画扇

寒芦卧踈黄远水分淡碧秋荷如有情相映两瀾

追和鲁直蜡梅二首

一种幽素姿凌寒为谁展似嫌冰雪清故作黄金浅岁穷压霜雪春至喜风露一枝蜡梅花清香美无度

送道者史宝通作丐

昔日山前寺兵余扫地空汝今能协力真是宝林通

又送道者王法圆作丐

誓将三寸舌求结万人缘宝刹成功日当期道法圆

送浮屠道廓

一宿已先觉四明那更游去来无所着风日海山秋

<集部,别集类,南宋建炎至德佑,相山集>

卷十三

钦定四库全书

相山集卷十三 宋 王之道 撰七言絕句

送贾教授伟满罢东归

赤城贾之奇顷闻驰声贤关远追其先洛阳年少予愿见之久矣是行分教武陵予偶将命本路遂获相从於此首尾三年而儿辈因得朝夕承教可谓幸矣今报政还朝予亦早晚当罢去语离江滨令人怅然因成二十八字奉送行色隆兴改元冬十月戊辰

妙年才气擅超羣试吏来司泮水芹行矣玉堂应召直忍将风袂与君分

重阳示二三友

龙山何处暮云黄坐想前贤落?狂萸实菊花良不恶为君沽酒作重阳

秋日悯旱题香山庄舍

千里骄阳稼穡枯人心穷极但天呼须烦岩壑为霖手下泽苍生慰海隅

寄梅花与曾子修

待船聊复驻征骖手捻梅花望翠岚花似若人清絕俗故从江北寄江南

送曾式古归建昌

两年说归明日归江头草软花芬菲风调江净船行驶好看芳草怀春晖

酬孔纯老送海错三首

海错东来自四明感君怜我故分珍拜嘉何必须豪饮大嚼姑从得句新

螺头已荷兼三和凤髓何须贵八珍多谢邦君怜不饮只将诗句巧争新

恶语岂堪酬妙句麤餐曾不餍常珍得君海错俱奇絕从此鄞江发兴新

和子厚弟春日见寄三首

睡起晴牕正忆渠老兵声喏到前除新诗价重连城璧便觉贫家富不虚
一鞭春色去迢迢溪上红粧笑语娇酒醉不知行客避竞眠芳草鬪裙腰
十里西畴马送曛晚风依约度溪云悬知今夜桃花雨一洗焦枯慰使君
谢潘壽卿惠牋并诗

饷厚东阳一万番从今难放笔头闲新诗正与花牋似文彩纵横咳唾间
道上杂花盛开

涓涓流水雨晴初夹道山花簇彩舆千骑不辞迎候远物情春意竟何如
风雨损花

雨多南国惜春归多谢诗人赋采菲堕白残红无处着漫随风絮作团飞
落梅入砚池

玉佩翻然下帝傍墨池照影妬新粧时人莫作飘零看收拾毫端无尽香
玉树花

几年埋没乱荆榛轩檻移来特地新何事临风忍相对伤心一曲旧亡陈
芭蕉

秋风鸣玉雨踈踈嫩绿临牕半卷舒似是相知慰牢落朝来肯寄一缄书
菊

千林摇落见孤芳色映青松破嫩黄玉露凄凉三迳晚金英芬馥几丛香
山茶

开花不与衆芳期先得江梅破白时犀甲鹤头微带雪画屏曾见两三枝
荷花

亭亭青盖倚宫粧新浴温泉体自香暂借青风来一霎欲披云锦见蜂房

红梅

穠华不与衆芳同偏爱施朱立晓风莫道春来无酒病脸霞犹带夜来红

题乌江官舍木芙蓉

桃叶萧疎柳叶黄清寒应怯夜来霜芙蓉雅与秋相好独对层台试晓粧

青梅

疎白欺人侵短鬓老红乘酒驻衰顔食梅已判非吾事把读清诗忆故山

和魏定父早春十首

早从子美追懒真近向长康得痴絶相逢可笑复可怜君看稀疎鬓边雪

安得都护胡青骢与君并轡摇玲珑南溪今日冻初解好看游鱼翻鬣红

依依杨柳绕溪斜黑白溪头鹄伴鸦雨过芜菁自春色一丛茅屋野人家

晚来天意欲晴寒幽鸟争春到舌端诗骨自怜山样瘦酒肠君似海能寛

门前溪水緑萦迴风穀无边费剪裁待与东君写春色好教红紫一时开

春到花梢一点红吹嘘应谢晓来风南园繚绕城边路无限诗情杖履中

??溪流碎玉鸣野梅随处伴行人归欵路出临邛市準拟沉浮麴米春

怪来庭砌堕寒梅风笛数声清以哀两日枯肠餒蔬笋不堪茗椀发轻雷

辰瓜醉竹定何如试问君家种蒔书坐久幽牕转斜日恰怜梅影上衣裾

南禅相望无多地深谢高轩日见过归去山林遂闲放却寻农圃问谁何

和秦壽之春晚偶成八絶

相从辄莫太忽忽赌酒分茶自有功谁谓春归无处覓柳蹊飞絮乱因风

照眼酴醾正及时
鞦韆红相映似相知
天公应也怜芳意
一霎轻风宿雾披
花外霏微雨弄晴
乱红狼藉过清明
伤春正苦无聊甚
接接欣闻噪鹊声
官闲时醉秀溪春
醉里吟诗字字新
欲报自惭无好语
年来胸次亦埃尘
欲下荒庭意已阑
一枝红药坐中看
东风不息成何事
又酹春陰作夜寒
轻陰还傍麦秋天
病怯春寒独衣绵
老境不知行乐好
坐来芳树看莺迁
春来谈笑数追陪
多谢传杯不放杯
醉里狂言应可笑
问春归去几时回
带雨飞来燕一双
问伊何事为春忙
野人不解呢喃意
勉强搜吟对麦光
和王園中道上初见梅花二首

马头惊见一枝新
夹道欢呼拥吏民
咫尺招提鷄黍约
不妨同醉万家春
安养疮痍过所亲
野人何幸预斯民
自怜枯槁无生意
遂与寒梅竞得春
和沈次韩春日郊行二首

杨花落地鷓鴣飞
百里湖山碧四围
信步不知行几远
却怜芳草伴人归
山色新晴一蘸青
隔溪无数野花明
杞苗荻笋肥应美
采掇何妨趁晚烹
和张文伯春日劝农

奉诏欢均草莽臣
郊原风日自温温
欲知太守催耕意
重谷劬农本圣恩
和刘春卿秋夜对月

天宇澄清桂影秋
骚人乘兴欲登楼
楼前白水三千顷
滉滉熔银烂不收
和章序臣梅花二首

之道比因诸公以职事多出
无复有以诗相牵帅者
笔砚遂埃没
今日偶得早梅数枝不敢独有
漫送序臣乃辱妙句辄嗣元韵奉谢

三月诗筒絶往来有时谈麈许追陪梅花雅欲撩佳句犯雪凌霜为我开
多谢苍头语我来恍如相见笑相陪新诗高妙梅清絶展读花前病眼开
和孔纯老江上避风题酒肆

对酒应从暮吹号酒行还喜荐溪毛若将物象评诗思须向江头看怒涛
和张文伯黄悦之席上赋雪

功成三白到春迴好放云天万里开今夜子猷方对客却烦安道过溪来
和张文伯先梅後雪

六花无怪索诗催正恐清寒勒早梅待得江头千树暗故争明洁逐风来
和子厚弟冬至即事

天容如监地无尘阳气依稀动紫荆日晷渐长端可爱霜华增重不胜清
和王觉民双泉道中

白云深处是吾家山市归来日影斜独立前村聊送目孤村流水闹寒鸦
和鲁如晦七夕

乞巧谁家绮席开夜阑箫鼓趁虚催启明不为牵牛计又放朝阳送曙来
和陈天予经过南巢邑人迎旧尹

君来井邑笑烘烘君去萧条迴不同似说攀辕如昨日可怜身老长儿童
和孔纯老别邻居钱进之醉寝留题

不敢搘筇问起居虑烦焦脰破兵厨杜门终日无人顾新竹墙头出万夫
和张文伯洞庭柑

金苞照俎出双柑想见和枝映笋篮欲倩玉纖分玉液要濡燥吻发清谈

和刘春卿晓起读书

梦断幽禽恰转更窥窗残月淡孤灯孜孜读诵如吾子指日菁莪看锡朋

偶书

万事秋来只信缘为谁清 晚风前断虹收尽廉纖雨喜见江南八月天

和吕子梅题陈倅牕前新栽竹二首

封殖要当同种玉翱翔端复见停鸾此君不是尘中物岂减樊川十万竿

自是清陰能借润不应积雨尚流寒先生端的礪溪裔乞与沧溟作钓竿

和陈勉仲赠淮西漕吴介之二首

威严霜肃德春阳民感澄清涕泗滂畏垒大穰知不晚三年端可笑庚桑

九郡疮痍赖拊存年来和气浹江村此恩未易论天报请看于公大里门

和赵积中白莲三首

翠盖亭亭水满塘六铢新制带天香晚来扶洗娇无力尽鬪冰肌不鬪粧

清风习习晚香微坐使诗人赋采菲想见温泉初濯玉侍儿娇拥太真妃

耻同流辈弄胭脂一樣新裁雪白衣何日与君携酒去两般分取载将归

和张元礼水仙花二首

素颊黄心破晓寒叶如谖草臭如兰一樽坐对东风软敢比江梅取次看

沉水香浓画不烟赋花谁是饮中仙顾予老拙辞源濫空想东坡万斛泉

和秦壽之铜陵江上二首

枫叶霜余霞灿烂苇花风起雪纵横铜陵江上秋容好两絕新诗取次成

烟销远水分帆影木落疎林出斧?嘯咏不知红日下九华何处望中昏

和子厚弟九日登魏文振亭园七首

潇洒湖东小小亭一时酬唱有三明
亭前澄练无边际应助诗人写物情
乱插黄花趁节宜年华休向镜中悲
已知和气回春谷横管临风更一吹
一龛灯火夜凄清壁下秋虫断续声
细把新诗等风味易牙元不乱淄澠
疎懒常嫌束带劳年来见客强垂条
不知此病容医否沥沥真珠出小槽
雨余东北望银屏一带寒山映骨清
谁道西风能换物染红枫树亦多情
宿雨飞花阻撷芳寄题端欲为增光
何时登揽快晴日?茗挥毫看瑞香
官道千秋坐小车仙随阮肇饭胡麻
男儿正患无津耳千古留侯事可嘉

时雨二絶和赵积中韵

稻花时候一犁雨天意从人无间然
我亦摧颓穷甚矣烦君试考小行年
白江州熟人炊玉竞说前年斗万钱
何事农夫太庸鄙欲将豚酒谢苍天
綠萼梅

天然膩玉细生香斜倚东风竚淡粧
可是春寒犹料峭晓窗犹试綠罗裳
榴花

看花令我忆金明五月尊罍竹叶青
窈窕宝津楼下路断肠千里四周星
送顾渚茶与孔纯老

晓来飞雪似欺春尽把羣芳点缀匀
莫讶两旗分顾渚要令佳句鬪清新

卷十四

钦定四库全书

相山集卷十四 宋 王之道 撰七言絕句

追和东坡梅花十絕

春到梅梢日自和动人芳气不须多清肌瘦骨如冰玉瘴雾那能柰子何
盈盈终日对粧台一树临溪欲半开吟赏不须期烂漫恐随春雨点苍苔
一池春水綠萦迴池上梅花暖自开想见温泉初出浴六宫遥指太真来
问言何处是前村万木号寒雪障昏安得梦为蝴蝶去花间栩栩适吟魂
真香暗逐微风远疎影低随淡日斜好在黄昏清浅意一时收拾付诗家
醉眼昏昏午倦开不堪诗债苦相催清香自是蠲烦药为折霜蕤一朵来
莫怪风前玉笋飞饮酣初喜传花枝正当北雪消残後恰直东风料峭时
绦跗檀口映冰肌踏雪来看带雪枝一见遂能消鄙恹汝南谁敢忽牛医
步入芳丛脚自轻看来羣卉眼偏明和羹有实休疑晚况是东君旧着情
山下溪头卖酒家为谁低入屋檐斜蔬肠不柰村酤澁笑挽长条沃井花
梅花十絕追和张文潜韵

额黄肌粉鬪新粧春入园林度暗香留滞江南归未得一枝聊复沃愁肠
晓来飞雪缀林端冰玉肌肤巧耐寒折得一枝红半吐自揆香蘂当朝飡
年年常是犯凝寒换骨曾凭九转丹结实和羹知不晚试尝花蘂味应酸
竹外山前见嫩黄水沉清渍雪肌香应嫌桃李风姿俗故作寻常淡淡粧
檐花灰涸细如尘渡口舟横不见人独喜霜蕤清照坐旅怀虽恶未孤春

凌霜冒雪报花期大小羣芳例是儿屈指春风无十日东君元是旧相知
素艷忽从江上见清香还向雪中闻谁能送酒来相劳为尔开尝对马军
冬温开遍向东枝映日含风万玉姬何必霓裳掩前古清癯端不羨丰肥
别後开园日就荒对花还忆少年狂东荣几树应无恙待得予归破嫩黄
花前倾步溅狂澜花外扶疎竹数竿带雪精神清更好冰肌元惯朔风寒
梅花和黄觉民四首

淨几闲牕小小餅一枝春色为谁清吾今老去心如水销得诗人与证明
萧然清映水边枝似向温泉见玉肌被恼诗人应不彻怪来言语总成诗
依倚春风雨淨餅暮林摇落避真清暗香似与常娥约来借黄昏淡淡明
夜来春信到南枝姑射神人逞雪肌多谢长须解予意送将羈客换新诗
和王元渤留题松壽岩白云庵寄郑顾道二首

流水泠泠浸稻田岩耕应费买山钱风梢雨盖摩霄汉个里高人即地僊
日影曈曨霁晓雾几声幽鸟隔窗闻谢安盍为苍生起休恋青山卧白云
追和贾明叔侯陟明二侍郎瑞香二首

睡香始生庐山中世未有识者一日有高人方白昼睡恍然若闻异香忽神思清发觉而寻之
得此花於苍崖翠壁之上故因以命名今乃以为瑞香非也虽然无害香谱中未有以瑞名者
而此香独得之花谱中未有以香名者而此花独得之吾知子弟蕙兰?奴龙麝绰绰有余裕也
因追和无为先生韵庶几当世知音者为我击节

日午高人睡正浓幽香初破碧山红忽然梦觉寻无处会有东来一阵风
深院重帘数尺墙对花何必竟烧香九龄风度高难挹举世纷纷漫笏囊
和富公权宗丞十首

门外传来一轴诗烂然蓬荜顿增辉匹夫不敢贪怀璧什袭今从故府归
展读新诗次第看管中文豹喜窥斑不知笔力能豪放落纸云烟欬唾间
闲想当年啸咏声一时人物鬪峥嵘江山清壮今犹昔谁谓丹青画不成
後來模楷复何人千载风流郭泰巾欲睹诗豪兼草圣一尊聊发洞庭春
行草应曾閱鬪蛇世情无识笑东家君看横雨随风势纸纸清新字字斜
昂昂野鹤在鷄羣一见人分浊与清吟对红葵朝雨细坐临綠竹午风轻
舍北湖山千叠翠街南溪水一篙深黄鹂也似快晴日杨柳陰中诉好音
恶客未尝知酒圣高人何止擅文豪三司自揣非吾事敢觊徐州解佩刀
嗟予少也戇无奇才力而今老更衰文阵异时逢大敌犹能斩将复搴旗
我惭思澁同司马君患才多继士衡今日相从非偶耳挂冠淮浙好寻盟
观梅和陈天予韵

断桥疎竹带山幽装点诗人覓句愁多谢双鱼传尺素絶胜斗酒得凉州
春风草木初萌动夜雨池塘正拍浮玉骨檀心清更好对花何惜醉扶头
和历阳守张仲智观梅五首

一霎轻风过雨稀满庭春色碎珠玑使君载酒花前醉更有新诗为发挥
万事当从酒到休子山那得许多愁綠樽翠杓梅花夕不醉翻令恶客羞
谁似樊侯哲且明解将勲业佐中兴自怜汨没毛锥子空对东风咏使能
夜烧红烛照梅花刺史风流自一家待得残英上丹脸韶华端复到山茶
出车何日劳师还二圣归来喜见顔乞得此身终芟制乱山茅屋两三间
和徐季功舒蘄道中二十首

春陰连日竟何如逐妇应怜拙勃姑习习晚风来更急欲吹时雨助虚枯
一声何处叫提壶杨柳陰中驻犊车笑语谁家駉儿女浣沙溪上数游鱼
溪流灩灩草凄凄春日农郊麦穗齐卷地东风还作恶片云随马渡溪低
拍溪春水鸭头青溪上哦诗醉眼醒不见梅花寒蘸影野桃山杏自娉婷
三日春霖发土毛道傍芳草半人高马头问是棠梨市一片梨花映小桃
野鸟关关督驾犁及时新雨土膏肥知君有意农夫劝故故穿林傍马飞
草满池塘水满川雨余溪溜正溅溅黄梅恰在山多处披雾时看一握天
山下溪边阿母家春雷初过茗生芽马头睡思浓无那一碗何妨泛乳花
一夜西风作晓晴纷然花草鬪欣荣苍松巧与夭桃并漫使诗人意不平
春云漠漠雨纖纖花柳丛边见酒帘心为惜春无处着可堪啼鸟更般添
晓光晴影正瞳矐转眼还惊日过中芳草岸头人渡水洛阳影里鸟呼风
草色青青入烧?登临何处暗销魂应怜野老无拘缚种竹栽花教子孙
欲识吾君圣与仁泽流寰海衆熙春两淮饥饉方移粟六轡驰驱不憚勤
日迟风细午陰微柳外青骢去若飞过得水村闻笑语几家扶得醉人归
庭闲人静鸟窥帘坐对文书亦倦拈春旱正须三尺雨江湖寧放老蛟潜
帶雨醺醺不自持短垣高榭倚斜枝野人莫觅丹青手摹写春容一絕诗
下马邮亭忽喟然数间茅屋起孤烟山花狼籍余无几断送归心起杜鹃
怪石形模老牯同漫将名字责农功得来正与齐田类谁敢言耕望岁丰
灂?归来麦已秋相从时说白云游八年不践同安境梦里山溪记旧由
光风习习日晖晖堕絮飞红积渐稀芍药醺醺看正好一尊能共送春归

和陈勉仲大寧院见寄

使驿驰驱赋陟冈等闲诗戲况逢场清和在序芳菲歇草色连天水满塘

和徐伯远无为道中

江南五月稻抽芒想见含花带露香底事淮乡太迟晚一犁新雨正开荒

和徐伯远见寄三首

我家湖上面九华无钱买山山见賒待栽北牖一坡竹追配东门千载瓜

新炊香软桃花红蕲州竹簟初出筒老翁易饱更甘寝便便一觉南牕风

三诗自可当尺书得书何必须双鱼黄花强把酬雪白丐君捧腹聊轩渠

和陈勉仲四首

清风为我晓开关风外浮云过雨还湛湛可怜清上下一篙溪水水边山

何日清游继大苏扁舟东去泛西湖欲将景物和诗句写作钱塘伟观图

拍天湖水注东关水外渔舟破浪还谁似老僧闲有味清风一榻面佳山

雨过山前草木苏开窗澄碧渺金湖近来翰墨君为絶喜见诗中有画图

和孔纯老按属邑六首

野云和雨渡金湖山色微风恍有无不惯扁舟浮浩渺且驱羸马上崎岖

云涛雪浪渺无边一簇溪桥客聚船輿卫欲休红日下几家茅舍起炊烟

行并焦湖试问涂何如震泽占姑苏提壶聒聒劝谁饮我不知君渠自呼

客里宵寒梦易醒起看残月照窗明招提正在山多处过雨流泉碎玉鸣

石窦泠泠注竹谿谿光浮动软琉璃幽人爱玩不忍去觅句坐惊红日西

榛莽无边没尽头当年禾稼压田畴流亡复业知何日九叙宜先戒用休

和戴禹功幕府归来三首

抖擞空肠一字无下邳能复异时书中兴正欲平骄寇莫若相如赋子虚
客里诗成付漫书清风一榻黑甜余相山旧隐今分定却是归来计不踈
临淮终日监修眉水外遥山尺五低我欲骑云叫阊阖请将捕寇付平西

和由字韵

当年相望见无由千里荆襄隔数州时得新诗夸好句服膺何止钓槎头【仆顷在湖北闻巨源诗名】

和赵积中

日下高城月入扉蒲葵不动晚风微幽人信步如相过买酒黄公一醉归

秋日即事二首

潮退菰蒲风自倒秋深菱芡雨应添怪来病眼双明甚喜见遥山寸碧纖
枕缘睡熟来魂梦衣为酣频带酒?多事长红兼短白雨余相倚映江村

秋日野步和王觉民十六首

芡觜静緘秋水碧梨腮深抹夕阳红近来诗社争相胜幽讨冥搜字字工
桑林闲觉踈黄减菜陇贫怜嫩緑添秋水接潮还潏潏晚风吹雨乍廉纖
穷愁长怕诗撩拨幽愤须凭酒破除对酒更遭诗债窘可堪毛穎不中书
揉蓝拍岸秋涛信列炬缘山夜烧?枫叶经霜红更好晚来扶杖过前村
荷叶倚风摇败緑蓼花沾雨卧衰红物华虽逐穷秋老诗句翻从壮岁工
迂愚长与懒相兼岁晚空余白髮添坐送夕阳还黯黯倚看新月露纖纖
五穷韩愈烦驱逐一室陈蕃倦扫除我有顷簷旧诗集当令阿买为君书

雨晴庭户生秋意潮落溪桥见水?稻熟人家得相向兵余眼底两三村
酒嫩细斟浮蚁绿茱柔轻剥汗衫红搜罗物象嗟予拙挥扫词章放子工
孤灯闪闪风还暗清漏沉沉夜向添案上数枝溥露菊可怜踈落嫩纖纖
簞瓢不失生涯在诗酒何当习气除欲倩雕弧落新鴈足间寻觅子卿书
雨开繁菊金无价风皱平池监有?日暮客帆何处落柿林西畔荻花村
烟里山光陈水墨云边日影乱青红新诗有画人难到高压澄江五字工
更穷诗债应难欠纵懒书淫亦自添水外修眉横翠巘试凭张敞画浓纖
人言会饮辰嫌酉我为求医日问除老去谁能遵百忌秋来只欲上三书
病怯酒杯微过量瘦怜衣带颇寬?伤心故国迷烟草秋日荒凉处处村
和卞养直见示三絶简圣书

看君落笔走云烟想见新丰醉少年龙脊旧堆骐驎种义方今服乃翁贤
杨柳陰中乳燕飞马头寒峭怯单衣胡麻知有谁人种应怪东游未即归
迟日轻风过雨天笑声何处送秋千清明已逼长安近寄语先生快着鞭
朝晴

朝来霁色快行人嫩绿妖红照眼明去去谅无留滞叹不妨寒食半陰晴
晚晴

飞霰飘飘堕晚风乱山无数暮云同天工却似怜羈旅又变霜华见碧空
一舍麻城指顾中远山横翠慰吾惊劳生艰险今尝遍休把狂言吓老翁
北去安丰

问言何处是安丰人指湖光柳影东欲识淮西真使者一鞭追驥有诗翁

安丰道中

水满陂塘草满川望中茅屋起孤烟十年不踏安丰路遂与清淮作次边

给散告帖

曾随骁将远追犇勇冠诸军继虎贲圣主念功知有自一时高下拜新恩

早发橐臬

春秋遗迹旧山川鲁破吴亡久寂然恰到前年征战处数间茅屋起炊烟

集英殿赐第出马上口占

鞭丝曳雪縹官槐綠阵中间一道开高下未劳轻喜愠相公曾作榜梢来

合寨陪诸公观月

一樽相对夜厌厌风卷浮云见玉蟾凌乱请看矛作舞清光炯炯已窥檐

永丰道上阻水

路穷得水欲何为立马逢人问所之十里归来同小愒一鞭南去不踰时

独步

雨晴烟渚白鸥乱风过霜林红叶稀独步幽吟心正苦却怜明月照人归

岳阳楼

云开层观切高寒三面江湖一面山眼界不知多少远望中幽鸟暮飞还

书子莱丙戌登科题名小录後

屈指宣和岁在辰於今四十有三春吾家又得莱追继丛桂从兹不乏人

寄二儿

老懒谁能教子孙静中犹喜读书声有如双凤传家学令我闻风畏後生

次韵赵积中慈湖即事

江南七月旱不雨卷地风霾翳寰宇夷门先生有底忙车马东游亦良苦
干戈九载予心哀乱离谁复歌南陔喜君父母老相守调官仍逐金陵来
入室儿童隘函丈想见彩衣还谑浪挂冠如欲赋田园一水淮乡足闲旷
嗟予留滞行当归秋雨夜寒闻捣衣短檠明灭泪眼暗谁令不寐心如飞
山色湖光过雨清江边归骑净无尘先生有酒快吾取相逢少见如斯人
平生可惯偿诗债追骥疲弩况加怠不妨对客自挥毫文社於今有淮海

卷十五

钦定四库全书

相山集卷十五 宋 王之道 撰七言絕句

冬日出郊二首

覆块青青麦欲齐田家篱落柘冈西岁饥冬暖聊相补扶藜归来饷莱妻
一鞭乘兴上山头雨脚随风湿破裘冬日有情还可爱忽开云雾见林丘

七夕苦旱望雨

田禾吐白将就槁野草垂黄几欲燃来日天孙嫁河鼓洗车今喜有夤缘

游毛公洞六首

说诗人去想云车千古青岩倚碧虚训诂未容端拜议一言聊复问关雎
旋披荆棘入山来洞口晴烟翳不开试问真人竟何处他年相就谒蓬莱
须信桃源路易迷野人遥指过山西由来石室非仙窟漫向云中覓旧蹊
山前踊跃见樵人欲问神仙更问津指点长柯向东去不知银穴又非真
徘徊银穴送斜晖散遣长须上翠微青鸟似知予意确故传仙语傍人飞
偶因青鸟遂幽寻翠壁苍崖白日陰三扣石扉人不识满山松竹自悲吟

题太湖驿竹轩

粉节储霜竞出篱我来犹及笋生时清风一榻君休问明月半窗予自知
过水南题范谏议书室

函丈当年贮卧龙笑谈曾记一尊同幅巾已起草庐在寂寞溪山空晚风

题德章山

丛环泼黛千峰色急雨霖霖万壑声莫讶祖师来入梦祇应知我欲山行
过含山邮亭和子厚弟壁间韵三首

犯暑篮舆趁晓耕东风迎面葛衣轻过山缭绕湖边路杨柳阴中带月行
透云斜日影朦胧树杪依微少女风景物重来正无恙为君收拾向诗中
开窗如见碧油幢新竹春来过屋长渐近柴桑旧家路清风来报稻花香
吴兴舟中有作

一水濡须百里间举头遥见水西山微波不动又终日安得扁舟送我还
春日偶成

短垣新雨上银泥柳外幽花咫尺迷独喜流莺解人意一声声傍绿牕啼
春日书事呈历阳县苏仁仲八首

篮舆兀醉出东门赖有官舟为解纷流马木牛今已矣其余儿辈说三分
芳草池塘处处佳竹篱茅屋野人家清明过了桃花尽颇觉春容属菜花
似是东风恼客心淹留行色故相禁扁舟正在江南岸又扰浮云作暮阴
情似长江流不断事如芳草剗还生此身何苦浮名绊正拟花时取次行
公余槐柳转斜日吏散鸟雀来空庭康成书带可人意坐见茸茸相对青
学似卿家宜有法人如我辈岂无情新诗早自推心服幽会知谁付目成
猛风吹雨暮江头烟草微茫一片愁双鲤不来无处问欲寻归路转悠悠
子美不应花解恼次公何必酒而狂知君颇负风流债安得司空惯窃香
过段寨二首

随行知有笔如椽不碍冥搜借榻眠酒醉诗成还上马秋蛇春蚓任人传

嫩綠天紅照眼明物華春事暗相驚提壺不飲勸誰飲正在竹叢深處鳴

經過合寨吊孟氏故居二首

藤梢棘刺失朱門空想當年載酒樽天色重增行客恨東風吹雨濕黃昏

行過春泥沒馬深幾聲幽鳥啭喬林感時恨別愁無那賴有清樽慰此心

晚憩聞雷

湖外山光入座來水晶宮闕翠屏開纖纖細落催花雨隱隱輕鳴啟蛰雷

含山驛中

日暖風輕晝睡余海棠嬌褪玉肌膚楊花也似知人意來趁飛紅入座隅

鳴山驛夜雨

夜來風雨曉還晴沙路無泥快早行鳥語花容春自好有生何處不安生

夜聞風雨

狂風橫雨忽來鳴半夜長亭客夢驚想見海門春漲急犇軍百萬听潮聲

丘城道中

翠巘中間白水邊野梅官柳似當年正看遶樹下殘日便覺前村生晚烟

出合肥北門二首

淮水東來沒蹕無只今南北斷修塗東風却與人心別布暖吹生徧八區

斷垣甃石新修疊折戟埋沙旧戰場闌闌凋零煨燼里春風生草沒牛羊

烏江道中聞杜?有感

麻葉蓬蓬小麥肥楊花風里杜?啼故園尚阻歸來賦慚愧東坡雨一犁

竹城道中

一溪清水浸余霞
风里归鸿字脚斜
今夜不知何处宿
路回山崦两三家
下阁道中

小桥流水数家村
春入川原日自曛
马上不知岚气重
误惊征袖湿啼痕
西门道中闻人售田

走利奔权几日休
归来还复郭南游
直饶心计奸如鬼
终恐输他善自谋
题大泉寺

六峯环翠绕金蓝
下马初尝一酌甘
久旱喜看云气浹
晚风吹雨过江南
题南巢地藏寺

蚊虻生花夜更长
睡乡蝴蝶正悠扬
山僧不恤秋眠熟
连打钟声到枕旁
题大龙寺

万松邀我上崔嵬
入寺山屏次第开
无说欲知真说法
松声还送出山来
题宿松薤山寺

小驿隳颓不见容
着鞭东走梵王宫
怪禽落日休相恐
五里松篁一径通
题许市接待院壁

一檐冬日送清温
竹萧萧覆短垣
来就老僧同曝背
不妨危坐默无言
题许市施水坊

梦断蓬窻特地愁
卧闻溪水啮缸头
夜航又逐东风去
重叹因人此滞留
宿大泉遇雨

予每远适行日不雨归日雨必作故常苦之是役也以干往肥上时秋旱连数月嘉谷尽矣而二麦未得入土民心忧蹙何翅倒悬当晓发月城晚抵大泉山方弛担与主僧语而山中出云须臾四合入夜遂雨予闻之喜不自知盖非为一已设也绍兴二十四年秋九月壬子

我行常苦雨相随旱甚民心若倒垂坐久云容肤寸合愿同焦槁被甘滋

题苦竹寺海棠洞三首

翠袖朱唇一笑开依风无力竞相隈阳城岂是僧家物端恐齐奴步障来

隔夜西风为办严扫除氛噎出晴天正逢翠幄张青绮应念朱唇拂紫绵

一径封苔知雨足贰车行县昔时迁对花啜茗思春日拂拭新诗益怅然

题崇因院清轩

予政和八年秋九月自冶父还轩车托宿是刹时积雨初霁夜月飞霜溪光炯然如水晶环绕殿阁令人毛发森竖神思清发乃得一绝书之壁後三十七年复经此覓前所题既就堙灭因主僧乞诗复为书之

肥松瘦竹古招提轩檻重游识旧题清意不曾吟得尽夜来明月浸寒溪

法云寺和汤立贤留题

寺占湖边数亩山杖藜偷得一朝闲昨朝恰别居巢长又喜新诗在壁间

题大善寺

絮?曳丝云带雨琼梳环髻水围山江村五月黄梅过十里人烟渺莽间

题华严院泽上人西韵轩用前韵

踈帘如雾隐窻纱虹影青红雨脚斜坐久清风起何处一盆昌歆映葵花

和彦立兄赠信上人

鼎社年来得志闲一杯聊复效逃禅新诗莫漫惊流俗恐被旁人唤皎然

赠浮屠道本二首

道本自历阳广教与六僧偕来以天申节受具足戒於当涂之万壽寺戒坛能诵吾兄彦时所题二诗故其归也用韵以赠之

暑雨初晴江上村藕花无数午风温梁山正帖淮南岸到得精蓝日未昏
一去禅关忽五春异乡惊见眼终清问师参学今何解云在青天水在罇
和因上人四首

拍天湖水乱蛙鸣雨脚随风泼细尘翠幄不开杨柳晚红云初坐海棠春
菱葑弥天眼界幽浇愁应办酒如油坐怜渔父机心胜万顷春苗不下鸥
水云深处见人烟桑柘鸣鸠似可怜却怪银泥环四壁由来春雨上蜗涎
荼蘼花底照衰颜风送余香到酒间春色他年尚无恙红裙来继谢东山
和天衣聪老五首

师去无为十五年重来猿鹤亦忻然此生不负今朝祝冀结龙华会里缘
老怀归去几何年吴越宗风久寂然闻说近来狮子吼应将驴脚问生缘
法华灵应着当年今古何曾有间然不见後身房次律却因和璞记前缘
达磨东来不记年一灯然处百灯然愿从清净求明了应喜晨斋学省缘
緑杨芳草自年年人老逢春重喟然六入傥能除旧习三乘端许结新缘
再用韵赠湖塘来上人二首

望外荆榛蔽辋川我来何必为逃喧乱余村疇鸡豚尽秋到江湖藻荇繁
湖水弥弥浸緑苔湖边衰柳两三栽游鱼得意潜还跃幽鸟多情去复来
山西庄舍赠信上人和彦时兄四首

十里西畴路半硇短辕无力困瘡痛支筇预作渊明具瓮有乌程不用沽
四壁萧然犬自驯年来食粥甑生尘相逢未暇寒温语请效参寥作故人
一枝清瘦早梅春风味高如郭泰巾襟袖归来香未歇要将佳句属诗人

寒鸦成阵下遥村水合回塘镜一番??溪流响何处乱山无数不知源

赠道上人

道人知我过山来旋扫蓬门对水开惟有温菰荐樽俎一畦疎绿隐蒿莱

和道可

卧雨春头到地长清风一榻借微凉暮声惊断高僧梦起拨炉中未过香

和彦逢弟简相山古上人二首

相山风物似斜川岑寂那知市井喧岁旱但伤禾穗槁秋饥犹喜粟皱繁

蒿艾深迷古径苔荒凉菊坞与松栽稻田正似人无几赖有高僧伴我来

送浮屠善慧

云涛霜巘正峥嵘梦里清游觉尚惊师到西湖如得句不妨频寄老书生

送心上人

西城畦稼卧黄云似说千门许见分驴载马驮应不厌一 牙齿正须君

春日访道上人

陇麦如烟水满塘路边桃李问柔桑道人不作渊明调笑碾新茶看瑞香

赠桐林老僧

绕屋青桐碧玉椽坐来岩石起云烟过门竟日奔驰者应羡山僧去道边

赠林山善相老荣师

至哉择术妙难论邂逅何妨丐一言我已无心求富贵余生归命给孤园

回峯寺和浮屠坦然韵

昼睡醒来日过中山光入座水涵空绿杨堤外荷花富招致清香赖有风

和彦时兄赠觉上人化灯

江上相逢试问津杖藜来作化灯行欲知照破无明窟佛殿荧荧一点明

和僧广实三首

曾向高安见大愚迢迢一路彻天衢而今到处无些事困睡饥餐得自如

闻说年来贫更甚生涯和地与锥无通身是手承谁力方信常人实若虚

动容俱见古人情千里归来得我惊七载何曾有离别水中明月本相亲

题德章山亲公塔

凭陵风雨上崔嵬一见亲公病眼开似是前生师弟子两年今日入山来

过广德宿开元寺上人房

满城花草鬪欣荣嫩绿夭红照眼明会有禅房通野色解鞍聊复憩予行

书来上人房

十里清风水拍天老僧斋罢抱头眠丹楹画栋看摧压好为僧伽作胜缘

书源上人壁

丹枫黄榭壮秋容诘曲僧房一径通塔似道人飞白笔开窗还见倚晴空

题德山涓老无句堂

峯头示衆合如何一棒由来已自多空去空回还信否至今疑杀那人诃

送浮屠宗立东游二首

立上人禅林杞梓法窟栋梁数千里往见天衣十五年坐参庭柏尔来半口吸乾溟渤一拳打破虚空真得和锥也无岂不成大丈夫哉是行来自湖湘访予相山将复观潮浙东予闻而快之故作是诗以赠

抚掌相逢一笑同自言参学百无功蜜甜忘却十年苦雷吼吓成三日聋

西走漫偿行脚债南游聊勘坐禅翁不知色力能强健又复观潮过浙东

赠蔡道人

宝盖山前蔡道人十年学佛颇安贫似闻亲见天衣老为改今名作惠新

赠羽流韩洞章

韩生画马有家法胷中骅骝不可计酒酣试作姜子牙恍若当年钓清渭

<集部,别集类,南宋建炎至德佑,相山集>

卷十六

钦定四库全书

相山集卷十六 宋 王之道 撰诗余

宴桃源【乌江道中二首】

黄落声迟风歇龕火夜寒明灭残月却多情来照先生归辙清絕清絕透隙风霜如雪
遥指汤泉西路隐约碧云天暮宿鸟择深枝两两相呼如语凝伫凝伫今夜梦魂何处

宴桃源【和张文伯雪词】

飞雪乍稀还骤高阁下临羣岫独立遂移时归去黄昏前後知否知否落笔骚人赋就
风急柳花飞骤白尽千林万岫樵担晚来归正在栖鸦啼後知否知否语到谢娘诗就

宴桃源【和张文伯海棠】

水外浸山桃李那得个中风味一种最怜渠酒着佳人半醉还似还似惊起午窗春睡

如梦令【和张文伯芍药】

绰约一枝红怨踈雨淡烟池馆梅子欲黄时日倚朱阑几遍争看争看人在沉香亭畔

如梦令【江上对雨】

一晌凝情无语手捻梅花何处倚竹不胜愁暗想江头归路东去东去短艇淡烟踈雨

如梦令【和张文伯木犀】

叶底芳蕤如缀坐对广庭忘味娇駮最怜伊乱糝舞余风袂贪喜贪喜不觉宝钗斜坠

长相思【美人】

桃花春杏花春桃杏妖娆如个人歌声清遏云 酒醺醺烛荧荧眼尾微红无限情相逢堪断魂

长相思【恨别】

雨蒙蒙日曛曛洗出远山三四重分明眉黛浓 野桥西官路东小驿夜凉风入松梦魂谁与同
花一枝酒一卮举酒对花君莫辞人生多别离 行相随坐相随更有何人得似伊春融蝴蝶飞
天四垂山四围山色天容入坐帷清风吹我衣 湖水东江水西东去西来无尽期不如君共伊
吴江枫吴江风索索秋声飞乱红晓来归意浓 淮山西淮山东明月今宵何处同相寻魂梦中
风淅淅雨霏霏风雨夜寒人别离梦回还自疑 蛩声悲漏声迟一点青灯明更微照人双泪垂
点绛唇【和朱希真】

短棹西来追随不及桃花宴薰风庭院明月裁纨扇睡起娇慵相见云鬓乱双鱼远欲凭春唤
一见韦娘面

点绛唇【和张文伯】

竹外梅花檀心玉颊春初透一池风皱妙语天生就有个人人嫋娜灵和柳君知否目成心授
何日同携手

点绛唇【和张文伯除夜雪词】

透幕穿帘回风舞态真轻妙不烦相恼江上春来了一阕清歌唱彻琼楼晓春工巧柳颦梅笑
点缀芳菲早

点绛唇【冬日江上】

古屋垂杨淡烟疎雨江南岸几家村疇酒旆还相唤短棹扁舟风横河频转柔肠断乱鸦晚噪
天共蒹葭远

点绛唇【社日雨】

春意催花片云又作朝来雨淡匀深注红紫知无数社日人家準拟行春去痴儿女倚门凝竚
借问东郊路

浣溪沙【和张文伯长至】

寒透珠帘怯晓霜灰飞缙室验回阳坐看红日上修廊泉泻龙头深泛酒烟凝象口暖吹香及
时歌舞意何

长

浣溪沙【春日】

水外山光淡欲无
堤边草色翠如铺
绿杨风软鸟相呼
牛蒨叶齐罗翠扇
鹿梨花小隘真珠
一声何处叫提

壶

浣溪沙【赠妓】

玉骨冰肌软更香
一枝丹棘映青裳
相逢归去未须忙
曲里春山情不浅
樽前秋水意何长
醺醺颜色粉生

光

浣溪沙【和张文伯海棠】

过雨花容杂笑啼
淡粧深注半开时
娇娆情态自天姿
新浴太真增艳丽
微风飞燕鬪清奇
绿窗朱户雅相

宜

浣溪沙【和张文伯木犀】

晓日晖晖玉露光
枝头一样鬪宫粧
可怜娇额半涂黄
衣与酴醾新借色
肌同薝蔔更薰香
风流荀令雅相

当

浣溪沙【赋春雪词追和东坡韵】

阳气初升土脉苏
东郊人散欲回车
一时春雪十年无
鱼枕蕉深浮酒蚁
鹿胎冠小粲歌珠
题诗不觉烛燃

须

体粟须频酒力苏
流涎正值麴盈车
坐来兽炭拨还无
一阕可能酬一绝
双银端不换双珠
松毛粉白老翁

须

春到衡门病滞苏力强犹可驾柴车少年狂妄一时无清坐不堪肤起粟高谈还喜唾成珠红裾痴笑雪如

须

冻卧袁安已复苏闭门那患出无车似渠人物到今无可笑崑山夸片玉须怜沧海叹遗珠时来应许掇君

须

浣溪沙【阻风铜陵追和东坡游泗洲南山韵】

残雪笼晴作沍寒北风吹浪过前滩远山云气尚漫漫睡起阳乌窥破牖坐怜香雾蔼雕盘一樽聊佐旅中

欢

采桑子【孙中益集於西斋题侍儿作第一流因以词谢之】

奇花不比寻常艳独步南州往事悠悠辽鹤重来忆旧游
仙翁不改青青眼一醉迟留妙墨银钩题作人间第一流

菩萨蛮【和赵见独佳人睡起】

香鬟倭堕兰膏腻睡起搔头红玉坠秋水不胜情盈盈横沁人
朱栏频徙倚笑与花争媚眉黛索重添春醒意未忺

菩萨蛮【采莲女】

藕丝衫剪猩红窄衫轻不碍琼肤白缦鬟小横波花楼东是家
上湖闲荡桨粉艳芙蓉榜湖水亦多情照粧天底清

减字木兰花【和孔纯老送郑?道移守严州】

金尊频倒照座梅花清更好春到长杨宠拜三公入郑庄
月城两载千里生灵蒙惠爱舞彻歌词并立新粧緑带垂

减字木兰花【赠孙兴宗侍儿回首】

修眉山远娇抹乌云秋水畔酒里花前坐拥斯人怎得寒
醪浮满须索空缸仍覆琰正恐相妨归去如闻笑语香

江梅清远潇洒一枝罇俎畔雪後风前照水窥檐巧耐寒
多情美满共饮自应渠醺琰醉赏何妨倾国天教抵死香

笑中声远走向曲房花树畔拥在樽前顿觉春温却夜寒
愿酬心满只得教伊频劝盏缓唱何妨贴体衫儿扑鼻香

仙姿凝远半出新粧琼户畔缓步来前正值东风料峭寒
钗头花满舞罢梅英飞入盏一醺何妨花与佳人巧鬪香

减字木兰花【和张文伯对雪词四首】

诗成呵手欲写已输君赋就寒粟生肤一盏浇肠可得无
回风弄巧比似婆娑尤敏妙似个人人嗅认梅花孰是真

尊前放手铜鉢声穷诗已就姑射肌肤舞罢纒头怎得无
青腰更巧担粉团酥来鬪妙不敢方人容色依稀似太真

玉奴招手来看前山琼琢就透骨侵肤似恁清寒更有无
春工纵巧只许梅花称独妙花底逢人逐马银杯误认真

鼈头龟手孤坐书生能意就煖体温肤绣被春寒想见无
雪词工巧高压君房天下妙白发欺人甚矣吾衰懒是真

减字木兰花【和孔纯老别】

离筵暂住君在龙舒曾是主今作行人卧辙何妨借寇恂
清歌妙舞断送吟鞭乘醉去一醺休辞捧爵佳人玉筯垂

减字木兰花【立春】

彩幡金胜一笑酬春聊适性駸女痴儿半挽梅花半柳枝
追欢何计幸对緑尊环皂髻欲舞还羞美盼娇回碧水秋

减字木兰花【和董令升正月五日会客】

蛾眉螭首舞雪娇回开冻候尽道今年千里风光萃绮筵
坐来新月照我苍颜并白发酒到休辞自有黄芽介寿祺

卜算子【和兴国守周少隐饯别万山堂】

挂颊看西湖屡对纶巾岸江上相从醉万山六见年华换
君唱我当酬我醉君休管明日醒时小艇东莫负传书雁

堂下水浮天人指山为岸水落寒沙只见山暗被天偷换
堂上老诗翁客至劳相管风喘溪头客自东日送云中雁

今日富川滨後夜溢江岸千里西湖指顾间未怕新年换
再见复何时此意凭吟管应有新诗当尺书日望南来雁

丑奴儿【对雪和彦逢弟词】

青腰似诧天公富奔走风云银界无垠委巷穷山草木春
玉楼不怕歌茵湿语笑纷纷须放他门醉里冰姿光照人

谒金门【进和冯延巳】

春睡起金鸭煖销沉水笑比梅花鸾监里嗅香还嚼蘂琼户倚来重倚又见夕阳坠门外马嘶
郎且至失惊

心暗喜

秦楼月【和张文伯雪词】

云不卷浇愁莫放金杯浅金杯浅新词丽句要人裁剪酒酣思致天同远临风捉笔纶巾岸纶
巾岸诗成归

去寒光照晚

阮郎归【和广济王宰二首】

玉绳低转斗阑干欠温春酒寒夜长风劲怯衣单有人哦二山
蟾欲满雁初还桃花微破颜枕痕犹带断虹残无言心自闲

长杨风煖弄腰枝日长蝴蝶飞雨余新绿细通池玉钩悬菱衣

鸿雁远子规啼此情谁得知一尊聊与故人持醉来悲别离

桃源忆故人【追和东坡韵呈曹倅子修三首】

逢人借问春归处遥指芜城烟树收尽柳梢残雨月闯西南户
游丝不解留伊住漫惹闲愁无数燕子为谁来去似说江头路

不知春色归何处但见茂林芳树庭巷落花如雨鬬乱穿窬户
晚行溪上东风住荷点青钱无数蛺蝶飞来还去错认花间路

南园最是花多处门掩绿杨千树别後几番风雨碧藓侵苔户
侬家旧在郊西住门外远山无数谁道不如归去咫尺长安路

朝中措【和张文伯清明日开霁】

朝阳淡淡宿云轻风入管弦声十里碧芜幽步一枝丹杏柔情
佳人何处酒红沁眼秋水盈盈诗曲美君三絶湖山增我双明

朝中措【孔倅郡斋新栽竹】

爱君节直更心虚移植并庭除好在红蕖相映卷帘如见吴姝
清风明月君无我弃我不君踈况有骚人墨客时来同醉兵厨

朝中措【和张文伯海棠】

暖风迟日透香肌春到柳边枝曾见酒红潮颊玉人初出罗帟
东坡何处朱唇翠袖空想芳姿争似濡须太守看花仍赋佳词

朝中措【和张文伯远亭】

晴烟漠漠日晖晖天际远山低檻外碧芜千里坐来目送鸥飞
诗牋谈麈珠盘落落玉屑霏霏更把登临余兴翻成白雪歌词

朝中措【魏倅定甫生日】

州闾庠序少追随俛仰鬓成丝仕宦孰踰君達恩袍遍及庭芝
溪头春日欢声和气如见生时好对高堂壽母献酬同醉金卮

朝中措【王守正仲生日】

满庭岩桂藹香风人在画堂中欲验鲁侯难老欢声千里攸同
台分金石源鍾淮水流庆无穷好继汉朝循吏从兹入拜三公

朝中措【和张文伯寒食日雨】

从来寒食半陰晴花底听歌声昨夜满城风雨惜花还系心情
海棠枝上朱唇翠袖欲鬪轻盈须藉嫣然一笑醉吟同过清明

朝中措【和张文伯元夕】

江城春霁雪初融楼观瑞烟中向晚金莲无数一时开遍东风
多情太守行携红袖坐引金鍾时出阳春絕唱才名不减诗翁

朝中措【董令升待制生日】

天庭丹熟在何时铅汞适投机四海方思霖雨未容驾鹤先飞
当年今日谪仙初降庭露醅醅愿对良辰好景称觞为醉芳菲

西江月【和张文伯腊日席上】

北陆藏冰欲竟东风解冻非遥一时芳意巧相撩入眼綠娇红小
柳色轻摇弱线梅英纷缀枯梢觥筹醉里赖君饶归去斜阳尚早

西江月【别思】

一霎轻云过雨半篙新绿横舟梅花池馆暗香浮酒入朱唇红透
有恨尤怜别恨多愁不惯春愁舞余何惜更迟留肠断断肠更後

一别清风北牖几番明月西楼断肠千里致书邮借问近来安否
归路淮山雨过归舟江水澄秋佳人应已数程头準拟到家时候

西江月【赏梅】

雪後千林尚冻城边一径微通柳梢摇曳转东风来看梅花应梦
酒面初潮蚁綠歌唇半启櫻红水肌绰约月朦朧髣髴暗香浮动

西江月【张文伯谢曾子修送酒】

黄菊正怀彭泽白衣俄致江州登高余醉快扶头此赋义兼情厚

痛饮还须酒对清吟况值诗流轻投无惜万金酬木李旧先琼玖

西江月【试茶】

磨急锯霏琼屑汤鸣车转羊肠一杯聊解水仙浆七日醒襟顿爽
指点红裙劝坐招呼岩桂分香看花不觉酒浮觞醉倒寧辞鼠量

西江月【春归】

春日荒荒别浦春潮灏灏长堤緑杨风喘客帆迟肠断江南双鲤
短梦当年楚雨扁舟後夜秦溪一声啼鸟怨春归人在酴醾花底

卷十七

钦定四库全书

相山集卷十七 宋 王之道 撰诗余

折丹桂【送蘧着 三子赴省试】

照人何处双瞳碧欲去江城北过江风顺莫迟留快雁序飞联翼
西湖花柳传消息知是东君客家书须办写泥金报科名题淡墨

用前韵送彦开弟省试

风漪欲皱春江碧予寄江城北子今东去赴春官挽不住抟风翼
修程应过天池息何处堪留客预知仙籍桂香浮语祝史休占墨

又用前韵送赵彦翱省试

雪晴山色分遥碧辉映江南北君今东去步蟾宫看少展垂天翼
晚来江上西风息不是新丰客明年三月见君时庆章绶纡铜墨

南歌子【端午】

角簾横龟枕兰房挂艾人一尊菖歎泛清醇好在佳人如玉映长春
冰彻杯盘莹香和笑语薰莲花衫子入时新挂起南窗一榻晚风清

玉笋浮菖虎金盘馈线鱼研丹聊作厌兵符何必城头一女当千夫
雨过山如洗风来草自梳佳人不惯手谈输却道如今重赌选官图

南歌子【赵叔全生日】

扇里薰风细壶中化日长梅花高下照红粧花外飞云芬馥水沉香
新竹轻储粉流莺巧弄簧不知何处是华阳应有千年白李荐霞觞

南歌子【和陈勉仲】

老懒诗才退春融醉眼昏青山终日对柴门柳外断桥流水几家村
桃李添新意池塘失旧痕一尊聊复为君温倾倒来年酬唱细重论

南歌子【戊午重九】

朱实盈盈露黄华细细风龙山胜集古今同断送一年秋色酒盃中
鸭脚供柔白鸡头荐嫩红量吞云梦正能容试问具区何处浙江东

南歌子【书所见】

露竹舒新绿风荷遶暗香谁家池馆睡鸳鸯还有玉人相对坐传觴
角簟清水滑纱厨薄雾凉晚来行雨过巫阳强整罗衣临镜学宫粧

南歌子【安丰守章彦辅生日】

玉露澄天宇金风净月华满庭秋色木犀花记得谪仙初下五云车
才业追前辈人门属当家壽觴无惜醉流霞闻说姓名潜护有笼纱

浪淘沙【和鲁如晦】

高髻堕香鬟送恨眉山老年花似梦中看厌浥一枝溥晓露珠泪阑干
卮酒发酡颜休更留残满城风雨麦秋寒余馥尚能销酒恶谁敢包弹

好事近【彦逢弟生日词】

秋色到东篱金散菊团香馥预借浮觴高会为作长年祝蟹螯如臂酒如渑
橙橘半黄绿唱我新词一釂听樽

前丝竹

好事近【何希渊生日】

春色到梅梢人在东风清 曾见少微初降藹龙泉佳气
功名富贵属多才如子世无几造物恰同予意放骅骝千里

好事近【程继诚生日】

霞影入瑶觴酒与余霞同色人共昌期方永过觥筹三百
一枝红皱石榴裙帘卷篆烟碧约我他年湖上看九华终日

好事近【王照美生日】

花影到酴醾风过玉卮摇碧坐上酒豪诗敌尽骑鲸仙客
主人名姓在金瓯归去定前席要见碧桃千岁看壶中春日

好事近【董令升生日】

春色到酴醾人在酴醾花底花扑金罍香透远胜烧沉水
一杯聊复对东风为祝千千岁作楫和羹事了归去骑箕尾

南乡子【追和东坡重九】

风急断虹收孤鹭摇摇下荻洲醉?尽从吹落去飏飏幸有黄花插满头
君唱我当酬千里湖山照眼秋不见故人思故国休休一阕清歌听解愁

南乡子【赠何彦道侍儿】

翠袖熨沉香黛拂修蛾淡淡粧销得多情锺傅粉何郎风动珠帘月半床
素手捧瑶觞谁念苏州已断肠夜雨不随歌扇歇浪浪归去无心赋海棠

南乡子【陈南仲生日】

遗爱满南州千骑曾为万里游琳馆归来无责更无忧坐听清歌醉玉舟 香雾鬢金虬春入梅
花助献酬请祝遐年长笑挹浮丘何止莘君一百筹【有人梦莘彭年遗公九十六筹故及之】

南乡子【寄和潘教授元宾喜晴】

天际彩虹垂风起痴云快一吹原隰杳杳春水更弥弥布谷因从野鸟知
初霁卷帘时巷陌泥融燕子飞午醉醒来红日欲平西一椀新茶乳面肥

南乡子

春霁柳花垂娇软轻狂不待吹圆欲成球还复碎谁为习习和风即旧知
深院日长时乱扑珠帘入坐飞试问荻芽生也未偏宜出网河鮓美更肥

南乡子【和张元助通判咏雪词】

出户绣帘垂拂面从他细细吹乘兴有谁招访戴难为煖帐薰炉醉不知
闲看逐风时欲着梅花又却飞雅与佳人回舞袂相宜试比冰肌可煞肥

玉楼春【和李宜仲】

少年心性销磨尽三斗烂肠浑是闷看书聊复强寻行属句不妨闲趁韵
此生自断天休问富贵时来还有分一卮芳酒送清歌楼下玉人相去近

玉楼春【和董令升正月五日会客】

年来六十增三岁却忆去年趋盛会风流人物胜斜川灼灼有同前日事
不知弦管催新水但见飘飘紫舞袂主人情厚酒行频酩酊莫辞今夕醉

鹊桥仙【七夕】

断虹霁雨余霞送日帘卷西楼月上银河风静夜无波天亦为云翥相访
蛛丝有恨鹊桥何处回首又成惆怅长江衮衮向东流写不尽别杂情状

小重山【占德秀生日】

要识长生辈赤松朱颜和绿发正丰茸当年今日堕仙宫佳气鬱香蔼菊花风
一饮判千锺小槽新酿美玉泉醲酒酣诗思浩无穷云烟烂题破锦牋红

小重山【彦逢弟生日】

花艳嫣然照坐红池光高下见木芙蓉相从欵欵莫忽忽新酿熟浮瓮碧香浓
倚槛送飞鸿登高时节近菊披风笑谈今喜一杯同揉金蕊和露入杯中

蝶恋花【和张文伯上巳雨】

檐溜潺潺朝复暮燕子衔泥穿幕来还去素锦青袍知有处花光草色迷汀渚春不负人人自
负君看流觞只凭良辰度厌浥小桃如泣诉东风莫漫飘红雨城上青旗催日暮柳絮沾泥花
蕊随流去记得前时行乐处小桥新绿初平渚
玉子文楸谁胜负不道光阴暗向闲中度天若有情容我诉春来底事多阴雨

蝶恋花【和王冲之木犀】

庭院雨余秋意晚一阵风来到处清香遍把酒对花情不浅花前敢避金杯满
簷卜醪醑虽惯见常恨搀先不是君徒伴莫把龙涎轻鬪远流芳肯逐炉烟断

蝶恋花【和张文伯魏园行春】

春入花梢红欲半水外綠杨掩映笙歌院霁日迟迟风扇暖天光上下青浮岸
归去画楼烟暝晚自拾梅英点缀宫粧面美目碧长眉翠浅销魂正值回头看

蝶恋花【和张文伯海棠】

碧雾暗销香篆半花影穿帘厌浥苍苔院鸂鶒一双塘水暖浮沉时近垂杨岸
雨过不知春事晚但怪朱唇得酒红潮面野?山穀三四盞移尊更向花前看

蝶恋花【追和东坡时留滞富池】

寒雨霏霏江上路不见书邮病目空凝注沙觜尽头飞白鹭篙师指似人来处
自笑自怜还自语钝滞如君只合归田去竹屋数间环畎亩个中自有无穷趣

临江仙【和陈德公】

红楼缥缈光风里熙熙和气欢声遏云余韵最关情春山闲淡淡秋水正盈盈
老去自怜心尚在相逢殊慰劳生纹楸聊复戏同枰试烦歌一曲须借酒三行

临江仙【和刘南伯】

怪得举头闻鹊喜果然都骑相过柳陰乘月倒金荷疎星明炯炯银汉静无波
总角追随今老矣相逢无惜婆娑夜阑余兴到狂歌长鲸方正渴应不厌倾河

临江仙【追和东坡送李公恕入浙】

鼓棹正逢江雪霁是行应快吴吟透云寒日半晴陰烟风凝翠重霜树溅红深
案上文书闲展读圣贤踪迹重寻不堪华发故駸駸双旌还有日万事付无心

一剪梅【和董令升赠魏定甫侍妾】

风揭珠帘夜气清香扑樽罍初见云英蓝桥何处旧知名今夕相逢此恨销停
劝客嫣然一笑倾细意端详无限娉婷曲终犹带遶梁声不辞沉醉为覆金觥

渔家傲【和余子美对雪词】

风揭珠帘寒乍透青娥不住添香兽火暖画檐鸣綫溜人醉後锦堂丝竹烘残昼
势合湖山增地厚孤高但觉修篁瘦回策如縈全在手骄马骤吾家金埒新编就

渔家傲【和董舍人令升三首】

系国安危还故老鹤书赴壠行当到多谢不遗敦雅好应信道年高德邵如公少 尊酒论文聊一笑肯将苦语夸危了落笔君房天下妙环窈窕清歌一阕渔家傲海岱惟青遗一老禁垣清切亲曾到独直固劳非此好谁信道才如权相从来少 把酒自歌还自笑醉中万事都齐了絶唱清歌仍敏妙声窈窕行云初遏渔家傲【禁垣清切并独直权德輿事】

爵齿俱尊惟此老诗词笔力谁能到奇字古文仍笃好须信道如公寧复忧才少剩费黄金因买笑穷通得丧都忘了坐对瑶觞看舞妙携窈窕南窗聊继渊明傲

渔家傲【和孔纯老三首】

岩电晶荧君未老看看门外风车到一点眉间黄色好人尽道从今次第登三少 左右青娥来巧笑朱唇涂额新粧了斜插梅花仍鬪妙歌窈窕醉来容我相嘲傲岁月漂流人易老东郊又报春来到梅靨柳眉还鬪好君信道衰顔得酒重年少 对景邀宾同讌笑莫教虚过芳菲了咳唾珠玑夸笔妙人窈窕新声倾作渔家傲灯火熙熙来穉老喜逢灯夕都齐到花市绮楼随处好人竞道今年天气常年少五马行游还坐笑公堂绣卷东风了箫鼓喧闐歌舞妙人窈窕也应引动南窗傲

感皇恩【彦逢弟生日】

宿雾霏晨霜江山明秀照眼黄花乱晴昼当年今日正是悬弧时候一杯聊献祝同亲旧莫问穷通休论贫富且趁良辰醉醇酎扬珠捣玉况值西成多收饱餐歌至治天垂佑

青玉案【有怀轩车山旧隐】

半年不踏轩车路彷彿过长桥去贴水行云风送度两行高柳一坡修竹是我尝游处黄鹂休叹青春暮出谷迁乔旧家句天意从人还许许凝寒和气沈陰霁色大早霁 雨

青玉案【对雪追和谢幼乐】

金尊照坐红裙绕恁一晌歌声悄乱扑珠帘风絮晓香薰笑语酒烘顔色莫逐年华老诗涛入笔悬河倒快万里云天为君扫检点春容何处早柳条青眼梅梢粉面得恁於人好

青玉案【送无为守张文伯还朝】

逢人借问钱塘路我亦欲西湖去目送兰桡知几度鳌峰浮玉鲸波飞雪正是潮来处海棠花下春将暮缓唱新词味佳句见说东皇曾梦许栢台冠豸金銮视草更作商岩雨

卷十八

钦定四库全书

相山集卷十八 宋 王之道 撰诗余

江城子【和彦时兄】

新篁初上箨龙披绿阴稀绿阴稀墙外石榴花放两三枝裙摺绦纱还半皱追往事惜佳期
流莺娇姹燕双飞雨晴时雨晴时卢橘攒金梅子更红肥浊酒一杯从径醉家纵远梦中归

江城子【追和东坡雪词】

寒光凌乱六花纖巧穿帘不鸣檐十里黄垆遥望辨青帘玉树参差何处覓吟雪曲捻霜髯
坐来令我看无厌拟名盐试尝甜飞入深潭应照老蛟潜三白预占来岁稔良可喜更何嫌

千秋岁【追和秦少游】

山前湖外初日浮云退荷气馥槐阴碎葵花红障锦萱草青垂带谁得似黄鹂求友新成对
忆昔东门会千古同倾盖人已远歌如在银钩虽可漫琬琰终难改愁浩荡临风令我思淮海

千秋岁【张文伯生日】

晓霜初肃秋色团芳菊榴转紫橘犹绿昨朝吹?会未快登临目须信道兵厨準拟三千斛
采采香盈掬泛泛纷浮玉红袖捧清歌逐何妨倾坐客共献长生祝归去好北门夜引金莲烛

千秋岁【郑帅清卿生日】

熙熙台上秋色增清壮和气溢祥烟扬淮山供杂俎湖水浮新酿人共仰貔貅坐拥诗书将
箫鼓声嘹亮珠翠环相向回妙舞迟妍唱竞斟长命斚同试沧溟量锋车往东归遂继华原相

千秋岁【伯母刘氏生日】

薰风散雾帘幕清无暑萱草径荷花坞幽香浮几席秀色侵庭庑微雨过绿杨枝上珠成缕
双燕飞还语似庆良辰遇酺美酒烹肥豕何妨欢且醉共作斑衣舞人竞报蟠桃已实君知否

千秋岁【彦时教授兄生日】

金风玉宇庭院新经雨香有露清无暑溪光摇几席岚翠横樽俎烘笑语佳时聊复乡人聚

门外荷花浦秋到花无数红鱣鲤青浮醕何妨文字饮更得江山助从此去蒲轮入佐中兴主

水调歌头【追和东坡】

湖上有佳色黄菊傲霜秋一尊相属谈咏彼此得无愁何处鲈鱼初荐错俎金虀点脍令我忆
东州双鹭带斜日飞下白苹洲晚风劲吹残酒袞破袞故人俱在江左底事独淹留归去草堂
侵夜一点青荧火得句可忘忧欲识无穷意终日倚城楼

水调歌头【用王冲之韵赠僧定渊】

败屋拥破衲惊飈漫飈飈不离当处人见拥篲上篮游弹指九州四海浪说其来云聚其去等
风休莫作袈裟看吾道贯聃丘齐生死同宠辱泯春秋高名厚利眇若天地一蜉蝣闲举前人
公案试问把锄空手何似步骑牛会得个中语净土在阎浮

水调歌头【对月词】

斜阳明薄暮急雨霁凉秋弱云狼藉晚来风起席卷更无留天外老蟾高挂皎皎寒光照水金
璧共沉浮宾主一时杰倾动庾公楼度银汉溥玉露势欲流不妨吟赏坐拥红袖舞还讴暗祝
今宵素魄助我清才逸气稳步上瀛洲欲识瀛洲路雄据六鳌头

水调歌头【秦壽之生日】

暑雨湿修竹凉吹入高檐鹭洲鍾阜如画霁色为依纖檻外藕花无数装点休祥嘉应不觉有
秋炎谪仙堕人世香雾鬱重帘富才艺强记覽三万籤须信公侯有种道义自相渐此去腰金
佩玉回视依莲泛水岁月亦何淹称觴还戏彩无惜醉厌厌

水调歌头【赵帅圣用生日】

颢气遍寰宇风露逼衣裘中秋昨夜明月千里满西楼人道当年今日海上骑鲸仙客乘兴下
瀛洲雅志在扶世来佐紫宸游庙堂上须早计要嘉谋牙床锦帐三岁江北叹淹留好在蟹螯
如臂判取兵厨百斛与客醉瑶舟待得蟠桃熟相约访浮丘

水调歌头【张文伯生日】

琼树挂初日珠箔卷清霜夜来溪上微雨佳节过重阳共庆当年此际曾见天麟协梦华閤挂
蓬桑人作鲁侯祝俾尔壽而臧保疲瘵旌德善致吉祥会看报政朝夕芝检趣微黄不藉灵丹
九转不用蟠桃三窃源远流长愿借沧溟富斟酌荐瑶觴

满江红【和张守仲及送孔纯老守历阳】

竹马来迎留不住寸心如结历湖须坞相望近同吴越阙里风流今未减此行报政看期月已
验康沂富国千古曾无别 多谢润沾枯辙令我神思清发闻新命欢浹两邦情愜明日西风帆
卷席高檣到处旌麾列忽相思我当往谁谓三整隔

满庭芳【代人上高太尉时在太学】

蔡水西来于门南峙天波拥入华楹芝兰争秀难弟遇难兄欲说随龙雨露庆千载河海初清
良辰好榴花照眼绿柳隐啼莺 君恩隆厚赐冰桃火枣来自蓬瀛正值雾横玉篆泉泻金鲸四
坐香和酒泛对妙舞弦索铿鍠椿难老年年今日论报祝长生

满庭芳【双莲堂】

翠盖千重青钱万叠雨余绿涨银塘藕花无数高下鬪芬芳浑似华清赐浴温泉滑洗出真香
何妨更合欢连理高压万芝祥 风流贤太守当年奏瑞盛事名堂好是琉璃地上一片宫粧况
有薰风解愠流霞泛丝竹成行依莲暇联珠唱玉应不愧金相

满庭芳【和元发弟秋日对酒】

露溢金茎风翔玉宇嫩凉初霁秋容山豁野蕪聊快一尊同正值大田多稼临邛隘酒客憧憧
追随处杯盘狼藉野草长松 新词何所似金声应铎玉气腾虹时来终宦逴休怨苍穹顾我
蹉跎老矣飒素发衰态龙鍾心犹壮会看文度独步大江东

满庭芳【送秦壽之】

雪霁风温霜销日暖一时笑语烘春草堂何幸四座德星邻聊借红粧侑爵兰膏膩高髻盘云
清歌妙贯珠余韵犹振画梁尘 熙朝卿相种扁舟东去入侍严宸忆当年擢桂连见三秦休说
参军俊逸应难过开府清新从今去八州都督端不困无津

满庭芳【伯父仲球生日】

紫角初繁青裳正好充闾清露飘香悬弧何早乌轡上扶桑试问椿龄几许踰万计才满三章
佳辰乐林塘增气萐萐拥红粧 称觴人共庆盘中白李来自华阳说壶中日月特地舒长定见
霜毫换绿天荅家庆延昌情千万辞慙思窘聊献满庭芳

满庭芳【和富宪公权饯别】

歌彻骊驹酒斟醺醺帆檣高映城楼绣衣携具开宴话离愁两岸橙黄橘绿一行雁几点沙鸥
情千万相看无语送我上孤舟 悠悠冬向晚梅花潜暖随处香浮奈长亭饮散无计淹留归路
淮山百舍空梦想连岁清游烦双鲤频将尺素来往寄江流

汉宫春【雪词】

欢动江城快风声震地云势颓山半年不雨玉霰来溉冬乾飘飘弱絮杂檐花飞上宾筵?林表数行征雁翱翔欲下清湾 何处梅梢点白弄横斜疎影竹外溪边天寒日暮含香脉脉无言朱唇玉颊映碧梧峙鹄停鸾最好是携壶挈榼相期同醉霜天

庆清朝【追和郑毅夫及第後作】

晓日?墀春风黄繖天顔咫尺清光恩袍初赐一时玉质金相济济满庭鸳鹭月卿映日尹星郎鸣鞘远锦鞦归路醉舞醒狂 追随宝津琼苑看穿花?侧拂柳鞭长临流夹径参差緑?红芳燕罢西城向晚歌呼笑语溢平康休相恼争揭疎帘半出新粧

醉蓬莱【追和东坡重九呈彦时兄】

对黄芦卧雨苍雁横秋江天重九千载渊明信风流称首吟绕东篱白衣何处谁复当年守蓝水清游龙山胜集恍然依旧 萸实嫩红菊团余馥付与佳人比妍争嗅一曲婆娑看舞腰紫柳举世纷纷名利逐罕遇笑来开口慰我寂寥酬君酩酊不容无酒

宴春台【追和张子野韵赠陈德甫侍妾】

翠竹扶疎丹葵隐映緑窻朱户萦回帘卷虾须清风时自南来题舆好客筵开俨新粧深出云街歌珠累贯一时倾坐全胜腰雷 金猊袅碧玉兕浮红令传三杏情寄双梅楼头漏促笼纱暗落花煤锦里遗音忆当年曾赋春台醉蓬莱归欤无寐想余韵徘徊

宴山亭【和张文伯海棠】

微雨斑斑晕湿海棠渐觉胭脂红褪迟日短垣娇怯和风摇曳一成春困玉软酴酥扶不起晚粧慵整愁恨对佳时媚景可堪重省 曾约小桃新燕有蜂媒蝶使为传芳信西蜀杜郎东坡苏老道也道应难尽一朵风流雅称上凤翘云鬓相映眉拂黛梅腮弄粉

胜胜慢【和刘春卿有怀金溪】

凌云气节贯日精忠艰难未许心灰芳酒一尊对君聊为君开要识治安非晚乐得新贤赋台莱愁似雪喜青天万里晓霁春回 须信赤绳系足朱衣点头终在休叹淹徊梅实槐花看看便是相催座上觥筹交错玉山峙莫遣停盃濡须好傥他时富贵犹冀重来

胜胜慢【和张文伯木犀】

菊团封緑莲萼凋红萧然独见芳姿短墙高榭踈筠怪石偏宜香遍秋风到处微雨过清露零

时花陰下称牋毫唱和杖屨追随 曷似江头竹外凌霜犯雪岁晚争奇夕赏朝吟劝秋莫放离
披细看石楠玉茗叶纵似风韵输伊最好处拥新粧临监碧溪

胜胜慢【送彦逢弟赴官西兴时冬至日用刘春卿韵】

鲁云书瑞周日迎长晓占缊室飞灰玉勒朝天千门禁钥齐开帘卷扇分雉尾香风远人到蓬
莱霞觞满万年献祝宫殿昭回 况有金瓯名姓任名远萧散无自徘徊门外锋车又连凤诏相
催酒到莫辞频举听清歌一阕倾盃功成日五湖烟月堪赋归来

石州慢【和董令升岁除】

磔攘送寒燔烈兴岁又颂尧历青蒿烧?緑浮风皱暖回春色天地交泰时当倾否五鬼休相厄
何妨笑倚东风一饮杯三百 长忆苻坚入寇功高晋室无如安石义槩雄心辄莫等闲抛掷盖
壤声名鼎彝勲业朋谿虽好未放终闲逸啾啾黄鸟更看壶中春日

石州慢【和赵见独书事见独善鼓琴】

天迴楼高日长院静琴声幽咽昵昵恩情切切言语似伤离别子期何处漫高山流水又逐新
歌彻彷彿江上移舟听琵琶凄切 休说春寒料峭夜来花柳弄风摇雪大错因谁算不翅六州
铁波下双鱼云中乘雁嗣音无计空叹初谋拙但愿相逢同心再绾重结

念奴娇【和张文伯重阳前雨】

黄花照眼对西风庭槛为渠凝伫準拟登高酬一醉底事晚来微雨蟋蟀声中芭蕉叶上怎得
争如许龙山何处无言暗想烟树 须知天意随人重阳晴未晚不烦频诉幸有兵厨三万斛足
助赏心欢趣千里江山两行珠翠端为骚人付层楼飞观应容老子追步

念奴娇【和鲁如晦中秋】

碧天无际乍雨清烟霭风开云月人在南楼剧谈胜咏拥碧油旌节银阙腾辉冰轮驾彩颢气
资高洁大星不见更容萤火明灭 须烦翠杓琼杯华牋象管与我酬清絶谁使琶声到耳轻赋
荻花枫叶露脚斜飞河陰低转香篆环三杰莫辞终夕舞腰重看回雪

忆东坡【追和黄鲁直】

雪霁柳舒容日薄梅摇影新岁换符来天工初见颁桃梗试问我酬君唱何如博塞欢娱百万
呼卢胜投珠报玉须放骚人遣春兴 诗成谈笑写出无穷景不妨时作颠草驰骋张芝圣谁念
杜陵野老心同流水必东与世初无竞公侯宁有种哉倾否由天命

虚堂响应声皎月形和影春到也须还长红多紫归条梗况有光风丽日能销积雪繁霜青女休言胜扶摇借便请看天池发鹏兴人言强汉治道夸文景谁能尧舜其君远继阿衡圣富贵吾所自有宰相时来则为自不烦趋竞欲寻文会诗盟得酒且相命

木兰花慢

对春光淡沲晴烟冉冉日迟迟渐红入桃蹊青回柳陌莺刷金衣差池竞求友去恼佳人幽恨上蛾眉应念年时追逐粧余为带交枝芳菲谁共赏嬉游何处马如飞不道新来牵肠惹肚暗减腰支须知乍寒乍暖褪朱唇又过海棠时已约姚黄魏紫留花等待伊归

凤箫吟【和彦时兄重九】

雨溟蒙年年今日农夫共卜新丰登高随处好银瓶突兀南峙对三公真珠溥露菊更芙蓉照水匀红但华髮衰顔不堪频监青镜相逢行藏休借问且徘徊目送飞鸿十年湖海千里云山几番残照凄风蟹螯虀似臂金英碎琥珀香浓请细读离骚为君一饮千鍾【银瓶三公皆山名】

归朝欢【对雪追和东坡词】

透隙敲窗风槭槭坐见广庭霜缟白长安道上正骑驴蔡州城里谁坚壁表表风尘物瑶林琼树生豪客对挥毫连珠唱玉竞把诗牋掷草草杯盘还促席痛饮狂歌话曾臆前村昨夜放梅花东邻休更夸容色清欢那易得明朝乌髻陞南极带随车黄垆咫尺莫作山河隔

望海潮【重九和彦时兄】

宝山烟霁金湖波渺珠帘高卷清霜枫叶露痕荻花风色人言今日重阳芳菊裊秋香更榴房鬪紫柑实传黄观阁凌空杯盘照座独醒狂良辰乐事难忘正少年游冶人在任庄铜鉢探题金钗当酒一时绿鬓红粧故国黯凄凉漫情随流水远兴与云长要是致君尧舜千古继垂裳

风流子【和桐城魏宰】

扁舟南浦岸分携处鸣佩忆珊珊见十里长堤数声啼鵂至今清泪衿袖斓斑谁信道沈腰成瘦减潘鬢就衰残漫把酒临风看花对月不言挂笏无绪凭栏相逢还相感但凝情秋水送恨春山应念马催行色泥溅征衫况芳菲将过红英婉婉追随正乐黄鸟间关争得此心无着浑似云闲

沁园春【和彦时兄】

城郭萧条风雨霏微醞造客愁况鸷羣鵬鸷末谐荐祢棘丛鸾凤犹叹栖仇世路如暮人情似

纸厚薄高低何日休逢殷浩会披云对月同赋南楼 堪嗟日月如流甚首夏謁来今半秋纵荻
花枫叶强撩归思有蓴羹菰饭归更何忧三板松舟一篙溪水百里淮山无滞留何须问蘧蘧
栩栩孰是庄周

贺新郎【送郑宗丞】

又是春残去倚东风寒云淡日堕红飘絮燕社鸿秋人不问尽管吴笙越鼓但短髮星星无数
万事惟消彭泽醉也何妨袖卷长沙舞身与世只如许 阑干拍手闲情绪便明朝苍烟白鹭北
山南浦笑指午桥桥畔路帘幕深深院宇尚趁得柳烟花雾我亦故山猿鹤怨问何时归棹双
溪渚歌一曲恨千缕

<集部,别集类,南宋建炎至德佑,相山集>

卷十九

钦定四库全书

相山集卷十九 宋 王之道 撰制

拟宏词试观文殿学士提举醴泉观兼侍读特授护国军节度使开府仪同三司江淮荆襄路安抚大使制

图旧德以分顾忧爰及祠庭之邃总元戎而任经略具膺帅阃之崇肆举徽章式昭异数近辍论思之益往劳镇抚之良视仪三槐宣威四路诞扬出綍咸告在庭具官某道大格天才周补袞作股肱耳目备见其有翼有冯敷心腹肾肠灼知其惟和惟一顷解政机之剧暂从真馆之游谓德行可用切磋故得通班於书殿谓言谋宜资啓沃故令兼秩於经筵虽愜予心犹违衆望惟江淮扼青徐之走集而荆襄制川陕之犇冲素号通津旧为近甸欲藉折冲而却敌宜即连衡而合从是用大纛高牙肃斋旄於蒲坂桓圭袞冕参礼节於鼎司冀効藩宣规恢疆宇於戏李靖总军西海有赖於文武之兼资裴度护国北门无踰乎始终之全德勉祇厥命茂隆乃勲可

拟宏词试少保镇南军节度使充两浙东路安抚大使兼知绍兴军府事授少傅镇南静江军节度使充江南东路安抚大使兼知建康军府事兼管内营田大使兼行宫留守加食邑实封制

分帅阃以蔽江莫易蕃宣之旧守留都而司钥尤高抚御之良眷我孤卿为时屏翰肆升华於亚傅爰徙镇於大邦载加节钺之权用壮藩维之势诞扬显册孚告治朝具官某器远而识明道隆而德博开物成务素高经世之才尊主庇民果大格天之业久服劳於百揆逮均逸於十连经营四方昭若召公之洪烈颐指诸将赫然郭令之遗风惟建业之繁雄实临流之都会股肱淮海襟带荆襄自观省以南巡念尝驻蹕寛忧勤之西顾宜重陪京嘉予寅亮之英倬彼威怀之绩是用进陞棘位增益斋旄仍专洪井之征诛兼制桂林之师旅并领兵屯之蓄申敦圭食之丰付尔保厘张吾经略於戏信谨有托兹萧何专属於关中文武足称故寇恂可任於河内往钦乃事无愧前人可

拟除赵参政制

国以任贤使能为盛尤急於中外艰难之时士以尊主庇民为功当见於上下因循之日肆朕嗣服遭家靡宁险阻八年若涉大水而罔知攸济焦劳庶事如措积薪而姑以为安念得扶颠持危之材助成兴衰拨乱之志我有耆德今告治朝俾参决於万几冀作孚於四海具官某声猷卓犖器识沉深至大至刚浩然孟子之气令仪令色翼乎山甫之心入践枢庭出更帅阃藜藿为之不采草木亦皆知名谓当补阙拾遗不可一日而去朝是用济繁治剧期以贰公而宏化於戏惟尔进退系於重轻尔其同德同心致予於治予亦作威作福与尔咸休往告远猷勉

追前哲

拟宏词试观文殿学士江南西路安抚大使授永兴军节度使开府仪同三司都督川陕荆襄军马事制

门下敷求贤哲协济艰虞式是南邦既懋蕃宣之绩宽予西顾方图保定之功爰因秘殿之华用拜斋坛之峻权分帅阃像视鼎司往无憚於一行伫有闻於数路诞扬涣号孚告治朝具官某器识高明才猷俊伟时惟轻重强者畏而忠者怀身任安危上不疑而朝不忌确乎社稷之卫美矣邦家之光自解钧衡遂临藩屏一日不见已勤当宁之思四国是皇良切折冲之望是用宠锡六旌於殽函之奥壤荣参三事於袞绣之钜公川陕以东荆襄而北颐指诸将张皇六师俾大振於国威期永清於寇略於戏会同有绎朕当内修而外攘文武兼资尔其出将而入相勉服厥命益隆乃勲可

表

拟范相免明堂陪位谢表

诏命待祠礼敢稽於俟驾恩从告病义良愧於执笏顾蝼蚁以何知致乾坤而介意【中谢】伏念臣早以樗散待罪钧衡晚缘弩痂乞身圭荦闲散既久傲慢相成端委何能素甘心於一壑支离未死犹窃食於三鍾属当宗祀之期获预辟公之召念采薪而不给奚荐牡以能胜奏達九重方惧防风之戮词颁一札岂意孟轲之容此盖伏遇皇帝陛下德厚宽仁道宏忠恕去苛解挠跻四海於平康利物爱人怜一夫之疹疾且父兄之於子弟施既如此则股肱之於元首报当若何喘息余生或未先於朝露驰驱晚节期少报於春晖

拟宰相贺明堂礼成表

孝達诸侯举飨亲之盛典欢均四表广宥罪之深仁允为宗社之休宜効臣邻之庆【中谢】臣闻鱼丽备礼斯可告於神明鳬鷖守成遂获安於祖考重惟今日之艰棘不若当时之治平自非天实相之物其多矣攘夷狄以去外侮之患任贤能以成中兴之功亦当能崇黄帝之合宫讲周公之宗祀俾我将我享不专美於前王致来燕来宁益绍隆於丕祚恭惟皇帝陛下常德立武深略纬文时敏厥修虽夙兴夜寐而匪懈日新其德使吏称民安而不知永言维则之思莫重因严之教精意以享爰修配帝之诚至神遂通果见得天之效臣等职当辅弼德乏肃雝骏奔以执豆笾有惭显相作解而施雷雨实赖熙成

代赵圣用镇抚谢放罪表

按属郡之奸违本期除害因故人之营救翻谓复讎狱用折於片言罪方虞於万坐拜恩知幸感涕无从【中谢】窃以事孰重於欺君刑莫加於谋上一之为甚犹当寘於斧钺之诛二者而兼岂能逃其洿瀦之罪是故在朝廷有上下之分法禁告论也而涉乎此则得言在闺门有

父子之亲法当容隐也而至於兹则听告岂容诬伪妄瀆宸聪姑欲沦胥冀逃已祸伏念臣千无一得尺乏寸长肆法驾之东巡逮金人之南渡偶缘分镇遂隶两州间道之官仅脱虎狼之口濒湖抗贼屡流蛟鳄之涎间关百罹参差九死馘舖肝之巨寇执问鼎之凶酋血气既衰精神已敝力小任重因尝乞身而再三志大心劳尚意立功之万一是贪眷遇不即退归属承宽恤之文用按贪残之政窃希何武庶几服罪而露章已愧范滂能使望风而解印岂图怙势大肆兴讹答榜吏民劫持上下造谤书之一篋投讼牒於九重譖愬既行凶邪得骋适苏章来二天之庇致曾参陷三至之辜虽雷霆忽震则惊并付虎冠之治而日月容光必照终明雀角之冤获从縲紲之余复齿縉绅之列兹盖伏遇皇帝陛下用心若监施仁如天与四海而为春重一夫之独泣望霓得雨将槁顿苏谓臣戚乃自贻方责以激薄律贪理宜无赦察臣情为可悯逮论其宁僭无滥忍及非辜臣敢不仰佩至仁益坚晚节死而後已冀有得於桑榆敏以行之庶不慚於犬马

代秦德久峡州到任谢表

分符东蓼往尝窃於一行紆紱西陵今复叨於再命望实踰於愚分感弥激於懦衷荣幸已多愧慚并积【中谢】伏念臣邓林朴遯冀野駑駘材无取於寸长力不胜於十驾偶缘世赏滥厠官联当兹综核名实之朝乃臣投置闲散之日盖以承流宣化方资师帅之良岂容窃禄备员获在子男之列此盖伏遇皇帝陛下道大亦大德明惟明不显亦临同周文之所以圣无为而治得虞舜之急亲贤遂令营蒯之微得备樵薪之末臣敢不钦承德意抚育黎元肯徒耗於太仓冀酬造化傥未烦於司败誓竭麋捐

信阳到任谢表

为官择吏尤高共理之良揣分量能实冒分符之宠已谐入境遂视章程向以报君奉行德意臣【中谢】窃以申为小郡地号极边人物荒残山川萧索曩接中都之奥壤分隶京西今为并塞之孤城割归湖北邑虽有二户不盈千顾繇薄以无堪误膺委寄何设施之可效庶尽拊绥伏念臣起自犁鋤进由庠序当政和之乐育隶业贤关属季孟之同升联名仕籍周旋三纪齟齬百罹盖由疎拙失於周身加以愚直动至忤物揜说利害逆料是非方得倅於南谿固尝妄言而取降官之贬继员丞於东蓼又复因人而为对吏之行积其愆尤久合诛殛尚赖圣恩之寬大未即弃捐敢期晚景之侵寻更叨拭擢兹盖伏遇皇帝陛下道大亦大德明惟明乃圣乃神本帝尧之独智克勤克俭兼夏禹之成能知人则能官人救物故无弃物致兹朴获备薪蒸臣敢不思致其身冀行所学但使政平讼理何敢求名庶几近悦远来自然乐业

代贾漕茂德贺表

天啓升平之运长发其祥时歌降永之年诞弥厥月华夷增气岳渎効欢【中贺】窃以圣王修之国修之家修之身以致海寓之宁大德得其名得其禄得其壽以慰生灵之望审龟图之罔极验凤历之无穷恭惟皇帝陛下道迈汤文仁齐尧舜省刑薄税跻万姓於春台偃武修文措八荒於壽域由中及外若臣与民对流虹绕电之辰注拱极望云之日臣滥将使指阻系淮

堦兽舞无从徒想钧天之奏葵倾有幸欣逢化日之长

代王亦顏江东转运判官谢表

持节西淮罪止虞於瘵旷飞驒江左恩复冒於宠荣德薄位高感深涕陨【中谢】伏念臣盐车下驷社栎散才曾无十驾之可称岂有寸长之足取误蒙拭擢洊被使令言远有光敢惮载驰而咨度见知则说遽先四牡之来归自北而南去闲就剧夫何易地滥及非才此盖伏遇皇帝陛下圣迈周文功跻夏禹照同日月见思齐之不显亦临治格平成得虞书之无远弗届常善救物因能任官遂令槭朴之微获备燠薪之末臣敢不永怀靡及专意肃将致一道之澄清虽其所短布九重之德泽则或庶几

提举湖北常平茶盐到任谢表

分忧顾於边城方虞汰斥遣谏詢於本路易副使令命朝出於岩廊光夕生於原隰退量緹力从激懦衷窃臣赋性不灵谋身更拙决科入仕垂及四十年行法涖官仅书六七考皆由愚蠢自取悔尤投闲置散分之宜久矣山林之适承流宣化民之帅幸哉州县之劳黽勉一期拊摩千里效蔑闻於共理宠忽拜於皇华矧国家敛散之权与山海懋迁之利视饥穰而为出入赈济吾民排商贾而制低昂阜通邦货欲膺是选必择其人夫何妄庸有此侥幸兹盖伏遇皇帝陛下常德立武深略纬文功迈宣王攘戎狄而复境土治符世祖明政体而揽权纲方并建於羣材以共图於大业怜臣尝废放两纪而不改其操付臣以澄清一道而俾效其愚自怜草芥之微乃辱乾坤之造戴恩若此图报谓何臣敢不祇服训词肃将使事周爰咨度宁辞六轡之驰驱功如见知愿奉三年之计最

湖南运判谢到任表

司仓湖北责仅免於旷瘵将漕湘南恩复叨於委寄任非所称惧弗克堪臣【中谢】伏念臣学术迂疎人材冗散自献书於明主因获罪於权臣久安丘壑之闲念絶轩裳之望晚从拂拭洊被使令分符何补於边城揽轡就乘於使驿食君之禄敢言避事以偷安当官而行必欲去奸而革弊常恐怨憎之积毁而遂致罪戾岂期礼乐之加宠而远有光华矧此湘江下临鄂渚九州数十县悉隶按澄三军百万屯咸资馈饷非刺举不回则何以率吏治非干施有术则何以贍边储遴简通才庶堪烦使不图侥幸猥及孱庸兹盖伏遇皇帝陛下因能任官循名责实内而公卿侍从之选儒必用真外而帅守监司之除功须已试怜臣虽穷且老而益坚益壮知臣既愚且直而守道守官特涣纶言俾更龙节臣敢不黽勉从事夙夜在公歌载驰驱之篇俯究使臣之谏度去不均不安之患仰遵圣训之丁宁积毫髮之微劳答乾坤之大施

拟沈必先尚书镇江到任谢表

江湖远去方安置散之宜纶綍下颁忽被分忧之寄恩踰涯分愧溢心顏【中谢】伏念臣才不逮人性多忤物盖平日素疾奸佞故当职辄忘权豪所言患不知岂敢为妻子之计若死诚

有补是甘报君父之恩犬马一心鷹鷃累岁独赖容光之照获全屈軼之生俾从麋鹿之羣乃其所志付以股肱之寄岂曰当然兹盖伏遇皇帝陛下汤德日新尧仁天覆任贤使能以济中兴之治选徒差马以成外攘之功念臣固尝效忠於补阙拾遗谓臣必能尽力於承流宣化一夫不获庶臻鸿鴈之安四征弗庭方起云霓之望

代叶少蘊左丞谢建康府安抚并庐壽宣抚使表

甯身藪泽方念咎於桑榆授钺江淮忽拜恩於纶綍功难补过愧不胜荣【中谢】窃以刺史之奉六条首除强暴汉安之遣八使专选威名或持斧以戢奸或埋轮以惩恶或褰帷而人为之震栗或揽辔而志在於澄清悉能致盗贼诣营而乞降岂但使守令望风而解去眷兹新命创自本朝望欲重於列城故非前世浩穰之地则不置声欲先於羣寇故非近时辅弼之臣则不除惟建业之繁雄实临流之都会面横赤壁背负乌江州分淮海之区星直斗牛之次肇三方之鼎峙更六代之龙兴舟车所通衣冠攸集在宣池寄股肱之郡於庐壽亦唇齿之邦肆法驾之东巡逮金人之南渡川原遍赤草木皆腥今将举郡邑而一新且复扶邦家於再造驱攘蜂蛭抚养疮痍兴仆植僵折冲厌难授以一方之巨屏俾为万里之长城必能慰安民情庶几称职诚欲布宣德意要在任贤伏念臣智不足以周身才未至于闻道衆人欲杀事难辨於窃鉄累圣优容理或伸於伏劔常恐铄金之谤积成销骨之冤岂图眷知擢眞枢近当奸臣之跋扈有乖明哲以自全泊元恶之殲夷遂至纠弹而共弃尚幸覆盆之照偶逃擢髮之诛丘壑三年干戈九死仅存余息获见中兴十国为连敢希元帅一麾出守遂镇名藩此盖伏遇皇帝陛下与物为春配天其泽赦过宥罪尽从雷雨之施藏疾纳污大廓山川之度用人惟已因能任官起臣於寂寞之滨处臣以繁剧之职责其後效以盖前愆臣敢不夙夜在公黽勉从事愿同猛兽保藜藿於深山不使明时致豺狼於当道

拟张德远谢大资宫观表

五年分阃功无尺寸之微一日还朝罪有丘山之重恩实踰於始望荣莫盖於前羞感涕无从捐躯曷报【中谢】臣闻臣子有二不择之戒在爱亲与事君春秋有五不韪之诛贵度德与量力有戾斯语不逃常刑伏念臣起身布韦致位枢筦岂有蚍蜉之援先为介绍特由乾坤之造所自陶熔顷缘骄敌之南侵上轸渊衷而西顾载惟川陕截然参井之隅其在国家隐若股肱之势宜为外援共弭内陵知臣於梁益当念乡粉谓臣在朝廷正司兵柄尔其振军声於万里之外无憚一行予亦措邦本於九鼎之安有闻再造承命奋发拥麾载驰自忘力小任重之虞孰恤意广材疎之诮俄淹岁月靡効涓尘臂虽怒於螳螂技已穷於鼯鼠积其误国久合杀身敢意眷怜尚从寬贷畀内祠之真禄陞秘殿之崇资俾养弩痾用安樗散此盖伏遇皇帝陛下至仁天覆大德海涵原其初心取一日用力之善以兹异数掩九载弗成之愆正复自谋无以踰此枕流漱石傥未泯於明时誓水指松庶有期於来效

拟张德远落大资依旧宫观表

恩隆宠极罪大谪轻虽镌秘殿之华尚假内祠之逸省穷心瘁拜命涕零【中谢】伏念臣顷

以謬庸誤膺委寄徇一時之急義當勇於舍生督萬里之征事莫難於料敵顧在當日敢辭此行徒以智小謀大不能推賢遜能以吝權至於日往月來遂成屈力殫貨而誤國死有余責生之在君此蓋伏遇皇帝陛下推成湯之寬仁體仲尼之忠恕方務風雷其号令而与天下更始謂宜雨露其膏澤以致帝命惟新聊示小懲用彰至德震風忽及方知厦屋之休寸草何知愿效春暉之報

拟贾明叔复显谟阁待制表

盛德有容尽释积年之谴微生何幸更叨三字之荣服宝训乎裕陵躡华资於延阁拜恩涕陨省过魂惊【中谢】伏念臣智不足以周身心但知於爱国谓邦有司直不可持禄养交以同衆人而地当敢言自宜明目张胆以报天子性既疾恶志务去邪故其论駁纠弹不复畏忌顾望出於狂瞽既无献可之谋责以愆违斯有黜幽之典三危两窜万死一生交游为下石之挤宾客竟引绳之逐属彗星之告异获湔除於奸党之中逮元圭之霈恩遂叙复於散官之列四十年之畎亩一万里之朝廷萧条蟠木之容零落蚍蜉之援分甘丘壑望絶云天何期断梗之残年有此登瀛之异数粉榆改观蒲柳增辉此盖伏遇皇帝陛下圣无常心天从人欲銳意社稷中兴之业敷求祖宗近侍之臣方将与四海而为春岂复忍一夫之失所念父有争子犹或保於令名则国有忠贤必能裨於至治忘其犯顔撻鳞之大罪録其输心露情之小忠宠之纶綍之恩还以图书之府臣敢不勉追老马冀问路於将来窃比翳桑誓扶轮於未死

代和州天申节贺表

五百岁而圣人出长发其祥十二年而岁星周诞弥厥月适际流虹之旦用修拊髀之欢恭惟皇帝陛下睿知有临神武不杀允矣中兴之主卓然上壽之资月之恒而日之升克明其德雷不一而风不再耆定尔功治基太平福熙纯嘏天所助者仆景命於万年人皆仰之得欢心於四海某职縻守土目极望云献壽九重莫厠仪韶之凤输诚千里徒倾向日之葵

拟辛侍御迁中丞谢表

备位杂端曾微报称进官独坐更冒宠荣岂容不讳之朝久玷敢言之地莫闻一得少补四聪【中谢】伏以朝廷之所赖以治者在官僚官僚之所由以肃者在纲纪唐分三院汉置一台中丞则专佐大夫以纠正百官御史则更直朝堂以推弹杂事在龙朔尝有司宪之号至文明复更肃政之名苟非其人为不任职必得刚正如狄仁杰以明王立本之罪蹇諤若韦思谦以直张仁禕之冤庶能抨劾奸邪扫清朋比使善人劝而淫人惧致强者畏而忠者怀伏念臣心固暗於是非职莫分於贤否平日素乏特立独行之操当职又无扬清激浊之称仅同羝羊之触藩篱敢比猛兽之保藜藿杨?之不屈於恐胁实赖神明温造之遂获於甄陞敢期眷獎此盖伏遇皇帝陛下追法上古绍开中兴欲来骨鯁之言共济艰难之业每寬风宪为霁天威听无憚於撻鳞报亦思於张胆臣敢不仕以行义进思尽忠知无不为当效鷹鷂之奋直者先祸更全蝼蚁之生

拟沈必先除吏部尚书谢表

方从散地起为千里之师敢冀误恩复作六官之长省躬有腴拜命靡遑【中谢】伏念臣受才凡庸禀性疎直夙荷圣神之眷久污清切之班昨长铨衡窃有曦於裴马迨靡岁月曾无补於丝毫旋遂劾归获逃罪戾方切前羞之负岂膺旧物之还此盖伏遇皇帝陛下躬上圣聪明之资开中兴熙洽之运虚心俊杰銳意事功嘉与刍蕘力致万邦之治欲令凋瘵获比三代之隆致一介以不遗岂寸长而可取臣敢不循名责实推贤達能勉遵毛玠之公庶几报政敢比山涛之职自作品题

拟翟巽谢除内翰表

松藉草方安琳馆之闲曳组鸣珂复拜玉堂之命遂使桑榆之景再瞻日月之光荣幸天多愧慚山积【中谢】伏念臣赋才凡下禀性庸愚居怀隐甫之刚常守展禽之介言惟古是动与时乖半世宦游二十年之持橐一时行辈六七人之秉钧固知汰砾不容於在前敢谓积薪或得而居上肆樗散之无用属弩痾之有加抗疏归来恰值干戈之扰杖藜逃去重增丘壑之迂间关百罹参差万死幸危憊之少间喜废坏之将兴誓毕此生请歌再造申君臣之善颂快江湖之鄙心野兴何浓正欲和风於南郭宸恩未替更令视草於北门此盖伏遇皇帝陛下并建英豪明扬侧陋期大来於儒雅以同济於艰难谓王之言也如丝臣之和也若响欲得封敖痛在朕躬之语当求陆贄号为内相之才念臣尝在翰林初本无过怜臣久居畎亩不遽遐遗特宠新除俾还旧物臣敢不强勉学问以冀淹该发为训辞庶臻深厚粉饰一王之法追还三代之风莲烛夜归密奉不传之旨金銮昼掩徧观未见之书内竭疎庸仰酬眷倚

拟赵元镇参政辞新除第一表

臣闻任重大者不可使小力持谋险艰者慎无与浅识计或用失其当则上何以副仰成之望若处非其宜则下岂能逃旷废之讥为责匪轻所系不浅故君必度德以授之位而臣当量力以効其官岂容謏闻获预大政【中谢】伏念臣智仅同於爝火才不越於斗筲自知甚明位早踰於涯分人言可畏势莫幸於宠荣况当外侮之侵陵方务中兴而克复盍求张仲以成吉甫之宪邦自有姚崇安用怀慎之伴食此盖伏遇皇帝陛下励精图治至诚与贤谓臣往在枢庭虽无尺寸功而不见其过念臣来自藩屏固尝二三任而遂悯其劳致兹误恩出於独断苟贪眷遇理必至於颠隮冀遂保全命特从於追寝所有恩命未敢祇受

拟赵元镇参政辞新除第二表

屬聶任隆乃俾蚊?之负穹窿听迓当闻蝇蚋之声顾帝意之云吁亦愚诚之未至苟幸从私於万一安能避瀆於再三【中谢】臣闻德进则朝廷尊而臣无素德贤用则邦家立而臣实非贤徒以弩痾久膺器使念主忧臣辱艰难非避事之时致日往月来倥偬积罔功之罪谓宜诛殛更冒宠荣虽圣眷之有加奈师言之不厌伏望皇帝陛下重怜旧物特寝新除任贤使能允济周室之美投闲置散俾从韩愈之宜傥未泯於余生冀有酬於异日

拟赵元镇谢新除表

纶言下逮俾赞洪钧鷁愿上陈莫回涣汗且方以効一官为过分岂敢期超八座以疏恩固避无从兢惶曷处【中谢】臣闻济一时之务者要须一时之胜为千岁之计者斯有千岁之传况今日参知政事之名乃前代左右丞辖之任实同令仆获在倚毗当得不挠不回如魏元成庶能矫拂趋竞盍求之才之烈若刘思道期以明振纲维可使疎庸亦蒙识擢此盖伏遇皇帝陛下鼎新庶政图任旧人礼重筑台姑欲先於郭隗功成补袞冀遂得於樊侯不由绍介之一言必欲断迁於三事智小谋大何裨日月之明责重命轻愿殫犬马之力

卷二十

钦定四库全书

相山集卷二十 宋 王之道 撰 劄子

王师所至秋毫不犯劄子

契勘今来用兵当预有以固结民心而所以固结民心者莫大於秋毫无所犯是以成汤之伐桀不过於归市者不止耕者不变宣王之平淮夷不过於不留不处三事就绪汉高之胜项羽不过於财物无所取妇女无所御此无他得天下有道得其民者所以得天下也得其民有道得其心者所以得民也夫斯民簞食壶浆以迎王师者岂乐於战伐哉为其有以慰云霓之望而脱水火之厄也若屠戮其父兄系累其子弟掠其金帛淫其妇女如之何其可也伏惟都督仆射相公上体九重所以眷倚之意下慰亿万生灵所以属望之心无使市不易宗庙不震长安之人不识旗鼓专为李晟美实中外幸甚

又与汪中丞画一利害劄子

画一之道闻有兵无将与无兵同有将而非其人与无将同然则今日膺阃外之寄运掌上之奇者尤不可不选择而使之也究自古用兵初不以衆寡为胜负但患乎将帅之非其人耳何则寻邑百万而光武以三千败之苻坚百万而谢玄以八千败之曹操以八十万而败於周瑜袁绍以四十万而败於曹操至於本朝太祖之定天下用兵亦不过十五万东征西讨无不如意其伐蜀也止用精兵七千人耳愚谓今日之兵本自足用诚得人而将之亦何患乎不济盖吾之宿将比自讲和以来初无尺寸之劳毫髮之功二十年间享其富贵尊荣甚者位师保太傅以至开府仪同三司其次类为太尉节度使如承宣观察防御团练使盖不足道黄金白璧歌童舞女充牣私室朝游暮宴其奉养僭侈有非言之所能尽者孰肯擐甲胄冒锋镝奋不顾身以徇国家之急哉当金亮之死止得人如往时之张韩其恢复中原亦已久矣传曰疆场不宁拔卒为将为今日计要当责诸军都统制统领官於行伍中推举其才能武勇而为衆所称者或一二人或四五人明言所长如赵军之许历齐军之田单上其姓名於朝然後诘之以诡道以观其谋试之以危事以观其勇谋且勇矣然後任之以职付之以事而较其能否优劣而拔用之俟其立到功效次第加赏如其所举不当其所举官必罚无赦而军中见充统制领将佐或有老怯无用者令其自陈愿休致者从之如此则有材武而陆沉者得以表见於世而老怯者得以退休於时亦各遂其志矣昔萧何荐韩信於高帝余人未之知也惟何知之而帝信之方其择日设坛诸将皆喜人人自以为得大将既拜乃信也一军皆惊已而佐帝取三秦定天下者信之功为多由是以观择将真今日之急务不可忽也不可不慎也

一兵法曰千里馈粮士有饥色樵苏後?师不宿饱故赵充国云积穀三百万斛於塞下则羌人不敢动然则当今足食之策莫如营田而营田之策非将帅身以率之未见其可也昔郭子仪以河中军食常乏乃自耕百亩将校以是为差於是士卒皆不劝而耕是岁河中野无旷土兵

有余粮也羊祜之镇襄阳也与吴人开布大信降者欲去皆听之减石城戍逻之卒以垦田八百顷其始至也军无百日之粮及其季年乃有十年之积此将帅营田之明效也其次则莫如韩重华之为振武水隆转运使出赃罪吏九百余人脱其桎梏给耒耜与牛使耕其傍便近地以偿所负释其粟之在吏者四十万斛不追吏得去罪死假种粮齿平人有以自効莫不涕泣感奋相率尽力以奉其令而又为之犇走经营相原隰之宜指授耕法故连二岁大熟吏得尽偿其所亡四十万斛而私其赢余得以休息军不复饥

一今日之用兵患在於规模不素定而或进或退或攻或守皆取决於朝廷朝廷初无一定之策以授於将帅故将帅幸其朝廷之遥制有当进而不进者有当攻而不攻者且如成闵除荆襄制置兼招讨方自鄂渚移屯德安而召援采石正当隆冬盛寒千里犇命士卒数万人疲於道路死者不可胜数其於赴援初不闻其有折冲却敌之功兵法曰百里而趋利者蹶上将五十里而趋利者军半至而况於千里乎此规模不先定之过也一今日之用兵患在於赏不当罚不行何谓赏不当盖以无功而肆为诞谩谓如偶获一人则图其战鬪之状张其掩杀之衆走旗入报以为大获胜捷而其赏有至於转十数官者何谓罚不行如王权以都统拥数万之衆遇敌不战而走非独大丧其师且使两淮之民悉为鱼肉既不能正其典刑籍其家产迨至台谏论列仅能除名远窜而已兵法以赏罚素明为足以知胜负然则军声之不振亦理所当然也复何恠哉

一自金人入寇我师进讨士卒以将帅望风退避一时犇溃初未尝交锋而自相蹂践死亡销折者十之五六曾不闻逐军申其死亡之数谓如前军原一万人今死亡过半而所请旧额不减一万之数後军原八千人今死亡过半而所请旧额不减八千之数是也若以所请虚数依旧给与死亡之家则犹可以养其父母妻子以慰旁观士卒之心亦庶几焉傥或统辖等人取之以为已有则其为公私之蠹可胜计哉传曰山林不能给野火江海不能实漏卮今日之患正在於此不可不深究其弊而痛革之也

一道路之言以为用兵以来人马死伤过半而诸将方且申乞招军买马朝廷不问其财用之无所自出悉从其请尽下诸道总领所应副而总领之所有皆自朝廷支降非於支降之外别有生财之道也陆贽有言益兵以生事加赋以殄人无紓目前之虞或兴意外之患在今日不可不以是为虑也

一晋武帝时鲜卑木机能为边患攻陷凉州帝临朝叹曰谁为我讨此者马隆进曰陛下能任臣臣请任之臣愿募勇士三千人无问所从来帅之以西寇不足平也帝许之隆募能引弓四钧挽弩九石者取之立标简试自旦至日中得三千五百人隆曰足矣请自武库选仗帝命惟隆所取仍给三年军资而遣之隆西渡温水木机能等以衆数万据险拒之隆以山路狭隘乃作偏箱车为木屋於车上转战而前行千余里杀伤甚衆隆至武威鲜卑大人猝跋韩且万能等帅万余落来降隆与木机能大战斩之凉州遂平今日之招军每効用一名日支食钱三百米三斗而又不刺面不涅手夫人得而充焉可谓优且厚矣使为将帅者诚能体国一一如马隆之用心而所招効用又尽得如马隆所募之人则一夫可当十夫之用不然十夫不足以当一夫是徒为虚名以蠹其民尔虽得百万亦何用哉

一唐陆贽之言曰人者邦之本财者人之心其心伤则本伤其本伤则枝干颠瘁而根柢蹙矣议者咸谓今日之计莫急於理财以愚观之理财在今日为无术但当行其革弊之政则财用斯足矣夫奉祠给禄朝廷所以示优贤之意也今不问官之高卑类以家贫仰禄婚嫁未毕为言陈乞宫观动至三五任坐糜帑廩下至初出官人欲得家居累考无吏绩请官俸往往乞监庙十之七八其侥幸亦云甚矣当此国家多难为士大夫者正宜君尔忘身国尔忘家岂容背公营私自为温饱之计哉今欲将宫祠岳庙请给并行住罢其以故丐闲者皆与其名而夺其实候事定日徐议复旧可乎古之仕者必有圭田盖养廉之意也今或彼有而此无甲厚而乙薄夫贪婪无厌之人正使有且厚犹恐未必能廉则其无且薄者又何以责其廉哉今欲例取职租之入以济军需候事定日徐议均一可乎今之仕宦文臣承务以上武臣下班祇应以上闲居待阙皆有月俸且文臣自选人以至改官自改官以至显官能以廉俭自将绵历既久生计粗足不犹愈於韦布之时哉而又加之俸贲莫甚焉今欲将文武闲居待阙月俸不问高卑例行住罢候事定日徐议给否可乎诸军拣放使臣将校以其陈乞或老或病不足以被坚执锐而无用於军也故拣而放之使得自便遂其闲逸以终天年正如士大夫之引年致仕不闻致仕之後复有俸给而终其老死也今朝廷以此辈尝有从军之劳则当考其战多之功而等第之使臣上者不过再任其次一任而止将校上者不过三年其次二年而止亦已过厚矣今乃不问其等第而一槩分送州军给禄养老至於死而後已其与当时陈乞老病减放之意岂不相悖戾乎耗蠹财用未有如此之甚者今欲将校除一任或再任三年或二年外并行住罢可乎此四者实当今之大弊如能住罢乞行下逐路漕臣籍所管州县所罢钱穀令逐项桩管不得妄有支动专责馈饷以佐军需其所得之多岂不过於豪民献助坊渡预借之数乎兹盖有利於国无伤於民但患其不能断以行之耳

申三省枢密利害劄子

一湖北荆西两路所屯重兵分隶四将而不置主帅虽庙算固有定义令其互相策应然至於缓急之际不知先登陷阵者果谁也正使有先登陷阵之人又恐旁观策应者畏忌顾望莫肯奋不顾身以徇国家之急如贺兰进明之不救张巡许远将何法以加之正使事定诛不救之罪若张镐之杖杀闾丘晓亦何能救其失哉昔九节度使之师以郭子仪李光弼皆一时元功难相临摄遂不置帅师次邺南未及战而溃兹不可不鉴也一自古边防未尝不戍重兵以备敌人今国家既都江淞必藉淮汉以为屏蔽自合戍重兵於沿边控扼去处今诸大将并屯江南去边动五七百里沿边州郡所戍多者不过三二百人少者才百有余人万一敌人夤夜以铁骑兼程入寇则数百里之地不过朝发夕至所谓沿边戍兵何能为哉使沿边戍兵无所能为则所谓大将者远在数百里外亦将惊惶失措岂不大可虑哉兵法曰先处战地而待敌者佚後处战地而趋敌者劳又曰百里而争利则擒上将军劲者先疲者後其法十一而至五十里而争利则蹙上将军其法半至三十里而争利则三分之二至倍日并行此孙臆所以败龐涓也今由都统下所遣戍兵或在德安或在应城且如信阳系沿边隘口止有兵一百五十人而除摆铺差出外在寨者止七八十人设若有惊求援於德安往来计六百里求援於应城往来计七百余里不知统兵者亦尝思及此乎俗谚谓远水不救近火此言虽小可以喻大今欲便乞戍兵则恐有不通水运去处或山路险阻艰於馈饷愚愿应沿边州郡各乞分戍步兵三二千人马三五百匹可乎如从所请只乞命诸军推择有才略善抚御士卒者令其统帅前来

庶几缓急可以倚仗兹正疆场不宁拔卒为将之时不可忽也

一访闻淮北州郡往往多有粮草师行恐非所忧兵法曰食敌一锺当吾二十锺 秆一石当吾二十石【注曰 豆稽也秆禾藁也】又曰取用於国因粮於敌故军食可足也【注曰兵甲战具取用於国中粮食则因敌也】且说彼民朝夕延颈跂踵以望王师之来至有一户而磨麦七十石养猪数十口造酒三二十瓮以备壶浆之迎者又有朝夕沿淮探伺及请旗榜者以恨王师之来不早彼民云但得天兵三二万人则自淮以北便有数十万衆为之乡道矣八月初五六间蔡州上蔡县百姓数十人传闻我师分屯德安遂欣跃鼓舞弃其资产攜其老幼与牛马而南行数十里而唐州桐栢县巡尉利其财畜会合弓兵追逐凡十数战弓兵死伤过半而老幼累日不得食疲困就擒亦有窜至本军界者以此观之可以相见彼民俟后之意但使我师所至秋毫不犯当见彼民争为前驱其恢复疆宇盖反手也

乞择县令以三事赏罚劄子

契勘百里一令实生民休戚利害所系而累年以来圣君贤相重怜凋瘵顷罹干戈涂炭之苦日夜讲求思所以选择县令以当百里之寄而终未闻有以循良见称於时者其失有三焉一曰循法而其所差不问人之能否二曰能否无别而人无所劝沮三曰劝沮不行而贪暴者不知所警庸懦者不知所勉昔郑子皮欲使尹何为邑子产曰学而後入政未闻以政学今欲行李唐书判拔萃之科应初改官人合入知县者并试其中者则进之使作邑其不中者则扼之使监当而其最优者上则陞擢差遣次则进秩又其次则减年以别能否可乎卓茂为密令政号忠厚光武一旦擢为太傅封侯史臣称其克复旧物享祚长久盖由知所先务而得其本原所致今欲责逐路监司核其循良岁举一人上治状於朝廷参较优劣择其尤异者取旨内则用而为郎官外则用而为监司郡守以是劝沮可乎汉孝宣信赏必罚总核名实而当时美其吏称其职民安其业今欲责郡守监司应属县令凡贪暴害民庸懦任吏者按劾无贷否则不以去官事发并连坐使其贪暴知所警庸懦知所勉可乎是三失若去而县令之不得人者未之有也

论和籴利害劄子

之道窃闻古者三年耕必有一年之食九年耕必有三年之食以三十年之通虽有旱乾水溢民无菜色是故国无九年之蓄则曰不足无六年之蓄则曰急无三年之蓄则曰国非其国恭惟国家乍更兵火比自平定以来殆二十年号称中兴而官兵之冗所费不貲逐岁调度尝苦其不给若以三年之蓄较之岂不大可虑哉之道於绍兴二十九年夏调官日固尝具劄子请於时相乞卖僧道度牒五千道每道价钱一千贯可得钱五百万贯其钱尽以籴粮於沿江州军贮积以备缓急军需当时虽不蒙施行今朝廷已降指挥出卖度牒二千道每道钱五百贯共计钱一百万贯其钱令诸路附纲起发解赴行在交纳内三总领所钱另项桩管如此窃恐所得百万迟之数月复成乌有愚愿阁下明言今日国用匱乏乞以此钱专用籴粮寻常不得妄有支动缓急以供馈饷不亦可乎所有和籴利便令具画一下项一今来如籴粮乞於所籴州县设場每場置斗十面差监官二员一员掌交量一员掌支钱其粮米入仓听令百姓自量

并不须用斗给盖百姓至愚而神圣人所谓上好信则民莫敢不用情今若听从自量决无以九升半作一斗之理而所支钱又无邀阻想见欢呼鼓舞而乐中於官也且百姓寻常入市糴卖其铺户於糴余名下每斗各收牙钱一二十文今闻官中收余乃无种种之费民情之喜不问可知也

一和余場合差专支官一名手分二名斗给库子各一名专支官兼掌出纳手分一名斗给一名司纳以给凭由手分一名库子一名司出以给价值其百姓既交量所糴米入仓讫交粮官即时令当行人出给凭由即时令当行人支钱不得少有阻节如违令州郡或监司觉察将官吏量行责罚

一和糴場所差监官二员交量官居其东支钱官居其西其监官日支食钱五百文专支官并手分斗给库子日各支食钱三百文其监官手分斗给库子食钱候余粮足日罢支如此庶几可以责其养廉若有乞取听人告即时决罚

一和余有二利盖民间艰於得钱若官中於米贱时收余则民乐於得钱而官获其利然今之和余遂成强余民之被害不可胜言无他且如转运司行下一郡令余一万石不惟本司要取额外升合而所余州县亦然至於专斗每斗又取使用钱一二十文方始交量不尔则一斗只可量七八升若百姓稍有语言其监官必绳以法解赴州郡或监司究治缘是更无所控告

一今来和余谓如州郡市价每斗一百文足即量增十数钱明量一升作耗百姓见官中更无阻节而价值比市井稍有所增自然不劳而办

一和余之弊不患乎吏之为奸而常患乎监官之不得其人不患乎监官之不得其人而常患乎监司守倖知县之不得其人使监司守倖知县诚得其人则监官有所畏惮而不敢犯过监官有所畏惮不敢犯过则吏之得肆其奸欺者亦鲜以类推之今日天下事往往如是岂特和余而已哉且监司一路之风宪也所至要当使奸赃退听善良受赐乃为称职今则不然凡置司所在主者或不得人则本司官吏往往开其作弊之端而州县官吏乘之公肆横取其为害比他郡尤甚有不可胜言者此又不可不念也

卷二十一

钦定四库全书

相山集卷二十一 宋 王之道 撰劄子

乞卖度牒余军粮劄子

窃闻之赵充国之制先零尝谓耿寿昌曰余三百万斛穀於塞下则羌人不敢动寿昌所余止得四十万斛义渠再使且费其半致羌人敢为逆由是以观为国家者岂容外有强敌而不为足食足兵之长虑乎朝廷自军兴以至於今三十有五年矣诸司所统无虑数十万兵亦不可谓不足矣而终未闻有岁月之储则食之不足槩可知也尝试以今兵食计之大率不过三百万斛略论中平之直为钱不过五百万缗异时国家常虑暗失丁壮禁卖僧道度牒矣而游惰之徒利於不耕而食不蠹而衣虽不披剃披带例以参头道者为名所至云集往往三两倍见存僧道之数其与暗失丁壮均也今欲乞权造绫纸度牒五千道每道立价钱一千贯俾自今以往度为僧道者依职员例预免私罪杖公罪徒逐岁等第分降诸路转运使出卖书填不惟可使此徒知度牒之艰得悉自顾惜互相勉励遵释老之遗训报君父之大德且复岁得数百万缗若行封桩不得别有支动於秋成日於米贱州军趁时每斗量增数钱收余除水脚糜费外可得三百万斛仍於濒江州军储积缓急以备军颁亦今日足食之策也

乞将犯盗罪不至死人配隶诸军重役劄子

契勘杀人者死伤人及盗抵罪惟兹三章非特汉高入关所约之法当然自唐虞三代以来未有能易此而致治者也恭惟主上明慎刑宪诏令之下罔不以施生戮死为念但推而行之往往未尽得人州县之吏上而守令下而巡尉间有坐视盗贼肆为良民之害而不复问者设或有能督责土兵弓手保甲擒获一二至於解赴所属则当行人吏又以为奇货重有乞取然後受之既付囹圄而未获徒党而行赇於鞫勘官司互相表里借词出罪无所不至由是自死降而入流流降而入徒者十常八九其尤甚者既谓之流曾不出境三二百里又以其徒伺候资送曲意奉承管押之人既赂以金复醉以酒弛而纵之逸者多矣此曹既返巢穴稔恶不悛其势与向来捉事人誓不俱生而有害有不胜言者矣今欲乞将犯盗罪不至死之人配隶诸军盖此曹类多骁勇趨捷岂惟缓急可以备驱役其防闲之密约束之严庶几有悛心而椎埋剽刦之流亦少畏惧用不犯於有司而百姓蒙实惠上广明主好生之德顾不伟哉

预置大军马草劄子

契勘大军见戍淮上将来合用马草理宜预行计置之道窃覩绍兴六年秋刘少保宣抚淮西日其他措置乖谬固不可毛举缕数而最为扰民者马草一事宣抚司行下安抚司安抚司行下诸州州行下县县行下保正长文移联函继踵催督起发而不言其受纳去处州县既已责办保正长更不肯为申明保正长迫於程限且畏军法正当获稻莩麦之际尽起保内丁壮人

负草四束自朝至暮旁徨道涂东西南北莫知所向如是者几一月後來寇退既就庐州置場受納而其受納官吏务在请赍竟为阻节斯民既苦一月无处交納幸有其交納处不复计较所费由是每草一束会计水运亦不下四百金其负担者往往至七倍深可怜悯乞欲朝廷明降指挥自今民间所科马草除情愿般赴军前交納人户外余听束納钱二百文省当夏秋间暇时官为召募老弱不堪出战之兵於淞淮及安丰塘并庐壽界有塘砾去处采斫堆垛准备缓急应副大军支遣庶得不夺民时不烦民力而军储预办缓急不致悞事岂曰小补哉

选将戍合肥劄子

契勘合肥西北距淮二百四十里东南距江亦二百四十里在今最为控扼敌人要害之地然而城大兵弱不能独守今年春伪齐来寇偶朝廷所遣岳节使兵至敌与寇会贼骇不意遂却不然合肥之民与河梁等无噍类矣兹亦幸而成功非孙武所谓以近待远以佚待劳以饱待饥其胜固前定也何谓以近待远兵法曰百里而趋利者蹶上将五十里而趋利者军半至倍日并行此孙臆所以败龐涓也何谓以佚待劳兵法曰先处战地而待敌者佚後处战地而趋敌者劳投石超距此王翦所以杀项燕也何谓以饱待饥兵法曰千里馈粮士有饥色樵苏後师不宿饱齕木煮纸此张巡所以睢阳也今以淮西安抚而戍兵江东一旦境上有变往五百里来五百里而中有大江之阻其势非旬日不能赴援而城已破贼已遁矣窃观去冬逮今宣抚司遣兵过江檣不下二十次少者五六百人多者三四千人初无闻於折冲厌难而一往一来徒困我师徒敝我民徒坏我州县其害有不可胜言者比闻宣抚刘太傅至合肥之明日有诏趣归而器甲粮饷之舟将次合肥而返被溺者十之三四焦湖南北数百里凋瘵之民当此畊蠹驱之於风涛万死一生之地俾令救其所失而偿其所捐深可矜悯伏望仆射相公以伊傅为心耻一夫之不被如宣武刘太傅国之重臣不可轻动即乞於诸将中选其武勇有谋者俾统兵屯戍合肥使得古人所以待远待劳待饥之道然後责以成功庶几乎其可也

乞罢无额上供钱减年赏劄子

臣闻圣人无常心以百姓心为心惟以百姓心为心故无常好也百姓之所好吾则与之聚之无常恶也百姓之所恶吾则与之去之恭惟陛下自即位以来因民心之好恶而兴利除害用能绍开中兴而措天下於太平比罢免行钱百有余万贯及放丁盐钱而以内库钱充之数不可槩举兹非以百姓心为心詎能至於此哉然尚有可议者如经总制司无额上供钱增及五千贯者守倅减二年磨勘一事为害不细访闻近来所在州郡前此无上项钱去处守倅利得减年之赏往往非理剗夺县道及場务常赋等钱以充无额上供僥冒赏典其初只缘守倅一时幸赏至使无额立为定额岁岁百色诛求侵削无所不至而公私受弊有不可胜言者矣盖县道应干所入钱悉出之民间場务应干所入钱悉出之酒税况兹年丰如淮东西湖南北米贱而不售民间难於得钱所至場务酒税额往往例皆亏损今守倅以利一时之赏而夺其县道場务常赋等钱增作无额上供正使逐郡不问大小例增及五千贯通天下计其数亦未必及今来所罢免行钱之多而况所增曾不及万分之一耶伏望圣慈怜其所取之微而流弊至甚特罢守倅逐岁无额上供减年之赏仍将二十三年以後创立无额上供并行免放不为永额以寬民力实天下幸甚

论诸将不为扞御计劄子

契勘自张韩罢兵以来殿帅之杨存中镇江之刘宝建康之王权鄂州之田师中皆拥重兵享高爵厚禄极其富贵安荣於今二十余年矣近杨存中以丐祠封王刘宝以跋扈被斥所存者惟王权田师中二人当此多事之时朝廷曾不责以扞御之事而二人亦宴然坐视初不闻其有所措置为彼之计则善矣而吾之所以平日养兵谋帅之意至此亦何所赖也虽然帝王之兵以全取胜是以贵谋而贱战而百战百胜非善之善者也故先为不可胜以待敌之可胜所以然者朝廷必有深谋至计所谓先为不可胜缓急可使折冲却敌而非天下所能窥其万一者不然愿於闲暇时密谕诸将使为之备若高崇文之屯长武城训练士卒常若寇至卯时受命辰时引道器械糗粮一无所阙而破敌人於谈笑顾不善乎然而万一有警使所谓探报者正如飞鸟之疾诸将尽如高崇文之受命不踰晷刻出师御敌然往五百里来五百里且有大江之阻风涛之患尚恐敌人先据要害欲进不能欲退不可机会一失噬脐无及其念之哉

乞重命令无使朝行夕改劄子

窃闻古者以命令譬汗其言曰涣汗其大号以明如汗一出而不可复反也是以成王之训有官君子则曰谨乃出令令出惟行弗惟反而刘向之上封事於汉元则曰今出善令未能踰时而反是反汗也如此而望陰阳之调不亦难乎然则命令之数变易非治世之所欲闻也国家崇观以来其弊在此今主上若稽古昔绍开中兴要当尽革前日之弊而朝行夕改尚或因仍旧习亦岂其所宜哉且以近时减官并县二事言之减官所以省费并县所以省事在今实当务之急也而减官未几旋又增置如减司户一员而增兵马都监与指挥十数员是也并县未几旋又复置如舒州之并宿松无为之并巢县曾不一年再复是也若以为官不可减县不可并不当以一人之言一己之意而遽行之若以为官在所减县在所并不当以一人之言一己之意而遽改也一减而十增适所以重费昨并而今复适所以多事不识汉光武之减吏十九并县四百其在当时亦闻增复者有几耶乞自今以往朝廷发号施令当深思圣人涣汗之言上以成王为法下以汉元为戒近则谋之卿士远则稽之衆庶可则因否则革无以古今而妄生是非无以彼我而妄为憎爱使生灵蒙实惠国家销实祸而天下後世仰望其治绩而不可跂及实中外幸甚

乞兵戍巢劄子

契勘今来金人入寇江北之地悉为贼区尚赖将帅协心士卒用命天戈所指诸路一清可为朝廷大幸然壽春距合肥才二百里有奇今壽春既已陷贼而合肥又为贼所平填不可复守若不明设斥堠申严备御使贼乘我之间长驱南来则自淮以南数百里荡然无有亭障不复留碍岂不大可虑为今日计必欲屏蔽江表莫若屯万人於南巢以据要害可则进否则退使贼不合转食东南实天下幸甚

乞赏营田官吏之不扰者而罚其扰者劄子

伏见近年州县营田之始诸事草创佃客既不可遽招则多劝诱而取之民田器既不可立办则多和买而取之民或借其力以耕或配其种以种兹固所不免者今举行既久自宜人人体朝廷之德意遵画一之成法令有补於国无扰於民犹老农之治田岁入常多於人而比隣族党初无毫髮之犯庶几播殖日广蓄积日富邦计以羨军食以丰而坐制敌人之命於股掌之上且亲民莫如令尉而营田之职又当朝夕巡行阡陌检察种蒔於民尤获相亲其扰不扰与有劳无劳不於令尉是责而谁责之欲乞因今年之再稔时行考课问去年之买牛余种与夫佃客之贷借官吏之请给其费几何所收子利几何较其所收比其所费果有数倍之获则其有劳宜在所赏也而一或扰民斯无足取要当访其扰与不扰而後加赏焉较其所收比其所费若才足以相偿则其无劳宜在所罚也而苟能不扰犹或可恕要当访其扰与不扰而後加罚焉诚能以一路计择其有劳而最不扰者一人旌赏之虽超迁数官而不以为僭择其无劳而最扰者一人黜罚之虽废锢终身而不为滥则人知劝沮矣人知劝沮则吏称其职矣吏称其职而民不安业者未之有也昔汉宣以信赏必罚总核名实而吏称其职民安其业号称中兴愿复见於今日

戍兵营田安丰芍陂劄子

契勘无为军近承安抚刘大傅劄子差官前来捡括逃户旷土谋为营田夫营田非适今也赵充国之制先零尝屯金城羊叔子之制孙皓尝屯荆襄皆在边徼未尝与农杂处而无为自兵火以来比江北诸郡粗有农作若又籍其逃亡与其闲旷而分屯以耕岂惟兵杂於农农扰於兵居者不得安而去之徙者不敢归而避之有失劳来还定安集之意亦恐无为距淮往复千里缓急不能相救有失且耕且战之意窃尝求古人之用心盖为帝王之兵以全取胜尝先为不可胜以待可胜而所谓不可胜者莫如营田塞下以俟其间而往取之此汉之所以破先零晋之所以擒孙皓盖两军相敌尺寸地必争今既为营田以制敌人奈何委五百里乃不於壽春而於无为也昔张仁愿代沙吒忠义为朔方总管於河北筑三受降城絶敌南寇路唐休璟以为两汉以来皆北守河今筑城敌腹中终为所有而仁愿卒奏筑之斥地三百里自是突厥不敢踰山牧马朔方益无寇其建三城也初不置壅门曲敌战格或曰边城无守备可乎仁愿曰兵贵攻取贱退守寇至当并力出拒敢回望城者斩何事守备退沮其心哉诚欲营田而於淮上其去敌人尚远复有长淮为之限制此张仁愿筑城敌腹中似未足深虑也今去壽春而就无为诸将之意亦可见矣之道窃尝为宣抚大傅计膏腴可以足食而无水旱之忧险阻可以戍兵而无掩袭之患进不失攻退不失守者惟壽春之安丰为胜盖安丰之田受芍陂之利者不下数百万顷而其陂之长濶各六十里东西如和州之麻湖而南北与深过之异时虽尝建置水寨兵余所存黎民亦无几矣其或未能营田淮上兹庶几其可也伏惟仆射都督相公忠诚忧国而加意焉

慰安淮南使自扞御劄子

契勘江北自王彦充攻陷壽春以来人心动摇日夕延颈跂踵仰望王师之来不翅大旱之雨迨今累月杳无所闻乃於八月初四日承七月二十三日括舡禁渡圣旨指挥截自十月一日已後大江更不得通行官私舟船候过防秋依旧且尽括江北舟船不能禁金人之必渡而逆

料金人遽絕江北之民且曰过防秋而依旧是犹人父兄急难不能保其子弟逐而去之且戒之曰他日安平汝当归四方闻之其谁不解体兹正与前日之弃河北淮北无以异也今既不能遣兵戍淮以安其心伏望宣抚端明重以属郡矜怜数千里之民无所依归备以之道之言申奏朝廷乞特发德音下明诏慰安淮南使人自保守如有能扞蔽一方不陷於敌候过防秋必行信赏要使中外感动至羸老癯疾扶杖往听愿少须臾无死以观中兴庶几可以上回天听下协人望

<集部,别集类,南宋建炎至德佑,相山集>

卷二十二

钦定四库全书

相山集卷二十二 宋 王之道 撰劄子

乞将京西淮南逃絶田展免租课劄子

契勘京西淮南系官闲田朝廷比缘少人请佃已於绍兴二十六年三月十六日专降指挥令转运司行下所属州县多出文榜招诱不以有无拘碍之人并许踏逐指射请佃不限顷亩给先投状人其租课依绍兴七年十一月二十五日指挥送纳自承佃後沿边州县与放免十年次边州县与放免五年候承佃及三年与充已业许行典卖其为招诱之法非不勤且至备且善可以见圣君贤相之用心也伏见近年以来请佃者渐衆而其间诸道人吏从而作弊以逃租之重而絶租之轻也遂将系官闲田暗却逃絶名色例行给佃或恣其乞取而轻重其租或俟其给佃既了续改作官员职田之类初年给佃次年即行起催并不依沿边放免十年次边放免五年指挥至使朝廷之德意遂成罔民之虚文甚无谓也欲望详酌将京西淮南应干已未请佃逃移户絶官田各随所在州县见行则例逃重絶轻纽撮租课沿边放免十年次边放免五年其逃田纳租及三年令其自陈以田亩土色纽作税役别给公据径改拨为已业许行典卖其絶田不以年限亦属常平不得更加租赋及行改拨务在必行如有违戾去处许佃户越诉将官吏重作行遣庶几请佃之家不至疑惧安土乐业日加垦辟用跻阜康之域不胜幸甚

乞止取佃客劄子

伏见淮南诸郡比经兵火所存凋瘵百无二三其间尝为人佃客而徙乡易主以就口食幸免沟壑者今既平定富家巨室不复问其如何投牒州县争相攘夺兵火之後契券不明州县既无所凭故一时金多位高者咸得肆其所欲而贫弱下户莫适赴愬勉从驱使深可痛悯且人一日不再食则饥七日不食则死当建炎之末绍兴之初斯民艰食米斗万钱无贫富贵贱刮木皮屑草子以充食方是时人人救死不赡有能分小絶甘而以糠核活人於垂尽之际者自非黔娄伯夷孰不转徙而愿为之役哉今距彼时七八年矣以一日不再食则饥七日不食则死论之向非徙乡易主以就糠核虽人百其身安得复至今日欲乞自今以往应尝为人佃客而艰难之际不见收养至转徙他处者虽有契券州县不得受理当艰难相收逮平定辄无故逃窜者听其主经所属自陈收捕所在州县不得容隐着为甲令庶几潜销攘夺之风大变逋逃之俗而有耻且格駸駸乎比屋可封之世不胜幸甚

罢山林寨巡检劄子

契勘江北居民顷当羣盗纵横计无所出一时创为寨栅保聚各家老幼後來稍定朝廷念郡县久无官吏以弹压抚绥相继敦遣尽令过江既到任其间贪残不法者往往指寨栅以为宝

货渊藪朝遣一人焉括其钱暮遣一人焉搜其粟名为劝借而有不从令与不如数者辄中以军法而寨栅始祸及於民矣兵火之余斯民获存者亦无几矣正复缓急守寨栅以自保犹恐力有不赡而中间刘少保宣抚淮西日又尽籍属郡寨栅之首领与其强壮听候起发使唤而民始以寨栅为产祸之基矣朝廷比年以来灼见保聚之有利於百姓每遇防秋辄诫飭郡县劝诱父老俾令措置寨栅又虑缓急人自为计不能合从以相救援复命郡县推择土豪中有官人县置山林寨巡检一员郡置都巡检一员统管下寨栅缓急相救所以加惠凋瘵可谓至矣而斯民终以前项二害惩沸吹薰伤弓惊木或闻边遽贼警人人宁扶老携幼冒犯霜露窜伏草莽莫有肯依寨栅为保聚计者然则巡检之在今日盖徒设也又况所置巡检虽号土豪皆异时卒伍之暴横屠沽之桀黠者幸此平定不得骋其志肆其毒今乃借此巡检之权诚恐一有不虞未必为国家用为乡里谋而劫所辖之良民以复仇报怨屠郡县者皆此曹也伏惟都督仆射相公为国长虑而加意焉

论赏罚不当劄子

臣观今日天下之大患不在乎边寇与盗贼而在乎赏罚不当盖赏罚人主之大柄也人主高居深拱而能使四方万里鼓舞震动忽然如神日以犇命赴功而天下若不足为者恃有此耳使其不当则赏非特不足以劝能而能者且怠矣罚非特不足以惩恶而为恶者益得以自肆矣然则天下何由而治乎古人善用兵者莫如孙武其言曰主孰有道将孰有能天地孰得法令孰行兵衆孰强士卒孰练赏罚孰明吾已知胜负矣夫论兵家之胜负而始乎主孰有道终乎赏罚孰明其言有深意也伏望皇帝陛下慨然奋发以赏罚为中兴之要务夙寤晨兴思所以求其当赏自贱始必欲当其贤罚自贵始必欲当其罪何者为当贤赏一人而千万人悦晓然咸知为善之利者斯当贤也何者为当罪罪一人而千万人畏晓然咸知为不善之害者斯当罪也赏当贤罚当罪而天下自治矣天下既治而外敌之不庭盗贼之不?未之有也

乞移屯沿边劄子

之道窃谓诸路都统制与帅守监司其职不同今日拥重兵护诸将可以为国家却敌制胜者都统而已至於总领出纳诸路之钱粮转运斡旋一道之飞挽提刑之经总钱物提举之盐井课利若朝廷用兵应副馈餽监司之职盖如此帅则今之安抚使是也守则今之州军是也且以湖北一路计之安抚使帅荆南大军之所戍也缓急责以扞御则固其职分而其一路共十四州唯信阳一军系沿边去淮无四十里户口单寡财用穷匮不及近里州军一草市虽有戍兵百余人正复受本军节制万一有警亦不足以办事而况其不受节制乎今欲随宜应变疾速措置务要不失机会莫若计沿边地界远近紧慢责令诸都统移屯边上控扼要害去处以防敌人妄动仍责诸路监司计置合用军需预於无事时於沿边屯兵所在储积以备支遣庶使同心协力共济大功传曰投机之会间不容穉惟参政仆射相公为宗社生灵之故少赐留神天下幸甚

戒江北守臣与伪齐崇信义禁侵掠劄子

右契勘千里一守休戚所系江北诸郡昨自敌马南渡羣寇毕集淮上朝廷从权一时郡守例除武臣以补其阙然失於勇者则务生事以开边衅失於贪者则务生财以肆民害徒爱锱铢之小利忘邱山之远图得地不可守而所守者反失之遂使疆场不宁元元涂炭深可矜悯昔孟献营武牢而郑人惧晏弱城东阳而莱子服羊祜戍荊州而吴人之降者不絶此三子者非有他长修德信保分界而已今国家与伪齐为隣而不知出此以坚爱戴之心愚未知其可也伏望都督仆射相公鉴前日之所以失取古人之所以得选择异将有才德威望之重臣而更之俾到郡之日崇信义禁侵掠有俘其子弟者还其家有刈其谷粟者偿其直假以岁月使人晓然咸知我专为德彼专为暴如是而举北伐之师可使箪食壶浆复见於今日也

奏议

论收复当自陕西始奏议

臣伏闻金人改图愿修旧好遣使叩关将至阙下近陕西伪都统者亦揭榜令其将士毋得交战以待讲解察其上下之意和议甚切盖和议不定则必有内忧不独惧我师之致讨而已国家以生灵为念固应许其自新有如三事所宜审处一正名分二减币聘三画疆界窃料金人之议必出两端一则欲仍用旧议更增岁赂而以河南故地尽归本朝一则欲请复侵疆各守旧境而以契丹故事求为敌国二者皆未可遽许也女真本小部贡献于我海上之盟以契丹之故约为兄弟契丹既灭便寻衅端以宣和为渝盟靖康为失信劫迁二帝沦陷中原圣主中兴怀柔备至而狃於常胜必欲兼并凶力既穷始通和好天子不较称谓屈已从权者正以疆弱之势有未敌耳其後东昏正隆屡盟屡变至敢倾国大举直窥济江其渝盟失信视我宣和靖康孰轻孰重我可以为辞矣今其立者素非人望以孱庸之故得自全於正隆之朝完顔一宗诛屠略尽见在近属惟有葛王僭道之谋起於羣下非有受命之符遏乱之略也威福大柄必在权强内外乖争覆亡可待故即位未几已有兄弟之变【近传金主诏书兵部尚书可喜昭武大将军乌伦延安府同知李老僧武义将军千户乌古剌统军司令史斡里朶谋叛被诛】观其累世骨肉自相剪除此岂安固之基灵长之运哉则强弱之势与靖康以後事体不侔远甚若欲通好必海上之盟复敌国之礼然後可许名分既正岁币自轻凡此二事彼必不敢固执惟分画之议恐费商榷耳大河以南彼知终非所有或当轻以与我而别有所邀然淮汉之北人稀土旷都无险扼汴都残破徒有虚名虽或得之未易经理发兵戍守少则不足多则不堪措置一乖腹心罹患此金人反复已试之策而我向来受欺覆车之明戒也岂可保哉厥今天下之势惟陕西为可复其地去敌最远控带关河内有四川为之根本我已得其十余州若摧散关凤翔之衆则其余风靡矣今日之议设以大河为界固中国之福犹当深图利害以拯後艰若以此外更有邀求岂容堕其奸计彼或降尊损币自同契丹而靳吝土疆不肯分割则陕西之地决不可失宜以我所得陈蔡唐许颍嵩洛并他路诸州两相换易如尚不可则宁稍增币期於必从独留南阳以通武关我若并梁雍荆扬之区保江汉秦蜀之险平居无事积粮固圉敌虽猖獗亦无能为若有衅可乘知不足图也此事至重非片言所决必一再往复而後可了惟少忍之而已陕西既得则置宣抚使司於阶成和风之间而分布将帅据和尚方山仙人等原以临制关中各用土人保其郡邑如熙秦京兆要害之处量出蜀兵戍之使以其力自全而不为蜀累邂逅有警则下车而出征万一不虞则回戈而固守进可逐利退无後忧抚

綏數年形勢自壯不煩糧饋不耗金錢惟稍出蜀縑增印錢引以募衆于陝西便足以了辦經費天下之利莫大于此百世之業也昔楚靈王窮兵桀虐民不堪命取陳蔡不羹又將伐吳爲乾谿之役楚人立子干以入郢王師潰于訾梁縊于申亥之家子干微弱亦不能自立卒爲弃疾所圖弃疾既篡未獲所安及盡反陳蔡不羹之封其國始定五年而後能出師金人今日之勢正類於此仰惟朝廷必有成謨狂瞽之言豈足觀采顧大議未定不厭詢謀用敢竭其區區之愚惟陛下載擇幸甚

狀

論瓦梁利害申都督孟參政狀

右之道所準前項指揮尋依應躬親前去真州滁州和州接界地名後湖沿河相度迤邐至瓦梁同真州六合縣丞諸葛缶呼集地分父老詢問得瓦梁河東至瓜步口出大江一百六十里北接後湖西南至再安二百七十里其水系廬州慎縣滁州來安清流全椒和州烏江等處山水相合流入此河東注大江每遇春夏山水暴漲即沿河低田往往淹沒若筑合瓦梁口堰住水源壅入後河即南北淹民田及行路十餘里其東西系是上通再安下通瓦梁河道并無利害內所淹地只是斷得自全椒南入綽門至和州路計九十五里其全椒西却有一路徑由六丈再安至和州計二百二十里比綽門路只多一百二十里不甚迂曲況瓦梁堰成即堰上自是一條大路不復似河道有水阻碍須用船筏方可濟渡若徑自滁州界白塔入真州界竹塹過瓦梁堰至宣化渡比之他路更為順便兼瓦梁下口又有六合渡薛家渡滁口山渡三處通宿泗滁濠等州入真揚州路別無阻節之道今相度上件瓦梁若從官員白劄子內所請筑合堰口不惟困民力費民財浸民田有此三害其於控扼江左實不見其毫發之利契勘金人前後兩次侵犯淮南第一次系由泗州入真州路第二次系由廬州入和州路即不曾經由滁州後湖過江若論控扼建康今日天設之險上則莫若阻淮次則莫若阻江今言事者上既不能以阻淮爲言次又不能以阻江爲言而乃以爲建康雖倚江以爲固其控扼之勢實在江北欲積水後湖以爲北海斷滁之全椒距和之烏江一路而期以控扼制北兵不得徑至江山豈不謬哉之道竊聞之周世宗時李氏苦周兵之南侵其臣何延錫爲畫此策方輦雷塘石封瓦梁口未及告成而數州之民皆去而歸周故是役罷今國家紹開中興遣兵戍淮乃所以爲江南之屏蔽自茲以往要當日辟千里廓清中原以副四海望霓之心上件官員白劄子所陳實恐未爲利便今以沿河父老所言及之道所見謹具狀申都督相公伏乞鈞旨更賜詳酌施行

論廬帥久任狀

契勘安撫使系一道帥臣如淮東之揚州淮西之廬州所以控扼邊防爲國屏翰平時猶不可輕以授人而況於今日乎伏見淮西安撫使仇愈沈靜有謀剛方不屈當去年冬敵入寇諸將逗留莫肯赴援羣吏睥睨咸欲逃遁而愈乃能死守孤城至統制官張奇刼之以兵曾不少變卒使江北數千里之地賴以保全非選植其才能若是耶往者朝廷忽以李健替愈守江州淮西之人莫不危之繼聞報罷道路乃復翕然相慶夫健之才或過於愈未可知也而人以愈之去爲危者才固見於已試也才之不可多得也尚矣選植其才而又不能固之以久任假之以

重权旌之以厚赏而冀其成功则敌何由而定兵何由而偃乎昔李牧之居代前後凡十余岁而大破匈奴李积之治并十六年而突厥不敢南惟仆射相公为朝廷计念之母忽

卷二十三

钦定四库全书

相山集卷二十三 宋 王之道 撰序

拟宏词太初历序

汉自高祖开基迄孝武元封七年盖百有二岁矣而循常习故至于稽古创立法制粉饰治功之事犹多阙焉於时历法坏废晦朔分至往往失度帝入公孙卿壶遂司马迁之言慨然叹曰历者天地之大纪先王所以仰观天时俯授民事者也奈何漫不问因诏御史大夫儿宽与博士共议宽等乃言曰帝王之有天下必改正朔易服色不相沿袭所以明受命於天也其议造汉历以为万世则初汉袭秦言历者宗张苍至是乃得邓平及唐都洛下閎等二十余人以律起历而罢其尤踈濶者十七家始用夏正以正月为岁首改元太初且以名其历焉惟律本於黄钟之管其长九寸其围九分得积八十一寸而历所繇作是为八十一分以太初之元年十一月甲子朔旦冬至日月如合璧五星如连珠应无毫发之差兹诚炎帝之分八节黄帝之纪三纲唐尧之命羲和虞舜之在玠衡之事也猗欤那欤生民之道其在兹乎

送因觉上人游天童序

上人因觉与其弟思古从余游十年更兵火艰难义等手足今年春不余告杖锡东去令人慨然若有亡也是行自湖之道场来过余相山入门笑哑哑不止徐谓余曰闻君以三至之言致疑於上或者以为恐陷不测之祸故不辞远道而来持一瓯茗以劳苦虽然吾心以为不应有是入其境乃知君以好直为罪人所诬今见公面吾是以笑昔人所谓富贵不能淫贫贱不能移威武不能屈者非君其谁哉君在建炎之末当金人长驱中原列郡不守而能与里人耒耨棘矜力芘一方更十数剧贼杀人如刈草菅所当辄破终不能伺其间隙晚虽以援衆之难两陷贼营君皆谈笑处之贼莫君辱君亦不少降今又遭此横逆吾意君当顛顚不堪其忧而君固自若以此而处富贵吾知其不淫无疑也上人又将为天童之游挽而留之莫得予来年亦当求官四明见上人於林下然未敢必也故书此以为异时一笑云绍兴三年冬十月

赠孙明远序

建昌孙明远妙於地理言吉凶祸福若相人然期以岁月若神今之管公明郭景纯也予昔葬先君之明年梦持杖履立塚前若指顾状俾令修之觉而忘其处十五年间或培或濬虽屡修终不满人意今年春复梦更葬予窃怪之後两月而明远至自广昌因予同年曾子修获有请於明远蒙不鄙过予往视松楸而观其形势一览而得其地於西南二十步外正与梦符使予若醉而醒且悲且喜势止形昂前涧後冈真葬书所谓龙首之藏者以秋八月壬午更葬获克襄事予老且拙百不迨人何敢徼福於先君然而明远术数之精不可以默而不书因其归也作是文以送之绍兴二十年冬十月

应资深康乐园四咏诗序

谢安石晋家第一等人方隐居高卧东山与支许辈事渔弋其谁敢以功名累之一旦从征西役卒能救危颠於将亡而副苍生之望其谁不以功名归之应丈承事即其第之东园斩茅伐石治台观以资觴咏之欢葺卉木以助江山之胜萧然有谢东山之高风正恐鸣驺入谷鹤书赴陇而康乐之乐非公所能独有而与苍生共之也四咏少见主人与客四时临览之万一要当捧腹疾读传之药笼酱瓿不尔识者以予为佞且鄙也

沈次韩诗序

次韩妙年秀穎读书为古学不作举子事业故能以诗名家而一时儒宗先生翕然称之仆去年春始得邂逅於南巢当稠人广衆中识其小异已而探其源索其流有如长河巨川渺不见其津涯孔子曰後生可畏焉知来者之不如今况今规模已若此敢易言其来邪次韩名愈仲姑苏人常从吴勋不伐韩驹子苍游金许其可嗣东坡一派云

拟宏词黄帝律本序

夫乐先王所以致鬼神和邦国谐万民安宾客说远人作动物无所不用者也而其作也本乎六律六吕谓之十二律阳六为律律以统气办物一曰黄鍾二曰太簇三曰姑洗四曰蕤宾五曰夷则六曰无射陰六为吕吕以旅阳宣气一曰林鍾二曰南吕三曰应鍾四曰大吕五曰夹鍾六曰中吕六律所以合阳声也六吕所以合陰声也阳为天陰为地天气下降地气上齐陰阳相摩天地相荡而乐在其中焉然则律吕者陰阳之声陰阳者天地之气是乐为天地之和明矣宜其幽足以感鬼神明足以谐民人微而至於百兽率舞六马仰秣有不期然而然者且律始乎黄帝取竹於大夏之西崑仑之陰地曰嶰谷竹生而窍厚乃命伶伦断两节而吹之以听凤鸣雄鸣为六雌鸣亦六故制箫一十有二起於黄鍾之管九寸转而相生各因而三分之上生者益一下生者去一而十二律备焉兹云门大卷之所由作也自时厥後如尧之咸舜之韶禹之夏汤之濩武王之武未见其舍是而能有作者呜呼律之妙一至於斯耶班固既已推明其功以为律本载之汉志故愚辄复抚其事实而系之以序

记

和州重开新河记

曲阜孔公纯老倅濡须之後年以尝连摄郡事无为及龙舒二郡之民鼓舞政化歌颂惠爱故其治状闻於当路诸司交荐未及终更而历阳阙守天子用周汉进律增秩之典俾往治之无为吾乡里也命下之日备见耄倪欢踊万口称赞已而咨嗟太息曰何为夺我贤别驾至挽留不能去公既至历阳下车未几已而其吏民安於清静不扰且复服习二郡之先声不烦告戒申令自底于治乃恤民隐乃访民病苟可以为人除害兴利者无不为之新河东西横截郡城而过在郡治之南百步外上彻麻湖下彻当利河濒河南北皆民居自更兵火迨今三十年失

浚治瓦砾粪壤日填月壅几与岸平旧含山历阳竹木薪刍稻麦菽粟凡可以为民食用者咸自麻湖入新河直抵郡城新河既湮塞舟止历湖门外数百步人始知有般挈负担之劳而历湖南西北三面羣山森罗衆水所潴下流既阻新河之淤积潦无所泄并湖之田岁稍多雨则成巨浸民甚苦之公既受愬暇日按视河濬审度利害得其要领以绍兴二十九年冬十一月己亥乘农之隙用民力而浚之千里之民欣欣然而来当隆冬沍寒举锺成云挥汗如雨曾不踰月土功告毕而河流汤汤导麻湖而东之害於焉除利由以兴渔舫粲舸辐凑闐闐贾謠商讴鼎沸市井濒河居民就涤濯资灌溉得爽垆之乐去底滞之苦其耕於麻湖之滨者自今以始岁其有而无复水溢之患岂曰小补之哉於是宾僚吏属庠序之士畎亩之民填溢公门愿纪实建碑垂示无穷且谓予往者尝官历阳熟知斯民利病来丐予文以记其事予窃闻之薛大鼎在唐为沧州刺史先是无渠淤塞大鼎浚而属之海商贾流行里民歌之曰新河得通舟楫利直達沧海鱼盐至昔日徒行今骋駟美哉薛公德滂被今公之浚新河殆与大鼎异世同功而能使麻湖夏潦有所从泄并湖数千百顷之田岁丰而无饥算课见效则似过之然天下之理有开斯有闭有通斯有塞是河行於郡中其濶不踰四丈其深不满八寻而居於其傍者苟於自便投瓦砾堆粪壤日加益而人不知然则後二十年积而至於闭塞可以前料开而通之必有与公同志者焉

通济渠记

唐有天下因隋之旧都长安以关中地狭所出不足以给京师备水旱故常转漕东南之粟然自江淮距汴洛以達于关中除其间陆运略计水行无虑数千里动有风涛覆溺之患自李杰裴耀卿常坚相继领漕事当时称其举职後不复有继者盗起天宝陵夷至于代宗漕路几絕不通京师米斗千钱天子为之宵旰於是元载当国而刘晏实主东都河淮西江南东西租庸盐铁转输有意事功乃抵书元载条具运之四利四病载乃尽以漕事委晏故晏得竭其才因自淮泗泝汴入河究观三门遗迹至河陰巩洛见宇文恺梁公堰廝河为通济渠且随江汴河渭所宜江船不入渭而江南之运积於扬州汴船不入河而汴河之运积於河陰河船不入渭而河陰之运积於渭口自渭口而易船然後達於太仓而漕以无壅岁致四十万斛由是关中虽水旱物不翔贵矣初渠成时禁膳无兼时之储旬农方按穗以供而岁输适至天子大悦特遣卫士以鼓吹迓东渭桥驰使劳曰卿朕之鄼侯也若晏者可谓有功於国者欤观夫陈諫推为管萧之亚而当时不以为过有能循其法者往往至於富国而以才闻於世其规模宏远是可书也故略其兴建日月而记其事之本末云

无为军淮西道院记

两淮之俗从昔号淳厚故其民重犯法而少鬪讼为长吏者诚能因其俗以布政施教而不扰焉家家可使和协辑睦人人可使敦龐纯固而乖争凌犯之愬不至於庭得以暇日嘯咏湖山之胜从容宾僚之乐把酒赋诗围碁鼓琴以度朝夕而民惟恐其去不然敝精神竭智力以从事于簿书刑狱非特身不得须臾寧而民亦困以病且贫恨其去之不速无为在淮右地最僻左盖大江注乎东南巢湖潴其西北羣山环之纬之川流自太平兴国三年创建军垒以来部使者以职事按临属部虽过境上亦往往憚其紆而罕至民既淳朴畏事二税之外间有催科

初不烦鞭朴率先期告办故前後郡太守苟不自为异而与斯民安于清静者类皆谈笑治之因目之曰淮西道院绍兴二十二年春二月赵侯若虚以帝室之英被命出镇天性岂弟济以明敏故其吏事一切务简肃以便民而向之烦苛凡近于扰人者率皆革去不数月而民乐其政服其教囿圉为之空虚日以无事於是喟然叹曰无为之旧称道院以今观之名不虚得矣而道院未建殆阙典乎乃度厥材乃鳩厥工乃即郡治之西秋香亭壮其基址宏其规模为堂五间于其後而前翼以修庑三旬而成不陋不侈上下远近不知其有是役也本路运使华原郑公政尚清静嘉侯之能因其俗而不扰也为书其额榜以淮西道院落成之日民之来观者莫不欢踊称赞於其下曰使君之意是殆无事而使吾富乎无欲而使吾朴乎将昭示於无穷而使後來者知所遵乎俾尔昌而大俾尔耆而艾斯言非矫诬也所以报使君爱我之赐也予获寓是邦窃闻其言喜而书之

庐州天庆观物产记

世以儒释道为三教名虽不同其实无二以迹求之但见其殊耳予尝观夫习为儒释道之学者较其力於所事不顾躯命以极其严饰奉其祭祀而为无穷之供罔极之传者往往儒不知道道不如释或者以为善恶因果报应之说莫如释氏深切着明故能竦动羣听如此虽然为儒者之说者曰作善降之百祥作不善降之百殃为道者之说者曰为不善乎显明之中者人得而诛之为不善乎幽闇之中者鬼得而诛之兹非明其善恶之报也哉言至於此殆未可轻议也今之士大夫未有不学乎诗书礼乐而能入官者若是则无非儒家者流也以浮屠氏之不爱头目髓脑国城妻子而惟佛之从为吾儒者当何如哉而世乃有侵学宫之地以广其居占学粮之田以厚其生者良可太息道士任致明予之里人庐为淮西帅府而管内道正久阙绍兴二十六年桐庐姜侯秘监被命出牧下车未几令其徒推择有道行可以为衆所服者远迩莫如任贤牒无为以礼敦遣至则领道正事为之植僵兴仆苟可以出力为观门利者无不至庐有两观一曰天庆一曰报恩凡两观旧有物产籍更兵火不存至是询究始末悉以状上所属勘验得实前後给者凡四将以剏之石而貽後人暇日携以示予曰吾於合肥其去来犹传舍也而两观旧籍之物产不可以吾去来有时漫不加问噫任之用心如此岂非予前所谓尽於其教而能为无穷之供罔极之传者哉是可喜也乃为之书後二年岁在戊寅夏六月

绍兴府法华山维卫像记

按西南维卫无量壽佛像记云阿育王第四公主以姿貌寝陋冀其端严舍金银铜冶铸斯像四十九躯首饰火焰足饰莲花布四天下为衆生植福之本此山得四十九躯之一而居其冠初晋成咸和四年有婆罗门僧宝奉斯像泛海东来比至齐祖兵乱旁徨无所向因穴地而藏之大河之侧顷之发藏无见夜梦神人告曰尔其往江左谒丹阳尹高公悝当自知之婆罗门僧如其言诣悝悝曰某年月日偶以职事至张侯桥远望桥下有五色光轮困覆水命左右视之得斯像於遡流因闻於朝有旨致之阙下辟瓦官寺以居之輦入金陵抵长岸坊口牛不肯进鞭之若与人竞径入长干寺中有司以闻上叹异久之赐内府钱数百万为殿以奉香火婆罗门僧闻悝言悲喜交集因辞悝走长干瞻礼以终其身更宋齐迄梁大同中昭明太子统亲自长干輦送斯像奉安山中至山之日顶放白毫相光宛如组练紫遶十峯明年山发洪水坠

石崩崖摧压涧谷寺成巨浸而像设中立块然独存肆唐会昌之变欲毁为钱以不能碎故存之始在长干当宋齐之代尝失火焰金莲所在宋人董琮因采珠于交州覩物触舟之祥而遂获火焰齐人张世系因捕鱼于临海覩蟹相附之异而遂获金莲呜呼变化不常去来自在地祇所不能秘王命所不能拘火所不能烧水所不能溺非天下之至神其孰能与於此哉故书之以告来者

卷二十四

钦定四库全书

相山集卷二十四 宋 王之道 撰书

论增税利害代许敦诗上无为守赵若虚书

愚尝读西汉书至曹参传未尝不反复玩味而想见其人恨不获同时虽为之执鞭而无悔焉初萧何既死参自齐相被召代何将行属其後相曰敢以齐之狱市为寄慎勿扰也後相曰治无大於此者乎参曰不然夫狱市者所以并容也今君扰之奸人安所容乎吾是以先之嗟乎君子之所为是岂衆人所能测识也哉虽然盖有授之者矣参之为齐相也当天下初定思所以安集百姓因召齐之诸儒使各述其所见而言者以百数率皆不侔未知所以适从闻胶西有盖公善治黄帝老子之书参乃使人厚币致之盖公为言治道贵清静而民自定参於是避正室以舍盖公而师用其言故相齐九年齐以安集大称贤相夫治道贵清静而民自定此语未有大过人者而参行之不变其效乃至於是然後知昔人所谓天下本无事庸人扰之为烦尔殆与盖公之言不谋而合也由是观之参之不欲扰狱市其源盖出於此淮南在今日为国家咽喉唇齿之地军兴以来淮南所以受兵最重者盖以大江实控扼於前也曹操之於吴苻坚之於晋所以睥睨江左而至於狼狈者盖以长淮实牵制於後也诚欲屏蔽江左则不可不实淮南欲实淮南而不务抚养休息使其富足以图缓急之用欲重其税敛而自竭其力无乃不可乎前後建议之臣非不乞括田增税朝廷非不从其所请而下监司守令施行之然卒不闻立赏罚以为监司守令之劝沮者无他亦可以见主上不忍人之政与相国不扰狱市之至意也又况淮南累年以来常苦水旱相半所入既薄而米贱如土直不满百斯民艰於得钱而私债官逋督责既严不敢不偿故日就贫窶秋成之日场未及涤而百室已告竭矣万一州县不容从告讐之俗而行履亩之税莫之顾恤其流亡可立而待也不知流亡之後何时而能使复业耶盖盗贼之警流亡可复也凶荒之变流亡可复也有大於此而父子不相见兄弟妻子离散尚可冀其复业耶惟是苦於赋重而至於流亡一复业则前日之积欠将纷至沓来欲去而不能欲留而不可故不若流亡之愈也税其可骤增乎然则终不可增耶户口之增衆而垦辟之不增广者未之有也垦辟之增广而赋税之不增多者亦未之有也今闲旷连阡亘陌斯民不复问其耕之卤莽耘之灭裂而其实有卤莽灭裂之报为佃客者又贪多务得正使所收不偿所种亦当取其十分之四往往倒持太阿以陵其主人故主人常姑息而听之且有田於此前年固常耕矣既耕而力或不能种者有之既种而秋成或无所收者有之去年之与今年虽或不耕不种而前日垦辟之迹犹在也因其有垦辟之迹官司遂得以括之村邻遂得以纠之平时素所不快者遂得以告之而加其罪责焉可不悲哉尝以周官考之大司徒之制其地域不易之地家百亩一易之地家二百亩再易之地家三百亩说者曰不易之地以其地美而岁种之也故家百亩一易之地以其地薄休一岁乃可复种也故家二百亩再易之地以其地又薄休二岁乃可复种也故家三百亩遂人颁其田里上地田百亩莱五十亩中地田百亩莱百亩下地田百亩莱二百亩说者曰莱谓休而不耕者夫井田之法方里而井井九百亩其中百亩为公田八家之所同种也其外八百亩分给八家家各百亩八家之所自种也其自种者

得而私之其同种者则以输於公上所以代税斂且既曰八家皆私百亩而大司徒之所制乃有家百亩家二百亩家三百亩之不同何也以其田有美恶有可岁种者有休一岁然後可复种者有休二岁然後可复种者是则休二岁而复种者三百亩止可当不易之地百亩今不问其田之美恶凡耕而不种种而不收者悉欲责其赋斂可乎且既曰八家皆私百亩而遂人之所颁自田百亩之外或莱五十亩或莱百亩或莱二百亩之不同何也以其田有当休而不耕者故虽上地百亩犹给莱五十亩是为百五十亩所以寬其上地之赋也至於中地百亩则倍以莱百亩是为二百亩所以补其中地之赋也下地之与上地相去远矣故下地百亩则莱至於再倍而给之二百亩焉是为三百亩所以足其下地之赋也今不问其有当休而不耕者凡耕而不种种而不收者悉欲责其赋斂可乎敦诗常以此语人而或者难之曰今之法与古之法岂可同日而语也敦诗独以为不然何者君相所以寬恤斯民与成王周公之用心盖不殊也特行法者之过也何以知其行法者之过比有言者尝请於朝曰守令能於任内劝诱民户归业增垦田五百顷当陞秩一等为守令者利於陞秩也不问其户口增不增徒开告讐之路以来顽狡不逞之人因其条禁之有罪赏又从而严刑峻法以行之而民始无所措其手足矣且安集流散垦辟污莱守令之职也而何以增秩为乎使守令萌侥幸苟且之心而害及斯民者此实啓之也夫告讐不可长也尚矣为此者要非所以美教化厚风俗使人有士君子之行而上副吾君跻民仁壽之意也於传有之哀公问於有若曰年饥用不足如之何有若对曰盍彻乎曰二吾犹不足如之何其彻也对曰百姓足君孰与不足百姓不足君孰与足且彻者什一之法也什一者周之法也什一之谓彻者彻通也什而取一实为天下之通法也方哀公时其取於民者什之二而犹苦其不足故问於有若有若之以彻为对盖讥其取於民者过重非周之法也大抵国家之富当藏之於民世岂有百姓足而君不足乎仁人之言其利溥哉如有若诚可为天下後世言聚斂者之诫也敦诗多幸得为阁下部民阁下称开府未及一月而政事无小大到则剖决犁然有当於人心岂弟循良之称洋溢乎远迩敦诗闻之喜而不寐复念无为小垒户不盈万兹何足以烦游刃而数年来未见有贤且明如阁下者虽然人非尧舜安能每事尽善听讼非易事也而喜怒相疑愚智相欺善否相非诞信相讥日杂进於其庭乃欲以一耳目智虑听其词而尽其情敦诗恐小人挟诈怀奸乘间抵隙得以误其聪明而为政事之累也昔人谓愚者千虑必有一得愚无他肠是行也敢以野人之见取曹参不扰狱市之说裒綴成书求见於阁下庶几一得之愚或可裨备聪明之所不逮噫奸人为政者之所当先去也而曹参以奸人无所容至戒後相无扰狱市而况於齐民乎其不可扰也明矣抑又闻之君子之於政也不独为国计且为民计不独为民计且为身计不独为身计且为子孙无穷之计能为子孙无穷之计而利不及乎身者无有也能为身计而利不及乎民者无有也能为民计而利不及乎国者无有也而昧者反此为子孙计而不顾其身遂至於贪以害其民民受害而国益病矣岂能福及於其身哉又岂能福及於其子孙哉当太宗时钱氏既纳土朝廷遣王方贇使两浙以均税始亩税三斗方贇至则为减三分之二以闻於上而不复请使还太宗诘其擅减之由方贇曰亩税一斗天下之通法也两浙今既为王民矣至於租税岂容尚循伪国之制哉太宗善之而两浙之民至今亩输一斗今万乘驻蹕两浙中外廓然无事而方贇之子准实生丞相珪珪之子孙布在仕版大而为公卿小而为郡邑与国咸休永世无穷若方贇可谓善为民计而利及乎国者初亦曷尝为身与子孙之计哉身享显荣而子孙昌炽如此职有由矣不识阁下然之否乎

上江东宣抚李端明书

之道观今日天下安危存亡之机间不容髮如王彦充据壽春窺合肥一事最不可忽夫彦充凭骄寇伪齐之势拥衆数千攻陷壽春方且蠲烦去苛矜老慈幼劝播植通贸易修城浚隍誓与斯民同死生此其志正恐不在壽春而在合肥盖合肥在淮南最为重城西北距淮二百里有奇而壽春实在淮上东南距江亦二百里有奇而建康实在江左江淮相距不踰五百里而三郡在焉其势犹唇齿股肱不可以相无也国家诚欲都建康则宜紧守淮南以为藩篱欲守淮南而不能保有壽春合肥虽守犹不守也昔史思明乘汴滑之胜欲窥洛李临淮以洛无见粮厄偏难守问於韦陟陟请益陕兵退保潼关为持久计临淮曰两军相敌尺寸地必争今委五百里而守关贼得地势益张不如移军河阳北阻泽潞胜则出败则守表里相应贼不得西北此猿臂势也今欲守淮南而失壽春既有唇亡肱折之患矣奈何复委合肥於虎口而不问邪使彦充苟出上计攻其无备出其不意其取合肥犹破竹也失合肥则失淮南失淮南则天下事去矣建康且得高枕而卧邪盖古者帝王之居必在中原吴越斥卤菰蒲之墟地倾兵弱固不足以号令天下建康虽舟车所会更六朝之建国然自古及今未有不资淮南以为屏蔽者方金人南渡之岁杜充守建康而委淮甸有识者咸知其无能为前军已覆不可不戒也之道不肖亦尝谋为国家之计莫若选择贤将戍重兵於合肥务令一切如羊叔子之在荊州崇信义禁侵掠使敌人晓然知朝廷之意以候士卒可用然後乘其敝而攻之庶几可以得志兵法有致人而不致於人兹其大略也苟不出此而听其所为以失其机後将噬脐其可及乎之道淮人也而请戍淮虽有类乎私已窃惟宣抚端明以伊傅为心耻一夫之失所使之道诚私己犹当惻然念之况大纛高牙实为合肥壽春滁和无为主帅其宜轸虑无可疑者今壽春既陷合肥危若累卵滁和无为数千里所存刀锯之余民朝夕惟隣火伤葵之是忧之道代匱鎮屬於閣下亦僚案也乃不於此而望将谁望耶之道今月初六日自历阳来拜谒者且将浹日矣固尝披肝沥胆具以鎮守之恳淮人之情间谍之言以渎於下执事虽蒙閣下矜其危急怜其无告略去等夷俾得尽其所见獎之以语言劳之以饮食下逮奴马之贱饭刍无所不问於人之观听则可谓荣矣然於之道之初心所以为淮人之计者则未也且宣抚端明受九重之寄托来鎮建康以兼领於淮甸今大驾指日幸临而营繕之命不絕於道是役也之道固不敢期端明之必行而幕中之宾如参议宗公实一时之英杰忠诚忧国不愧古人其沈默有谋人咸以为有乃父留守之遗风而留守之德在国家如周人之思召公焉爱其甘棠而况其子乎闻之道路剧贼刘超愿以所部听命立功补过而都督前军统制崔公增自鎮江来拜宗公於堂下感泣呜咽久不能起盖留守所至有以固结人心如此之道闻叛亡之徒如王善李成今为贼用欲乞兵南来以抗我师而留守之於二人亦有生死肉骨之施昔仆固怀恩诱回纥结吐蕃拥衆三十万来寇中原郭子仪以衆寡非敌单骑谒回纥压以至诚卒能使倒戈以乘吐蕃而破其衆惟宣抚端明威声所加固有以褫奸雄之魄而夺之气今合肥之行诚得参议公授以成算俾之董师临敌庸詎知王善李成之不背贼而向我耶若与朝廷当一面以作士气以张国势以寬吾君西顾之忧则有余矣之道忠义所激不自知其狂僭伏惟钧慈哀其诚而貸其罪且无以文采芜秽而遂简其说幸甚

上宣谕汪中丞书

之道窃闻之易曰惟几也故能成天下之务又曰几者动之微吉之先见者也君子见几而作不俟终日盖几之为物藏於眇忽不可以期待不能以巧致其至也诚能因之而不失所以能成天下之务而获不终日之贞吉其去也疾不容瞬苟惟失之後将噬脐悔可及乎是故智者不先几而起不後几而发先几而起是为妄动後几而发是为失应昔者越王勾践以会稽之栖逮其反国焦心尝胆思有以报吴後七年而民求奋其臣种蠡之徒止之以为未睹其可乘之几於是乎敛形匿迹以伺其隙者凡十八年一旦夫差空国北从黄池之会遂一举而败吴再举而亡之窃惟主上岁在丁未以徽庙之子渊圣之弟兵马之元帅乘父兄北狩入继大统於今盖三十有五年其所以含垢忍耻屈己讲和岁以金缯饟遗敌人其为礼惟恐不至而未尝厌怠者无他上念二圣之播迁而冀其复还下怜四海九州生灵之涂炭而冀与一世同其休息也今二圣相继升遐虽徽考之弓劒归葬固陵而渊圣之梓宫未知何在前日使来所奏敌人语言大肆嫚辱意在窥并淮地之道指江为界古人所谓多行无礼必自毙者正谓此尔以愚观之敌人之危不朝则夕然未知所以危之者果谁也何则敌危有三无故而去其巢穴徙都燕山则固有可危之理今乃自燕徙汝自汝徙汴所过居民丁壮妇女室庐器用牛马稼穡为之一空所与偕来之人莫非素所虐从不堪久役之苦而叛亡者过半所存余党见其势败事去因起而危之此其一也淮北之民怀祖宗二百年涵养之德朝夕延颈以俟王师之来愿为前驱万一王师或缓其期势亦不容自己因起而危之此其二也契丹有不共戴天之讎今闻敌人追兵本国非独抗拒不来且立契丹之子以为主彼或乘上下之愤而释憾除嫌因起而危之此其三也三者虽皆足以危敌然度其势皆因其叛盟於我故得以投间抵隙而乘其几若是则我所当乘之几而彼或得之要其亡敌虽均然论其投几之会间不容髮则在我不能无失应之悔盖其党得而危之则是杀一贼生一贼羊祜所谓孙皓暴虐已甚於今可不战而克若皓不幸而没吴人更立令主虽有百万之衆未可窥也其为後患岂不大哉此几之不可失者一也彼民得而危之则恐奸雄得志而胜广之徒出焉虽若无足虑亦须烦其征讨此几之不可失者二也契丹得而危之则河北之地恐非吾有虽若无足虑亦当图其恢复此其几之不可失者三也今敌窟在大梁无异於夫差黄池之会国家蒐兵讲武以俟敌人之隙者何翅勾践之十有八年今乃先叛盟干我王略而彼民之望我师不翅大旱之雨我师之思奋以刷数十年之耻恨不朝发夕至斩其首以献所谓不可以期待不能以巧致者卒然而会於目前惟此机会自与敌人用兵以来岁周三纪今乃适至其不易得盖如此又岂可缓而失之也哉昔苻坚以小酋之种拥秦雍百万之衆欲吞东晋而并天下於一统师次淮淝晋用谢玄以兵八千走之坚遂灭亡方坚恃衆自谓投鞭於江足断其流亦何壮也逮淝水之败闻风声鹤唳皆以为晋师至又何弱也观敌人之骄侈残虐坚之为国盖不至此然其轻侮中国则甚於坚天之亡敌在此时矣恭惟宣谕中丞以直言劲论正色立朝为时王魏凡有识有知者莫不想望其风采兹缘敌人窥伺汉淮而主上奋厥武赫斯怒仰稽天时俯察人事分命诸将移屯江北要害之地以备扞御重念湖北京西控扼上流特遣合下将使事奉密旨抚劳将士体访事宜其与裴度以中丞之视征讨淮蔡之师异代同符是时考功郎中知制诰韩愈上言以淮西三小州残敝困极之余而当天下之全力其破败可立而待然所未可知者在陛下断与不断耳今敌人犯此三忌而是行叛盟殆与苻坚之寇晋略不少异而况所有兵民往往背叛其视苻坚之衆百不二三重惟国家养兵数十年斯民之劳敝极矣必欲息民莫如休兵今乃当应而不应当动而不动当起而不起则恐一失机会而兵休无时民亦何从而息也哉不识合下自出国门以至於鄂千有余里之远亦尝询及刍蕘之言乎士卒之论乎闻而思奋者

臣而思报其君之讎乎子而思报其父之讎乎弟而思报其兄之讎乎民至愚也合而听之则圣抑亦以退避为是与非乎以进讨为可与否乎范蠡所谓从时者犹救火天与不取反为之灾羸缩转化後将悔之愚愿采斯言以告於上庶几休兵息民之有日也干冒台严下情无任绍兴八年六月十二日上侍郎魏珪书

之道窃闻之先民有言询於刍蕘以谓人有所长不可以其微贱故忽之也之道比缘赴调居於临安之隘巷者八十余日朝夕获闻闾閻之言似有可取者辄敢以其所闻上渎听览惟执事择焉其言曰王伦使金还金遣使随伦报聘国家自靖康以来失於议和致两君北狩万乘东巡百姓坠於涂炭迨今十有四年尚不觉悟又复纵伦卖国引盗入家以闯我虚实排办馆待之具所至骚然夫金人之为此也利得子女玉帛尔不以吾之所以馆待者过礼而遂已也今有被盗者家徒四壁立复不自量又从而东借西乞以其所有而夸於盗其不为盗之招者几希顷年章谊孙近使金余人尽留南京惟谊与近得至军前稟议今金使之来自合引用此例留余人於韩世忠军中令其使副造朝不惟有以褫其魄而夺其气亦足以示朝廷之尊乃若议和则有九不可而一可之道闻此言如醉而醒如梦而觉因谓同舍郎曰智者千虑必有一失愚者千虑必有一得兹殆所谓一得者乎请试为执事陈之父母之讎不与同戴天兄弟之讎不与同国金人昨犯京师自徽宗皇帝明德皇后以下悉从播越今兹仙去虽云厌世其实杀之又况渊圣之与六宫尚囚沙漠四海共愤恨为人子弟者义当何如此其不可和者一也当唐德宗时吐蕃因沙堡之败惧而求和宰相张延赏入马燧之言请於德宗从之当时诸将独李晟以为不可诸相独柳浑所言与晟意合曰豺狼之性非盟誓可结已而吐蕃果刼盟如晟浑言此其不可和者二也和戎所以息民也斯民厌乱久矣孰不欲其通和而幸其休息哉今輿议乃尔盖伤弓之心犹思靖康覆车之辙而惧其复蹈也必欲议和是拂民心民心则天意也天可违乎此其不可和者三也顷自车驾南幸金立刘豫於济南以有中原之地岁贡币三百六十万缗豫奉之未尝少有坠失一旦以计废豫尽豫所藏担囊揭篋倒廩倾困而去若取诸怀不烦顾指而我师以君伐臣睥睨累年终不敢进非金勇而豫怯我弱而豫强也盖豫已臣事金人则金犹父也豫犹子也为人子者固不虞其父之见逐惟不虞其见逐故金得以逐豫如反手之易为豫计者亦初不谓豫曰汝於金非有父子之亲徒以我之废吏故立汝以为得志必将与我对抗而为己之扞蔽也抗我则所以事己者不敢不至豫既挟金以抗我则其於我也不复若金之不虞其见逐也且日夜求所以胜我惟恐其不胜而见擒是则我之所以不能取豫者以豫视我若讎而豫之所以见执於金者以其待金者过於亲也今金欲和是以刘豫畜我此其不可和者四也当宝元康定间契丹以重兵压境遣萧刘六符来聘意在刼取关南十县朝廷命右正言富弼为报聘之行仁祖重念两国生灵之故许其屈已增币而契丹平逮卒事弼不肯受赏曰此非臣之本志也呜呼忠臣之谋国一至此耶今金无约请和非出於谋则是厌兵而欲结好於我以邀岁贡从之而遂罢兵则非特不能保其不叛盟而乘我之间又恐朱克融辈变生不测从之而兵不可罢则不能不於养兵之外横赋重斂岁供溪壑无厌之求其势必至陈胜吴广之起於秦青犢黄巾之起於汉为祸殆有甚於此者此其不可和者五也顷年以来诸将非不进讨终不能取淮北尺寸之地或暂得之复旋失之正使举大河以南尽还朝廷度其力果能保有之乎与其随得随失不若置之度外以俟其力足以制金徐为进筑之计此其不可和者六也自古中兴之主未尝不因於险阻艰难惟其履险阻艰难而益挫益坚因能兴衰拨乱而光祖宗之业刷父兄之耻而见称於天下後世若周宣复文武

之境土汉光之恢复疆宇是也今得河南之地不足以立国金藉此求和则必天地以要我自此以往虽使王灵日张军声日振尚敢议恢复之图哉此其不可和者七也汉唐以来中国之待外夷不过征伐之与和亲征伐则将帅任其责和亲则庙堂主其议今天下之权不在庙堂而在诸将诸将拥重兵据要地偃蹇自肆视国家之安危存亡如越人视秦人之肥瘠漫不加意遇缓急则虽请援者并肩於庭督战者接武於涂方且傲睨而不顾逗留而不发曰将在军君命有所不受傥从金盟而不与诸将议使金诚和犹恐自疑而至於溃叛万一挟诈如尚结赞之意在窥窬是使诸将得以有词而不复出兵矣此其不可和者八也李义琰尝曰大国之使可当小国之君今主上以休兵息民为重固不憚臣事金人且以其主为君则其使盖同列也若金使援此为言倨慢无礼不知朝廷何以待之此其不可和者九也然则所谓一可者孰可哉韩原之战秦伯获晋惠公晋遣陰飴甥使於秦秦伯曰晋国和乎对曰不和小人耻失其君而悼丧其亲不憚征缮以立圉曰必报讎君子爱其君而知其罪不憚征缮以待秦命曰必报德以此不和秦伯曰国谓君何对曰小人咸谓之不免君子恕以为必归小人曰我毒秦秦岂归君君子曰我知罪矣秦必归君贰而执之服而舍之德莫厚焉刑莫威焉纳而不定废而不立以德为怨秦不其然於是秦伯说陰飴甥之对改馆晋侯而归之初不闻其以贿盟也今金诚欲还二帝六宫与祖宗之故地而为德於我以要我盟曰既盟之後言归於好各守封疆世世子孙慎勿相犯有渝此盟明神殛之而无所事贿夫谁曰不可同舍郎曰子之所言九不可理固然矣所谓一可乃服而舍之如秦伯之归晋侯也夫晋侯以三施不报有负於秦之君民秦伯尚且归之我徽宗皇帝初不闻有负於金而生不得反其国死又且要其盟岂服而舍之道哉使金无所要但以有负我遂归梓宫之与天眷犹当愧於秦伯况不如是耶为今日计当以此意明告使者而俾复命苟惟不从是金无意於盟我何罪也大抵主和者徒苟目前之安遂忘父子君臣之义他日傥修先帝之怨亦不过临时失信败盟而已夫信者国之宝民之庇言之瑞善之主也苟信不继盟何益哉且自古失信败盟未有不身罹其祸而殃及後世者不可不戒也不可不慎也之道今月初四日已尝具稟目少见野人区区之意明日遂有无为之行不果再诣屏着踰伏小舟中念古人身在畎亩心不忘君将次宜兴复紬绎前日临安之有得於街谈巷议者为之书以献庶几有闻於吾君吾相而使敌计无所施焉转祸为福实在侍郎一言干冒威严无任皇惧之至

<集部,别集类,南宋建炎至德佑,相山集>

卷二十五

钦定四库全书

相山集卷二十五 宋 王之道 撰书

上都督张丞相书【绍兴七年五月一日】

之道闻遭非常之变者必立非常之功以震耀乎天下而使疲瘵起望霓之叹奸雄消问鼎之心然後神器亦随以定而天下莫有敢觊觎者当西汉之末新都侯王莽乘间抵隙攘窃神器十有五年光武以高帝九世孙起布衣发迹舂陵昆阳之役自将千骑与营部俱进一战而斩敌数十级诸部喜曰刘将军平生见小敌怯今见大敌勇甚可怪也且复居前请助将军遂再战而斩敌数百千级诸将既累捷胆气益壮无不一当百逮三战乃与敢死士三千人杀王邑破其百万之衆而莽遂伏诛呜呼人心所归天命所向虽有若林之旅何能为哉今主上自靖康间以道君之子渊圣之弟兵马之元帅嗣承千载之统抚绥九有之师固异乎光武之起於布衣矣即位之初盗贼遍海内蜂屯蚁聚屠掠生灵燔毁郡邑金人乘之再犯江淮虐焰彗云不可向迓方是时人人朝不谋夕独恃祖宗德泽在民比年以来王灵日张国势日强绿林黄巾之流畏威者接踵请降拒命者骈首就戮譬犹以汤沃雪举山压卵无往留碍而喁喁万宇始知人心自有所归天命自有所向而不复有所睥睨者矣惟是叛臣刘豫僭窃位号占据京师南面称尊驱逼境内丁壮岁一再至淮上出没作过未遂扑灭然而士马之强弱与新都侯莽相去实楚越也方莽遣寻邑将百万来犯昆阳时城中才七八千人诸将度衆寡非敌各欲散归保守妻子使非光武笑以待之为图画成败而身先诸将其不败於寻邑者几希尚安能赫然中兴为汉世祖使天下後世想望其功烈凜若神人而不可跂及耶今日之事要当主上自将深入如光武昆阳之战梟刘豫以献庙社上以昭祖宗之灵下以雪臣民之耻其或未然愿下亲征之诏诫谕诸路将帅曰其修车马备器械以待亲往视师应桥梁贵州县粗修令通輿马便止无致剗平除治重以扰民所至官吏不得迎送播告中外咸使闻知兹正兵法所谓形人而我无形则我专而敌分者也我专而敌分故备前则後寡备後则前寡备左则右寡备右则左寡无所不备而无所不寡虽使孙吴复生亦不知为刘豫计矣然後都督仆射相公与二三大臣时因政事之暇扈从车驾今日幸扬楚明日幸庐壽其次幸襄汉又其次幸关陕使其行诡秘人莫能测微至於无形神至於无声如高帝之自称汉使晨入韩信张耳卧内夺其印符麾召诸将咸易置之而信耳犹不知者然後可以作士气振军声发号布令而人乐闻兴师动衆而人乐战交兵接刃而人乐死自此以往虽复鞭笞四夷功在朞月而况其余哉之道愚直拙疎位在百寮底而遽不知分守妄言天下之利害以上瀆钧严罪在不赦伏惟都督仆射相公哀其诚而恕其僭且无以文采芜秽而遂简其说幸甚

代人上张德远丞相书

某观今日天下之患不在夫强敌与盗贼而在夫号令不得行於诸将盖诸将才非尽韩彭贤非皆李郭徒以尺寸之劳父兄之庆致位师保傅之重拥千百万之衆侈然养尊视国家之休

戚安危如越人视秦人之肥瘠漫不加於其心惟务广田宅保妻子而已至於所统偏裨士卒无事则共耗官餉自营私计一有不满意则逼胁长吏捶挞巡尉而恣行凶悖有事则以将在军为辞坐视将命者接武於道请援者并肩於庭傲睨而不顾逗留而不进正复不得已而一出则驻兵境上自开寇掠之隙徒害我人民坏我州县其为患有不可胜言者逮其寇退则攘取巡捕官所献之馘所受之俘以为己功上之朝廷又从而冒增首级侥幸赏典既使天下不敢言而敢怒又使同功一体之人用命者效之而无所劝不用命者恃之而无所惮深可痛哭昔汉文帝有匈奴之忧常恨不得廉颇李牧为将而冯唐以白首郎面折文帝以为虽得廉颇李牧亦不能用愚尝原其意特以当时法太明赏太轻罚太重而魏尚之罪不应削爵而削爵故唐有是言耳夫法太明赏太轻罚太重固未为甚失也犹且不可以用人又况赏不当功罚不当罪法不行於骄蹇之臣而欲使用命者劝不用命者惮以佐中兴之功难矣恭惟仆射都督相公以文武兼资之才当安危自任之寄内总百揆出临六军高牙所指积年逋诛之寇一旦望风震溃诣营乞降虽裴度平蔡之勲不足进焉然而犹有可议者号令未行於诸将也在唐张九龄尝曰穰苴出师必斩庄贾孙武习战犹戮宫嫔守珪法行於军禄山不容免死今日之事正类於此诚欲行法则向之所谓骄蹇者岂得不斩以徇而一新其号令耶果能若此愚将见强敌不足灭盗贼不足擒也位卑言高罪在不贷伏惟钧慈以社稷生灵之故而留意焉

代何希渊上张丞相书

某自卯角读孟子尝窃怪伊尹用心太过至稍长师以书授之反复说命三篇然後知伊尹之所以然者不特自期当若此四海之所瞻仰一人之所责望殆有甚焉伊尹曰天下之民有不被尧舜之泽者若已推而纳之沟中高宗之命传说则曰尔尚明保予罔俾阿衡专美有商其意盖谓伊尹尝佐成汤伐夏救民其言一夫不获时予之辜播在天下有後世想见其风采而不可得者某宇宙间一夫也虽朴讷不足比数顽钝无所知晓而长身四十五岁世之险阻艰难备尝之矣比得一官其视侪辈亦粗有劳矣然而受性刚褊赋分奇穷遇事辄有太公望鬻浆天凉屠牛天热与韩吏部握手覆羹转喉触讳之诮曩者备员和州鎮司机幕偶属郡无为守王彦恢贪暴自肆而新制连坐不觉察之法甚严帅长赵徽猷因百姓声冤辞颇切至姑欲治其吏魁以伸无告而彦恢中有所歉乃先本鎮一月告变於朝事下宣抚委今丞相赵公核实间庐守胡待制以故人为彦恢底上章朝廷以为郡政悉出於某由是坐遣褫官赎金向因明堂之恩洗其愆御史之疏列其枉而一时夺罢者既用且复矣独某迫於寒饿不能千里赴吏部自陈至今犹未免降授之名此其可怜者一也淮西知县自经兵火合入官少有愿就者往往拘於资格欲授而不可得今防秋是时百里一令民命所系奈何不愿者既不能强注使授而愿者又反重却使不得授耶兹亦行法者之过也某才非石苞窃有意小县为朝廷牧养疲瘵兹者之来实持淮西安抚使司辟书愿就陶铸顾事属自荐口欲吐而复茹袖欲出而复纳者累日於兹莫知为计兹其可怜者二也有此二可怜是亦伊尹之所谓不获者今仆射都督相公以兼资文武之材出佐明主咄嗟而破狂寇谈笑而定剧贼起身布衣不十年而取卿相其自视与耕莘筑岩者何以异观其勲业塞天地声名摩日月九夷八蛮震动叠息将请命之不暇而相公方歉然若不足吐哺下士虽刳尧之贱朝夕造谒而未尝有倦色此其意正欲搜罗天下英杰以济中兴之治庶几斯民复见高宗成汤之世无一夫之不获其所耳是行也某故敢有望於相公伏惟钧慈不以某人物侏儒文采芜秽而遂弃之幸甚

上都督府参谋兵部尚书吕安老书

之道尝谓天下之事非有所甚难其气之胜於才者力能办之如折枝拾芥之易是气也静不踰於方寸动或塞乎天地其至大也配道其至刚也配义揜之以卒而不乱压之以重而不慑兹古人所以能却敌咄嗟折冲谈笑安国家定社稷於不可支梧之际而举世誉之曰忠贯日月神明扶持者惟合下负经纶之才挟康济之术起身布衣不十五年而致位大司马其自视与筑岩钓渭者何异犹以为未也淮西在今日实控敌境前此号为骁将若近世之所谓韩彭英卫者以保傅之重拥貔貅之衆养尊江左无事则广田宅保妻子蠹帑廩为国家之螟螣有事则坐视所部数千里之罢民如越人视秦人之肥瘠漫不加意正复督战者接武於道请援者骈肩於庭常傲睨而不顾逗留而不进今合下实代之朝受命夕引道驰驱远戍若登金门上玉堂而不自以为疑此其气固有以大警服乎天下矣逮其至屯也营垒旗帜初无所变改而号令一出气色精明不数日有敌人犯边合下不动声色遣百骑以走之使列郡不闻其警而不自以为功此虽不足为合下道且天下之所望於合下者不止此而之道所以言及之特为淮民庆也兵法曰先加以声後致其实由此卜之愚前所谓气胜於才而力足以办天下之难事者将於合下而见之也之道窃闻之卒未亲附而罚之则不服不服则难用卒已亲附而罚不行则不可用今有亲附之道三焉一曰请给戒其诛削二曰役使戒其营私三曰赏罚戒其冒濫夫请给者三军之所恃以为命者也向也闻之士卒所支米麦一月之间仅得五分之四所请食钱一百以上仅得三分之一其余则自主将至於押队皆有分焉人孰不有父母妻子也既仰给於为兵者所得之钱米一经减克不足以乐其身而及其父母妻子亦何以责其缓急仗节死难乎则诛削之禁不可不先也夫悦以使民周公之东征所以能致民忘其死者也向也不问王事而一槩驱使之其伐竹木也名为修葺营房而坐贾者列肆隘井邑名为创造战舰而行商者连樯满江河或般载连年或暴露终岁从未有严刑以责其懈怠曾无添给以补其勤劳忧愁之色见於风霜怨怒之言闻於道路则私役之禁不可不严也夫赏罚孰明孙武之用兵所以能前知胜负者也向也不问功罪而任情以行之其赏也及其所当罚其罚也及其所当赏赏不当功则非特不足以劝能而能者且怠罚不当罪则非特不足以惩恶而为恶者益得以自肆岂可使安坐於千里之外甯名军籍者一岁冒转数官而出入於行阵之间有功战伐者秋毫不蒙其利则冒赏之禁不可不明也是三者不除而欲士卒之亲附者未之有也既除矣而欲士卒之不亲附者亦未之有也之道於合下庠序之旧比闻此来旗旄前驱骑士拥後为时尚父出统六师之道自念分絶穹壤羞愧蓄缩不敢求见者殆今一月复早夜以思曰合下方以君命治边事於淮西其归未可朝夕期也而之道父母邦实在麾下如以前日半面之交及之道姓名而後求见则不敏之罪又安所逃耶况有此三事似可裨聪明之所不及而发扬先声是用请间於合下以致其说庶几行之而惠及海宇则之道亦当受赐伏惟高明略其狂僭之罪而加意焉

绍兴九年五月二十二日上谏议曾统书

之道不佞待次里社与木石鹿豕为伍不识治体不闻国论惟是区区爱君之心实寤寐不忘宗社安危存亡之长虑此无他嫠不恤纬而忧宗周之隕女不念嫁而忧太子之幼亦其利害祸福有以相及不得不然非过虑也金人自宣和靖康以来愚弄朝廷有同儿戏卒以陵夷我

国家迄於今而不振方其设一谋施一计虽下而小夫贱隶咸能料其将然且曰如是者奸也如是者诈也已而合若符契不差毫厘而朝廷之上乃独断然以为非奸非诈惟恐其奉承之不暇以自取欺侮戮辱而终不悔且悟何哉孔子曰鄙夫可与事君也与哉其未得之也患得之既得之患失之苟患失之无所不至矣嗟乎此言诚足以箴当世之膏肓也去年夏金人遣使随王伦报聘讲和之道是时调官临安获闻舆论有九不可一可之说尝欲掇拾効愚献忠以裨庙堂未议昼度夜思将成复毁曰位卑言高罪也因止而趣装以归行次宜兴复念古人身在畎亩心不忘君如之道虽不肖奈何甯名仕版乃忍坐视安危存亡之几而不为一言耶於是慨然裁书托故人遣驿致之前吏部侍郎魏公砮以丐有闻於上凡半年不得报而胡铨之书传焉言至於此贾谊之流涕痛哭不为过也遂事不谏之道尚何言哉侧聆道路以谓金人归我河南故地奉还两宫此其为策不浅盖以今日所用之将所养之兵皆五路两河之人归我以地则不复限以尔界此疆迟以岁月其势必至解散兹殆与汉军楚歌无以异也顷自两宫播迁天下之人耻失其君而悼丧其亲常有不共戴天之愤而主上之所以宵衣旰食励精政事注意甲兵者岂有他哉亦欲扫除强敌以刷父兄之辱而光於祖宗也夫人怒则威威则勇骄则怠怠则弱我师之不逮金人虽三尺童子所共知也而支梧累年未尝败衄者以其素所蓄积者怒也金人之意若曰此不可以力胜吾当还两宫以骄之彼既臣妾於我则将恃和弛备然後可图也兹不必以商为鉴前日刘豫之擒犹未远也又况包藏祸心未易窥测其万一耶且事固有未见其利而先受其害者淮西昨更兵火井邑聚落化为炎埃比虽招徕流亡整葺庐舍然余民百无二三所谓井邑聚落亦皆荜门圭窰多者才十数间少者不过四五椽而已自春及夏监司守令以奉迎两宫为名排备牲饩次舍纖悉责具急若星火峻如雷霆贫穷尽於诛求凋瘵敝於营缮其夺民时劳民力固在所不论窃尝以一邑计其费不下五七万缗使金人诚还两宫斯民正复竭膏血鬻妻子以应所须犹将欣然不尔虽食王伦之肉何能谢哉愚谓今日之事殆古人所谓可吊不可贺者请以五事上瀆听览庶几朝夕造膝之际有献於吾君而备其采择焉谨按鲁僖公十五年晋侯秦伯战於韩秦获晋侯以归及秦伯归晋侯将反国先使告国人曰孤虽归辱社稷矣衆皆哭愚以为渊圣之南来俟其渡河即下手疏以自讼可乎此一事也谨按僖公三十二年晋人败秦师於殽获其师孟明视白乙丙西乞术及晋还三帅秦伯素服郊次乡师而哭以迓之愚以为梓宫及渊圣到日自天子以下素服郊次而哭乃密谕河南所过州县一切准此而其供帐之类悉去华丽采色而纯用布素可乎此二事也谨按襄公二十七年宋之会楚人衷甲窃闻梓宫以下神櫟无虑千百愚以为委西京守臣待其将至豫修陵寝继遣一二大臣蒞葬中取神櫟之最下者斲而视之然後奉安及令诸道饬武备以戒不虞可乎此三事也谨按唐开元全盛时明皇幸东都命三百里县令刺史各以声乐集河内太守辈优奴数百被以锦绣饬以犀象而鲁山令元德秀独制于蒿于之曲遣乐工数十聯袂而歌之明皇见而叹曰贤人之言哉河内之民其涂炭乎因黜河内而陟鲁山今两宫寂无来音而淮西一郡之民已有二十万缗之费矣百姓足君孰与不足百姓不足君孰与足愚以为两宫宿食供顿所经或无屋宇乞依南郊青城故事行下有司预办数千匹之青布临时设帐以庇风雨而明诏诸路勿造宫殿勿饰器用以重劳费斯民可乎此四事也谨按檀弓卫司徒文子问於子思曰丧服既除然後乃葬则其服何服对曰三年之丧未葬服不变除何有焉愚以为梓宫之还天子哭泣衰絰以从檀弓未葬之礼可乎此五事也是五者虽若无补於国安危存亡实此系焉昔齐仲孙湫来省鲁难既归齐侯问曰鲁可取乎对曰不可犹秉周礼周礼所以本也国将亡本必先顛而後枝叶从之鲁不弃周礼未可动也君其

务宁鲁难而亲之亲有礼霸王之器也庸讵知两宫来归金人之使不有若仲孙湫者乎愚是以知安危存亡实卜斯举檀弓曰子思之母死於卫柳若谓子思曰子圣人之後也四方於子乎观礼子盖慎诸孟子亦曰滕定公薨文公五月居庐未有命戒及至葬四方来观之颜色之戚哭泣之哀吊者大悦呜呼斯礼也岂忽哉至於金人之情伪则愚已略见於前及详於魏公之书敌情之不可信也尚矣盟如皦日而平凉之会犹或刼之今我臣妾於金而金以臣妾蓄我初无诅盟夫以奉之者有限而求之者无厌此其势必至於用兵所不可知者特其迟速远近而要不能免也虽然昔者越王句践亦尝臣妾於吴矣而卒灭吴以朝鲁卫陈蔡执玉之君愚以为为今日计患在夫主上不能礼下羣臣以集其能与羣臣不能辅佐主上以雪其耻如越王之报吴而不在臣妾於金也不然危亡且在朝夕不识执事以为何如祖宗积累至难宗庙社稷至重惟执事其为国家念之干冒威严无任战栗

与淮西提盐许子长书

近尝专遣人附状继闻移司历阳舟御已过关下伏想乘风遡游遂抵所舍即日望霓得雨焦槁顿苏恭惟按轡多暇台候万福之道无状赋分奇穷兵火以来平时贪暴庸鄙才出已下不足挂人牙颊者皆能起家致身为人祸福而之道独以愚直拙疎不投时好见弃於縉绅先生之列方丞历阳日合下实始将命淮右驻麾鎮西一时求名定价以幸青天之睹者盖足相躐合下初未尝过而问至之道则称述过量慰劳加等待以国土之道自顾空空不审所以得此之由中间避地糝江又获托庇旬月当李成陷舒张琪破潜之初干戈避於今三年更绿林黄巾之变盖以百计两陷贼营仅脱万死以今年春邂逅绣节轺车於月城之东复得瞻望台表猥蒙合下矜连蹇之无堪敦艰难之有旧久而不替其敬爱而遂忘其丑哀恤逮於存没勤厚见於饮食周旋曲折无所不至使之道喜与拚会莫究手舞足蹈之所从是行也道过居巢见伯氏首言合下所以相待之意不同常人固不翅已受赐已而候馆侍庭以聆警欬益信伯氏之言为不妄方戒食之余碎建溪之龙饼煎灤湖之蟹汤沃鼎调膏淪瓠分乳如是者手亲再之而不自以为烦周公之所为吐哺下贤者岂复有踰於此之道生长田间自为儿童时志在与民除害兴利读书学古人晚乃与弟兄辈以科第得禄而太平日久祸发所忽敌骑长驱中原如蹈无人之境自江以北悉为敌区之道亦苦家难窜伏山谷每思时与志违未有以偿万分之一故苟可以如所志者不敢不尽力竭愚而为之比在鎮司帅座赵公以之道在同官中朴忠无他肠付之以事不辞剧易方含山豺狼为孽之日实遣之道走於羣神弭灾消变之道亦念古人如宋均之在九江韩愈之在潮阳去虎驱鳄灼灼如前日事非二子力固有所胜实其诚有所感之道用是斋三日而制为鄙文斋五日而告於境内之神以归复命初豺狼白昼入市噬人如羊豕虽操戈负弩有所不憚被伤者甚衆至是一夫徒手敢与狼搏衆狼成羣莫为人害巢穴既远井邑以安之道然後知天地虽大莫大於诚鬼神虽灵莫灵於诚金石虽坚莫坚於诚推是诚也以往其何不济前日自巢来归踣躅於荆棘蒿艾之间殆九十里不类通道将次胡避殆见迹牛涔蔬畦麦壠转水车之唧轧藹炊烟之郁葱农夫两两三三田作而反挽犁携插仅有可观之道窃自悲喜盖悲者悲其凋丧者不可复见而喜者喜其安存者庶几将兴也既抵山中之明日乃与耆老茗饮相劳苦特以庐江之叛寇未远方被坚执锐以从事於戒严他未有暇也或者辄以旱告曰天久不雨今时方麦秋而熏风火煽原田龟拆稼穡无高下皆垂黄如燎矣公独奈何之道计无所出谫之人言断以已意取水胡避山之祿泉建置

道场为衆请雨以斋戒为佛事以慈愍为天心昼夜祈祷不敢少怠如是者三日果有片云起於泉中曾不踰晷霰黶垂布如可承揽是夕小雨连日出云至二十八日大雨沾足呜呼诚之有感於神也如此神之无负於诚也又如此之道辄不量力备述胡避山禄泉前後保护生灵感应事件别具公状申稟伏乞合下体国爱民少加意焉胡避寨记谨纳一本座右咨度之暇当能指挥治书苍头吟讽之也上浼台严无任战栗

与无为宰李廷吉书

前日率易上状正愧濡削不?以自取戾专使拜教之辱感愧何穷即辰暑雨微凉恭惟行李乍此休息尊候万福之道不才无状稟性既愚拙赋分且复奇穷读书学古不敢小叛於理故其所为莫投时好坐是上下疾之如仇岂谓合下所赏与世俗异自江左来平生初无半面遽乃过听两喜之言大见褒拂使老盆破甑顿增九鼎之重方之古人倾盖如故似未云过然有不虞之誉者必有求全之毁自兹以往幸致察焉是望仰惟合下高才絶人治万事如破竹顾此蕞尔之邑若不足治然屠掠之余今幸敌骑衰息羣盗相继伏诛所存饥羸百不一二正如沈疴向愈要当调适其饮食滋养其气体顺之而使勿怒安之而使勿惊不可使其劳惧其耗敝其精神不可使其忧惧其损伤其心志瞿瞿然忪忪然惟恐其起而後庶几其有生意若或饱之而太过饥之而不及怒之而陰阳交丧惊之而魂魄俱褫劳之而益其虚忧之而重其伤如是而欲其生虽三尺童子亦知其万万无此理也今官俸节而不支军储支而不继固诚如合下言然以是而欲敛之於民而支其不支继其不继愚恐速沈疴之不起而後将噬脐也今州县官更多於百姓而所养之兵非疲癯则游惰无事则蠹太仓有不足则刼长吏恣凶悖有事则弃甲兵望望而去之以开寇掠之隙与毒垂尽之民以资无足之吏与夫疲癯游惰之兵孰若汰其冗滥量入为出而与吾民休息以俟岁月度其力之可为然後图之似亦未晚盖今之所谓富者特餽糠粃耳若必欲敛之与贫者等是使齷草茹木然後已也伏承合下以之道旧尝掇此千里之寄恐有一得之虑可以裨补高明曲加諏访古人有言士拙於不知已而伸於知己之道故敢恃爱肆所欲言而忘其交浅言深之戒伏惟寬仁特赐矜察

上宣抚大使叶少蕴观文书

天地以生殖安养之功付之名山大川故名山大川不求即於物而物即之人君以教化磨砺之具付之王公大人故王公大人不求即於人而人即之名山大川风雨云雷之所兴金玉珠贝之所藏虎豹熊羆蛟龍鼈蜃之所窟宅椅桐梓漆苹蘩蒹藻之所渊藪而凡游於其间者无不得其所欲厌足饱满虽不可见其运用而功利之及於物者盖不可以缕数而髮计也所谓不求即於物而物即之者以此王公大人其道德足以厌服人心其闻望足以耸动人听其议论臧否足以轻重一时荣辱万世故天下之士奔走於车尘马足之间以冀一见而不自以为屈幸而得命之坐与之言辄退夸於人以为终身之宠而人亦不以为歉所谓不求即於人而人即之者以此物虽欲即於名山大川而名山大川有不可得而即者高深之极实制之也诗曰崧高维岳峻极于天书曰若涉大水其无津涯王公大人亦复如是故士之即於王公大人至其不可即而去之则有高山仰止望洋向若之叹恭惟宣抚左丞以开济之资经纶之术隐然为国长城折冲厌难扶顛持危以济中兴之业当世之所谓王公大人者何以尚之侧闻持

节以来警欬所临千里震恐而之道乃以苦块余生顷从金革无避之权备员鎮抚司之干官不能望风解印罪当万坐尚何敢言且王公大人出拥高牙入卫画戟函丈之地辄至者死不翅山川之高深不可蹈犯其势有曳裾漫刺终身愿见而不可得者而之道以职事在属郡实为僚案之末而和之距建康无十舍之远庶几夤缘披雾望尘以快平生一识荆州之愿而之道拘於丧纪之容且复不敢有请累月於兹每自喟恨当世之所谓王公大人昔所愿见而不可得者今有可见之阶矣而礼有不得见亦命也夫敢图过听忽有书命之招使破甑敝帚顿增九鼎之重之道比拜赐不觉惊愕失声曰天下之事出於意外固有若此者乎不识合下所取者何事也夫有不虞之誉者必有求全之毁之道鄙性介直疾恶太甚向保守桑梓正当羣盜纵横干戈抢攘之际一时所为凡有利於民者往往以死争之贾憎媒怨不复顾恤今日之举虽蒙合下察其愚无他肠怜而进之诚恐一人之植有不足以胜千人之拔也庄子有之寻常之沟巨鱼无所还其体而鯢鱣为之制步仞之邱陵巨兽无所隐其躯而?狐为之祥且鱼之巨者无过於鯢鲸兽之巨者莫踰於犀象彼其志固有异於鱣狐之从容於沮洳蓬萊之间以为莫已若者而所以还其体隐其躯亦岂能无意於名山大川之见容也不识合下将使之游於名山大川而无不得其欲耶亦将使之徒有高山仰止望洋向若之恨也

卷二十六

钦定四库全书

相山集卷二十六 宋 王之道 撰啓

贺王仲开无为到任啓

入奏肤公被纶言而进秩来宣德意凭熊轼以专城光尘开刺史之天膏泽下文昌之雨涓刚视事载歌已浹於四隣裁书寓心修好敢稽於一介恭惟某官风神高迈干局明强在朝谁踰仲卿信有家法当世未见夷甫可谓人豪肆王室之中兴崇侯邦之外援念旬服久沦於涂炭而月城尽废於荆榛民苦疮痍正有资於抚养兵连蜂蛰其可缓於驱攘奸宄招权贪暴专杀兹用辍江东之独步固宜致淮南之寝谋君子怙焉小人恐矣某邱园断梗湖海浮萍存鲁何功叹干戈之未靖依刘有幸望桑梓之非遥驰驱尚阻於披云踊跃辄先於贺厦

贺宋景阳无为到任啓

伏审枫宸锡命银菟分符千里兴谣喜列星之入境两淮增气庆偃月之得贤况居是邦获赖其福既景仰之有素宜舞蹈之不知恭惟某官清庙尊彝碧梧鸾鹄盛德懿范素高二相之风茂实英声早擅一时之誉眷隆当宁寄重专城淹宁终於三年政将报於五月披云甚迹幸依桑梓之陰贺厦惟勤敢附鴈鱼之信

与滁州谢倅交代啓

莫为我先孰覩告新之政请从其後敢忘求旧之图方欲寓心遽先枉教属有金沙之役尚稽绣段之酬载味过情益知腼面恭惟某官神识沈敏才术疎通誉望攸归固後來之一器风流未减真吾家之千金虽未见其耸壑昂霄已屡更於蟠根错节惟淹翔别驾者如此其久故倾动诸公也不谋而同某朴遯无庸蹉跎不竞策弩足而追骥何可及哉翦狗尾以续貂代其匱尔傥及瓜之非晚庶披雾之有期尚慎节宣以绥福履

贺元旦啓

符颁桃梗俾在位之罄无不宜酒进椒花期有家者老而益壮应三阳之交泰与万物以更新恭惟厚德鎮浮高标激浊半年於此不为赫赫之名千里而观但见熙熙之俗所谓祁寒之爱日岂惟酷暑之清风民人所歌福祿攸介况对大来之旦宜膺善降之祥某待罪杜门畏谗避地有贤而不能事固慙居於是邦扫轨而无所干岂免讥於同辈但厠称觴之列徒倾贺厦之心瞻颂益深敷宣奚既

代人到鎮江任谢执政啓

归从雪水之游方欣得计起作丹阳之守良愧非宜况当江淮襟带之冲实为吴越股肱之郡望云甚还宜责任之益隆借寇方浓岂疎庸之敢冀虽皦日无私於照隙亦和风有力於嘘枯此盖伏遇某官名重本朝道嗣前哲蓍龟国论断然可否之莫移冰监人材昭若贤愚之自辨潜消外患力赞中兴重怜一介之遗曲借寸长之誉致兹嵬琐再被搜扬某敢不采问风謡班宣政令务安凋瘵庶无愁恨之声期使浇漓悉变敦龐之俗不负知己斯为报恩

代宋景阳到无为任谢执政啓

去江百里旧为鱼稻之乡临水千区今杂吏民之舍视诸郡犹为胜处在同列可谓误恩窃以一州得才则十万户赖其福庶民从化惟二千石用其良汉唐以来率皆慎此兵火之後其可忽诸休养疮痍驱攘蜂虺况熙朝方注意於淮甸岂薄才宜备员於月城此盖伏遇某官股肱一人师表百辟持顛扶危以赞中兴之运折冲靖难以成外攘之功谓任贤使能当在所先故刮垢磨光亦或不舍某敢不尽瘁以事强恕而行不为赫赫之名用安流散庶使优优之政将播咏歌报德如何处心若是

与无为令李廷吉啓

道路兴謡喜双凫之入境吏民改观知百里之得人恭惟某官名重当时韵齐先达质如浑金璞玉之莫名其器材似干将莫邪之难与争锋悟主片言识封侯之非晚报政三月嗟改秩之未优暂烦卓犖之英来理荒残之邑九重惻怛重郎官出宰之权一洒烦苛鄙令尹告新之政愿同百姓皆出再生既期披雾之瞻当致维桑之敬

谢张簿啓

负职居多念哦松之弊政接聯何幸对栖枳之新除荣耀一书欢腾百里恭惟碧梧停鹄沧海遗珠标致故自不凡才华尤世所贵家传三篋知无不读之书胄出九龄是必致远之器撞钟待问翻水成文射策天庭笑却万人之敌升华桂籍荣题千佛之名凡在见闻孰不歆艳颜亦厚矣愧尺牋之未修德莫加焉辱长牋之首及

贺刘无隅除户部侍郎啓【代何希渊作】

伏审宠膺帝制擢贰地官九重侧席以遄其归千里攀辕而惜其去簸扬所逮舞拊攸归恭惟某官风教名卿文章宿老骥称其德洗万古而凡马空岳极于天临絶顶而衆山小上方图於邦计时莫急於军需当求条奏时政如李元紘庶几对扬圣问得卢承庆果闻华綈慎付真材食给关中正赖萧何之画钱流地上伫观刘晏之功进位钧衡加泽寰宇遂益隆於国体用大慰於民瞻某猥以孤踪出於大造朽株枯木尝有赖於先容坠履遗簪幸无忘於旧物永言欣颂实倍等伦

鎮抚司参谋到任谢赵圣用啓

乡邦半载犹怀衣锦之羞宾幕一时复遂依莲之幸虽从宦在人情若为可庆而夺丧於子道宁免有惭宠极魂惊感深涕霑窃以观人固自不易听言尤其所难方邪正之未分孰明汲直逮是非之既判方验卢奸然理可知者君子不为面谀而情可察者小人专事容悦悦或乐於软熟鲜不墮於蔽欺兹古人所以抱忠信获罪之冤而大雅所以有明哲保身之戒伏念某赋才凡下禀性庸愚居怀隐甫之刚常守展禽之介学惟古是动与时乖疾恶若讎自不知其已甚论心如故人或谓其太疎岂惟鬻浆而得凉常是转喉而触讳尚赖覆盆之照少宽擢髮之诛岸侧沈舟坐阅千帆之过笼中翦羽旁看百鸟之翔敢谓弃捐更遭收录此盖伏遇某官惟善能举其类於人何所不容藏疾纳污大廓山川之度扬清激浊悉归标鉴之公察其顷守粉榆初本无过怜其久居邱壑不遽遐遗赐以刘公一纸之书寘於越府三才之列某敢不秋城夜观远追退之谈笑之风客礼官曹载味子美接聯之什冀今日碧油之眄为他时黄阁之知

谢发解啓

十载家声孰继三珠之植五州乡赋今同一鶚之飞岂曰能贤幸而获选窃以祖宗设科举以取士最号得人崇观兴学校以育材独闻稽古惟诗赋之再复与经术而并行因元佑所尝用以求俊良肆靖康乃率由以变风俗一时韦布方声律以相先千里干戈遽寇攘之见逼逃虚既久失职可怜如某者湖海浮萍邱园断梗穷有余於五鬼文不逮於一钱酒瓮饭囊岂免称衡之诮驴鸣狗吠敢逃庾信之讥属世道之交兴致中外之率俾爰下三年之诏用搜万国英抱槩怀铅数多踰於百辈拔犀擢象名仅登於六人岂谓疎庸亦蒙简拔此盖伏遇主文先生用心若监持法如衡美恶惟形人莫知其报德低昂顺物我亦何所容私乐莫濫於齐竽宝遂珍於郑腊某敢不加勉所学益坚乃心将期驱羊而取官用酬平昔庶几指龟而论报上答恩私

贺淮西漕韩琬啓

芝检疏恩輶轩出使素妙斡旋之术望重一时遂专飞挽之权惠加九郡况足兵莫先於足食而用衆无急於用贤其两得之在此举矣凡预卿云之庇窃欣爱日之临恭惟某官器识高宏才猷英远济烦治剧如破竹於数节之余摘伏发奸似穿杨於百步之外允矣澄清之寄卓然华近之阶某朴 无庸蹉跎不竞青天甚还会逢云雾之披沧海虽遥敢借舟航之便稻花过雨梧叶惊秋方炎凉之未调冀啓处之加慎

鎮抚司罢参谋谢啓

受诬对吏始慙明哲之保身获譴赎金终坐刻深之为狱尚幸容光之赐仅逃洗垢之诛感涕无从归恩有自窃以诗歌行露重言听讼之难史记降霜深悼被囚之屈盖两怒既多溢恶则偏听必至生奸矧夫周阳由心怀爱憎加以伯州犁手持上下谓虚为实俾证龟以成蛇变有作无至钻皮而出羽刑因不中罚及非辜安得张季之时无冤人固宜于公之後有兴者伏念某心如其口愚无他肠忘机而言辄露情好直而动斯疾恶是故论事常若茹物之莫能以下咽至击邪则犹视讎之不可与戴天自初摄事於乡邦逮此备员於帅幕力排螟螣休养疮痍

监为丑妇之羞分明亦甚鹿被猎夫之逐罗织何多始缘人醉而独醒遂见我清而衆浊致奸
谀之丑正假贪暴以兴讹劫异时骨肉之流共为媒孽賂平日指天之輩咸作爪牙因何武之
露章訝宗资之画诺遂成污蔑妄瀆宸聰祇欲沦胥冀逃已祸适苏章来二天之庇故曾参陷
三至之言雀角繆悠虎冠顾望借袖蜂而害尹引跼客以刺由专凭盜璧之讒莫辨偿金之误
与禽兽而奚择又何难焉譬草木之有区焉可诬也兹盖伏遇某官精神满腹白黑简心着戴
胄之明强擅王珪之标鉴栢垢爬痒一时冬日之温枯苏弱强千里卿云之覆是修羔鴈聊写
肺肝其敢不尚友古人益坚素守皇天后土况明仁杰之心伊尹周公尤见元忠之德造次於
是死生以之

回安丰教授潘元宾贺啓

误膺共理方怀非据之惭猥辱同声远致过情之誉对双鱼而拜颺加什袭以珍藏荣幸不貲
钦佩何已恭惟某官当今潘陆异日班扬言文而真盖得圣人之忠信学精而博宜为儒者之
宗师岂芹泮之能淹将蓬山之是陟念尝有一日之雅虽鄙拙而爱忘故不远千里之遥以緘
题而賛庆永为好也何以予之

与信阳交代张卿直啓

双鱼尺素比惭报谢之弗?一日三秋方念忧忡之未释矧及瓜之非晚岂削牍之敢稽恭惟某
官盛德圭璋长材杞梓政成五月岂容借寇之留名在九重行遂徵黄之拜某策弩迫骥翦狗
续貂虽有命以难违顾非材而甚愧荷花过雨桐叶惊秋愿加寝餽之调冀获晤言之慰

代张守彦智贺刘宣賛克捷啓

禁暴戢兵久恃干城之略猷俘投馘今闻斩将之功息千里之鸣桴致五州之奠枕戎有良翰
公乃其人恭惟领军宣賛暗哑咄嗟足以讐敌严毅沈果工於料人刃恢恢乎有余将多多而
益办究观细柳若亚夫真将军哉固宜阖庐知孙武能用兵矣眷言小衅密迹大军屯戍同安
知每劳於外援师民振武诚有藉於中兴岂惟万举而万全盍亦七擒而七纵某属拘茅土阻
造辕门裁书寓心姑庆灭烽於淮甸勒铭纪实终期蹀血於龙庭

代何希渊谢越守陈汝锡啓

抚孤恤难义为熊掌之求杀父取貲横致鼠牙之讼不有片言之折难逃三至之诛感极惊心
恩深陨涕窃以狱系人命不容失之或诬民有争端尤宜慎於致察盖两怒既多溢恶则偏听
必致生奸爱恶相攻是非交战词苟忽於三复理斯闇於五声辨若张仪莫获明其盜璧孝如
曾子犹被谤於杀人此先王所以有取於淑问猷囚而後世所以深讥其忠信获罪伏念某箕
裘衰族蓬荜寒生累世括苍仰少微之在上半生历水慕张籍之为隣荏苒岁时栖迟邱壑家
徒四壁地仅一廛酒虽乏於贤人车竞来於长者尝欲见危而致命敢惮杀身以成仁肆圣主
之东巡适金人之南渡干戈云扰土庶星奔号寒啼饥者往往衣冠携幼扶老者纷纷原野哀

哉弱女父已陷於孤城去矣扁舟家欲浮於大泽乃孺子将入井之际而仁人当引手之时眷彼友生收此惻独遑恤每食之不饱但求容膝之易安间关百罹参差万死方喜将安将乐共获保全岂知无罪无辜反遭欺蔑人嗤德报以怨自叹害生於恩谁实怜之慨其叹矣尚幸覆盆之照获伸刻木之冤此盖伏遇某官持张廷尉之平振韩京兆之职儒雅饰吏明慎用刑谓邹衍之降霜以明忠也故召伯之行露每尽心焉断然三辅之著龟昭若万邦之冰监遂令黜闇终被平反某敢不载惟张堪托子之言益坚郗鉴哺甥之志苟交情之有取虽执咎而何忧兹为今日之报恩亦结异时之知己

贺黄大受司理致仕啓

挂冠法曹还辕乡社君恩优老俾通籍於朝班士论称贤振高风於时辈未遑赞庆先沐宠临病尚阻於登门报敢稽於削牍

代张守彦智贺朱劬沈佖及第啓

射策枫宸笑却万人之敌升华桂籍荣题千佛之名朝廷得贤邦国交庆恭惟某官笔走羣象心醉六经翻水成文追异时之大手撞钟待问号当世之长头月评既高风鉴加赏摘髭收第虽吏部之相推驱羊取官亦舍人之自许果膺慎简获慰钦遴顾桑梓以何功属竿牍之过礼赠同锦绣当为篋衍之珍报蔑琼瑶益重心顔之愧

回应隆谢解啓

作者七人审已被周书之荐成名一日遂将登汉策之科是为瓜葛之荣岂独粉榆之庆恭惟文工翻水誉重拔犀饱看未见之书森然九经库历辨不知之物展也五总龟岂图老去之残年获睹後来之秀士喜与拚会情在文前衰朽何称猥辱琼琚之赠缪愆有愧难论锦绣之酬

又回许骧谢解啓

伏审得隼文场驰声士藪未果踵门之贺俄承漫刺之临更辱长牋以华衰老恭惟才猷出类事业轶羣有开必先既遂首一乡之善不鸣则已又将魁万国之英用慰月评少伸舆论顾乏琼琚之报猥蒙绣段之投莫罄欣愉徒增愧感

又回张天纪谢解啓

伏审较艺文场登名天府光生梓里欢动萱堂顾赞庆之未遑辱緘题之先及恭惟笔走羣象心雄万夫旧坚铁砚之盟今中铜钱之选不先不後适居儿侄之间曰寬曰柔仍喜愿恭之次可谓州闾之秀堪为蒲柳之荣龙泉太阿虽其光射斗牛隋珠和璧岂宜以暗投人报乏琼瑰愧兼芒刺

又回流寓孙深几谢解啓

伏审兴贤能於万国祇奉诏音推流寓於一时荣登贡籍尚阻踵门之贺俄先漫刺之临仍辱长牋特形过礼恭以才猷俊迈学术淹通诗攻秦系之城赋入相如之室德懋厥祖昔尝刺於是邦才高乃公今尚尉於属邑虽披云之未久而蒙雾以滋多流水高山自顾非知音者夜光明月胡为以暗投人

又回苏路谢解啓

伏审郡国明扬祇奉出纶之诏邱园特起荣膺荐鹗之书欢动庭闱光生里舍恭以少推有造长负不羁李长源之才猷吾尝呼以小友邴食其之豪放人皆谓之狂生惟藏器以待时故依隐而玩世今中宾兴之选是为贵达之阶初得传闻欣喜至於不寐更蒙惠顾感佩为之无涯欲论绣段之酬敢後桂枝之祝

答滁州同官啓

比蒙误恩滥授别驾二年待次窃有愧於非才双鱼致书敢复希其过礼望不及此心当谓何恭惟某官善政能官雄文尔雅交友则乐相下无嫌乎自後以先人责己也重以周惟恐其太高而絶物义不遗於一介意何翅於万金顾无琼玖之酬徒切巾箱之秘

答安丰同官啓

永言闻望久怀未见之忬何意宦游将有同寮之幸事关夙昔情极欢欣方欲裁书少致论交之好遽蒙遗札备形过厚之恭非所敢当祇以为好

代人贺淮西赵安抚到任啓

伏审陞华延阁移鎮名藩一人寬侧席之忧九郡効长城之庆中外幸甚恭以某官风神高迈干局明强自更督府之烦洊历淮邦之剧发奸擿伏情常得於咄嗟厌难折冲功每成於谈笑惟合肥之重寄由当宁之深知行将继淮陰之数万以尽取齐城且复同幼度之八千而遂平坚衆力除外侮共济中兴某才乏寸长虑无一得偶缘当路俾摄令於月城以迄今朝获蒙休於绣节虽望风解命诚为见几而作念操篲侍庭岂曰无因而前将遂望尘敢输贺厦藕花过雨梧叶惊秋冀加慎於节宣期亟跻於禁近

得宫祠谢宰执啓

昨干出位之诛理宜无赦今拜奉祠之命恩实有归惟扞舌而莫惩其非故陨身而冀效其报伏念某受材凡下赋分奇穷性识不灵学每拘於是古计能无取事仍闇於趋时言辄忤人动斯害己失漫追於奔马悔何及於噬脐当南谯待次之余正北征出师之际四郊多垒羣帅异

心欲输蝼蚁之忠敢避邱山之罪囊书朝奏纶诰暮颁果示薄惩聊从远窜省愆念咎俄四阅於岁华湔垢涤瑕遂三经於恩典饥寒共迫疾病交攻伶俜蓬艾之间落拓江湖之上顾此身而自厌谅斯世以谁怜爰有仁贤饰以齿牙之论遂令废吏足乎升斗之求俾养弩疴用全樗散伏遇望隆当代德配古人藏疾纳污大廓山川之度扬清激浊悉归标鉴之公惟中养不中而才养不才故小以成小而大以成大曲借吹嘘之赐再兴沈滞之踪此而可忘他亦何赖虽成事不说尚当惊木而吹藿然补过有终更冀赠刀而遗带

卷二十七

钦定四库全书

相山集卷二十七 宋 王之道 撰跋

跋户部陈子强守节事

好生恶死人情所同故天下莫重於生莫难於死士大夫委质立朝当其迫险临危诚审所谓事君之义有重於生而不为好恶之所夺移则其奋不顾身以徇国家之急是谓死得其所又何难哉兹陈分寧之所以能截然於溃叛中排羣议抗强敌保孤城以建功立名而使一时拥貔貅守金汤望道引遁闻檄请降者羞愧骇汗而不能自己也公既被褒赏自邑得郡以至奉使为郎而高节伟蹟书之太史与唐河北二十四郡中顔平原相为长雄後二十八年岁在壬寅其子义实尉无为与予游获观其功状如见当时忠愤之气凜拂穹壤云

跋梅审礼观德堂连理诗

审礼予乡人也宣和末始倾盖於京师中间更兵火犇避相从不为不久而未获闻观德堂之盛事积善之家必有余庆兹固今昔不易之论审礼其勉之

跋王无邪九华杂咏诗

予家濡须郡城之北五十里有山曰银鉶者神仙之窟宅也峯峦高秀隐若碧玉自非云烟蔽亏一举目则见之今行年六十有三欲游之心昼夜不舍而因循未能然後信韩退之所谓洞门无鎖钥俗客不曾来非虚言也王君无邪番阳人比寓吾里累年数获过从好论诗志尚不羣一日登九华楼遥望其山怅然恨无羽翼不能飞去建安黄知求罢令庐江无邪附舟以东不踰年知求被命出宰青阳九华实青阳之胜境而江左之名山也无邪既偕来遂能穷搜徧览形于歌咏俾自有此山以来骚人逋客遗踪逸迹不得遁而皆存令人窃愧之虽然予方学道而尚友乎广成子浮丘伯与夫鍾吕之流虽方壶员峤蓬莱远在海上隔弱水三万里犹当乘云御风翱翔於其间银鉶之游盖不足道也

跋程元吁手帖

元吁与予有甲辰同升之好当其为宰属偶同彦逢弟赴调获一再见之甚相亲也後十八年岁在乙亥蔡元德解濡须幕携示异时往还手帖数纸观其作字遒劲造语警拔想见风度云

代无为守王正仲奉直跋所赐御劄

绍兴三年秋臣权将命七闽岁偶旱饥上轸渊衷亲洒云章以赐臣权令措置劝诱赈济其言

至诚惻怛视一时之饥者不翅由己饥之与帝尧文王之用心无以异盖帝尧不虐无告不废困穷而後世称其仁如天文王怀保小民惠鲜鰥寡而当时歌仁如驹虞惟仁足以长人惟仁足以得天下之心而不庸释用能中兴宋室上配仁祖而巍巍之功穆穆之德辉映今古於皇休哉臣权谫度无状幸生圣代恭被丁寧之训正复殫竭犬马何以报塞而臣区区之意莫获表见谨刊诸石昭示无穷非独以为小臣之光欲俾天下後世知吾君之仁及物如此谨记

跋休粮方

予初得此方以为食者民之命人自免乳以上一日不再食则饥非有病七日不食则死而此方之效一食乃可七日不饥再食乃可四十九日不饥三食乃可三百日不饥四食乃可二千四百日不饥嘻欺亦甚矣世岂有此理哉暇日因依方修制将食以验其方而家人争以为不可余曰老固多病而比尤甚它不可概举至於齿牙动摇每咀嚼饭蔬辄痛不能堪似非久於世者愿试食此幸其效或可延寿命不然死无日家人知不可夺听其如法服之一杯径饱曾不满三合果得七日不饥後七日再服果能四十九日不饥而向之病皆去色力康强如少壮时余览照不觉击节称叹至於再四曰有是哉朱君之言不我欺也予自束髮读书入乡校游国学既壮始登第少不更於世故长遂拙於谋生今年过六十家贫口衆有薄产常计岁入以制用度犹多苦其不足岁稍歉则甚故无余以济人虽有区区自利利他人之心福渺位下莫获施設独念广此方於无穷则庶几焉识者其怜之其详自有天圣中二公勒石本未见之前後序可考而知兹不复赘云

跋元佑党籍事迹

君子小人之所以异邪正而已然而邪正未易辨也方其同朝杂处君子既指小人为邪小人亦指君子为邪君子小人相哄於其前而小人常胜君子常不胜非它惟特立独行危言核论上必期於致君下必期於泽民不然则释位拂衣而去之兹其所以常不胜也而邪则反是惟利之从不顾是非利害苟可以中主之欲为身之谋以售其说而保宠固位无所不用其至兹其所以常胜也邪正之不并立尚矣小人既得志则思所以尽逐君子以快私忿凡挺特不羣刚方不屈平时之议论稍异於己者往往指以为朋党草薶而禽猕之如是而举世俊杰靡有子遗矣崇寧用事之臣以元佑羣贤为奸党殆为是耶虽然天岂可欺也哉後三十年中原多故黄循圣之先公直阁乃得元丰之日历元佑之时政记於蔡氏家藏故书中焚炳之余遂获上之朝廷书之太史以暴白宣仁圣烈太后之德音与夫先帝晚年追悔之遗意使天下後世晓然知奸臣贼子之用心虽间能行险侥幸欺世盗名於一时而其终不可掩覆者盖如此呜呼兹岂人力哉天实为之昔石守道负谤死欧阳文忠公读徂徠集有诗哭之云谗诬不复辨亦止百年间百年後來者爱憎不相缘是时公议出自然见妍孔孟固一生毀逐遭百端後世苟不公至今无圣贤所以忠义士恃此死不难信哉斯言绍兴二十八年冬十月丁亥

跋李仲览所藏东坡满庭芳法帖

东坡先生元丰间以抗议直言忤宰相竟坐罪谪黄冈方是时亲戚故旧平日至厚善者往往

畏咎絕不通問況有能不遠數百里冒犯風濤之險朝夕警欵於其側以相顧恤者耶吾觀李公仲覽之從先生游初非有求徒以慕先生之高風乃至於此想其心亦固斷之天地質之鬼神正復以此获罪上下无所憾恨者是豈小丈夫之所為哉先生喜公詩至謂氣節剛迈讀之使人肅然自失逮其還朝遇公於富川又書異時黃岡所制長短句以遺公公之於先生亦至矣而先生之所以待公蓋不薄也

跋籍田詔石刻代淮西賈曹茂德

臣聞農者天下之大本也而籍田者又勸農之本也周自后稷以農事開國至於文武而有天下籍田之祈播於聲詩迄用康年殆天之所以報也中更板蕩逮宣王乃能內修政事外攘夷狄復文武之境土亦云盛矣而千畝不籍號公訕之何哉不知所本故也洪惟熙朝若稽古太宗當端拱之改元首講三推之禮以觀稼穡以供粢盛以詒子孫萬世無疆之休徽考祖述憲章振百王之墜典而宣和盛舉輝映今昔肆主上纂承興衰撥亂用再造我有宋爰念食為民命廼追前烈以今年正月戊子躬耕籍田示為農先且復親洒宸翰賜詔中外期與世俗躋于富壽之域而庶幾於漢文臣雖庸愚不足以窺聖謨之淵懿然歷觀三代盛王敦本務農其蔑以加於此矣而下比漢文蓋謙德也臣寮建議請以前日之詔立石郡邑之厅事所以儆有位冀使吏知所承民從其化被旨曰可臣濫將使指敢不祇若以率先所隸郡邑而為一路農人之勸乎有實其積萬億及秭臣幸朝夕見之紹興十六年六月甲子具官臣某謹拜手稽首而書於下

跋思古上人華嚴經

思古上人飛錫來自湖之何山過圓覺道場寺有大檀越所開毗盧一大藏教四方以工墨之直來請者如市古出冬裘以示圓覺之衆得錢二萬六千就易此經以歸將以遺宿云大士為崇因無窮之施經云以一手擎十佛刹能於一劫空中住彼之所作未為難能信此法是為難古臨冬市裘不遠千里能與此經俱來與楮而藏之過而不問者豈可同年而語哉後之讀是經者當作是念

又跋所施先茔德余庵華嚴經後

德余庵蓋先大夫翠峰居士先宜人施氏之茔奉嚴香火之所中間住庵比丘廣言嘗作僧伽龕其旁設經函十二室曰他日當置大方廣佛華嚴經并李長者合論分十二函以實之為德余庵不可稱量不可思議之功德言之所愿未及遂而示寂後十三年歲在己卯上人思古自崇因來繼領庵事欲踵成之予曰此豈可以累人是夏六月十一日還自臨安乃贖此經以歸授古庵主每十冊護以五色帕納之函經合論計一百二十冊釋音二冊謹以藏之龕中俛見聞讀誦從此悟入譬如一燈然百千燈明者自明明終不盡其功德豈易言哉紹興二十九年閏六月二十一日壬申

卷二十八

钦定四库全书

相山集卷二十八 宋 王之道 撰杂文

劝学文

古有家塾党庠以待父兄之教近世书会似之兵火十年人废敦学正复有良子弟幸免屠掠愿就训饬者往往孤陋寡闻触事墙面深可叹息杨丈八行乡里耆哲诗赋宗匠今习殿课辟数楹於胡避山之东欲得天下英才而教育之诸公为人父兄有子弟而不教教而不择其师谁任其咎之道故敢以此闻下执事传道受业其为子弟加意焉毋怠

谒王欧二公祠文

故太守翰林学士王公故太子少师欧阳公之祠惟二公以直道佐明主为时大儒屈临是邦閱岁滋久而流风善政雅歌雄文播在人口莫可弥忘之道以晚生常恨不获执鞭以从公游今者之来庶几因缘职事访遐躅纪遗事而沾丐余波以起枯槁莅政之始敢以礼见

谒安丰军遗爱侯孙叔敖文

惟侯以芍陂有功於民载在祀典粤自春秋至於我宋其遗爱实无穷焉之道奉天子命来为郡丞涖事之初敢以礼见

信阳军祭风师文

惟神位亚六子气挠万物吹嘘所及枯者以荣甲者以拆实佐天地不长之化不产之育维孟之春雨润日烜草木萌动斯民将即来於田野播厥百谷鼓之舞之俾咸遂其发生秀实则不能无望焉尚飨

祈晴文

维神聪明依人而行眷言此方再罹寇兵既毁既掠莫蚕莫耕人皆有言不如无生芄芄其麦指日望成淫雨害之岂人之情青天白日庶几此诚神其听之无爱厥晴

祈雪文

雪为五谷之精雪不时降则五谷不实而民无以为生重惟夏大旱斯民每食不饱惟麦是艺以冀来岁之成其势诚可迫其情诚可矜矣三分其冬今过其二而愆阳若此麦何望焉民将

何所仰焉上天同云雨雪雰雰以沃此麦而慰此民非神之难神其格思

祭先农坛文

维太皞乘震执规司春而神实佐之神之有功於发生明矣今阳气方升土膏其动斯民将有事乎播植刺史於民苟可以身先而劝相者罔敢不勉若曰勾者毕出萌者尽達俾万物之生各得其宜则惟神实制之东作之始敢不以告

祭家神文

伏以祖父以来三年一祭内外家神谓之还口之道寄居於此阖门二百指实藉神祝以生活安乐不敢废兹礼谨涓日命僧致洁家庭诵经卷作佛事仰祈昭格伏惟本家内外尊神鉴此诚悃来享来寧

代何希渊到庐江谒诸庙文

某以天子命为是邑宰其所守法奉公为国爱民固当自尽然聪明之所不逮思虑之所不及惟境内之神实陰隲而显相之视事之始敢不以告

代和州连守端夫罢任谢诸庙文

顷以君命来守此邦时属艰难事益纷扰畏首畏尾随补随失常恐掇怒於民被罪於朝而不获休归今乃微疴获丐琳宇将遂婆娑於江汉之上三年於此蒙神之祝厚矣今日之幸岂敢昧德短棹扁舟请从此辞

奉安竈神文

惟神位列七祀载在礼经职主一家传闻俗谚比缘革故兹获鼎新烹飪之初敢不以告奉安之後其或来寧

祭井神文

惟神功德滂被一方受赐不汲不盈愈汲愈出自我先君实发斯閼三纪于兹再大水利波涛舂撞秽恶渐渍洌或用污螯因以坠视而不问为我之愧蠲吉僦工载渫载治羣之三日敢慢厥事神其格思食万斯世

胡避山祭井文

源泉混混行於地中有神司之非感莫通岁在庚戌首卜南峯石不我穿遂已厥功东北之隅

庶几决洪有石凿凿人不倦终二年于兹我心忡忡念欲改图谁当诱衷爰相山形乃得行龙乃问龟筮龟筮是从乃告山祇山祇是容泉既有在人意金同日吉时良今当僦工神其格思报不敢空

祭白虹山神文

惟神以兴云出泉之功嘉惠此方民物受赐旧矣而岁或大旱云虽时兴而不能作霖雨泉虽日出而不能滋稼穡则神之功或几乎亏今度两山之间截然为垠以瀦蓄积潦待其岁旱泄而放之用沃山下之田使焦槁者苏荣茂者实永永为万世利是功也岂易量哉兴役之始敢不以告

迁葬告皇考文

岁在甲寅维暮之冬时以不孝获罪昊穹官军始扰边警继至远迩震动不克襄事三日而殯忽焉二周眷言遗令涕泗滂流轩居之原肇修新阡归葬有期敬以告迁

迁葬告皇妣文

往遭凶岁在阇茂日月漂流七年以久方当归葬郡寇满路曾不旬浹有伐其墓皇天佑善贼遂中止幸不及棺慚痛何已哀哀先君後兹五载奄弃诸孤欲养不逮死则同穴王诗所言先君有命岂敢惮烦轩车之原卜云其吉祔于先君万事永毕童孙冢妇夹侍其圻肝心若裂莫写悲怆

迁葬告先妻文

汝以盛年弃诸子事厥姑於地下在汝亦云幸矣而诸子痴且顽男及冠而忽於诗礼之学女已笄而昧於箕箒之奉啓廸扶持独能无意耶先妣之死汝实送之先考之殂汝其知之今将迁先妣於祖塋之东举先考於相山之西而合葬於轩车之南檀林之麓以汝侍先妣而居於右以亡侄童儿侍先考而居於左汝其有知庶鉴此心

改葬告亡考宣教祝文

自初襄事以迄於今十有六年两见於梦始侍杖屨立於冢旁指顾其前俾整治之觉而茫然莫得其处昨也宵惊恍如改卜百里之内奠賻日至神之告人决非偶然天诱其衷聿来孙公相其陰阳旷若发蒙趋全避缺得地西南稽之梦寐实契我心将以八月蠲吉谋良原起乘止万年其藏

和州含山县驱狼文

人君以斯民付之吏譬犹上帝以斯人付之神其责实相似民有病苦而吏不能救亦犹人有祸患而神不能去其罪实相等夫人君之爱民与上帝之爱人不异也其视元元之灾害不翅自我招之自我受之也若吏不汝省神不汝顾以为时数实当然而不闻於君请於帝使民人之情不能上達则已若获上達为吏与神者其被譴宜何如哉和抱江负山当宾客军旅往来之冲而含山又为通道自强敌入寇迨今八年更戎马贼兵之变无虑数十次所至荆棘爨无盛烟幸而未血斧鑕者又以齷草茹木为命今豺狼成羣白昼入市与饥羸格鬪力不胜则恣残噬如驱羣羊而向之齷草茹木者且复有畏涂之戒往往束手啼饥坐以待尽吏奉天子命牧养小民使民至此吏亦安所逃罪神以功在国德在民实受命于天作庇此方正使吏不以声于帝而帝不以咎于神为神之职当如何耶昔宋均为九江守初境多暴虎檻穽所不能制下车自责去檻穽而虎为之渡江今太守赵公贤且仁不减宋均其不以长刀大劒强弓劲弩有事於狼而遣属吏同县官有请於神盖与宋均之去檻穽不谋而同官吏诚不德有以致之冀神力请於帝俾殃及於厥身勿使百姓无辜同此濫罚不然神为不职某当闻之州俾含山之民毁像撤庙以为神羞神其听之母爽

譴疟鬼文

予岁在甲寅夏五月病疟踰十日良已而儿女辈自是多苦此疾至丙辰夏而不能去其热焦火其寒凝冰呻吟无虚日毒之以万金之药灸之以三年之艾驱之以首楞严之秘呪譴之以孙思邈之灵符终莫见其毫髮之效予因以为兹诚星官历翁所谓厄会者置不复问姑使之调节其饥饱顺适其燥湿以俟其愈逮秋七月为孽益甚自少以至长由内以及外一日而卧床者八人家人环视医者拱手莫知所措如是者凡两浹八月丙午予来自轩车越三日己酉夜梦羣盗在予家矛戟森然结束行李其状若将去者中有一人姿表极伟伺羣盗之间密谓予曰吾侪奉扰久矣今当去然尚有欲抵公之隙者诘朝恐一来公其避之是行也丐公九月九日於轩车山头祀我数日而病者相继愈九月初吉予复苦寒热危与死隣因念梦中语曰兹殆所谓要之者耶三发而止夫祠有辞之意彼请辞也我不可以不送今日重九谨以卮酒彘肩登轩车而送之我非太公乃苦十盗鬻浆天凉谁为此耗我非韩愈复苦五穷转喉触讳往往造攻莫酷如寇两?其间莫冤如狱证璧成环三年於兹为病所毒热兮火燎寒兮冰沃甚至儿女下逮妾御朝呻暮吟守而不去今汝请辞良慰我心酬此一杯载骤駸駸

卷二十九

钦定四库全书

相山集卷二十九 宋 王之道 撰墓志

孙宜人墓志

亡妻富春孙氏曾大父守宗大父倚父祉皆高尚不求闻達其先避五季乱自和之乌江徙居巢之驪牙今二百有余岁矣父字无悔世所谓善人君子也凡三娶秦氏张氏魏氏夫人盖秦出也生十七年而曾大父许字我明年秦氏亡迨外除始来归温柔静恭承顺舅姑兢兢然惟恐不及事无巨细必禀而後敢为未尝自专与诸姑处常怡顔下气若见所畏者不浪笑语归王氏二十年而予游上庠者十年虽风雨寒暑疾病家人不见其有儿女戚戚之态尤勤於妇功非夜分不寐尝谓予曰使为学如此取官何足道哉予以是知自勉获与兄弟辈登进士第吾家无为之轩车号大族无虑数百口咸以夫人为贤建炎三年冬予官历阳将泛舟还里中属金人围合肥王善?巢予弟彦逢侍双亲浮家避地江山至泥汊适相遇太夫人喜曰儿妇归吾无忧矣四年贼盗遍江之南北予始与里人保胡避山初太夫人有翻胃之疾至是寢剧以五月三日卒於山之所茔夫人後太夫人之卒四十五日而疾七十三日而终年始三十八当夫人之属纊李伸拥兵数十万攻豹子山甚急遣人求援胡避以夫人之丧未果行明日而豹子?衆皆泣且言曰微夫人我曹殆不免不然一不成而万有余丧呜呼哀哉夫人死无憾矣以一死活十万人之命而获从太夫人於地下有是二事吾又何哭焉生三男曰蘧曰蘧曰迈二女曰寅曰申将以绍兴四年十一月某日葬於驪牙之西三里曰带渔河之原为之铭云宜寿而夭世所不晓以一易万孰多孰少带渔之原山水环绕予亦老矣之死同兆

故李公孝先墓志

惟李氏世家陇西唐末避黄巢乱徙於饶之乐平公其乐平人也讳忠字孝先姿表伟岸遇事有胆略方志学里有健讼者诬引乃翁部将怒追逮甚急公慨然曰为人子而不能免父母於难非孝也先追吏诣郡请代父对有罪不辞郡将嘉其意从之果白其妄当与弟侄异产纵所取曰吾不汝多少肥瘠较也当是时饶人闻其风老者莫不愿得以为子少壮者莫不愿得以为兄弟靖康元年春金人寇京师郡有勤王之举责县备饷餼令徐时孚按籍勉其里之雄於财者助军公户最下弗及闻蘧谓其子常曰兹正卜式所谓贤者宜効死节有财者宜输之之秋今诏求直言叩阊非吾事也汝其疏时政得失生民利病与平日所尝语汝者献之以遂吾愿家有百斛赢吾当尽输为里人倡故一时斲者化之而乐平在六邑号先办常明年上书数万言陈足食兵计天语赏叹下有司施行且官之九品建炎二年春桂仲正叛建康合张胜衆三万?当涂破建德掠石门入利阳凶焰益逼令赵子木闻常长於画有意事功尽以柯岭十四寨委常统之使拒贼常谋於公不数日而兵备修饬至不得犯百里为安三年夏李大刀连刘文舜溃党屠毁境上远迩震动公聚里人谕曰贼有必避者险也彼所可击者散也有是二利而不为非勇也衆壮其言相与控扼要害请常董其役常为设方略俘馘几尽所属上其功於

朝常用是迁承务郎为无为县令公性识通敏少虽以家责夺举子之学而於经传多所贯综闲居养生閱岐伯仲景之书遂妙於用药南方信禳虽至父母痼疾子弃不敢侍里中有蹈此者公责以大义且曰冬伤於寒春必病瘟理也尔乃不问医而问巫愚亦甚矣故时有疫则必家至与之善剂日候其安否其贫不能自存与死无以自葬者皆悉力营给之恶俗为变公尤喜宾客第之东有堂曰仁寿为公燕集之地每与所过从觴咏歌舞继日不厌且乐於周人之急婚嫁亲戚故旧之孤为多平生论事不直不置故於言无所苟人有争者曲直胜负不质之有司而以公言为证晚年与人语多及瞿?之教观其所为真若有道者也始淮西更李伸张琪之变千里萧条亭舍不烟及常得邑无为或难之公曰事君不择地而安忠也作诗以督其行戒之曰拊循凋瘵要在不扰故常到官用公之言而称治予尝追和东坡所赠王庆源诗遗之云庆源老人骨已朽爱民似子当今无其政事可知也公後数月往覘焉入其境喜见顔面曰吾无忧矣已而里人思公悉遣子弟趣公归公笑而与之俱以明年绍兴四年二月戊子終於仁寿堂人为流涕享年七十有七曾大父某父某皆隐德不仕娶范氏以贤淑闻子男二人长党早世次常举进士女三人叶正奭余汝舟徐时举其壻也而归叶余者先公卒孙男五人女四人曾孙男五人女四人诸孙如师心师回师尹皆好学有立盖公之余庆也公有别墅在舍南静理乡桂林原山林清远公至则忘归尝命常曰吾没当葬於此常将以五年二月甲子如公所卜葬焉无为予乡里也往获庇常之政而公常与吾翁游日谈佛老至相得也今常不远千里走介抵书以友生王珏状公之行来乞予铭义不可辞铭曰孝悌在人兮壙有基基隆壙厚兮何时隳忠於奉上兮孝所移发愤偷财兮富儿疑子常献书兮谁授之嘉谋说论兮帝所奇殲走溃叛兮功可欺柯岭戕戕兮思者悲南方恶俗兮多信禳里闾一变兮莫敢违作堂仁寿兮花木菲客至不醉兮无庸归抚孤周急兮人争依如石蕴玉兮山增辉子孙秀发兮家之肥桂林遗芳兮追平韦

故武节大夫陈文叟墓志

文叟讳师良泉之晋江人曾祖赞隐德不耀祖察以叔父中奉大夫某赠正奉大夫父照以公贵累赠武经大夫公志尚豪迈迥出一时辈流中奉才之谓当以材武进会诏下郡国立武学以三舍法取士公慨然曰郭汾阳顾不足慕耶何切切章句为遂由舍法取贡於上庠中宣和五年武举异等补某官调泗州吁?县尉次楚州盐城县巡检迁其官充御营左将军干办官次贑州排岸迁某官充两淞路都巡检使次绍兴府兵马都监次平江府常熟县福山巡检初公从韩宣抚世忠军会行在陈攻取大计韩喜谓得公晚苗传之变公以战多超转数秩先是枢密李公与公为布衣交洎登西府荐公有专对材堪奉使絶域一时士论翕然推重公自福山归西兴之所舍不复有仕意以武节大夫致仕平生好作诗晚年诗益工每一篇出识者服其笔力闲居宴坐焚香诵经深於性理无所滞碍於所舍之西偏名其堂曰随缘自号随缘居士以绍兴二十九年冬十月辛亥考終於正寢享年七十有二安人黄氏贤淑能循法度子四人曰求已保义郎前镇江府常州巡辖斥堠曰求志新明州指使曰求俊承节郎新潭州指使盖皆以功赏延之典奏也曰求忠应进士举孙三人某某某孙女三人俱幼求已盖吾弟删定彦逢之壻也将以今年某月某日葬公於绍兴府萧山县之湘湖南越王城之书为参知政事诏有司宠其先世於是赠皇考故朝奉大夫之道为太子少师閱月上践阼覃及天下加赠太子太师四月迁知枢密院事赠少师明年拜枢密使加赠太师枢使罢政还故乡周视松檟乃谋

刻其先德於墓之碑而以其辞属袁於是太师之薨盖二十有五年矣曩建炎间敌犯江淞长淮千里莽为盗区握兵者畏避不敢战有城者遁逃不能守太师以一书生率数千乌合之衆保胡避山水抗羣贼区区一隅之地东有张琪南有邵青西有李成北有李伸合其兵数十万环布四境磨牙有毒卒不能吞噬使一方之民仰视俯育脱死锋刃公之力也不幸忤触权臣才不究於用而遗庆所鍾乃在其子枢使既致位二府为时名臣而公赠官一品荣耀身後非陰德之报欤袁待罪史官方哀次建炎以来故事如公言议风烈法所当载故不敢辞而为之铭按公字彦猷无为人曾祖讳用和隱德不仕祖讳【原本缺字】贈太保考韩奇累贈太傅曾祖妣冯氏祖妣于氏原葬有日求已遣人致恳於妇翁以前福州福清令黄童行状来乞铭彦逢将无以为壻之意寓书有请於予予顷年以视彦逢於西兴之官舍获识文叟其後彦逢既以犹子妻求已遂联姻娅予每赴调至临安文叟闻予来必携具涉江相过清谈终日而去如是者非一今公云亡予以远官歛不得抚其棺葬不得临其穴若铭又何敢辞铭曰生於泉葬於越前湖後城流长冈峯

卷三十

钦定四库全书

相山集卷三十 宋王之道撰附录

加赠少师王之道勅

士有抱负器业砥名励行自见於世而用之未尽者乃秉义方以训其子今登元枢重我本兵之地则褒崇之典追报其亲盖亦理之宜而事之称也大中大夫知枢密院事兼参知政事庐江郡开国侯食邑一千二百户食实封三百户王藺故父任朝奉大夫赠太子太师之道学博而文贍材全而识明蚤收儒科寢阶膺仕两持使节风采犹存孰遏长涂位不配德克生贤佐始大尔门进亚公师爰颁命綍官品增峻用诏无穷可特赠少师

赠故太师王公神道碑

淳熙十有六年正月壽皇圣帝将逊于位以今端明殿学士通奉大夫提举临安府洞霄宫王公藺自礼部尚赠卫国夫人妣施氏累赠福国夫人公幼穎悟八岁通一经弱冠贡辟雍与兄之义弟之深同登宣和六年进士第擢绅荣之榜其所居堂曰三桂时太平久用事者开边隙公知必乱对策极言考官恶其直寘之下列靖康初调和州历阳丞县有大圩积雨将败皆豪家所占请於官欲增埂郡檄公督役公呼诸豪谕之曰尔圩尔修将责之谁鞭其不率者皆争出夫得数千人扞水而圩全岁乃大熟郡以为能俾摄令乌江甫视事御营使刘光世檄言大军且至令具刍粮视仓库无铢粒里豪素服恩信不移晷得钱七十万米三千斛事定悉以偿之或谓军兴科借不必偿公曰信不可去也民相信何忧匱乏宣抚司檄清野期以三日责军令状公曰敌未至而先困吾民可乎譴吾自当之即书以授使者令民安堵如故不踰旬清野之议亦寢以循资丐罢奉二亲还乡率族党保胡避山使其弟之深守之公以兵法部其丁壮转战於外且诱乡民运粟於山能致一石者与其半故粮不乏山西有毛公寨李伸围之急公以精卒从间道出不意大破之寨人德公拔寨与公合伸耻其败攻益力会伸破张琪据濡须城遣鍾义以十余万衆来攻语寨人曰为我请王县丞来否则必屠尔寨公料衆寡不敌将挺身说贼谕其衆曰彼围益急吾势益孤生路絶矣伸虽羸悍闻颇知书可以诚动幸而听则免祸纵见杀犹愈於束手待毙也衆感泣争止公公曰吾以一身救数万老幼何畏死即以数十骑出见义义与衆贼大惊曰公何勇耶我来无他盖以公得衆心欲以郡城相委而去尔公辞不可义以矛拥公马而东日且暮遂入城而张琪复振与伸战伸败走琪刼公过荻港令招诱胡避之衆公以计脱归时所在盗贼蠭起杀人如麻独在胡避者皆得免未几丁母忧镇抚使赵霖以便宜起公摄乡郡公拊摩疮痍招集流冗境内帖然有伪为皇侄奉徽宗诏领大元帅者移檄州郡公引隼不疑辨戾园事抵镇抚司擒送行在所果得其奸霖以公守胡避功闻於朝改承奉郎就差充镇抚司参谋官都督府筑滁州瓦梁堰为小北海以备敌委公往视公言舍江淮天设之险而积水於敌所不经之地徒扰民费财尔遂不复筑含山当合肥往来之冲有狼为害又委公驱除公斋戒入境悉屏迹人以比宋均渡虎韩愈徙鳄云丁父忧服除通判

滁州时方议和公移书吏部魏公珪谏议曾公统言辱国非便又上疏陈敌有可胜者五且缴所与二公书大忤宰相秦桧意责监南雄州溪塘镇盐税会赦不果行异议者率得重谴公遂绝意仕进卜居相山之下自号相山居士以诗酒自娱凡二十年桧死起知信阳军绍兴三十一年至郡明年北亮败盟诏沿边为守备公疏言应敌之策不报建康都统乞拘沿江舟船毋泊北岸转运司以朝旨移郡公奏拘老小则失人心禁商旅则走官课大将措置乖谬貽敌笑侮鄂州都统乞团结西湖北保甲遇征行许充本军乡道公复言统帅所谓乡道是欲驱百姓为先锋耳朝廷是公言事俱寝除就湖北提举常平茶盐或言辰沅靖三州洞丁习武艺宜募二千人顺流赴建康诏提刑司具舟楫公时兼宪事得符惊曰敌未平岂可复摇远人心奏罢之湖北十四郡常平积粟三十八万而在鼎州者十五万陈腐几半诏以餉荆鄂军公曰徒费輶运而愈耗折乞留以为旱备未几鼎州大旱公遂发廩以平糴价取腐坏欠折之数请於朝而蠲除之岁稔和糴以补其旧而官吏得逃责百姓免流殍二十年积弊悉去前提举张公震语人曰王公所为是吾前日睥睨而不敢为者摄鼎州有僧崇一居桃源以妖惑衆公召致狱民争言僧有神术治之将不利公弗听狱具流筠州卒无能为乃大诘服荆帅乞调鼎澧岳乡兵之半同守御公遗帅书言乡兵本以护乡井岂堪裹甲赴敌况三郡水旱相仍安可骚动帅服其言而止除湖南转运判官郴寇李金窃发诸司蒙蔽不以闻公至摄帅事乞兵於朝贼偶归巢穴宪遽奏贼就招抚朝廷信之追还所遣兵人情忧惧公檄宪贼若果降当诣郴公参若自去自来後必为患檄未至郴而贼作宪惧罪即报当路以贼之再发檄於公参之一语言者不察劾公罢已而朝廷知其非宪与二郡守俱镌责公前枉尽白而竟不复出矣遂以朝奉大夫致仕公为人质直刚劲尚风节平居恂恂气和而色温至临大事区处剖决多出人意表遇人患难虽雠隙亦极力拯之不顾家有无壮岁入仕遭时多故慨然欲以功名自奋数上书陈利害忠义激烈听者竦然又以策干丞相赵公鼎张公浚吕公颐浩参政李公光盖以数公可与共功业者其在历阳料杜充之必败和州之必变皆如其言和议既成而公废脱守边郡持使节当寿皇厉精之初可以有为而公已老亦命也夫以乾道五年六月朔日终於家公之将终也忽语其子曰吾衰久无梦畴昔之夜梦帝召我而命之曰以尔有功当禄其後吾年七十七死何憾捐馆数日有白气如练止舍中人以为异云以其年十月甲申葬於郡城北三十里长冈之原胡避遗民存者尚衆扶老携幼遮哭於道丧车至不得前配鲁国夫人孙氏先公四十二年卒子十人繫奉议郎签书武冈郡判官蘧廸功郎郢州长寿尉皆後公卒迈承直郎监蕲州蕲口镇着廸功郎监西京岳庙朝奉郎通判庐州次即枢密使也茹承务郎莱承议郎前知池州贵池县芾荀未仕女六人适承议郎赵善治承议郎徐一夔文林郎许栋从事郎张汉卿通直郎万俟侃幼疾废孙男二十人孙女十九人曾孙七人有文集三十卷藏於家呜呼读其书可以见公之学考其始终大节可以知公之心观其子孙繁衍盛大又可证天之报施为不诬也铭曰

着姓维王出自太原唐季避乱派分河南自河徂淮累世乃显视彼淮水知其源远烈烈太师以文起家与其伯仲聯登雋科粤自少年志出人上议论伟然风节豪壮始仕邑佐逢时棘艰父母之邦毁于寇残鳩集遗黎依险自保纓鋤棘矜以抗羣盜盜环四境莫嬰其锋椎耄数万寄命于公谁谓书生有谋有勇云谁厄之弗究其用活人之功上帝所知不耀其躬而後之殆是生枢臣为国硕辅维垣一品以贲其墓长冈之原公墓在焉植碑勒铭垂千万年